





Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL. 2.3.135





Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.155



Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.155




Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.155

2 M. 3

2. 3. 155

XXXIV 4
SFONDR




N O D U S PRÆDESTINATIONIS

*Ex Sacris litteris, doctrinaque SS. Augustini, &
Thomæ, quantum Homini licet, dissolutus.*

A U C T O R E
CŒLESTINO
S. R. E. PRESBYTERO
CARDINALI SFONDRATO.

*Sententia illa antiquitate, suavitate, ac scripturarum nativa auctori-
tate nobilissima de Prædestinatione ad gloriam post prævisa opera,
sanè mihi gratissima fuit, qui nimirum eam semper ut Dei
Misericordiæ, ac gratiæ magis consentaneam, verio-
rem, ac amabiliorem existimavi, quod etiam
tantisper in Libello de Amore Dei indicavi.*

S. Franciscus Salesius in Epist. ad P. Leonardum Lessium data
sub die 27. Augusti 1618., quæ habetur impressa Lovanii in
Theobus Theolog. Philippi de Vos eamque citant Maynam
Tom. 2. Philosoph. Sac. cap. 24. & Gonzalez Tom. 2.
Disput. select. disput. 8. sect. 3.



ROMÆ, Typis Jo: Jacobi Komarek Boëmi propè SS. Vincentium,
& Anastasium in Trivio. 1696.

S U P E R I O R U M F E R M I S S U.

SACROSANCTÆ

ET

INDIVIDUÆ TRINITATI.

Votum morientis Auctoris.



T cognoscant Te
Deum, & quem misisti JESUM
CHRISTUM in quo omnia,
ex quo omnia, & per quem om-
nia.

*Cælestinus Sfondrati S. R. E. tit.
S. Cæcilie Presbyter Cardinalis.*

a 2


Fe.

SACROSANCTE

ET

INDIVIDUE TRINITATI.

Monasterii Andree.



CHRISTUM in quo omnia,
ex quo omnia, & per quem om-
nia.

Capitulum 22. de R. H. in
2. de R. H. in 2. de R. H.

1. 2. 3.

Feria 4. Die 25. Julii 1696.

IN Congregatione Generali S. Romanæ, & Universalis Inquisitionis habita in Conventu Sanctæ Mariæ super Minervam coram Eminentiss. & Reverendiss. DD. S. R. E. Cardinalibus in tota Republica Christiana, contra hæreticam pravitatem Generalibus Inquisitoribus à Santa Sede Apostolica specialiter deputatis.

Lectio memoriali tenoris sequentis, videlicet: *Eminentiss. & Reverendiss. Signori. Essendo dalla Sacra Congregatione proibito, che niuno possa stampare in materia de Prædestinatione, & Divinis auxiliis, senza licenza della medema:*

Il

*Il Card. Sfondrati havendo compo-
sto un Tratato de Prædestinatione,
ch' involve anche la materia de Di-
vinis auxiliis, prega la medema Sa-
cra Congregatione del S. Officio per
la licenza di poterlo stampare serva-
tis servandis, e l'haurà à gratia.
Quo memoriali audito, Eminentiss.
& Reverendiss. DD. Cardinales In-
quisitores prædicti annuerunt.*

*Josepb Bartolus S. Romanæ, & Universalis
Inquisitionis Notarius.*

PIO

Pio, & Erudito Lectori.

F. Jo: Damascenus Ordinis Min. Convent.

Postremum piiissimi Auctoris, & dignitate Eminen-
tissimi, en tandem Opus in lucem prodiiſſe conſpicias
Lector; ejus probè undequaque Auctoris clarissimi,
qui Romanos inter Purpuratos, cum lucis hujus frueretur
usura, tanta meum respexit obsequium clementia, ut
tenuitatem qualemcunq; meam operi imprimendo præfe-
cerit, pro cæteris pluribus indies imprimendis, & curam
commisſurus, & inspectionem. At (proh dolor) imma-
turo eripiens mors icu, in uno SEONDRATO erepto,
quanta eripuit bona! Erant inter cætera diſſertiſ-
ſimus De Opinione probabili Traſſatus; Diſſertatio-
nes eruditissima duæ contra Hæreticos De Baptismo In-
fantum: Apertiſſima De Atheismo parabatur Historia.
Remediis fecundissima contra pestilentem Librum Hei-
deggeri Tigurini, cui titulum fecerat, Meretrix Apoca-
lyptica, Diſſertatio afferebatur: Itemq; Commentaria
in Jus Canonicum eodem quinquennio, quo Salzburghi
illud explicuerat, in tres digesta Tomos elaborata, expo-
nebantur; Quæ omnia unà cum cæteris prælaudati Au-
toris MM. SS. Sanctissimi D. Nostri INNOCENTII XII.
jussu, Eminentissimo, ac omnigenæ eruditionis peritiſſi-
mo Cardinali ALBANO Apostolicorum Brevium Secretario
credita sunt. Quoniam verò extremo, & inexpectato ere-
ptus fato Auctor nunquam satis laudatus extremam eis
non imposuit manum, meas ideo duxi partes, ut de qui-
busdam, quæ pro hoc opere necessaria videntur, manu
plena unumquemque edocerem.

Primo igitur Auctoris finem, & mentem perſcrutatu-

THH2

rum admoneo; ut prius de morum pietate, cœlestis amoris
 ardore, divinæ gloriæ Zelo, omniumq; salutis desiderio,
 quæ Ecclesiasticum quemq; decent, & tanto in viro ap-
 primè fulserunt, se certiore reddat; Qua re quidem co-
 gnita, facile quæ mecum acta de ipso referam, credet, &
 Regulam sibi in iudicando constituet. Illum namq; sæ-
 pe sæpius (ac tū præcipuè, cū in Arce Castri Gandul-
 phi, quò aëris mutationis gratia diverterat, ad ejus ad-
 missus sum obsequia, propiorq; moralium virtutum in
 litteratissimo Homine admiratus sum ornamenta) piè ita
 mecum differentem audiui: Se cum Scholis contrarium
 de Prædestinatione, & gratia sentientibus, ut contentio-
 nis funem duceret haud scripsisse, sed præcipuè in Votis
 habuisse, ut ii, quibus, juxta expressa in hoc Opere prin-
 cipia, Verbum Dei de Prædestinatione factum esset, ma-
 gis divinæ Misericordiæ in nos miseros magnitudinem ad-
 mirarentur, ac sese strictiori semper charitatis vinculo in
 Deum devinciendos, cœlestis Beatitudinis spe erigendos,
 nec non Summo & Infinito Bono per opera conjungendos
 agnoscerent; prout etiam Genevensis ille Antistes Sanctis-
 simus Franciscus Salesius, & credidit, & lib. 5. de Amo-
 re Dei cap. 3. testatur, & ad Patrem Leonardum Les-
 sum ex Societate Jesu scribens, in nostri Auctoris senten-
 tia circa Prædestinationem, hominum memoriæ consi-
 gnavit. Quòd si, quis quis es, tantum Opus lecturus,
 unà cum Opere nuncupativam, quam ipse penè moriens
 dictavit Epistolam, leges, finem, & obiectum idem cognove-
 ris necesse est; Hocq; tibi ut magis pateat, ea in parte Li-
 brum attentius percurras, qua Asceticis Aphorismis intel-
 lectum illuminat, & voluntatem ad Dei amorem accendit.
 Verum ut Lectoris admirationi occurrā in iis, quæ
 quodammodo Operi deficere videntur, eum monitum
 volo, me servatis servandis, cū agrotare Auct. Emi-

nen-

nentissimus ceperit, jam hujus Operis impressioni ma-
 num admovisse; Illum verò in Paragrapho tertio primæ
 partis describendo, in quo ab origine Mundi ad hanc no-
 stram usque ætatem longa, nec non erudita historiarum
 serie, Dei gratiam etiam obstinatissimis Peccatoribus
 non deesse conabatur ostendere, occupatum, & Annum
 sexagesimum sextum supra trecentimum Æræ Chri-
 stianæ affecutum, urgente morbo decubuisse, & cre-
 scente occubuisse. Sed quod Græci adagium usurpant:
 Ἀγλαὴν ἥρωα πάλαι & ἐνὶ στήθεσσι, videlicet, Illustrem He-
 roem bellum nulla re privat, in piissimo & litteratissi-
 mo Heroe probatum est; Humane namq; Vitæ finem ipso
 in mortis agone expectans, totus erat, ut finem suum as-
 sequeretur, hoc est, Operis hujus impressionem; Unde cum
 jam pridem CARDINALI LEANDRO COLLOREDO non minus
 dignitate, quàm pietate, Eminentissimo super hoc enixè
 vota sua contulisset, humillimas tunc etiam suas preces
 Sanctiss. D. Nostro INNOCENTIO XII., Benefactori suo
 munificentissimo, nec non Serenissimo, ac Piiissimo COSMO
 TERTIO Magno Etruriæ Duci transmisit, mibiq; ut præ
 viribus ceptam editionem curarem, indiccit, prout eorum-
 dem Principum auspicio sum affecutus.

Huic insuper Operi illustrando fuit quidem ea inten-
 tione Auctor, ut Polemico-Historicos adderet pro dis-
 solvendo Prædestinationis, gratiæq; Nodo secundæ par-
 tis Paragraphos; Verùm cum in iis parandis noctes
 San-Galli absumeret, diuturnos optimi Principis, &
 Pastoris pro Populo, proq; suo Grege impendens labores
 per INNOCENTIVM hujus nominis XII. purgatissimo in-
 cognoscendis, ac librands Perspicuorum Virorum vir-
 tutibus judicio, proq; præmio afficiendis Mecenatem
 nulli secundum, Vaticana exornatus Purpura, iter
 Romanum est aggressus.

*Ceterum inaudita ne iudices parte, mi Lector, advertas, quaeso, Clementis Alexandrini lib. 6. Strom.
Edgeworth: Non enim improbari, ac damnari aliquid potest, nisi prius cognitum sit: Hinc de exhibito Opere iudicium suspendas, donec totum percurreris, interdum enim textum solvit contextus; Quin delectationem cum doctrina exhauries, ubi exquisito omnia leges stylo conscripta, sacra Patrum eruditione referta, ac Theologico, solidoq; innixa fundamento. Quod si inter legendum Typica, prout solent in unoquoque Opere, occurrent errata, gemens sub Torculari Opus ad sui vitam, debuit & gemuisse proprii Parentis ad mortem; Non levis quidem iactura, nec minor pro detergendis lacrymis Correctori ab impressione distractio. Quae satis prudenti ad excusationem notitia. Crassiora quae sunt, apposita ad Operis calcem notula indicabit, & corriget. Auctoris mentem, & finem interea grata habeas, quia sancta, quia ad Animarum profectum, & tranquillitatem praecipue directa; Quibus facto respondere si studeas, felicitatem, quam toto auspicio animo, assequeris.*

APPRO-

A P P R O B A T I O .

G Eminos Electorum, & Reproborum greges æquissimâ oc-
culti iudicii Dei mensurâ alterum salvandum, alterum
perdendum in sacra Regum historia (l. 2. c. 8.) compe-
rimus typicè designatos, ubi mysticus David Æternus Iudex *mensus*
est duos funiculos, unum ad occidendum, & unum ad vivificandum,
quo implexissimus adumbratur *Prædestinationis, & Reprobationis No-*
das: quippe alius funiculus Rahab, alius Moab, alius Juda, alius Sa-
maria, unus electorum, alter reproborum, unus templi aut taberna-
culi, alius carceris. Huic nexui exolvendo dum solerter insudamus
ex Doctoris gratiæ monito (2. ad Cor. 10.) *ipsi in nobis nosmetipsos*
metientes secundum mensuram regulæ, qua mensus est nobis Deus, alius
occurrit (Ezechiel. 47.) *duplex funiculus Joseph* portendens Gra-
tiam sufficientem (qua Deus *ideo omnibus,* ut disertè scribit S. Am-
brosius l. 2. de Abel, & Cain cap. 3., *opem sanitatis detulit, ut*
quicumq; perierit, mortis suæ causas sibi adscribat, qui curari no-
luit, cum remedium haberet, quo posset evadere) & Gratiâ effi-
cacem à S. Augustino victricem, & triumphatricem nuncupatâ,
qua certissimè liberantur, quicumque liberantur (Osee attestante
cap. 11.) *Trabam eos in funiculis Adam, in vinculis charitatis.* His
interiicitur tam arctum vinculum, quo inter se coalescunt infallibilis
gratiæ blandientis efficacia, & inviolata humanæ voluntatis libertas,
ut (l. 1. Reg. c. 18.) Davidis, ac Jonathæ necessitudinem permutatis
vestibus, ac veluti dignitate, & potestate confusa devinctissimam su-
perare videatur. Ex his conflatur ille *funiculus triplex* ratione prin-
cipii, mediæ, & finis, seu ut cum S. Fulgentio l. 1. ad Monim. c. 11.
loquar, *relatè ad vocationis initia, justificationis augmenta, & glorifi-*
cationis præmia ab Apostolo Romanis c. 8. descripta. Verè *funiculus*
triplex seu potius tergeminus, qui propter abstrusissimas superexcelsi
Providentiæ supernaturalis mysterii, & Divini intellectus, ac volun-
tatis difficultates in uno *Prædestinationis Nodo* agglomeratas *difficilè*
rumpitur. Triplicem hunc implicatissimum nexum plusquàm Her-
culeum Gordiumve non magni Macedonis ense discindendum
stricto autoritatum ex divinarum Scripturarum oraculis, Pontifi-
cum decreto, Patrum Senatus-consulto, & Scholæ Theologicæ Pro-
cerum placito depromptarum, atq; etiam acutissimarum rationum

A P P R O B A T I O .

macrone expeditè resolvit, & tùm eximio Eminentissimi nominis decore, tùm ingenti Theologicae facultatis incremento, nulli adstri-
ctus parti, nullius in verba juratus, summotis præjudiciorum præsti-
giis, sagaciter præcavens cum S.P. Bernardo *Serm. 6. in Cant. , ne re-
condatio solius iudicii Divini in barathrum desperationis præcipitet ,
& misericordiae fallax assentatio pessimam generet securitatem*, dilucidè
extricat; tùm etiam ex recondito profanae eruditionis penu, utile
dulci sapienter permiscens, nullo verborum involucrio (quandoqui-
dem juxtà Græcā parcemiam, ἀπλὴς γὰρ ὁ τῆς ἀληθείας λόγος, *simplex, &
aperthus est veritatis sermo*) sed aureā eloquentiā explicat Eminentiss.
& Reverendiss. D. Cardinalis Cœlestinus Sfondratus in longè præcla-
rissimo opere inscripto: *Nodus Prædestinationis &c. quantum homini
licet dissolutus*, in quo sapientissimus æquè, ac religiosissimus Au-
thor hocce saluberrimum S. Bernardi (*Serm. de Nativit. S. Jo: Baptiste,
& serm. 8. in Cant.*) documentum sedatus, tantum lucere, vanum,
tantum ardere, parum; ardere & lucere perfectum; egregiè patefa-
cit spiritum sapientiæ, & intellectus, qui instar apis ceram portantis
& mel, habet omnino & undè accendat lumen scientiæ, & undè insun-
dat saporem gratiæ. Istud itaque insigne volumen honoris ergò jus-
sus à Reverendiss. Patre Paulino Bernardinio Sacri Palatii Apostoli-
ci Magistro tanta animi jucunditate perfusus evolvi, tantaque sedoli-
tate penitiùs introspexi, ut nodum sanè in scyrpo quæreret, quisquis
hac in materia nunc enodi vel nodulum censorio stigmatè inurendum
suspicaretur, quin potiùs deberet cum Doctore Mellifluo (*Serm. in
Nativit. SS. Innocentium, & serm. 1. in Purif. B. Mariae*) magis solici-
tus, & timoratus agere gratias benignissimo, & largissimo Salvatore, qui
humanae salutis occasiones tam copiosa charitate perquirat, ut in his vo-
luntatem & opus, in his sine opere voluntatem, in his etiam sine vo-
luntate opus salutis invenire latetur, qui vult omnes homines salvos
fieri, & ad agnitionem sui venire; cujus gratia in communi po-
sita est, offertur omnibus, & nemo illius expers, nisi qui renuit. Ex Cœ-
nobio S. Pudentianæ de Vrbe, die festo S. P. Bernardi Abbatis 1696.

D. Joannes Maria Gabriellus Monachorum Reform. S. Bernardi Ord.
Cisterciens. Procurator Generalis, S. Theol. Magister, Sac. Congregat.
Indicis Consultor, Supreme Inquisitionis Qualificator, ac Collegi-
i Urbani de Propaganda Fide studiorum Præfectus.

IN-

APPROBATIO.

Nodos tenaces recta rumpit regula, ait Prudentius Poeta Christianus in *præfat. ad Theodorum*. Id quàm præstitum sit in hoc libro, cui titulus: *Nodus Prædestinationis ex sacris litteris, doctrinâq; Sanctorum AUGUSTINI ET THOMÆ, quantum homini licet dissolutus*, nemo sapiens non videt. Sanè cum Auctor doctrinâ non secus ac dignitate Eminentissimus, quem nuper nobis ereptum (proh quanta Christianæ Reipublicæ jacturâ) sacra hæc Aula conquiritur, cum, inquam, ille postremum hoc, & maximum suæ humilitatis specimen nondum decumbens edidisset, ut lustrandum mihi tantum opus committeret, mirari satis non potui, quam benè ille implicitum tot difficultatibus argumentum, cui enodando lectissimi Theologorum manus admoverant, explicuisset. Quid ergo de ipso opere sentirem, cum aliquoties eidem testari, vetante Purpurati Principis modestia frustra tentassem, id nunc tandem, præcipiente Reverendissimo Patre Magistro Paulino Bernardinio Sac. Pal. Apost. Mag. proferre cum debeam, illud inprimis ejusdem Prudentii *lib. 2. cont. Symmachum* Lectori ingero.

*Nam cum divinis agimus de rebus . . .
Conjectare animo contendimus, exigua est vis
Humani ingenii, tantoq; angusta labori.*

Quoddam usquam alibi humana ratio deficere in perscrutandis divinarum rerum quæstionibus deprehenditur, contingit id potissimum, ubi arduum *Prædestinationis*, & divinorum auxiliorum *Nodum* dissolvere aggreditur; Quæstiones enim quæ pro hocce *Nodo* dissolvendo à Theologis quandoque agitari permittuntur, profundas magis, ac difficiles esse, non obscure innuit Cælestinus Papa in *Epistola* quam, proscriptâ iam hæresi Pelagiana, ad Gallie Episcopos scripsit, *Profundiores verò, ait, difficilioresq; partes quæstionum, quas latius pertractarunt, qui hæreticis restiterunt; sicut non audemus contemnere, ita non necesse habemus adstruere.*

Neque verò ausim dicere Auctorem hunc omnium retrò scriptorum (sunt enim magni nominis, ut satis perspicuum est Scholastica in Palæstra versatis) qui de mente S. AUGUSTINI implicatissimam hanc quæstionem, & in eadem Auctoris sententia, extricandam susceperunt, vicisse conatus, & rectiori regula tantum *Nodum* abru-

A P P R O B A T I O.

abrupisse (suffundi enim rubore cineres ipsos timerem) Illud potius confidenter dicam , Opus hoc tali argumentorum vi , nec non suavitate sermonis elaboratum esse , ut si rectè intentioni Auctoris adhæreas , scopum ipsius satis invenire possis , non alium certè , quàm incrementum Amoris erga Deum , quo ipse æstuabat , exaltationem divinæ misericordiæ , augmentum spei , quod sibi unice proposuisse mihi sapiùs piissimus Auctor professus est .

Quod attinet ad Doctrinam Patrum , præcipuè verò memorati AUGUSTINI , constat vel hinc Auctorem tam sapè , & tam sedulò illorum opera evolvisse , ut penè eorundem spiritum induisse videatur ; Pietatem verò , Zelum , Dei amorem nulla non pagina refert , præcipuè ubi Asceticus est ; nam igne quodam succendit animum , & supernis compellit æstuarè desiderii . Non alio itaq; Lemmate inscriberem Librum , quàm quo suum *de Oratione* Gregorius Nyssenus Τὸ ἱερὸν καὶ Θεῖον ἔργον *Sacrum , & divinum Opus* , vel quo R. Azarias Librum Aristæ *de Septuaginta Interpretibus* חכמי דברי קנים *Dectus Seniorum* . Quod si motes simul , ac scientiam Auctoris nostri posteritati designare vellem , elogium illud ab Alexandro de Ales mutua-rem , quo Divi BONAVENTURÆ ejus discipuli viventis meritum compendio referebat : *Non videtur Adam in homine isto peccasse* , aut si idipsum aliquantò fusiùs exequendum esset , aptissimum sanè præconium exhiberet in Chronicis Minorum Religio ; nam planè congruunt meritissimo nostro Purpurato , quæ de eodem BONAVENTURA ibi exarantur : *Hujus Sanctissimi Cardinalis doctrina devota , sapida , & seraphica est , cùm legentes non solum illuminet , sed inflammet ; omnem enim veritatem , quam ipse intellectu percipiebat , ad formam devotionis , & laudationis Divinæ reducens , ruminabat affectu* . Nec extra argumentum esset , quæ de Joanne Cænobiarcha S. PATER meus DAMASCENUS in *Oratione de Trisagio contra Anastasium* , & *Cnaphæum* scripsit : *Nec verò nos fugit , qua divinorum sermonum cupiditate tenebatur , quodq; voluptatem eam , quam ex his percipiebat , ipso quoq; melle dulciorem esse ducebat* .

Nemo qui noverit COELESTINUM CARDINALEM SFONDRATUM , nemo qui ejus opera perlegerit , indulgere me hic nimium genio arbitrabitur , aut longius trahi , quasi posthumam gratiam redditurus eximie humanitati , qua me usq; ad extremam vitæ excepit . Extabunt apud litterariam , & apud Christianam Rempubicam monumenta tantæ virtutis , INFULÆ verò à præstantissimo Patrum Cætu , &

Pur-

A P P R O B A T I O .

PURPURA à Summo, ac Vigilantissimo meritorum Libratore INNO-
CENTIO XII. delatæ, testari poterunt, quàm sim parvus, &
quantùm Justitiæ detrahā, dum ad alia propero.

Ut igitur judicium meum qualecunq̃ absolvam, monitum
velim Lectorem, opus hoc deductum esse, quod ajunt, ad calcem eo
tempore, quo Auctor ultima corporis ægritudine torquebatur; ubi
enim aliquantùm intermittebant cruciatus ad instar Gregorii Papæ,
qui ad extrema deductus Epistolas pro Ecclesiæ necessitatibus (teste
Baronio *ad an.* 595.) dictabat, vel D. Thomæ qui Cantica Cantico-
rum decumbens explanabat, ipse quoq̃ ad hoc *Prædestinationis*
Opus intervalla valetudinis penè moriens impendebat. Proh quàm
dulcis, ac proficua Justo morienti meditatio!

Atque hic non admodùm laboro in extollendo Auctoris inge-
nio; Opus enim per se loquitur; quin etiam, attentâ argumenti dif-
ficultate, loquitur Nazianzenus *Oratione* 33. *ὅτι πάντων μὲν, ὅτι τῶν
ἐκτακτικῶν, καὶ διαθετικῶν ἐν Θεοῖς.* Non omnium esse de Deo dispu-
tare, sed eorum dumtaxat, qui explorati sunt, ac contemplando lon-
gè præcesserunt. Satiùs est igitur gratulari Auctori vel mortuo, & ex-
clamare cum Augustino *Epist.* 9. ad Hieronymum *Ingenium tuum
divino dono aureum.* Nequeo tamen præterire modestiam, qua tali-
ter ille in scribendo utitur, ut dum suam nititur probare sententiam,
alienam nullatenus sugillet, aut carpat, ac proinde dicere de se po-
tuit cum Cypriano *lib.* 4. *Epist.* 4. ad Magnum: *Qua in parte nemi-
ni verecundia, & modestia nostra præjudicat, quo minùs unusquisq̃
quod voluerit sentiat.*

Sed quoniam primas in scribendo obtinet exquisitissima illa
pars Ingenii, quæ cùm nullis tradi præceptis, nulla possit arte præ-
scribi, usq̃ue adeo tamen necessaria est, ut ea deficiente lapidum
nihil esse possit, Prudentia videlicet, quæ vulgò Judicium appella-
tur. Hæc porrò tam religiosè, ut ita dicam, in hoc opere, imò in
quavis operis lineâ, & in quovis penè apice, ut, sicut in omni ejus
actione, nullibi desideretur. Nec miretur quisquam me hanc lau-
dem à Theologo requirere; meminerit enim oportet, quid de Theo-
logia sentiat Epiphanius Salaminæ Cypri Episcopus *hæresi* 31. *ὅτι
τὰ ὅσα παρὰ τῶν ἁγίων ἀποστόλων, καὶ διὰ τῶν τῶν ἁγίων ἁποστόλων.
Quæ anigmatum quibusdam involucris obtecta sunt, expoliet, atq̃
explicet, & ad commune fidei institutum accommodet; quamq̃ue regu-
lam Theologo scribenti præscripserint Cyrillus Alexand. in *Prosphe-*
*tico**

A P P R O B A T I O .

*fito ad Imperatorem Theodosium ἡ τῆς ἑσπερίας ἀνελευσίας κατὰ τὴν εἰς
ἐξίον, ἢ τὴν μὴ τῆς εἰς αὐτὸν ἐπέλευσιν ἀποφύγειν τὰ ἑσπερία νοῦν . Indignum
putat ea quæ intelligentiam superant, immoderata diligentia labefacta-
re, ac nimis inquisitionibus subiicere, & AUGUSTINUS lib. 9. de Tri-
nitate cap. 1. De credendis nulla infidelitate dubitemus: de intelligen-
dis nulla temeritate affirmemus. In illis auctoritas tenenda est: in his
veritas exquirenda.*

Et sanè nil cautius Auctore nostro; nam ubicunq̃ue aliquid pro-
bandum suscipit, vel sacrorum Codicum auctoritati innititur, vel
exquisitis Theologiæ principiis adhæret, vel SS. Patrum, & AUGUSTI-
NI in primis sententia fulcitur. Quàm verò arduum sit introspicere
Patrum sensus, præcipuè ubi eorum sententiæ ab ipsis etiam Ortho-
doxis ad Scholam evocantur, & in quæstiones traducuntur, noverit
quicunq̃ue vel à solo limine Ecclesiasticam Historiam salutavit; Con-
stat enim tres Sessiones habuisse Patres Concilii Florentini, nempe
XX. XXII. XXIII. ad investigandum Basilii sensum; Patres verò
Chalcedonensis Synodi Actionem primā ad expendendum quoddam
Cyrilli dictum, Sextæ Synodi Actionem septimam ad unum Dionysii,
Actionem nonam ad unum Cyrilli, & duodecimam ad unum Mennæ
testimonium explorandum. Sed, ut verum fatear, speciali Dei ope,
& juxta præfagium nominis, COELESTI præsidio factum arbitror, ut
in tanto Scriptorum conflictu, arduum, & implicitum Prædestina-
tionis *Nodum*, gratiæque Arcanum explicaret COELESTINUS, qui non
unam, vel alteram ex AUGUSTINO libaverat auctoritatem, qua suam
fulciret sententiam, sed totum AUGUSTINUM longis, iteratisq̃ue vi-
giliis, ut patet, ita hauserat, ut ipsius ore loqui videretur AUGUSTI-
NUS. Quod ut tibi Lector perspicuum sit, fas sit mihi dicere de hac
Auctoris Dissertatione cum R. Baybad *de studio legis* prout refertur
in lib. Pirke Aboz. cap. 5. הפוך בה חפוך בה רבולא בה *Versa illam,*
versa illam; omnia enim complectitur.

Ex patria itaq̃ue, ubi pium est credere, te tot laborum præmiis
frui, præbe mihi faciles aures, Tu, cui tam jucundè auscultabam cum
mihi loquebaris in via; Audi quam exquirebas tui Operis, Censuram,
nunc tandem quando nec me laudantem adulatio movet, nec te lau-
datum tentat elatio; Audi cum Vincentio Lyrinenſi *Commonitor 1.*
adversus Hæreses cap. 27. Intelligitur te exponente illustris, quod
antè obscurius credebatur, per te posteritas intellectum gratuletur,
quod antè vetustas non intellectum venerabatur.

Tan-

APPROBATIO.

Tantas igitur altissimi Ingenii Opes , tantosque uberrimos Piissimi Auctoris Fructus , nedum Prælo , ut iis Ascetici , Scholastici , Polemici , Parænetici , Philologi , aliique fruantur Eruditi , sed Immortalitate dignos censeo . E Cœnobio SS. XII. Apostolorum de Urbe Quarto Nonas Octobris in Die Festo Seraphici Patris FRANCISCI , Anno à Virginis Partu MDCXCVI.

Fr. Joannes Damascenus Ord. Min. Convent. Sac. Theol. Magister Sanctæ Romanæ , & Universalis Inquisitionis Qualificator , Sacrarum Congregationum Rituum , & Indicis Consultor , & in Archigymnasio Romanæ Sapientiæ Theologiæ Dogmaticæ Lector .

Imprimatur.

Si videbitur Reverendis. P. Magistro Sac.
Pal. Apostolici .

Sperellus Episcopus Interamnen. Vicefg.

Imprimatur.

Fr. Paulinus Bernardinius Ord. Præd. Sac.
Apost. Palatii Magister .

INDEX

Partium, Paragraph., & Numeror.

PARS PRIMA.

*Esse in Deo seriam, impensamque, & quantum
ex se est, efficacissimam voluntatem
salvandi omnes.*

§. I.

- ¹ **E**xplicatur fusè quid nomine voluntatis, gratiaque, per se efficacis, & ab Auctore, & ab aliis quoque Theologis intelligatur.
- ² Probatur primò testimonio ex Sacris litteris, quarum testimonia expenduntur.
- ³ Ex mysterio Incarnationis.
- ⁴ Et ex sensu Sanctorum Patrum, praesertim Prosperi Aquitanici, Discipulorum S. Augustini fidelissimi.
- ⁵ Et ex ratione. Ubi distinctio voluntatis antecedentis, ejusque efficacia, & consequentis expenditur.
- ⁶ Ex divina bonitate, ejusque in homines amore.
- ⁷ Et ex absurdo, si dicas, non omnes, quantum ex parte Dei est, efficaciter eligi.
- ⁸ Et ex efficacissimis mediis, quæ Deus ad æternam vitam suppeditat.
- ⁹ Et ex efficaci omnium Creaturarum in suos fines directione.
- ¹⁰ Et ex necessitate, præceptoque, spei Christianæ.
- ¹¹ Et ex disertissimis Augustini, Angelicique Doctoris testimoniis, quæ simul expenduntur.
- ¹² Diluitur Sophisma Calvinii de Prædestinatione.
- ¹³ Series, ordoque Prædestinationis breviter expressus.
- ¹⁴ Respondetur ad objecta, & ostenditur, Christum pro omnibus, etiam pro reprobis orasse.

I N D E X.

- 15 *Non ideo Voluntate antecedenti, & quantum ex parte Dei est, aliquos esse reprobatos, quia in Sacris litteris dicitur Christi sanguis pro multis, non pro omnibus effusus.*
- 16 *An Semipelagiani ideo Heretici, quod dicerent, velle Deum omnes salvos fieri?*
- 17 *Ea Sententia: Deus vult omnes salvos fieri, quomodo ab Augu-
stino explicata?*
- 18 *Divina, & efficaci voluntati an resistit possit?*
- 19 *Cur non omnibus ea media, & auxilia dentur, quibus praevisi
sunt, certissimè assensuri?*
- 20 *Respondetur ad celebre Apostoli testimonium ad Roman. 9. fuisse
vera illius sententia exponitur, praesertim an Deus sit causa ob-
durationis?*
- 21 *Non sequi ex nostra Sententia, non habere Deum majorem Electro-
rum curam, quam non Electorum.*
- 22 *Multoq; minùs sequi hominem seipsum discernere.*
- 23 *Causam Parvulorum nihil obstare, multoq; magis ad rem nostram
facere.*

§. II.

*Dari omnibus hominibus ad aeternam vitam conse-
quendam non tantùm necessarias, & qua-
lescunq; sed copiosissimas, & abunda-
ntes gratias, quibus si velint, facile,
commodeq; obtinere illam possint.*

- 1 *Ex voluntate efficaci salvandi omnes, optimè inferri voluntatem
omnibus quoq;, quantum ex parte Dei est, efficaces, & copio-
sissimas gratias offerri.*
- 2 *Posse causam aliquam & dici, & esse efficacem, quamvis effectus
non sequatur, idq; exemplis Luciferi, & Adami ostenditur.*
- 3 *Efficaces ex natura sua, & copiosas gratias dari ex Sacris litteris,
& qua ratione jugum Christi leve, & suave dicatur, osten-
ditur.*

I N D E X.

- 4 Sæpe reprobis, & renuentibus æquales, aut etiam majores gratias dari, quàm electis, & consentientibus. Neq̃, tantùm externas, verùm etiam, multoq̃, magis internas. Ubi Augustini, & Thomæ testimonia expenduntur.
- 5 Idemq̃, probatur ex effusissima etiam in Bruta, aliasq̃, Creaturas insensibiles Dei bonitate, & Providentia.
- 6 Et in ipsum hominis Corpus.
- 7 Et quia homo Dei opus est.
- 8 Idemq̃, ex Corporis humani structura.
- 9 Ac præsertim hominis redemptione.
- 10 Ipsaq̃, experientia.
- 11 Neque id tantùm de fidelibus, verùm etiam infidelibus credendum esse, quod variis, multisq̃, rationibus probatur, præsertim verò testimonio Augustini, ejusq̃, præstantium Discipulorum.
- 12 Nihil obstat doctrinam S. Thomæ de Infidelitate purè negativa.
- 13 Si homini auxilia gratiæ deessent, transgressionem mandatorum ex sententia Augustini nequaquam transgressoribus imputatum iri.
- 14 Nullis quantumvis obduratissimis Peccatoribus abundantissimas gratias deesse.
- 15 Quo sensu Augustinus dicat, gratiam non omnibus dari.
- 16 Causa Parvulorum sine Baptismo decedentium non obesse ostenditur.
- 17 Exponitur Augustinus.
- 18 Falsam esse eorum opinionem, qui contendunt gratiam omnibus quidem præparari, non tamen omnibus dari.
- 19 Exponitur Apostoli sententia ad Rom. 10. quomodo credent, quomodo audient sine prædicante &c.
- 20 Nemini quamvis perditissimo custodiam Angelicam subtrahi, ubi de peccatorum mensura, deq̃, prava consuetudine, modisq̃, eam expugnandi.
- 21 Nemini orandi petendiq̃, gratiam deesse. Ubi de gradibus Orationis, deq̃, auxilio remoto.

INDEX.

§. III.

*Dei gratiam etiam obstinatissimis peccatoribus non
deesse longa serie historica, multisque
exemplis ostenditur.*

§. IV.

*Orationem etiam Peccatoris, cum illa petit, quæ ad
vitam æternam consequendam necessaria sunt,
semper exaudiri, sicque in peccatoris po-
testate esse gratiam illam efficacis-
simam, & triumphatricem
orando impetrare.*

- 1 *Quid sit efficacia gratiæ Triumphatricis, fuse, multisque ex Augusti-
no testimoniis exponitur.*
- 2 *Qua ratione voluntas humana præter objecti propositionem à Deo
physicè juvetur, ac etiam præmoveatur.*
- 3 *Orationem efficacissimam, certissimumque medium esse, quo etiam
peccatores gratiam illam specialem, ac triumphatricem assequi
possint, ubi distinctio peccatoris ad bonum conantis, & non co-
nantis.*
- 4 *Probatum ex Sacris litteris, iuxta Patrum expositionem.*
- 5 *Ac etiam ex ratione.*
- 6 *Qua ratione sint intelligendæ scripturæ, cum dicunt, non exaudiri
peccatores.*

§. V.

INDEX.

§. V.

*Aphorismi, seu Regulae Asceticae de mysterio
Prædestinationis.*

- 1 Explicatio primi Aphorismi.
- 2 Explicatio secundi Aphorismi.
- 4 Explicatio tertii Aphorismi, ubi de spe, & timore.

PARS ALTERA.

*In qua ostenditur, nihil opponi posse divinae pro-
videntiæ ex eo, quòd in negotio Prædestinationis,
quædam sint inscrutabilia.*

§. I.

*Probatnr ex Sacris litteris, sanctisque Patribus, no-
luisse Deum Mysterium Prædestinationis
ab hominibus explorari.*

§. II.

*Multa esse in rerum natura, quæ licet vera, occul-
tas tamen, & inpenetrabiles habent causas,
nec ideo falsi accusari possunt. Ergo
multò magis idem dicendum de
alea Prædestinationis.*

§. III.

INDEX.

§. III.

*Causam Divinorum Judiciorum quærentibus
optima datur, omniq̃ue demonstra-
tione potentior.*



NO.

N O D U S PRÆDESTINATIONIS

*Ex SS. litteris, doctrinaque SS. Augustini,
& Thomæ*

QUANTUM HOMINI LICET,
DISSOLUTUS.

P A R S I.

*In qua expenduntur, quæ cognosci in hoc arcano
ab hominibus possunt.*



UO sunt, quæ in omnibus Christianæ Fidei
Mysteriis considerari oportet, videlicet, &
quodd cognosci debeant, & quodd penetrari
non possint; sicque & quodd fidem merean-
tur, quia certa; & quodd reverentiam, ac
timorem, quia sublimia, & inaccessibleia. Utque
maris, ita rerum divinarum proprietas est,
& magnâ ex parte cerni posse, & majori
latere: Sicut enim non mare, sed flumen
esset, cujus totam latitudinem, & profundum metiri oculo posses;
ita non res divina, sed humana esset, quam totam intellectu perspi-
ceres. Inde est, ut in aliis ferè omnibus, ita quoque in rebus ad
Religionem spectantibus duo vitanda, excessum videlicet, ac defe-
ctum, hoc est, ignorantiam, & præsumptionem; par enim damni
est, parisque delicti, & nescire, quod debeas, & velle scire, quod

A

non

non possis. Quid enim interest, siue ideo cadas, quia cæcus es; siue cadas, quia per præcipitia incedis? Imò sæpe major, peiorque audacium, quàm ignorantium ruina; isti enim soli, illi cum pluribus cadunt, quos exemplo, ac veneratione doctrinæ, quam profitentur, in abrupta compellunt, ut Origenis, Tertulliani, aliorumque experientia ostendit. Optimum ergo est Apostoli monitum ad Rom. 12. 3. *Sapere ad sobrietatem*. Si non sapias, quomodo amabis, quod ignoras? Si non ad sobrietatem, quomodo tibi proderit, & non potius onerabit, quod non capis? Optimus ergo cognoscendi, qui vescendi modus erit, si nec gulæ indulgeas, nec fami desis.

Hæc, ut dixi, in omnibus Christianæ Religionis Mysteriis, sed præsertim in arcano Prædestinationis vera sunt. Nihil isto apertius, si modeste accedas; nihil occultius, si protervè invadas. Nihil ad inflammandum amorem opportunius, si modicè, ac guttatim aspergas: nihil ad extinguendum validius, si impetu, & undatim affundas. Omnia tempestatibus, & naufragiis plena, si scapham alto committas: omnia tuta, & tranquilla, si terram legas. Verbo, hîc maximè consilium Apostoli valet ad Rom. 11. 20. *Noli altum sapere*.

Ego cum observâssem in hac præcipuâ, & decretoriâ salutis, & animarum causâ à quàm plurimis nimis parùm divinæ bonitati tribui, & culpam pereuntium non tam reis imponi, quàm in ipsum Judicem derivari, quasi partibus addictum, & aliquibus tantum, non omnibus propitium, nimisque ardua præscribentem, quæ paucis, & Heroibus tantum superare animus sit; ego, inquam, cum id animadvertissem, statui iustissimi simul, & clementissimi Judicis causam suscipere; nodumque hunc, licet aliàs implicatissimum, non ferro, sed calamo solvere, ac omnibus compertum, palamque facere, nullam posse contra Judicem querelam moveri, nihilque in prædestinationis negotio peractum, cui non amor præfederit; sicque damnatorum casus non Prædestinationi divinæ, sed humanæ voluntati tribuendos esse, Deo quavis ratione vitam peccatori procurante, sed peccatore ipso omni ratione mortem volente, sicque verissimas esse illas Prophetæ voces Oseæ 13. 9. *Perditio tua ex te Israël, ex me tantum auxilium tuum*.

Quatuor ergo in hoc argumento demonstranda suscipiam. *Primò*. Deum serio, impensissimè, ac quantum in se est, efficaciter omnium hominum salutem velle. *Secundo*, & ideo non quascum-

Dissolutus. Pars I.

3

cumque hominibus, sed abundantissimas, copiosissimas, & ex natura sua efficaces gratias tribuere, quibus ad æternam felicitatem pervenire possint. *Tertiò*, imò facillima quoque media præscripsisse, quibus etiam perditissimi, ac deploratissimi peccatores gratias illas speciales, quas Augustinus *invictissimas*, & *triumphatrices* appellat, sicque perseverantiam finalem certissimò impetrare possint, si velint. *Quartò*, & hæc ad divinam, & infinitam Bonitatem omni suspicione liberandam sufficere; reliqua in causa Prædestinationis explorari nec posse, nec debere.

§. I.

Esse in Deo seriam, impensamque, & quantum ex se est, efficacissimam voluntatem salvandi omnes.

S U M M A R I A.

- I. Explicatur fuscè quid nomine voluntatis, gratiæq; per se efficacis, & ab Autore, & ab aliis quoq; Theologis intelligatur.
- II. Probatur primò testimonio ex Sacris litteris, quarum testimonia expenduntur.
- III. Ex Myſterio Incarnationis.
- IV. Et ex sensu Sanctorum Patrum, præsertim Prosperi Aquitani, Discipulorum S. Augustini fidelissimi.
- V. Et ex ratione. Ubi distinctio voluntatis antecedentis, ejusq; efficacia, & consequentis expenditur.
- VI. Ex divina Bonitate, ejusq; in homines amore.
- VII. Et ex absurdo, si dicas, non omnes, quantum ex parte Dei est, efficaciter eligi.
- VIII. Et ex efficacissimis mediis, quæ Deus ad æternam vitam supeditat.
- IX. Et ex efficaci omnium Creaturarum in suos fines directione.
- X. Et ex necessitate, præceptoq; Spei Christianæ.
- XI. Et ex disertissimis Augustini, Angelicq; Doctoris testimoniis, quæ simul expenduntur.

A 2

XII.

Nodus Prædestinationis

- XII. *Diluitur Sophisma Calvini de Prædestinatione.*
- XIII. *Series, ordoq; Prædestinationis breviter expressus.*
- XIV. *Respondetur ad obiecta, & ostenditur, Christum pro omnibus, etiam pro reprobis orasse.*
- XV. *Non ideo voluntate antecedenti, & quantum ex parte Dei est, aliquos esse reprobos, quia in Sacris litteris dicitur Christi Sanguis pro multis, non pro omnibus effusus.*
- XVI. *An Semipelagiani ideo Hæretici, quod dicerent, velle Deum omnes saluos fieri?*
- XVII. *Ea Sententia: Deus vult omnes saluos fieri, quomodo ab Augustino explicata?*
- XVIII. *Divina, & efficaci voluntati an resisti possit?*
- XIX. *Cur non omnibus ea media, & auxilia dentur, quibus prævisi sunt, certissimò assensuri?*
- XX. *Respondetur ad celebre Apostoli testimonium ad Roman: 9. fuisseq; vera illius sententia exponitur, præsentim an Deus sit causa obdurationis?*
- XXI. *Non sequi ex nostra Sententia, non habere Deum majorem Electorum curam, quam non Electorum.*
- XXII. *Multoq; minùs sequi hominem se ipsum discernere.*
- XXIII. *Causam Parvulorum nihil obstarè, multoq; magis ad rem nostram facere.*

NE termini, quibus Theologi in hac profundissima, remotissimaque ab hominum captu materia uti solent, ambiguitatem aliquam, speciemque erroris præferant, prius, in ipsoque limine explicandæ nobis sunt voces, quæ toto hoc opere quàm frequentissimè occurrent, & in quibus tota rei summa, cardoque versatur.

I. Observandum igitur primò est, duas in Deo esse voluntates, *antecedentem* unam, alteram *consequentem*. Non quòd in divina natura numerum, & multitudinem perfectionum admittamus; sed quia quæ in Deo unum sunt, ea ob eminentiam, & infinitatem suam pluribus, innumerisque perfectionibus creatis æquivalent; & ideo perinde quoad effectum se habeant, ac si plura essent; sicque à nobis per numerum, & in plurali explicantur, quamvis reipsa sint res simplicissima. Ea ferè ratione, quâ dicimus, nummum aureum tres florenos argenteos complecti, non numero, cùm unus sit, sed valore, & pretio. Ita, inquam, duæ sunt in Deo voluntates: Pri-

ma

ma absoluta, efficax, independensque ab omni hominum merito, quâ Deus naturaliter, meroque bonitatis suæ instinctu, atque, ut ita dicam, *motu proprio* vult omnium hominum salutem, æternamque felicitatem; & ideo eos creat, eos redimit, & accommodatissimis ad hunc finem mediis accingit, aliter tamen, aliterque juxta infinitæ, ac ordinatissimæ sapientiæ suæ modum. Et hanc vocamus *voluntatem antecedentem*, seu *voluntatem amoris*, quia nullam aliam causam habet, quàm, ut dixi, naturalem bonitatis suæ instinctum, motumque propriam. Hæc, inquam, voluntas, quantum ex parte Dei efficax, & absoluta est. Efficax; quia vi hujus voluntatis movetur Deus ad media non tantum huic fini necessaria, & commoda; verum etiam abundantissima, & præstantissima hominibus applicanda, adeo ut ne unigenito quidem, nec sanguini, vitæque parcat, quod nemo facit, nisi qui finem flagrantissimè, ac efficacissimè ex parte sua cupit. Absoluta verò hæc ipsa voluntas dicitur; quia licet Deus exequi hanc suam voluntatem nolit, nisi homine consensum suum præbente, cum salvare invitum, nolit: quod tamen creaverit, & quod ideo creaverit, ut æternam vitam adipisceretur, quodque in hunc finem nobilissimis, & validissimis mediis instruxerit, id totum gratis, totumque opus summi amoris, & bonitatis fuit, nihil homine ipso ad propositum tam regię, spontaneæque adoptionis conferente, nullaque ex ejus parte conditione expectata: sicut si Princeps Juvenem mendicum sola miseratione, & pietate commotus hæredem ultimis tabulis scribat, quæ tamen hæreditatem ipso facto consequi non possit, nisi ex natura ipsius testamenti adeat, acceptetque: in hac, inquam, hypothesi voluntas mendicum instituendi, pura, absoluta, mereque gratuita est, nihil ad ipsam conferente mendico, quippe omnium, quæ à Principe fiunt ignaro: Voluntas tamen ejusdem Principis, ut actu ipso hæreditate potiatur; conditionata est; quia non vult aliter obtineri, quàm hærede adeunte, & acceptante. Ita in Deo. Quod te voluerit condere, voluerit in filium, quantum est de se, adoptare, voluerit Regni cælestis heredem esse, in eumque finem mille, ac pretiosissimis te dotibus, & beneficiis exornaverit; meræ charitatis, & misericordiæ fuit, nihil te, tuisque meritis adjuvantibus. Voluntas verò, quâ decrevit, ne hoc ipsum Regnum obtineres, nisi velles, & mereris; quodque spoliare te illo voluerit, quia prævidit, te operari, & mereri nolle; hæc, inquam, voluntas *conditionata*, & *consequens* dici

dici debet, quippe ex præuisa voluntate, arbitrioque tuo pendens; quod Theologi nostri aliis terminis voluntatem intentivam, & executivam appellant.

Si tu verò solam illam unicamque voluntatem de se efficacem in Deo dici velis, quæ effectum consequitur; litem quidem de nomine monebis, sed pellimè confusione terminorum rebus ipsis consules, confusis enim terminis, confundi quoque rem ipsam oportet; ut si equo nomen Aquilæ; aut Romæ nomen Memphis imponas, nemo non inferet; ergo equum alas habere, & Romam Nilo rigari. Voluntas ergo de se efficax illa dicitur, quâ quis rem aliquam tam seriò, impenseque intendit; ut illi consequendæ validissima media, omnesque officii sui partes impendat, seu deinde effectus sequatur, seu non sequatur; postquam enim omnes suas partes aliquis explevit, nec tamen effectum obtinuit, id non voluntati, non ignaviæ cupientis, sed casui, alteriue impedimento imputari, adscribi que debet. Ita in Deo res se habet: Si enim eius saluandi omnes voluntatem consideres, tam illa impensa, & eximia est; ut iure jurando protestetur, *Se nolle mortem peccatoris, sed ut convertatur, & vivat*: Si efficaciam, & abundantiam mediorum spectes, tanta est; ut etiam proprio filio non pepercerit, sed pro omnibus tradiderit illum, & cum illo omnia nobis donaverit: Si denique examines, an omnes numeros, omnesque partes Salvatoris, & Redemptoris expleverit, id tam plenè, copioseque peractum; ut nihil exigere ampliùs possis, *quid enim, inquit, debui facere vinea mea, & non feci?* Quæ cum ita se habeant, amabò te, quid voluntati divinæ deest, ut quantum ex se est, efficacissima appellari non debeat? *At effectus cessavit.* Esto; sed efficacia causæ quantum est de se, non ex effectu, sed ex conatu, votoque censetur, ut videlicet adeo velis, ut nihil eorum omittas, quæ fieri debent: quod si non esset, omnia ferè vitæ Christianæ fundamenta corruerent.

Altera voluntas est hypothetica, & conditionata, quâ Deus peccatores punire constituit, si gratiis à se copiosissimè oblati uti nolint, iisque in finem, usque pertinacissimè oblectentur. Hæc voluntas, ut monui, conditionata est, quia supponit insuperabilem peccatorum contumaciam, ac finalem impœnitentiam. Et hanc vocamus voluntatem consequentem, seu voluntatem Iustitiæ, quia non immediatè, motuve proprio à Deo proficiscitur, sed ex Peccatorum protervia, oblatam veniam obstinatissimè recusantium.

Potest utraq; hæc in Deo voluntas exemplo clementissimi Prin-

Principis ostendi. Is cum plures filios habeat, omnes magno amore complectitur, omnes paternæ hæreditati destinat, & ideo cum civilibus, tum bellicis artibus per versatissimos magistros imbui curat; omnes denique regio cibo, regio cultu, ac famulatu exornat, & si quem morbo affligi contingat, vitaque periclitari; dolet, timet, præmia medentibus spondet, non curis, non expensis parcat, nihilque non agit, ut laborantem restituat. Quod si eorum aliquem audiat, defectionem parasse, sibi que bellum, ac mortem moliri, ac patriam igne, ferro vastare; non ideo primum in filium rebellem amorem ponit, nec continuè propositum mutat, eum honoribus augendi; sed per Legatos, per epistolas, minis, præmiisque, ac reluctantem armis aggreditur, victumque veniâ, & amplexu donat. Si verò intelligat, nec oblatam veniam ab eo recipi, nec armis abstinere, sed toti Regno perniciem meditari, nullisque rationibus à se, patria que perdenda compesci posse; tunc enim verò mutato consilio, publicæque quietis causâ pertinacem vinciri, ac perpetuâ custodiâ claudi iubet; quod nisi faciat, nemo non dicat, Principis partibus defuisse, nec clementem in filium, sed ignavum in Patriam appellet. Ita prorsus in Deo; nisi quod quæ in hominibus pluribus consiliis, & propositis, ac per intervalla fiunt; in Deo unum consilium, unum propositum, unumque momentum est; sed quod infinitate, ac eminentiâ perfectionis omnia illa complectitur, quæ modò in Principe diximus. Nam quia anima hominis una, eademque est, non ideo minus vegetat, & sentit, quàm aliæ, innumeræque plantarum, brutorumque animæ. Et quia æternitas unicum instans est; non ideo minus spatii, minusque temporis occupat, quàm innumera annorum, ac sæculorum myriades. Et ut Plinius notat, Panchios gemma, licet una sit, non ideo tamen non ex omnium aliarum gemmarum coloribus constat: Sic in Deo, non ideo, quia ejus voluntas una, eademque est, non omnes illas Amoris, clementiæ, justitiæque partes complectitur, quas suprà recensuimus. Et quamvis nulla sit in Deo, quippe immutabili, successio cogitationum, ut modò istud, modò remutata, aliud velit; est tamen ordo, & connexio Decretorum, cum & ista sit maxima perfectio confusio opposita: sicut enim, quia Deus est substantia immaterialis, ideo cognoscit: & quia cognoscit, ideo amat; & quia amat, ideo providet: ita quia est infinitè bonus; ideo vult omnibus à se conditis bene; & quia bene vult, vult neminem perire; & quia neminem vult perire, nulli copiosissima ad hunc finem

finem media negat; & quia tandem videt, nolle aliquos oblati mediis proficere, nullumque delinquendi finem facere; ideo vult punire, ne Justitiæ suæ desit. In quibus omnibus non alternatio, & vicissitudo cogitationum est, sed ut dixi, ordo & connexio, qualis esse in natura simplicissima potest. Vult ergo Deus, quippe omnium Pater, omnes homines salvos esse, vult Regno potiri, vult hæredes scribi, idque amore non qualicumque, sed paterno, hoc est, omnium maximo, ac sincerissimo. Et si qui rebelles evadant, non ideo propositum, & amorem mutat: monet, rogat, invitat, terret, minatur, prosperis, adversis urget, veniam, pacemque offert. Et ecce tibi voluntatem Dei *antecedentem*, seu *propositum amoris*, omnes salvare festinantis: Si verò nihil ista proficiant, peccatore omnem veniam, omnemque gratiam respuente; tunc enim verò succedit *voluntas consequens*, ac propositum *Justitiæ*, quo, ne officio Judicis desit, neque impunitate delicti licentiam delinquendi foveat; rebellem ad pœnam, & supplicium vocat, semper tamen affectu, & charitate Patris nunquam in Filii pœna, etiam criminosi latantis. Ea ferè ratione, quâ videmus, pretiosissimas, & charissimas merces naufragii metu à Domino, & mercatore jactari, invito tamen, & ad singulos jactus plorante. Sic Deus amat, etiam cum perdit, perdit tamen, ne justitiæ naufragium faciat. Hinc illæ voces: *Heu consolabor super inimicis meis* Isaia 1. v. 74. *Jerusalem, Jerusalem, quoties volui congregare filios tuos, & noluisti? Nunc ergo relinquetur Domus vestra deserta.* Matth. 23. Vides hîc deferentem, & tamen plorantem; jactat, & gemit; sed hoc amor, illud Justitiæ debet; periret justitia, nisi plecteretur culpa.

Observandum deinde est, posse causam aliquam esse, dicique efficacem, quamvis effectus non sequatur; si videlicet cessatio, & suspensio effectus non ex defectu virtutis in causa, sed aliunde proveniat. Illa enim dicitur causa efficax, quæ omnem, & necessariam virtutem ad ponendum effectum habet: Nemo enim negaverit, solem causam efficacem illuminationis esse, quia nihil ei ad illuminandum, & aërem, & terram deest, ipsoque facto omnia illuminat, nisi nubem, aut velum, aliudve impedimentum opponas, quæle opponunt, qui lucenti, & mille radiis ad illuminandum conanti oculos studiosè claudunt; tunc enim cessabit quidem illuminatio, non tamen solis, sed solem impediens culpâ. Aliud ergo est causa efficax, aliud effectrix; ista, quam effectus consequitur; illa quæ omnem

omnem necessariam virtutem ad consequendum effectum habet, nisi aliunde impediatur. Idem de gratia dicas. Alia effectrix est, quæ voluntatem expugnat; alia efficax, quæ virtutem expugnandi habet, quæque ipso facto voluntates omnium expugnat, quot quot impedimentum nullum ponunt; unde quod una, eademque gratia alium flectat, alium non flectat, non gratiæ, sed voluntatis culpa est: sciendum enim, hanc esse libertatis creatæ naturam, ut quamcunque etiam efficacissimam gratiam possit eludere, cassamque reddere; quod si potest, quid mirum est, si aliquando agat? Sicut enim nulla gratia est, quæ tollat libertatem; ita nulla est, quæ tollat potentiam resistendi; quid ergo novi, absurdique, imò quid non rationi, & experientiæ consentaneum, resistere aliquando illam, quæ semper potest resistere, juxta illud Act. 7. *Vos semper Spiritui Sancto resistitis?* Non quoddam major sit in voluntate virtus resistendi, quam in Deo potentia superandi; sed quoddam Deus nolit potentiâ, sed gratiâ uti, hoc est, non cogere liberam, sed invitare, ac more nobilis, castique amatoris petere consensum, non rapere. Re igitur sic explicata, à sacris litteris initium ducamus.

II. Primò igitur Beatus Apostolus I. ad Timoth. 2, ita loquitur: *Obsecro primam omnium fieri obsecrationes pro omnibus, ut in omni pietate, & honestate vitam geramus; hoc enim bonum, & acceptum est coram Salvatore nostro Deo, qui omnes homines vult saluos fieri, & ad cognitionem veritatis venire; unus enim Deus, unus & Mediator Dei, & hominum Christus JESVS, dans semetipsum redemptionem pro omnibus.* Vides in hac sententia, non semel tantum, sed sæpius, ac repetitis vicibus, Deum omnium salutem velle. Dicit enim Apostolus: *Pro omnibus* orandum esse: Christum *pro omnibus* redimendis sanguinem fudisse: *pro omnibus* curare, ut salvi fiant: *Pro omnibus*, ut ad veram, & Christianam Fidem perveniant. Ubi simul adverte, non de iustis tantum, & qui re ipsa salvantur; verum etiam de iis loqui, qui peccatores, & infideles sunt; nam & pro istis orandum est, & de istis præsertim scribit Deum velle, ut omnes ab infidelitate ad veram fidem convertantur. Cum ergo Apostolus de omnibus loquatur, nullumque excludat; cur tu excipias, quos ille non excipit; excludas, quos ille non excludit, finemque Divinæ Misericordiæ ad paucos constringas, quem ille ad omnes dilatat? Paulus dicit *omnes*: tu dicis, paucos: cui magis credam? Apostolo, an tibi? Nec tantum id asserit Apostolus, sed etiam duplici ratione probat: quia

unus est Deus, unus est Mediator: quasi dicat: Si plures essent Dñi, pluresque Mediatores; credere aliquis posset, non omnes omnino homines Deo, & Mediatori nostro cordi esse: sicut quia non unus, sed plures in Mundo Principes sunt, quilibet suis, non alienis subditis providet; Rex videlicet Hispaniæ Hispanis, non Gallis: Rex Galliæ, Gallis, non Germanis, aut Indis. Quodd si unus omnium mortalium, idemque Imperator esset, ut olim Romæ; ad illum non unius modò, aut alterius Nationis cura pertineret. Ita cum Deus sit omnium Dominus, omnium Mediator; non potest non omnibus, quantum ex se est, vitam, & felicitatem velle, alioquin partibus suis deesset, sicut deesset Medicus, qui cum decem ægrotorum curam suscepisset, non omnibus, sed tribus tantum sanitatem efficaciter cuperet; & Aduocatus, cui cum ex officio octo clientum causæ, & quidem capitales commissæ essent; duos tantum tueretur, reliquis aut neglectis, aut non serio, obiterque defensis. Ergo qui omnium Deus & Mediator est, aut oportet officio suo desit, aut omnium salutem, & vitam efficaciter velit. Altera Apostoli ratio est, quia Christus est *omnium Redemptor*, quam paulò post accuratius examinabimus.

Ezechielis 33. v. 2. ita loquitur Deus: *Et tu fili hominis dic ad eos: Vivo ego dicit Dominus Deus, nolo mortem impii, sed ut convertatur impius à via sua, & viuat*. Si Deus ne peccatoris quidem mortem, & supplicium vult, cuius ergo hominis vult? nam si aliquis dignus sit, quem Deus perire velit, is planè peccator erit: Si ergo nec peccatorem perire vult, nec iustum; sequitur, ut neminem velit. Peccatum est infinita Dei offensa, quippe infinitæ Majestati facta; & ideo non unam tantum mortem, unumque infernum, sed mille, & innumeros meretur: Si ergo ne infinita quidem injuriâ provocari divina voluntas potest, ut mortem, & excidium peccatori velit; sequitur, ejus in peccatores, adeoque in omnes mortales amorem inextinguibilem, insuperabilem esse; sicut insuperabile incendium esset, quod nullis aquis, ne totius quidem maris extingui posset. Ubi etiam observa, patheticam illam, plenamque tenerrimi amoris in Deo loquendi formulam: *Dic ad eos: vivo ego, dicit Dominus &c.* Ubi vides, Deum non velle tantum impii salutem; verum etiam id palam profiteri, suumque propositum solenni juramento firmare, ac per Prophetam peccatoribus insinuatam velle. Quid amabò! est efficaciter velle, si id non est, quod Princeps aliquis & juramento, & publicis tabulis, & misso insuper Legato palam

iam testatur? Planè qui aliter sentiunt, nescio, an ex Deo vero, Deum Mimicum, & scenicum faciant, quales sunt, qui ludi, & animi causâ gestu, habitu, comitatu Reges in theatro se fingunt, cum tamen nihil minùs, quàm Reges sint. Sed absint hæc ludibria à veracissima illa Majestate, quæ nullam causam fingendi habet. Egre- giè huc servit & illa Ecclesiastici sententia c. 15, v. 2. *Non dixeris per Deum abest: quæ enim odit, ne feceris . . . nec enim necessarii sunt ei homines impii*. Atqui si Deus voluntate antecedente, & quantum est ex se, non vult aliquos salvari; planè per eum abest, ne tot millia reproborum salutem consequantur, tam enim consequi eam non possunt, Deo nolente, quàm non potest imago in nuda tabula pingi, nolente Pictore. Nec mihi gratias sufficientes, occultas inspiratio- nes, & alia salutis instrumenta opponas, quæ reprobis dantur; tam enim nihil possunt ad salutem consequendam omnia illa nolente Deo, quàm nihil possunt ad opus faciendum omnia instrumenta cessante artifice. Abest ergo per Deum, si velit quidem te ex fidelibus nasci, Baptismo tingi, veram Fidem doceri, sed nolit saluum esse, sicut per Fabrum abesset, ne domus strueretur, si vellet quidem ligna cæ- di, saxa conducì, machinas parari, sed nollet domum surgere. Ne- que dicas, Deum voluntate antecedente, motuque proprio tam mul- tos Regno excludere, ut Justitiam suam ostendat, nam ad hoc quo- que respondet Ecclesiasticus: *Non sunt Deo necessarii homines impii*, non sunt necessarii Justitiæ, non sunt necessarii potentiæ, perinde ac si Deo non millia alia Justitiæ suæ declarandæ argumenta supersint, citra tot animarum strages, ac æterna supplicia; perire enim necesse est, si nolit saluare. Deinde officium Justitiæ ad voluntatem non an- tecedentem, sed consequentem pertinet, cum delictam supponat. Postquàm enim peccator divinæ voluntati oblectari pergit, nec ce- dit vocanti misericordiæ, Deus hoc ipsum peccanti malum in ma- gnum bonum convertit, more præstantis Medici, remedium ex vene- no parantis; ut in Pharaone monstratum est; sed cum id totum cul- pam, & impœnitentiam supponat; nihil ad eam voluntatem prima- riam, ingentem, & antecedentem facit, de qua nobis Disputatio.

Sed omnium clarissimè Christus ipse apud Mathæum *cap. 18.* ubi cum proposuisset parabolam Pastoris, qui nonaginta novem ovi- bus relictis, unicam, quæ erraverat, quæsit, invenit, succollavit, magisque de illa una, quam perditam repererat, quàm de nonaginta novem aliis nunquam perditis, gavissus fuerat; subjunxit: *Sic non*

est voluntas ante Patrem vestrum, qui in Cælis est, ut pereat unus. Sicut ergo Pastoris, non Mercenarii est, ne unam quidem de ovibus suis, etiam minimis perditam velle; ita Redemptoris nostri nullam de animabus à se conditis damnatam velle; nisi forsan major pastori cura de ovibus, quàm Redemptori de Animabus sit; magisque pastor errantem ovem, quàm Deus errantem animam diligit. Si ergo ne unum quidem vult Deus perire, ergo vult omnes non perire, hoc est, salvos esse. Sicut Judex, qui ex mille reis nollet vel unicum supplicio affici; vellet hoc ipso omnes vivere, veniâque donari. Ubi simul observa efficacissimam, & enixissimam esse hanc de nulla ove perdenda boni Pastoris voluntatem. Si enim non efficaciter vellet, cur peregrè proficiscitur? cur ubique terrarum quærit? cur laborat? cur sudat? cur inventam amplexu stringit? cur humeris imponit? cur viciniam plausu, & tripudiis implet? planè aut nulla voluntas, aut ista efficax dici debet.

Huc quoque efficaciter illa verba Sapientis faciunt cap. 6. v. 8. *Puillum & magnum ipse fecit, & æqualis est illi cura de omnibus.* Hic Sapiens ex ea ratione, quòd Deus omnium hominum Creator sit, optimè colligit; ergo *omnium æqualiter* curam habere. Non ita quidem, quòd non unum Creator plùs alio diligit, id enim & in naturalibus, & supernaturalibus rebus clarissimè apparet; cum enim amare sit bonum velle, quantò plùs boni uni, quàm alteri confert, tantò Deus magis unum, quàm alium diligit; sed quòd nullum deferat, nullumque, quantum ex se est, abiiciat, velitque perire. In quo eadem omnium creaturarum, & æqualis conditio est. Quòd etiam spectant illa Apostoli verba ad Roman. 10. & ad Coloss. 3. *Non enim est distinctio Judæi & Græci; nam idem Dominus omnium . . . Induite novum hominem secundum imaginem ejus, qui creavit illum, ubi non est Gentilis, & Judæus, Barbarus, & Scythæ, Servus, & liber.* Si ergo neminem deserit, cujus Dominus, & Creator est; Sequitur, ne in illa quidem Prædestinationis causa, quæ omnium maxima est, & ex qua reliqua omnia pendent, nullum omnino deseruisse, nullumque ab efficaci salvandi proposito exclusisse. Si enim tam multos, imò longè plurimos exclusisset; non ergo omnes curavit. Quis enim dicat, curasse, quos in illa causa omnium præcipua, & infiniti momenti neglexit, exclusit, abiecit? Planè tam non est hoc curare, quàm pater non posset dici, curasse filium, quem nihil mali adhuc meritum domo, & hæreditate paterna spoliasset, aut

in

in flumen casurum tenere noluisse. Et tamen id omnino est, quod facit Deus, si arbitrio suo, nullâque prævisâ culpâ tam multos adulatorum salvare noluit; unde necessariò secutum, ut perirent: jam enim suprà monui, idem in adultis esse non salvari, quod perire, cùm medium non detur in præsentî serie præcedentiæ supernaturalis, & ideo si unum non est, sequitur necessariò, aliud esse; sicut quia inter vivere, & mori medium non datur, si Deus nolit aliquem vivere, sequitur necessariò, esse moriturum. Rursus, si verum est, quod dicit Apostolus, nullam apud Deum (quantùm videlicet ad salvandi propositum) distinctionem esse Judei & Græci, Barbari & Scythæ, quia est Dominus omnium, & quia omnes ad imaginem suam condidit; sequitur ex eadem ratione, & priusquàm culpa aliqua inter reprobos, electosque distinguat; nullam quoque apud Deum inter reprobos, & electos, inter Paulum, & Judam distinctionem fuisse: sicque omnibus æqualiter salutem optasse. Si enim ideo non distinguit Deus, inter Judæum, & Græcum, inter Barbarum, & Scytham; quia non minùs Græci, quàm Judæi; nec minùs Barbari, quàm Scythæ Dominus est; ergo nec in illo Prædestinationis negotio, quantùm in se est, inter Cain, & Abel, inter Paulum, & Judam distinxit Deus, sed omnibus æqualiter salutem voluit, quia non minùs Caini, quàm Abelis, nec minùs Judæ, quàm Pauli Dominus, & Creator est; nec minùs unus, quàm alter ad ejus imaginem conditus, imò & redemptus. Quantùm ergo ex parte Dei est, non est Barbarus, non est Scythæ, non est reprobus, non est damnatus; sed omnes filij, omnes dilecti, omnes chari, solâ culpâ inter malos, bonosque, inter Electos, reiectosque distinguente: Sicut enim apud homines non potest filius citra culpam, & in ultimis Tabulis à Patre omitti; aut si omittat, querelam Testamenti inofficiosi filius opponet; ita multoque fortius apud Deum, ubi longè magis, quàm in humanis Tribunalibus leges amoris, humanitatis, & clementiæ valent. Hæc ipsa Augustini sententia fuit, cujus perpetua ferè & consans doctrina est; non dari electionem unius præ alio, ubi non sit distantia meritorum, sic enim in Psalm. 45. scribit *Quid est Deus in medio ejus? hoc significat, quod æquus est omnibus Deus, & personas non accipit. Quomodo enim illud, quod in medio est, paria habet spatia ad omnes fines; ita Deus medius esse dicitur, æqualiter omnibus consulens. Quod intellige de voluntate Dei, quantùm ex se est, omnes salvandi; non verò de æqualitate meritorum*

rum

rum, aut gloriæ: Constat enim, hæc alia, & alia esse, nec minori, quam in ordine naturali varietate. Qua in re idem dicere liceat, quod olim Hannibali Carthaginensi: Is enim, cum militem omnium Nationum in Romanos duceret, ut omnes quoque spe præmii ad pugnam, & victoriam accenderet, his verbis teste Plutarcho utebatur: *Carthaginensis mihi erit, quicumque hostem prostraverit.* Ita Deus mortalibus: *Prædestinatus mihi erit quicumque peccatum vicerit.* Idemque Augustinus in expositione quarundam Propositionum ex Epistola ad Roman. cap. 60. scribit: *Quid ergo elegit Deus? Si enim nullo merito non est electio, æquales enim omnes sunt ante meritum, nec potest in rebus omnibus æqualibus electio nominari.* Et lib. 1. ad Simplicianum q. 2. *Unde igitur ista electio, vel qualis electio, si nondum natis, nondumque aliquid operatis, nulla sunt momenta meritum?* Et infra: *Nemo eligitur, nisi iam distans ab illo, qui reicitur.* Unde, quod dictum est: *elegit nos Deus ante Mundi constitutionem, non video, quomodo sit dictum, nisi ex præscientia.* Ergo ex hoc Augustini principio, si voluntatem Dei antecedentem consideres, sicut in illa omnes pares sunt, omnes creaturæ, omnes imagines, omnes filii, ita quoque nulla illic Pauli, nulla Judæ distinctio, nulla unius præ alio electio; (*non est, inquit, electio, ubi non est distinctio meritum*) sed quantum ex parte Dei est, omnes dilecti, omnes ad vitam æternam, aut aliquid, quod ipsa vitæ æternæ melius sit (ut de infantibus Baptismo non tinctis postea dicemus) destinati. Si verò voluntatem Dei consequentem, & executricem attendas, hoc est, illam, quæ præscientiam meriti, aut demeriti consequitur, jam incipit in communi illa, parique massa distinctio Pauli, & Judæ esse. Ideo enim Paulus præ Judæ electus, quia Paulus vocationi consensurus, Judas dissensurus prævidetur, sicque unus præmio, alter supplicio dignus. Quam rationem elegantissimè quoque S. Ambrosius advertit lib. 1. offic. cap. 13. *Quis operator, inquit, negligat operis sui curam? quis deserat, & destituat, quod ipse condendum putavit? nam aliquid non fecisse, nulla iniuria fuit, sed non curare, quod feceris, summa incontinentia.* Neque dicas, omnes à Deo curari, quia omnibus media ad salutem procurat; quomodo enim dici possint procurari media ad salutem, nolenti salutem? Planè tam impossibile est homini salutem adipisci, Deo nolente; quam impossibile est trunco, statuam fieri, nolente Sculptore. Lusus ergo erit, quidquid tu dicis, Deum pro salute omnium agere, si non vult omnes salvari, sicut lusus &

pon-

pompa fallentis Tyberii erat, cum currus, commeatus, hospicia, supplicationes, omnia ad iter Romam pararet, sed nollet proficisci. Cætera, quæ de causa infantum, de Esau & Jacobo in contrarium opponi possent, postea refutabimus. Verum quidem est, S. Augustinum alibi sæpè aliam electionem admittere, quæ non invenit eligendum, sed facit: ut videre est c. 7. de Corrept. & Grat. c. 13. de Prædest. Sanctor. l. 5. contra Julian. c. 3. Sed ibi loquitur de assumptione, & vocatione ad gratiam supponente iam electionem ad Gloriam, & consequenter aliquam distinctionem. Certum enim est, S. Augustinum cum aliqua in suis libris retractasset, numquam retractasse, quæ in libris ad Simplicianum de gratia docuerat; imò vehementer ea commendasse, eoque Semipelagianos remisisse l. 1. de Prædest. c. 4.

III. Nec minùs hanc in rem faciunt illæ sententiæ, quibus Sacrae Litteræ clarissimis verbis docent, Christum pro omnibus mortuum esse; quales sunt ad Rom. 8. *Qui proprio Filio suo non pepercis, sed pro omnibus tradidit illum.* Et 2. ad Corinth. 5. *Si unus pro omnibus mortuus est Christus, ut qui vivunt, non sibi vivant; sed illi, qui pro omnibus mortuus est.* Et 1. ad Timoth. 4. *Qui est Salvator omnium hominum, maxime Fidelium.* Et Epist. 1. ad Corinth. c. 8. *Peribit infirmus in tua scientia, pro quo mortuus est Christus?* Ubi Apostolus apertissimè supponit, Christum etiam pro perituris, hoc est, pro Reprobis mortuum esse. Et 1. Joan. 2. *Ipsa est propitiatio pro peccatis nostris; non pro nostris autem tantum, sed etiam pro totius mundi.* Cum ergo Sacra Scriptura toties, ac tam enixis verbis, Christum pro omnibus mortuum esse testentur; nullibi verò, & nunquam pro aliquibus tantum; planè temerarius sit, qui id dicat, quod Scriptura non dicit; id verò non dicat, quod Scriptura tam clarè, ac toties dicit. Si quis Princeps moriturus ultimis Tabulis disponat, ut ex regio, immensoque thesauro, quem hæredi relinquit, omnes totius Regni captivi redimantur, qui trirēibus, & servituti addicti sunt; hæres verò non de singulis generum, sed de generibus singulorum; hoc est, non de omnibus, sed de paucis tantum id intelligi vellet; quis non infidelem, prævaricatorem, hostemque paternæ voluntatis diceret? At quantò id iustius dicendum de illis erit, qui contra clarissimam Scripturae sententiam Christi Redemptionem angustissimam faciunt, ejusque infinitum in homines amorem brevissimis terminis coercēt, sicque rivum ex pelago faciunt?

IV.

IV. Nec alia totius Ecclesiæ, sanctorumque Patrum sententia fuit, quos magno numero proferre in medium liceret, nisi superfluos testes, & importunos crederem in causa tam manifesta: præsertim cum nemo apertius, quam Scripturæ loquantur, unde quibus istæ non sufficiunt, nihil aliud supersit, quo persuaderi possint. Unum ergo tantum, alterumque producā, explicandi potius, quam convincendi causā. Primus sit S. Prosper Episcopus Regiensis, quo nemo pulchrius, ac eloquentius de gratia scripsit, nemo Augustini mentem melius & intellexit, & exposuit. Sic ergo variis locis loquitur: *Sincerissimè credendum, atque profitendum est, Deum velle, ut omnes salvi fiant: siquidem Apostolus, cuius ista sententia est; absolutissimè præcipit, quod in omnibus Ecclesiis piissimè custoditur, ut Deo pro omnibus supplicetur. . . . Qui ergo dicit, quod Deus non vult omnes homines salvos fieri, sed certum numerum Prædestinatorum, is durius loquitur, quam loquendum est de altitudine inscrutabilis gratiæ Dei, qui omnes vult salvos fieri, atque ad agnitionem veritatis venire. . . . Sive igitur novissima contemplemur sæcula, seu proxima, seu media, rationabiliter & piè creditur, omnes homines salvos fieri Deum velle, semperque voluisse. . . . & ideo manifestum est, quod diversis atque innumeris modis omnes ad se invitet; sed qui veniunt, Dei auxilio diriguntur; qui non veniunt, suā pertinaciā reluctantur. . . . Nulla ergo dubitandi ratio est, JESUM Christum Dominum nostrum pro impiis, & peccatoribus mortuum esse, æquorum numero, si aliquis liber inventus est, non est pro omnibus mortuus Christus; sed prorsus pro omnibus mortuus est.* (a)

S. Leo: *Pro omnibus impiis mortuo Domino, etiam Judas in eo potuisset consequi remedium, si non festinasset ad laqueum. . . . Dominus enim noster peccati, mortisque destructor, sicut nullum à reatu liberum reperit, ita liberandis omnibus venit.* (b)

S. Ambrosius: *Mysticus ille Sol Justitiæ omnibus ortus est, omnibus passus est, omnibus venit, & omnibus resurrexit.* (c)

S. Augustinus: *Judicabit orbem terræ in æquitate, & populos in veritate sua. Quæ est æquitas, & veritas? Congregabit secum electos ad iudicium; ceteros autem separabit ab invicem; positurus enim est alios*

(a) Floruit A. 460. In Resp. ad 2. Vincent. Obiect. & in Resp. ad Obiect. Gall. sentent. 8. Et lib. 2. cap. 16. & cap. 25. de Vocat. Gent.

(b) A. 461. serm. 11. de Pass. & Serm. 1. de Nativit.

(c) A. 397. in Psalm. 118. v. 64.

alios ad dexteram, alios ad sinistram; non ergo partem judicabit, quia non partem erit; totum judicare habet, quia pro toto sanguinem dedit. Et alibi Christum Dominum ita Reprobos alloquentem inducit: *Videte vulnera, quæ inflixistis; agnoscite latus, quod pupugistis, quod & per vos, & propter vos apertum est, nec tamen intrare voluistis.* (a) Et lib. de Spir. & litera cap. 33. interrogat: *Cur voluntas credendi, si donum Dei est, non omnibus detur?* Et respondet: *vult quidem Deus omnes homines salvos fieri, non sic tamen ut eis adimat liberum arbitrium, quo vel bene, vel male utentes iustissime judicentur; quod cum fit, infideles contra voluntatem Dei faciunt, cum ejus Evangelio non credunt.* Sed de Augustini mente circa hujus sententiæ expositionem pluribus postea.

Concilium Tridentinum: *Et si Christus pro omnibus mortuus est, non omnes tamen beneficium ejus mortis accipiunt.* (b)

Ipsa denique Ecclesia mentem suam quotannis de hac re publice profitetur, cum Deum ita rogat: *Omnipotens sempiterne Deus, qui salvas omnes, & neminem vis perire, respice ad animas diabolica fraude deceptas, ut omni hæretica pravitate deposita, errantium corda respiciant, & ad veram fidei redeant unitatem.*

Ex his omnibus palam est, nullum omnino hominem esse, pro quo Christus passus non sit, & consequenter quem nolit efficaciter quantum est de se, saluum esse; quæ enim de se efficacior voluntas, quam cum aliquid ita optas, ut pro eo consequendo etiam sanguinem, ac vitam impendas? Planè ipso Salvatore teste, *maiores charitatem nemo habet, quam, ut animam suam ponat quis pro amicis suis.* Aut quid existimari potest, Deum non esse daturum, postquam Unigenitum dedit, cujus vita longè pluris, quam millies mille Paradisi valet. Nolit ergo Paradisum dare, qui voluit Filium? hoc est, negabit obolum, cui donavit thesaurum? Quæ argumentatio non nostra, sed Apostoli est dicentis: *Qui etiam pro nobis Filium suum Unigenitum dedit, quomodo ergo non cum illo omnia nobis donavit?* Quasi dicat Apostolus: noli timere, ne qui majus voluit, non velit & minus: negare nihil potest, postquam Filium dedit. Quid est Cælum ad Filium, nisi thronus ad Imperatorem? qui ergo ut regnaret, non pepercit Imperatori; quomodo ne pereas, non parcat throno? Si Medicus sanguinem suum omnibus venis profudisset sanando

C

ægro-

(a) A. 520. in Psalm. 95. & lib. 2. de Symbolo ad Cathecum.

(b) Concilium Trident. Sess. 6. cap. 3.

ægroto; quis dubitet, non eum ferid, efficaciterque ægroti sanitatem cupere, nihilque de aliis pharmacis omiffurum, opportunis quidem, sed multò minoris pretii, nulliusque Medico damni? Hoc argumentum eleganter inculcat S. Augustinus in Psalm. 148. *Tales arrhas accepimus, tenemus mortem Christi, tenemus Sanguinem Christi. Erigat ergo se humana fragilitas, non desperet, non se collidat, non se avertat, non dicat, non ero beatus. Quid enim tibi promissit Deus o homo mortalis? Quòd victurus es in æternum. Non credis? crede, crede: plus est iam, quod fecit, quàm quod promissit. Quid fecit? mortuus est pro te. Quid promissit? quòd vires cum illo. Incredibilis est, quòd mortuus sit æternus, quàm quòd in æternum vivat mortalis. Jam quòd incredibile est, tenemus. Si propter homines mortuus est Deus, non est victurus homo cum Deo? Planè hæc tam clara sunt, tamque omnibus manifesta, ut & Lectoris, & causæ ipsius injuria sit, diutius immorari, perinde ac si clarè videntibus persuadere multis rationibus velis, nivem candidam esse, solemque interdum lucere.*

V. Quòd si nihil Scriptura, nihil Patres de hoc Dei omnes homines salvandi proposito loquerentur; id ipsam apertissima ratio convinceret, & cui nemo nisi expers rationis repugnare possit.

Ubi tamen priùs observa, ut notavimus sub initio, duas in Deo esse voluntates, *antecedentem* unam, alteram *Consequentem*. Non quòd in diuina natura numerum, & multitudinem perfectionum admittamus; sed quia quæ in Deo unum sunt, ea ob eminentiam, & infinitatem suam pluribus, innumerisque perfectionibus creatis æquivalent; & ideo perinde quoad effectum se habeant, ac si plura essent; sicque à nobis per numerum, & in plurali explicantur, quamvis re ipsa sint res simplicissima. Ea ferè ratione, quàm dicimus, nummum aureum tres florenos argenteos complecti, non numero, cum unicus sit, sed valore, & pretio. Ita, inquam, duæ sunt in Deo voluntates. Prima absoluta, efficax, independensque ab omni hominum merito, quàm Deus naturaliter, meroque Bonitatis suæ instinctu, atque, ut ita dicam, *motu proprio* vult omnium hominum salutem, æternamque felicitatem; & ideo eos creat, eos redimit, & accomodatissimis ad hunc finem mediis accingit, aliter tamen, aliterque iuxta infinitæ, ac ordinatissimæ sapientiæ suæ modum. Et hanc vocamus *voluntatem antecedentem*, seu *voluntatem amoris*, quia nullam aliam causam habet, quàm, ut dixi, naturalem Bonitatis suæ instinctum, motumque proprium.

Hæc

Hæc,inquam,voluntas,quantum ex parte Dei efficax,& absoluta est. *Efficax*, quia vi huius voluntatis movetur Deus ad media non tantum huic fini necessaria,& commoda; verum etiam abundantissima, & præstantissima hominibus applicanda, adeo ut ne Unigenito quidem, nec sanguini, vitaque parcat, quod nemo facit, nisi qui finem flagrantissime, ac efficacissime ex parte sua cupit. Absoluta verò hæc ipsa voluntas dicitur; quia licet Deus *exequi* hanc suam voluntatem nolit, nisi homine consensum suum præbente, cum saluare invitum nolit: quod tamen creaverit, & quod ideo creaverit; ut æternam vitam adipisceretur; quodque in hunc finem nobilissimis, & validissimis mediis instruxerit; id totum gratis, totumque opus summi amoris, & bonitatis fuit, nihil homine ipso ad propositum, tam regie, spontaneæque adoptionis conferente, nullaque ex ejus parte conditione expectata. Sicut si Princeps juvenem mendicum sola miseratione, & pietate commotus hæredem ultimis tabulis scribat, quam tamen hæreditatem ipso facto consequi non possit, nisi ex natura ipsius Testamenti adeat, acceptetque, in hac inquam, hypothese voluntas mendicum instituendi, pura, absoluta, mereque gratuita est, nihil ad ipsam conferente Mendico, quippe omnium, quæ à Principe fiunt, ignaro. Voluntas tamen eiusdem Principis, ut actu ipso hæreditate potiatur, conditionata est; quia non vult aliter obtineri, quam hærede adunte, & acceptante. Ita in Deo, quod te voluerit condere, voluerit in filium, quantum est de se, adoptare, voluerit Regni cœlestis hæredem esse, in eumque finem mille, ac pretiosissimis te dotibus, & beneficiis exornaverit; meræ charitatis, & misericordiæ fuit, nihil te, tuisque meritis adiuvantibus. Voluntas verò, quæ decrevit, ne hoc ipsum Regnum obtineres, nisi velles, & merereris; quodque spoliare te illo voluerit, quia prævidit, te operari, & mereri nolle; hæc inquam, voluntas *conditionata*, & *consequens* dici debet, quippe ex prævisa voluntate, arbitrioque tuo pendens; quod Theologi nostri aliis terminis voluntatem intentivam, & executivam appellant.

Si tu verò solam illam, unicamque voluntatem de se efficacem in Deo dici velis, quæ effectum consequitur; litem quidem de nomine movebis, sed pessimè confusione terminorum rebus ipsis confusis; confusis enim terminis, confundi quoque rem ipsam oportet; ut si equo nomen Aquilæ; aut Romæ nomen Memphis imponas, nemo non inferet; ergo equum alas habere, & Romam Nilo rigari. Vo-

luntas ergo de se efficax illa dicitur, quâ quis rem aliquam tam seriò, impenseque intendit; ut illi consequendæ validissima media, omnesque officii sui partes impendat, seu deinde effectus sequatur, seu non sequatur; postquam enim omnes suas partes aliquis explevit, nec tamen effectum obtinuit; id non voluntati, non ignaviæ cupientis; Sed casui, alterivè impedimento imputari, ad scribiq; debet. Ita in Deo res se habet: Si enim eius salvandi omnes voluntatem consideres; tam illa impensa, & eximia est, ut jurejurando protestetur, *se nolle mortem peccatoris, sed ut convertatur & vivat*. Si efficaciam & abundantiam mediorum species, tanta est, ut etiam *proprio Filio non pepercerit, sed pro omnibus tradiderit illum, & cum illo omnia nobis donaverit*. Si denique examines, an omnes numeros, omnesque partes Salvatoris, & Redemptoris expleverit; id tam plenè, copioseque per actum; ut nihil exigere amplius possis: *quid enim, inquit, debui facere vineæ meæ, & non feci?* quæ cum ita se habeant, amabò te, quid voluntati divinæ deest, ut quantum ex se est, efficacissima appellari non debeat? *at effectus cessavit*. Esto; sed efficacia causæ, quantum est de se, non ex effectu, sed ex conatu, votoque; censetur, ut videlicet adedò velis; ut nihil eorum omittas, quæ fieri debent. Quod si non esset, omnia ferè vitæ Christianæ fundamenta corruerent.

Altera voluntas est hypothetica, & conditionata, quâ Deus peccatores punire constituit, si gratis à se copiosissimè oblati uti nolint, iisque in finem usque pertinacissimè oblucentur. Hæc voluntas, ut monui, conditionata est, quia supponit insuperabilem Peccatorum contumaciam, ac finalem impœnitentiam. Et hanc vocamus voluntatem *consequentem*, seu voluntatem *Iustitiæ*, quia non immediatè, motive proprio à Deo profisciscitur, sed ex Peccatorum protervia, oblatam veniam obstinatissimè recusantium.

Potest utraq; hæc in Deo voluntas exemplo clementissimi Principis ostendi. Is cum plures filios habeat, omnes magno amore complectitur, omnes paternæ hereditati destinat, & ideo cum civilibus, tum bellicis artibus per versatissimos Magistros imbui curat; omnes denique regio cibo, regio cultu, ac famulatu exornat; & si quem morbo affligi contingat, vitæque periclitari; dolet, timet, præmia medentibus spondet; non curis, non expensis parcat, nihilque non agit, ut laborantem restituat. Quod si eorum aliquem audiat, defectionem parasse, sibi que bellum, ac mortem moliri, ac patriam igne,

igne, ferro vastare; non ideo primum in filium rebellem amorem ponit, nec continuò propositum mutat, eum honoribus augendi; sed per Legatos, per epistolas, minis, præmiisq̃ue, ac reluctantem armis aggreditur, victumq̃ue veniã, & amplexu donat. Si verò intelligat nec oblatam veniam ab eo recipi, nec armis absistere, sed toti Regno perniciem meditari, nullisq̃ue rationibus à se, patriaq̃ue perdenda compesci posse; tunc enim verò mutato consilio, publicæq̃ue quietis causã pertinacem vinciri, ac perpetuã custodiã claudi jubet; quod nisi faciat, nemo non dicat Principis partibus defuisse, nec clementem in filium, sed ignavum in patriam appellet. Ita prorsus in Deo; nisi quodd quæ in hominibus pluribus consiliis, & propositis, ac per intervalla fiunt; in Deo unum consilium, unum propositum, unumq̃ue momentum est; sed quodd infinitate, ac eminentiã perfectiōnis omnia illa complectitur, quæ modò in Principe diximus. Nam quia anima hominis vna, eademq̃ue est, non ideo minùs vegetat, & sentit, quàm aliæ, innumeræq̃ue plantarum, brutorumq̃ue animæ. Et quia æternitas unicum instans est; non ideo minùs spatii, minùsque temporis occupat, quàm innumeræ annorum, ac sæculorum myriades. Et ut Plinius notat lib. 26. cap. 10. Panchios gemma, licet una sit, non ideo tamen *non ex omnium aliarum gemmarum, coloribus constat*. Sic in Deo, non ideo, quia eius voluntas una, eademq̃ue est, non omnes illas amoris, clementiæ, iustitiæq̃; partes complectitur, quas suprà recensuimus. Et quamvis nulla sit in Deo, quippe immutabili, successio cogitationum, ut modò istud, modò re mutata aliud velit, est tamen ordo, & connexio Decretorum, cum & ista sit maxima perfectio confusio opposita. Sicut enim, quia Deus est substantia immaterialis, ideo cognoscit: & quia cognoscit, ideo amat, & quia amat, ideo providet: Ita quia est infinitè bonus, ideo vult omnibus à se conditis bene, & quia bene vult, vult neminem perire, & quia neminem vult perire, nulli copiosissima ad hunc finem media negat, & quia tandem videt, nolle aliquos oblatis mediis proficere, nullumq̃ue delinquendi finem facere; ideo vult punire, ne iustitiæ suæ desit. In quibus omnibus non alternatio, & vicissitudo cogitationum est, sed ut dixi, ordo, & conexio, qualis esse in natura simplicissima potest. Vult ergo Deus, quippe omnium Pater, omnes homines saluos esse, vult Regno potiri, vult hæredes scribi, idq̃ue amore non qualicumq̃ue, sed paterno, hoc est, omnium maximo, ac sincerissimo, Et si qui rebelles evadant;

dant; non ideo propositum, & amorem mutat; monet, rogat, invitatur, terret, minatur, mittit; prosperis, adversis urget, veniam, pacemque offert. Et ecce tibi voluntatem Dei *antecedentem, seu propositum amoris*, omnes saluare festinantis, Si verò nihil ista proficiant, peccatore omnem veniam, omnemque gratiam respuente; tunc enim verò succedit *voluntas consequens*, ac propositum Justitiæ, quo ne officio Judicis desit, neque impunitate delicti licentiam delinquendi foveat; rebellem ad pœnam, & supplicium vocat, semper tamen affectu, & charitate Patris, nunquam in filii pœna, etiam criminosi latantis. Ea ferè ratione, quâ videmus pretiosissimas, & charissimas merces naufragii metu à Domino, & Mercatore jactari, invito tamen, & ad singulos jactus plorante: Sic Deus amat, etiam cum perdit: perdit tamen, ne Justitiæ naufragium faciat. Hinc illæ voces Isa. 1. vers. 24. Matth. 23. *Heu consolabor super inimicis meis! Ierusalem, Ierusalem, quoties, volui congregare filios tuos, & noluisse? Nunc ergo relinquetur domus vestra deserta.* Vides hîc deferentem, & tamen plorantem, jactat, & gemit; sed hoc amori, illud Justitiæ debet; periret Justitia, nisi plecteretur culpa. Reigitur sic explicata, rationes modò audiamus, quibus hæc ipsa, & efficacissima omnes homines salvandi voluntas magis, magisque demonstrabitur. Nam

VI. *Primò.* Deus ex sua natura est infinita Bonitas, infinitus Amor; ergo quantum ex se est, omnibus bene vult, omnesque amat; & consequenter nullum perire vult; sicque si cui male sit, si quis pereat, id principio omnis mali adscribendum est, quod est peccatum, non principio omnis boni, quod est Deus. Quemadmodum quia sol ex natura sua lucidissimus est, ideo omnia luce, ac radiis implet, nihil verò tenebris, umbrisque aspergit, & ideo quidquid umbrarum existit, illud non in lucem, non in Solem, sed in corpus opacum luci oppositum referri debet; ita, inquam, Deus, quia infinitus amor est, omnes amat, & quia infinitum bonum est, omnibus bene vult; mala verò aliunde, quàm à bono derivantur. Imò, quod bene observandum est; non solum natura boni, & amoris est, ut se aliis quovis modo communicet; verum etiam ut formam adversam expugnet, deleatque repugnantem, sicque non utcumque, sed cum triumpho regnet, hostesque profligato. Quod præsertim locum habet in agente nobilissimo, hoc est, copiosissimè bono. Sic videmus, solem non tantum, ubicumque micuerit, lucem omnibus as-

fun-

fundere; verum etiam tenebras pellere, & quantum licet, in sui naturam convertere, ut in nube, in iride, in stellis, in auro, gemmisque cernere est, quæ omnia sunt aliqua ipsius Solis imitatio. Ignis quoque non solum calefacit, verum etiam frigore, geluque soluto omnia sibi similia efficit, & in alium ignem convertit. Quod si aliqua obstant, nec agenti cedant, ut noctua Soli, adamas igni; non idem tamen negari potest, ignem, & Solem, quantum in ipsis est, conari, ut dotes, & perfectiones suas etiam resistentibus imprimant. Idem de Deo sentias. Cur enim hunc solum ab omnium agentium conditione excludas, ut cum omnis causa similitudinem sui affectet, ipse solus aut non velit, aut non possit, qui omnibus dedit, ut vellent, & possent? Vult ergo, quantum in se est, omnes bonos esse, quia ipse bonus est; vult omnes iustos esse, quia ipse iustus est: vult omnes felices, & beatos esse, quia ipse felix, & beatus est: & denique vult omnes sibi similes esse, quia id omnibus causis, ac præsertim præstantissimæ, & nobilissimæ ingentum, & naturale est; nec ipsa Beatitudo (quæ est omnium operum Dei ultimus finis) aliud erit, quam perfectissima creaturæ cum Creatore similitudo, juxta illud Joannis: *Similes ei erimus, quia videbimus eum, sicuti est*. Majus ergo prodigium esset, Deum optimum, & felicissimum nolle, quantum in se est, aliquos felices esse, quam Solem sui exortu alicubi noctem efficere, ignem paleas adiectum alicubi gelu, non flammam excitare.

Hinc Stoicorum hallucinatio ostenditur, dicentium: Deum, cum nullius creaturæ indigeat, sibi que sufficiat; nulli quoque diligendæ obstringi, sed pro arbitrio, ut supremum in eas dominium ostendet, negligere, persequi, ac perdere eas posse, ut aucupes, & venatores cum feris, cum præda solent. Verum qui sic philosophantur, Tiberium aliquem, aut Neronem Dei nomine intelligunt, quibus nullum majus potentiæ, & majestatis argumentum videbatur, quam per strages, & supplicia in ciues grassari. Perinde ac si nulla alia Deo ratio super sit, potentiam, & dominatum suum in homines comprobandi, quam illos perdendo, Domitiani Cæsaris exemplo, muscas animi causâ aureo stylo figentis. At verò quam non est Imperatoris muscas persequi, tam non est Dei, homines perimere; quid enim aliud est homo ad Deum, quam musca ad Imperatorem? Nihil ergo ad potentiam Dei muscarum strages. Quod si talis esset Deus noster, qualem isti concipiunt, merito opponi ei posset,

set, quod olim Arminius Germanico Cæsari, cùm ingentibus copiis cinctus, vxorem abduxisset: *Egregium patrem! Magnum Imperatorem! Fortem exercitum! Quorum tot manus unam mulierculam abduxere.* (a) Non ergo potentiae argumentum est, perdere animas, sed servare; sicut nec præstantissimi artificis frangere crySTALLUM, sed sculpere: nec eximii pictoris delere imaginem, sed pingere. Et ideo optimè dixit Sapiens: *Misereris omnium Domine, quia omnia potes.* Vides, ubi posuit potentiam? Non in vindicta, non in suppliciis, sed in venia, & in clementia. Imò, ut notat Aristoteles: lib. 2. Rhet. *Maximè ob imbecillitatem nascitur ira.* Et ideo mansuescere Leones, ac Elephantes videmus, nunquam tamen mures, & vespas. *Sunt leges,* inquit Ambrosius, lib. 5. Hexam. cap. 21. *Non scriptæ litteris, sed moribus impressæ, ut leniores ad puniendum sint, qui maxima potestate funguntur.* Et S. Hieronymus in Isaiam cap. 28. *Non est opus Domini perdere, quos creavit: & punire peccantes peregrinum, & alienum ab eo, qui Salvator est.* Nec minùs eleganter S. Augustinus Serm. 109. de Temp. *Qui nos tanto pretio redemit, non vult perire, quos emit, nec enim emit, quos perdat, sed emit, quos vivificet.* Falsissimum ergo est, ideo Deum salvari aliquos nolle, ut appareat, Dominum esse; cùm potius dominii, & potentiae argumentum sit, parcere, & servare, cùm possis delere. At, inquit, *Deus nullius creaturæ indiget, & ideo non tenetur amare.* Imò quia non indiget, ideo amat; si enim amaret, quia indigeret, non is amor, sed quæstus, & paupertas esset. Tria ergo sunt, quæ Deum ad amandos homines provocant. *Primò, infinita illius perfectio:* Bonitatis enim proprietas est, se aliis quoque, utcumque capaces sint, communicare, more videlicet amnis, qui si modicus sit, intra ripas, & alveum fluit; si plenus, redundat, & omnia, quæ circumalluit, gramine, ac floribus vestit. Quàm ergo Deus non potest non bonus, ac optimus esse; tam non potest non homines amare. Necessitas ergo homines amandi, non in homine, sed in ipsa Dei natura principium, ac fontem habet, & ideo perpetua, & universalis est. Quam rationem S. Thomas 1. contra Gentes cap. 73. his verbis expressit: *Deus solus est maximè liberalis, quia non communicat, & tribuit, ut aliquid sibi accrescat, sed quia ipsum communicari est sibi conveniens, tanquam fonti Bonitatis.* Deinde cùm homo sit opus & factura Dei, non potest Deus non amare, quod ipse fecit, alioquin in artificis con-

tem-

(a) Tacitus lib. 1. Annal.

temptum cederet odium operis; quantoque præstantius opus, ac
 majoris pretii; tantò major amandi illud, & conservandi cupiditas,
 tantoque si prolicias, aut inter vilia reponas, major Auctoris injuria:
 quidquid enim contra tabulam, contra domum, contra statuam di-
 xeris, id totum in pictorem, architectum, sculptoremque redun-
 dat. Hinc etiam tanta parentum in partus suos dilectio, & cura;
 nec hominibus tantum, sed brutis etiam, ac rebus inanimatis im-
 pressa: quanta in parandis nidis, ciboque pullis quærendo volucrum
 solertia? Pelicanus sanguine pascit: Aquila opposito corpore à telis
 venantium tuetur: Vrsi, Leones, Tigrides in ferrum, & mortem
 ruunt, ut catulos servent. Amant etiam Dracones, & Basilisci, quæ
 genuerunt. Denique nihil tam barbarum, tam sævum, tam rationis,
 vitæque expers, quod non suorum amore tangatur. Deus ergo, qui
 hunc ipsum amandi impetum rebus omnibus impressit; ipse solus
 non amabit, quæ fecit? Ipse omnium artificum, omniumque pa-
 rentum solus erit, qui operibus, qui filiis suis excidium malit, quàm
 vitam? Eum solum & Dracones, & Basilisci amore superabunt?
 Planè indigna sunt ista, quæ de Deo omnium Opifice, omniumque
 parentum optimo vel cogitentur. Amat ergo, & flagrantissimè
 amat, quia Pater, quia Conditor, quia odium, & contemptus ope-
 ris in ipsum Auctorem rediret; sicque quàm non potest se ipsum,
 tam non potest opera sua non amasse. Hanc rationem optimè Sa-
 piens expressit: 11. vers. 25. & 27. *Diligis enim omnia, quæ sunt,*
& nihil odisti eorum, quæ fecisti; nec enim odiens aliquid fecisti, aut
constituisti; parcis enim omnibus, quia tua sunt Domine, qui amas
animas. Vides hinc iterum, nihil excipi, nihil excludi, sed omnia diligi;
 diligi verò, quia Dei sunt opera. Et simul observa, hæc non de electis,
 sed de reprobis, Pharaone videlicet, ejusque infidelibus populis di-
 cta esse. Si ergo diligit Deus omnes homines, ergo salvari vult om-
 nes, nullumque perire; amoris enim est, amato bene velle, malum-
 que nolle. Sciendum quoque est, hominem non qualecunque Dei
 opus, sed imaginem esse; imaginem verò non penicillo, non auro,
 non minio, aut Apellis arte, sed Dei ipsius manu confectam, & in
 cujus anima longè vivaciùs Dei facies, ac pulchritudo efflorescit,
 quàm Solis in Iride, & Narcissi in fonte, limpidaque crytallo.
 Nullus autem odisse, aut averfari potest imaginem ejus, quem amat;
 imò quò major dilectio, tantò impensius amplexu, osculoque ima-
 ginis delectatur, nec satiari aspectu potest. Quòd si ex adverfo ima-
 ginem

D

ginem

ginem conspuat, aut contumeliis afficiat, signum id odii est, & contemptus in personam revolvitur; unde Senator Romanus capitis damnatus est, quod manum annulo, signoque Tiberii Cæsaris insignem ad servilia protulisset. Cum ergo Deus se ipsum infinito amore prosequatur, imaginem sui, hoc est, hominem odisse non potest; aut si illum odio, & contemptui haberet, id ipsum in eum redundaret, cujus homo effigies, & adumbratio est. Hoc ipsum insinuant illa Sapientis verba 12. vers. 18. *Tu enim dominator virtutis cum tranquillitate judicas, & cum magna reverentia disponis nos*. Reverentia inferioris est ad Superiorem, aut paris ad parem: unde ergo Deo in creaturas, tantæ Majestati in ancillam reverentia, nisi quia Dei imaginem gestat, imago verò, nomenque Principis non auro tantum, aut gemmis (ut olim Alexander sculpi se jufferat) verum etiam ceræ, & plumbo incisa fidem, ac honorem merentur; nec Augusti Legatum privata conditio venerabilem facit, sed quod Cæsarem referat.

Denique præcipuum amandi homines incentivum sanguis, ac merita Redemptoris sunt. Postquam enim Christus humanam naturam induit, ac pro omnibus hominibus, nemine excepto, sanguinem fudit, Deus non utcumque, ac ut puram naturam hominis animam intuetur, sed ut Filii sui sanguine redemptam, ejusque meritis dotatam, ac regni cœlesti hæredem constitutam; sicque licet propria conditione sordidam, ac peccatricem, divinique amoris indignam; tanti tamen Advocati, & Mediatoris patrocinio insignem. Amat ergo illam non proprio, sed Mediatoris merito; nec quia dignam infinito Amatore, sed quia à Filio, quem infinite diligit, commendatam; ita videlicet, ut tota ratio hominem diligendi non sit meritum, aut conditio Dei, sed interpellatio, & Majestas Advocati. Quis enim tam grandis latro, & tam supplicio dignus, quem Judex non absolvat, si pro Advocato Cæsarem habeat? Ita inquit S. Joannes 1. cap. 2. *Filioli mei, hæc scribo vobis, ut non peccetis; sed si quis peccaverit, Advocatum habemus apud Patrem JESUM Christum justum, & ipse propitiatio est pro peccatis nostris: & non tantum pro nostris, sed etiam pro totius Mundi*. Vides, non aliquorum, non paucorum, non Electorum tantum, sed omnium Advocatum. Sicut ergo nemo tam peccator, nemo tam reprobus est, cujus causam non Unigenitus Dei suscepit; ita quoque nemo est, qui sperare veniam non debeat, qui que à Deo non ardentissime diligatur.

gatur, nullo quidem merito suo, sed magno Mediatoris patrocinio. Neroni in speculo, quod ex Smaragdo confecerat, Gladiatores spectanti, etiam vulnera, & sanguis in theatro pugnantium florida, ac speciosa videbantur, non quodd talia essent, sed quodd talia in Smaragdo viderentur: Ita nemo peccator tam fordidus, nemo tam saucius, qui non aliquid habeat, quod vehementer ametur, si Deus illum non in se ipso, sed in gemma; hoc est, in Redemptore consideret.

Ergo, inquires, Deus necessariò hominem amat, hoc est umbram, folium, guttam, meramq; vanitatem? Atqui hoc indignum tanta Majestate, perinde ac si Rex aliquis ad caulam, hortumq; colendum se demittat, aut amore ardeat vilissimæ, ac rusticæ Virginis, quæ nihil habeat, quod cum forma, ac dignitate amantis comparari possit. Resp. Homines à Deo & liberè, & necessariò amari. Liberè, quia potest creare, aut non creare; necessariò, quia postquam creavit, fieri nequit, ut non amet, cum amare sit velle bonum: primum autem, maximumq; bonum, & reliquorum omnium fundamentum est, esse; diligit ergo Deus, quoties dat esse, quæ tamen necessitas, cum sit hypothetica, & consequens voluntatem, nihil obstat liberati. Deinde diligit Deus homines, quatenus aliquid sunt Dei, ut supra docuimus, sicque non eorum pretio, sed intuitu, ac merito sui: Neque id infinitam ejus magnitudinem dedecet: dedeceret enim, si amando creaturas aliquid commodi ab istis reciperet, aut earum pulchritudine raperetur, ut homines solent, id enim ad indigentiam, & cupiditatem pertinet. At Deus non supponit bonum, aut pulchrum, sed facit; nec in creaturis amat, quod est creaturæ, sed quod est suum: sicut cum Pontificis imaginem in tela veneraris, nihil indignum homine, aut præstantiâ tuâ facis, licet enim multò tu imagine nobilior, quia tamen non telem, non colores, sed Pontificem in signo, ac imagine colis; ideo nemo id obsequium vitio vertet, imò verteret, si omitteres. Sic Deus nihil in homine amat, nisi opus, ac imaginem suam, hoc est, se ipsum in speculo, & radio expressum. Si ergo, ut ostensum est, Deus omnes homines amat, sequitur, ut omnes quoque, quantum ex se est, salvos, ac felices esse velit: hoc enim est amare, amato bene velle, malumque nolle.

VII. *Secundo.* Cum dicis, Deum aliquos tantum, non omnes salvos esse velle, sicque voluntate propria, nulloque ad culpam respectu alios ad æternam vitam destinare, alios excludere, quero, cui

Dei attributo hanc exclusionem adscribas? nihil enim in creatis est, quod non in aliquam Dei perfectionem derivetur. Quod creavit; *Potentia*, & *amoris* est: quod vestit, & nutrit; *Providentia*: quod parcit; *Misericordia*: quod donat; *Liberalitatis*: quod punit; *Iustitia*: quod in amorem sui rapit; *infinite pulchritudinis*: denique nihil isthuc derivatur, quod non fontem, & venam habeat in aliqua perfectione, Dei quæ attributo. Quæro ergo, cui causæ, cui attributo referas voluntatem illam insuperabilem tot millia æterna felicitate excludendi? *Amori*? At amantis est, velle alteri bonum, non nolle. *Misericordia*? At miserentis non est, veniam negare, sed dare. *Potentia*? At, ut supra monstravimus, potentis est opus struere, non demoliri. *Iustitia*? At Iustitia supponit culpam, & causam prius in delicto, quàm in voluntate Dei, ac vindicta Judicis habet; si ergo Deus eos tantum excludit, quos reos prævidit, quique perire, quàm renuntiare delicto maluerunt, jam ad voluntatem *consequentem*, non *antecedentem* pertinet, sicque non in bonam Dei, sed in malam hominis voluntatem referri debet, Deo vitam, sed peccatore mortem, ac supplicium eligente. Nihil ergo est in Deo, cui possis hanc primam voluntatem non omnes salvandi attribuire. Frustra nodum in scirpo, & fulmen in hac iride quæris: non est indoles summi Boni, velle homini summum malum.

VIII. *Tertiò*. Nemo quàm plurima, & opportunissima ad consequendum finem media adhibet, si finem ipsum non velit; id enim amentis esset, aut alios ludere volentis. Quis enim balnea, sectio-nes, inediam, aliasque medicinas admittat, qui sanitatem nolit? Quis vineam plantat, colit, putat, depampinatque, ea voluntate, ut vindemiam non colligat, aut etiam incendat? Quis venatur, piscatur, si prædam nolit? Cum ergo Deus non *Electis* tantum, sed *Reprobis* etiam pretiosissima, ac ferè innumera media paraverit, mandata videlicet, internas, externasque inspirationes, Angelicam custodiam, ac quod præcipuum est, sanguinem, mortemque suam, qui, inquam, hæc media omnibus voluit, ac etiam dedit, quæ potuit finem ipsum noluisse? quorsum tot pharmaca, & tanto pretio confecta, si noluit sanari? quorsum tot vela, tot remi, & tam longa navigatio, si noluit ad portum appellere? planè nihil aliud hoc esset, quàm oleum, & operam perdere. Cumque nihil simile in operibus naturæ, imò ne in hominum quidem quibuscumque negotiis videre sit, sacrilegum foret, in operibus gratiæ, tantò illis superioribus,

can-

santiſque momenti de Deo hunc ludum, & larvam ſuſpicari.

IX. *Quartò*. Id ipſum efficaciffimè oftenditur, ſi illa conſideres, quæ immediate à divina voluntate proveniunt, citraſque hominis arbitrium: hæc enim omnia, quia ſolius Dei ſunt, ordinatiſſimè, nulloſque errore ad fines ſuos diriguntur. Nunquam Sol ſuum curſum abrumpit, aut Ecclipticam exit. Nunquam Luna ſuum orbem non implet. Nunquam flumina aliò, quàm in mare volvuntur, nec alibi finem currendi faciunt. Nihil deest avibus ad volandum; nihil piſcibus ad natandum; nihil Aquilæ ad prædam faciendam. Et bruta omnia, quamvis eſuriant, & ament, nihil tamen eſt, quod in eorum epulis, & conjugii vitium imitetur. Et quamvis monſtra ſubinde, aut prodigia contra communes leges eveniant; ea & rariſſima ſunt, & ſerviunt homini, qui finis eſt omnium ratione carentium. Verbo quidquid immediatè à Deo eſt, finem ſuum conſequitur. Ergo, multoſque magis, quantum ex parte divinæ voluntatis eſt, omnes homines, modò ratione polleant (nec enim de infantibus modò loquimur) ad finem ſuum, hoc eſt, Dei poſſeſſionem diriguntur, quem niſi aſſequantur, non hæc Dei ſemper metam ferientis, ſed hominis culpa eſt. Cur enim Deus, quantum in ſe eſt, in ſolo homine operum ſuorum nobiliſſimo finem hominis nolit, & tot monſtra, quot damatos, & peccatores pariat?

X. Si Deus, quantum eſt ex ſe, nulloſque ad culpas hominum reſpectu, non vult omnes ſalvos, ſed quàmplurimos Cæli, ac Redemptionis ſuæ expertes eſſe; ergo non conſtat, Deum mihi Cælum parâſſe, mihi quoſque redimendo paſſum, ac mortuum eſſe; imò ſuſpicari meritò poſſim, me de illorum eſſe numero, quos voto, ac ſponte ſua Cælo inter tam multos excludit. Quod ſi ita eſt, cadunt totius vitæ Chriſtianæ præcipua fundamenta, ſpes videlicet, & amor: præcipua enim amandi, ſperandiſque ratio eſt, quia *prior dilexit*, quia *Filium ſuum unigenitum tradidit*; at non conſtat, quid me quoſque dilexerit, & quid pro me Filium quoſque tradiderit. Quomodò ergo ut Redemptorem amabo, quem ignoro, an Redemptor meus ſit? Quomodò in merita, mortemque illius ſperabo, quem nescio, an mihi quoſque meritis, mihi mortuus ſit? Planè ut nemo tenetur Navarchum eligere, ejuſque fidei vitam ſuam committere, quem nescit, an navigandi peritus ſit, & de quo meritò dubitat, velit in portum ducere, an potiùs in ſcopulum, deſertamque inſulam exponere; ita nemo tenetur in Redemptorem ſperare, ſi nesciat, ſuum

suum quoque Redemptorem esse, ac seriam, & efficacem voluntatem se quoque salvandi habere; at scire non potest, si non omnes voluit, si non omnes redemit. Adde, neminem sperare aliquid posse, qui plures non sperandi, quàm sperandi rationes habet; tunc enim validior, maiorque metus minorem fiduciam vincit. Atqui nisi Deus, quantum ex se est, velit efficaciter omnes salvos, omnes sanguinis sui participes esse, sed quàm plurimos sponte sua Cælo excludit; sequitur, plura mihi fundamenta non sperandi, quàm sperandi in Redemptorem suppetere; cum enim plures sint relictæ, quàm electæ; plures quoque sunt, qui exemplo suo ad non sperandum, quàm sperandum invitant, quot enim relictæ, tot sunt non sperandi argumenta. Quomodo ergo sperare in Redemptorem iubes, cum plura non sperandi incentiva occurrant, omnemque fiduciam exinguant? Fracta est anchora, paratumque naufragium, si vera sunt, quæ dicis. At vera esse non possunt, quia cum Scripturis, cum Religione, cum Christianæ vitæ principiis, cum morum honestate pugnantia: quem enim non pigebit, Christianum, & innocentem esse, spe omni sublata?

XI. Restat, ut Sanctorum quoque Augustini, & Thomæ de hac re sententiam rogemus. Cum enim, quoties de Prædestinatione agitur, præcipuam isti paginam faciant, fidemque mereantur, semper deinceps eorum testimoniis, & autoritate causam nostram armabimus, sic enim istorum accessu nulla ratio dubitandi supererit.

S. Augustinus de Spiritu & littera cap. 3. *Vult Deus omnes homines salvos fieri, & in agnitionem veritatis venire; non sic tamen, ut eis liberum adimat arbitrium, quo bene, vel malè utentes iustissime iudicentur; quod cum fit, infideles quidem contra Dei voluntatem faciunt, cum ejus Evangelio non credunt, nec ideo tamen eam vincunt, verum se ipsos fraudant magno, & summo bono, malisq; pœnalibus implicant, experturi in suppliciis potestatem ejus, cujus in donis misericordiam contempserunt. Ita Dei voluntas semper invicta est, vinceretur autem, si ullo modo possent evadere, quod talibus ille constituit. Qui enim dicit v. g. volo, ut omnes servi mei operentur in vinea, & post laborem quiescentes epulentur, ita ut quisquis eorum hoc noluerit, in pistrino semper molat: videtur quidem quicumq; contempserit, contra voluntatem Domini sui facere; sed tunc eam vincet, si & pistrinum contemnens evaserit, quod nullo modo fieri potest sub Domini potestate. Ille igitur reus erit ad damnationem sub potestate ejus, qui*
con-

contempserit ad credendum misericordiam eius . Tria hic docet Augustinus . Primum , velle Deum , omnes homines salvos fieri , neque Prædestinatos tantum , sed etiam Reprobos , nam de Reprobis tantum dici potest , quod contra voluntatem Dei faciant , cum eius Evangelio non credunt , & se ipsos magno , & summo bono defraudent . Secundum , Quod si aliqui non salventur , id non Deo , sed libero arbitrio tribuendum , quo male utentes iustissime judicentur . Tertium , nec ideo tamen vinci , frustrarique Dei voluntatem posse , cum illa semper aut obedientes coronando impleatur , aut rebelles puniendo ; sicque semper in Deo voluntatem salvandi præcedere , sequi verò voluntatem perdendi .

Idem Augustinus quàm plurimis locis præsertim verò in responso ad articulos sibi falsò impositos , art. 7. & art. 14. eam sententiam pro certissima inculcat , repetitque , *Deum neminem deferere , antequam deferatur .* Atqui hæc regula Augustini falsissima est , si Deus ab æterno , ac propria voluntate , nullaque ne prævisa quidem culpa voluisset tam multos non salvari : quæ enim major , & antiquior desertio fingi potest , quàm ab æterno nolle certò perituros , ne pereant , tenere ?

Aliud quoque insigne Augustini testimonium est lib. 2. de peccatorum meritis cap. 17. ubi sic loquitur : *Cum voluntate humana , gratia adjuvante divinâ , sine peccato in hac vita possit homo esse , cur non sit , possem facillimè , & verissimè respondere , quia homines nolunt . Sed si ex me queritur , quare nolint ? imus in longum . Verumtamen etiam hoc sine præiudicio diligentioris inquisitionis breviter dicam . Nolunt homines facere , quod iustum , sius quia latet , an iustum sit , siue quia non delectat : Tanto enim quidquam vehementius volumus , quanto certius , quàm bonum sit , novimus , eos delectamur ardentius . Ignorantia igitur , & infirmitas vitia sunt , quæ impediunt voluntatem , ne moveamur ad faciendum opus bonum , vel ab opere malo abstinendum . Ut autem innotescat , quod latebat , & suave fiat , quod non delectabat , gratia Dei est , quæ , ut homines non adjuventur , in ipsis causa est , non in Deo .* Quæ verba allegat . S. Fulgentius lib. 1. ad Monimum : *In istis , inquit , Augustini dictis attende quæso mi charissime , primum , quia ut homines non adjuventur à Deo , in ipsis causa esse dicitur , non in Deo .* Quid clarius dici potest ? Vult salvare , vult juvare etiam eos , qui salvari , & juvari nolunt , ergo Deus , quantum est ex se , neminem à salute excludit , ergo includit omnes ; nec Prædesti-

destinatos tantum, verum etiam Reprobos, isti enim sunt, & non illi, per quos stat, ne juventur.

Et iterum Tract. 12. in Joan. circa finem in ea verba: *Non enim misit Deus filium suum, ut iudicet Mundum, sed ut salvetur Mundus per eum: Ergo, inquit, quantum in medico est sanare venit agrotum. Ipse se interimit, qui præcepta Medici observare non vult. Venit Salvator ad Mundum; quare Salvator dictus est Mundi; nisi ut salvet Mundum, non ut iudicet Mundum? Salvati non vis ab ipso? ex te ipso judicaberis.* Plura notatu dignissima hîc docet Augustinus. *Primò, Velle Deum omnes, etiam reprobos salvos fieri; reprobi enim soli sunt, qui se ipsos interimunt, qui præcepta Medici observare nolunt, qui salvari recusant. Secundo, Nec utcumque, sed efficaciter, & impensissimè hanc ipsam omnium salutem velle Deum: Ille enim efficaciter vult, qui facit, quantum in se est, & cui imputari non potest, si ex voto res non succedat; atqui juxta Augustinum, Deus, quantum in se est sanare venit agrotum, qui si non sanatur, ideo est, quia sanari non vult. Tertiò, Quod ex antecedentibus sequitur, nihil ex parte Dei ad omnium salutem deesse, & consequenter in Decreto Prædestinationis neminem ab æterna gloria, quantum in Deo est, fuisse exclusum (alioquin si Deus ante omne prævisum demeritum exclusisset aliquos, istis ex parte Dei, nimium quantum ad salutem defuisset, videlicet voluntas Dei eos salvandi) scique qui exclusi sunt, non Deo, sed prævisis demeritis, culpisque suis hanc exclusionem debere.*

Idem Augustinus rem totam eleganti similitudine illustrat in Psalm. 63. ad finem; *Ubi: quod pluit in agrum uberem, dulce est, & quod pluit in agrum spinosum, dulce est, nunquid pluviam accusas, quod spinas genuerit? nonne erit pluvia illa testis in iudicio Dei, & dicet: ego dulcis super omnia veni. Tu ergo quid proferas vide, ut quid tibi pareatur, attendas. Profers frumentum? horreum spera. Profers spinas, ignem time. Sed nondum venit aut tempus horrei, aut tempus ignis. Nunquid consilii corrigendi, & mutande vitæ male in bonam non est tempus? non est locus? nonne si vis, hodie fit? nonne si vis, modo fit? quid empturus es, ut facias, quæ emplastra quæsiturus? ad quos Indos navigaturus? quam navim paraturus? ecce dum loquor, mutacor, & factum est.* Et iterum in Psalm. 101. *Sanabit te Christus, sed opus est, ut sanari velis. Sanat omnino ille quidem, sed non sanat invitum. Quid enim in te beatius, quàm ut tanquam, in manu tua vi-*

tate

tam, sic in voluntate tua habeas sanitatem. Hic iterum multa dicit Augustinus, quæ ad causam nostram muniendam mirificè faciunt. *Primo*, enim docet, divinam gratiam instar *pluvie dulcis super omnia venire*, hoc est, omnibus dari, bonis videlicet agris, & malis, fecundis, & sterilibus, electis, & reprobis; sicque Deum, quantum ex se est, omnibus salutem velle, ideo enim omnibus dat gratiam, quâ salventur, sicut cælum ideo omnibus pluit, ut omnibus proficit. *Secundo*, quoddam aliud ager proferat frumentum ad horreum, aliud spinas ad ignem, id non pluvie, quæ omnibus dulcis est, adscribendum, sed bonæ, aut malæ agrorum glebæ. Ita quoddam alii bene, alii malè operentur, sicque quoddam alij sint electi ad cælum, velut frumentum ad horreum, alii verò sint reprobi, velut spinæ ad ignem, id non cæli, non pluvie, hoc est, non Dei, non gratiæ defectum, sed peccatorum esse. Quæ omnia falsa sunt, si Deus non vult omnes salvos esse; id enim perinde esset, ac si cælum in frumenta tantum, non etiam in spinas plueret. Et quoddam plures cælo, ac salute careant, non penes peccatores tantum, sed maxime penes Deum defectus esset. Quis enim major defectus, majusque impedimentum ad opus esse potest, quàm nolle artificem? Nec posset Deus in extremo iudicio dicere peccatoribus: *Ego dulcis super omnia veni*: possent enim respondere, non fuisse omnibus dulcem, qui noluit omnium misereri, sed misereri tantum eorum, quos sponte ad Regnum elegit; non verò illorum, quos sponte proscripsit. *Tertio*, docet Augustinus, in omnium potestate, ac arbitrio esse, ut vitam suam quovis momento corrigant, mutenque in aliam: *ecce*, inquit, *dum loquor, muta cor, & factum est*: atqui hoc verum non est, nisi ex parte Dei nihil desit, quod ad opus faciendum desiderari possit: Nam si illam vacuum tantum gratiam sufficientem admittas, cum qua nemo operatur, aut saltem in finem usque perseverat, quomodo sperare possim, me cor mutaturum cum ea gratia, cum qua jam à quinquies mille annis, nemo unquam cor mutavit, nemo mutaturus est? Ego sperabo, futurum mihi, quod nemini hactenus factum est, nemini fiet? Vota ista, & spes sunt dormientium, non vigilantium. *Quarto* alia Medici similitudine utitur Augustinus, eaque probat, nullum penitus esse, quem Deus sanare non velit, quoddam si aliqui non sanentur, non ideo esse, quod Deus nolit; sed quoddam ipsi non velint: *sanat omnino quemlibet, sed non sanat invitum*. Ubi vides, loqui Augustinum de voluntate salvandi etiam reprobos, isti enim sunt, qui sanari nolunt. *Quinto* addit denique Augustinus,

E

salu-

salutem, vitamque æternam *in manu ac potestate nostra esse*. At falsissimum id est, si salvari Deus aliquos nolit: tam enim in manu mea non est, salutem, Regnumque æternum adipisci, Deo non eligente, quàm non est in manu, & arbitrio meo Episcopum fieri, non eligente Capitulo. Imò hoc magis, quàm illud sperari possit; potest enim voluntas Capituli aut mutari, aut vinci, non potest voluntas Dei. *Neque dicas*, velle quidem Deum salvari omnes, sed voluntate simpliciter inefficaci: Jam enim id suprà refutavimus, quando probatum est, voluntatem sic inefficacem repugnare officio Patris, ac Redemptoris, repugnare tot illis remediis, ac modis, quibus Deus salutem hominis procurat, repugnare communi hominum sensui, qui cum inefficaciter aliquid volunt, nihil eorum agunt, quæ pro salute hominum agit Deus, repugnare etiam menti, ac doctrinæ Augustini: Si enim Deus, quantum ex se est, & ante prævisam omnem culpam vult efficaciter me non esse ex numero Electorum, sequitur, ex parte Dei insuperabile consequendæ saluti impedimentum poni, omnemque potestatem ad eam adspirandi ademptam esse, quæ tamen omnia è diametro aduersantur Augustino, ut modò probatum est. Repugnat denique rectæ rationi: cum enim dicis, velle Deum salutem omnium, sed inefficaciter tantum, quæro ex te, unde hæc inefficacia, languorque voluntatis proveniat? ex culpa peccatoris? at dicis, præcedere omnem culpam etiam prævisam: ex imperfectione hominis, qui nihil habeat, quod possit divinam voluntatem ad efficaciter amandum provocare? At Dei amor non pendet ex objecto, & bonitate creata, nec supponit bonum, sed facit. *Deinde*, homo quæ filius, & imago divinæ pulchritudinis, satis habet, quo amari efficaciter & possit, & debeat, ut suprà ostensum. An verò hanc inefficiam divinæ voluntati adscribes? atqui hoc absurdissimum est, cum enim divina voluntas infinitæ activitatis, & potentiæ sit, tam ex illa non potest esse inefficacia, quàm non potest ex calore gelu, ex pulchritudine odium, aut ex magnis viribus, magnoque impetu, torpor, & imbecillitas nasci. An verò dicendum est, hanc inefficiam ex arbitrio, & libertate Dei proficisci? At Deus licet amare possit hominem, vel non amare, postquam tamen illum ut imaginem condidit, tam non potest amplius non amare, quàm non potest non stare pollicitis, postquam semel promisit. Quæ necessitas cum sit hypothetica, & ab ipsa voluntate originem ducat, non minuit, sed auget libertatem. Ut taceam, nihil posse à divino, infinitoque amore alienius dici, quàm voluisse non unius, aut alterius hominis, sed

tot

tot myriadam ruinâ libertatem suam experiri. Quasi verò defuissent alia, & innoxia probandæ libertati suæ argumenta, qualia essent, cœlum, stellas, elementa, mundumque universum momento dele-
re, & alium frungere.

Rursus idem Augustinus lib. 6. Hypognosticon hæc habet: *In quantum possumus, omnes homines ad bonum exhortemur; nulli desperationem demus, pro invicem oremus: ipsius erit potestatis, judicium in nobis debitum mutare damnationis, & gratiam indebitam Prædestinationis prorogare.* Observa, tantum ex sententia Augustini à Deo abesse, ut aliquem voluntate antecedente, ac sponte sua salvum nolit, ut potius paratus sit, etiam eos, in quos sententiam damnationis tulit, in gratiam, ac numerum prædestinatorum recipere, si vitam mutant, & peccatis abstinent. Scio equidem, ab eruditibus dubitari, an hic liber Augustini sit, sed tamen Doctores, qui notas editioni Lugdunensi addiderunt, ad finem hujus libri hæc habent: *Hujus operis non meminit Augustinus in Catalogo suarum lucubrationum, sed omnia sic referunt ingenium illius, ut de auctore nihil sit dubitandum.* Et initio ejusdem operis: *Hic liber videtur esse hominis eruditi, facundique, qui, quæ sparsim ab Augustino diserta sunt contra Pelagianos, studuit in unum contrahere.* Ipse Bellarminus: *Libri, inquit, Hypognosticon eruditi sunt, & utiles, & vetusti Auctoris.* Sed quidquid de hoc libro dicatur, certum est, nec dubitari ab ullo potest, hanc esse Augustini sententiam: eam enim in sermonibus de tempore clarissime docet. Cum enim serm. 109. multa præmisisset de sententia Damnatorum in Reprobos ferendam, mox adjungit: *Quid times, quia dixi, si mutaris, mutatur? prædixit, non fixit. Nam dictum est, si penituerit vos de omnibus peccatis vestris, penitebit & me de omnibus malis, quæ factururus eram vobis. Nunquid quasi errantem penitet Deum? Sed penitentia in Deo dicitur mutatio sententiæ: non est iniqua, sed justa. Quare justa? mutatus est reus, mutavit Judex sententiam: noli terreri, sententia mutata est, non justitia. Justitia integra manet, quia mutato debet parcere, quia justus est.* Si Deus voluntate antecedente, nulloque ad culpam, & pertinaciam peccatoris respectu salvari aliquos nollit, falsum esset, culpâ mutaturum sententiam, cum, ut dicis, sententia non à culpa delinquentis pendeat, sed à voluntate salvere nolentis; voluit enim non salvere, priusquam delictum prævideret. Aqua incalescere quidem ab extrinseca causa potest, sed cum naturâ suâ frigida sit, faci-

lè amoto igne calorem perdit, recipitque ingenitum frigus. Sic Deus naturâ suâ benignus, & in omnes clementissimus est; nec illi ardor homines puniendi, Regnoque proscribendi ab intrinseco, sed aliunde accedit, ex delicto videlicet, & impœnitentia peccatoris. Hic est ignis, qui divinam iram inflammat, istum si removeas, nihil in Deo præter innatam bonitatem, omnesque salvandi propositum. Hoc solum discrimen est, quodd aqua, cum ex calida in frigidam evadit, mutatur, quia aliud est frigus, aliud calor; mutatio verò de uno in aliud transitus est. At cum Deus jam damnare vult peccatorem, jam emendatum non vult damnare, nulla in Deo mutatio est, cum in illo non sit aliud, & aliud, sed una, eademque voluntas, quæ tamen ob infinitam sui eminentiam, utrumque effectum, pœnam videlicet, & veniam complectatur. Tota verò mutatio in homine solo est, jam peccatum amante, jam detestante. Sic unum, idemque speculum, nunc deformem, nunc pulchrum, nunc juvenem, nunc senem representat, nullâ speculi, sed objecti tantum mutatione. Sicut ergo non speculum, sed facies mutatur; ita cum Deus jam vult, jam non vult peccatorem damnare, non Dei, sed peccatoris mutatio est. Sicut ergo in arbitrio tuo est, ut non turpis, sed formosus in speculo appareas, si videlicet maculam tergas; ita in arbitrio tuo est, ut non reprobus, sed electus apud Deum sis, si oblatam gratiam accipias, ac peccatum deponas. Non ergo speculum, sed faciem, hoc est, non Deum, sed conscientiam accusa. Id ipsum alia similitudine illustrari potest, Solis videlicet, qui jam hominem illuminat, si oculus aperiatur, jam non illuminat, si oculos claudat, nulla tamen in Sole, sed in homine tantum mutatione facta. Hæc ipsa S. Pauli sententia fuit 2. Timoth. Cum enim de Prædestinatione loquens, dixisset: *Fundamentum Dei stat. Cognovit Dominus, qui sunt ejus. In magna autem domo non solum sunt vasa aurea, & argentea, sed & lignea, & fictilia: & quædam quidem in honorem, quædam in contumeliam*, mox adjungit: *Si quis ergo se emundaverit ab istis, erit vas in honorem sanctificatum*. Sicut ergo in arbitrio tuo est, oblatam à Deo gratiam recipere (quæ, ut postea probabitur, nemini deest) sicque à peccatis mundari; ita quoque in arbitrio tuo est, vas gloriæ, aut contumeliæ; hoc est electum, aut reprobum esse, Deo, quantum in se est, omnes ad gloriam, nullum ad contumeliam parante. Hoc est, quod scribit Ambrosius in caput primum Lucæ: *Novit Dominus mutare sententiam, si tu noveris mutare delictum*.

Cum

Cum Pelagiani obiicerent Augustino, docere illum, non esse Dei voluntatem, ut omnes salventur, Sanctus Doctor ex instituto, & professo hanc calumniam refutans, hæc scribit art. 2. ad articulos sibi oppositos: *Cum veritas dicat: si vos, cum sitis mali, nostis bona data dare filiis vestris; quomodo fieri potest, ut Deus nolit aliquos salvari, qui etiam salvari volunt, nisi aliqua causa existant, de quibus, quamvis sint nobis incognoscibiles, ita tamen iudicat, de quo dici non potest, aliter eum quidquam facere debuisse, quam fecerit. Remota ergo hac discretionem, quam divina scientia intra secretum Justitiæ suæ continet, sincerissimè credendum est, atq; profitendum, Deum velle omnes salvos fieri. Siquidem Apostolus, cujus ista sententia est, sollicitè præcipit, ut Deo pro omnibus hominibus supplicetur. Ex quibus, quod multi pereant, pereuntium est meritum: quod multi salventur, salvantis est donum. Quod enim reus damnetur, inculpabilis est Dei Justitia, ut autem reus iustificetur, ineffabilis Dei gratia est. Hic tria docet Augustinus. Primum: Sicut pater terrenus bona data dat filiis, multò magis id Patrem cœlestem & fecisse, & faciurum esse. At nullus est pater terrenus, qui propria voluntate, nullaque præcedente culpa velit aliquos ex filiis hæreditate, domoque paterna excludere, quantò minùs id volet Pater cœlestis? An fortè minùs est pater, aut minùs amat? aut quis unquam de terreno patre audivit, eum, ut potentiam, & libertatem suam ostenderet, maiorem filiorum partem, aut exilio mulcasse, aut gladio percussisse? quantò minùs id de cœlesti Patre dicendum? Esto enim posset perdere ut Dominus, nollet tamen ut Pater; nec ita ejus potestas extollenda est, ut amoris præjudicet. Alioquin ubi erunt magnifica illa: *Et miserationes ejus super omnia opera ejus. Superexaltans misericordiam iudicio?* Quomodo enim major misericordia, si plures deferit, quàm sanat, plures negligit, quàm eligit? Mutanda erit sententia, corrigendum vaticinium, magisq; dicendum: *Et indignatio ejus super omnia opera ejus. Superexaltans iudicium misericordiae.* Quod si potentiæ suæ dare experimenta velit, quantò illustrius, & manifestius in alias creaturas, quàm in homines, hoc est, in mancipia potiùs, quàm in filios ager? Quamquam jam supra ostendimus, potentiam artificis non destruendis, sed condendis operibus monstrari. Secundò docet Augustinus: *Sincerissimè credendum, ac profitendum esse, velle Deum omnes salvos fieri, ex quibus, quod multi pereant, pereuntium est meritum.* Hic apertissimè*

osten-

ostendit Augustinus, ex iis, quos Deus vult salvos esse, multos perire, sicque illam Pauli sententiam de voluntate omnes salvandi, non solos Prædestinatos, verum etiam reprobos complecti, nullumque à Deo excipi, si enim aliqui exciperentur, ii reprobi essent. Cur ergo alibi Augustinus docet, de solis Prædestinatis dictam esse? quia id ex instituto non agebat Augustinus, ut hîc agit, quando calumnias sibi ab adversariis impositas unicè, & ex professo refellit. *Deinde*. quia, ut infra dicemus, & ipse Augustinus professus est, non unam semper, eandemque sententiam tenuit, sed magis, magisque disputando profecit, crescente semper, ut in Sole contingit, cum motu luce. Ac tandem quia Augustinus plerumque loquitur de illa gratia, quæ non tantum est efficax, verum etiam effectrix, hoc est, cui opus respondet, & de hac verum est, ad solos Prædestinatos spectare.

Tertio excipit ab hac omnes salvandi voluntate Augustinus aliquos, qui licet velint, occultissimis tamen, & in arcanum repositis causis non salvantur; ita prorsus, ut illis sit tota ratio pereundi non Dei, sed eorum imperfecta voluntas, *quod multi pereant*, inquit, *pereuntium est meritum, quod multi salventur, salvantis est donum*. Ubi vides, duas à S. Doctore voluntates poni: unam, quâ homo perit, & hanc dicit, peccatoris esse: alteram, quâ homo salvatur, & hanc Dei esse. Voluntas ergo Dei solum pertinet ad salvandum, non verò ad reprobandum, & deferendum, alioquin dicendum esset, *Quod multi pereant, nec salventur, Dei est nutus, eos salvare recusantis*. Nam posita hac voluntate non salvandi, quamvis reliqua omnia impedimenta cessent, fieri non potest, ut homo salvetur, cum omnium impedimentorum maximum sit, Deum nolle; sicut impossibile est, nolente pictore, imaginem pingi, quamvis alioquin nullum aliud in tabula, in coloribus, in penicillis impedimentum sit. Cur ergo non omnes salvantur, etiam qui volunt? respondet Augustinus, duas esse causas: unam patentissimam, & universalem, alteram occultissimam, & specialem. Patentissima est, quia peccatores non verè, & efficaciter volunt; hoc est, non per ea media, quæ illis ad salutem præscripta sunt; sicut nec ægrotus dicendus est, velle sanari, si sanitatem quidem optet, sed remedia recuset: non est hæc voluntas, sed umbra voluntatis; non salvantur ergo, quia nolunt, & ita *quod multi pereant, pereuntium est meritum*. Altera verò, & occultissima causa est, soli que Deo nota: Quis enim compertum habet, cur Petrum, & Magdalenam ita vocaverit, ut vellent, non verò

verò ita Saulum, & Judam? Petrus peccator, Judas peccator. Petrus vocatus, Judas vocatus. Petrum aspexit: Judam osculatus est; plùs fuit osculari, quàm intueri. Et tamen Petrus convertitur, Judas desperat. Unde amabò in tanta paritate cadendi, tanta disparitas resurgendi? Quia Petrus voluit, & quia Judas noluit? ita quidem; sed cur non factum, ut uterque vellet surgere, sicut permisum est, ut uterque vellet cadere? Hoc arcanum, & ænigma est, quàm occultum, tam justum. Constat, potuisse Deum, constat, voluisse; constat potenti, & volenti Deo Judam repugnasse, cætera latent, nec explorare licet. *Noli scrutari, si non vis errare*, inquit, idem Augustinus, qui hanc doctrinam suam videtur à Magistro Ambrosio haurisse in Psalm. 118. ita loquente: *Mysticus ille Sol Justitiæ omnibus ortus est, omnibus passus, omnibus venit, & omnibus resurrexit. Si quis autem non credit in Christum, generali beneficio ipse se fraudat, ut si quis clausis fenestris radios Solis excludat.*

Denique perpetua est Augustini sententia, divinæ Bonitati, & Justitiæ nimium quantùm repugnare, si homines immortalis animæ præditos, & ad imaginem suam conditos citra omne peccatum, non tantùm æternis suppliciis addicat, verùm etiam si cœlesti Regno excludat, ac velut durissimo exilio procul patriâ pellat. Quo argumento præsertim Pelagianos urget: Hi enim docebant, parvulos originali peccato non teneri, sed tamen, si absque Baptismo decedant, cœlestis Regni expertes esse. Quibus Augustinus responder, id salvâ Dei Justitiâ fieri non posse: nec enim posse innocentes à justissimo Deo puniri, maximam verò creaturæ rationalis pœnam esse, si exilio mulctetur, nec verò exilium aut majus esse, quàm quod perpetuum, aut pejus, quàm quo cœlum amittitur; tantò enim infelicius exilium, quantò felicius patria, sicut tantò gravius malum, quantò majus est bonum, quo privat. At qui hæc omnia absurda longè magis locum habent, si dicas, Deum ante omne prævisum hominis peccatum alios ad æternam vitam elegisse, plures verò non elegisse. Non elegit ergo, cùm adhuc innocentes essent, hoc est, cùm nondum peccassent, nec peccaturi præviderentur; privavit ergo illos patriâ, ad quam creati erant; at hæc privatio patriæ est illud acerbissimum exilium, quo negat Augustinus, posse innocentem puniri. Quod absurdum longè in adultis immanius est: adultos enim aut æterna in cœlo felicitas, aut in inferno æterna infelicitas manet, nec medium datur: unde quoad rem, effectumque ipsum unum
idem-

idemque fuerit, non elegisse, quod damnasse, cum istud ex illo necessario sequatur. Sicut enim quia inter manum dexteram, & sinistram alia, & tertia manus non datur; si quis dexteram vinciat, ne uti illa possis, sequitur necessario, sinistra te usurum. Ita si Deus ante omnem prævisam culpam noluit aliquos, imò longè plures ad dexteram, hoc est, ad cælum pertinere; sequitur, necessario pertinere ad sinistram, hoc est, ad infernum, æternumque supplicium: id verò nimium à divina Bonitate alienum esse, mille locis protestatur Augustinus. Audi illius verba Serm. 14. de Verbis Apostoli: *Ecce existit, nescio quis, & dicit: parvulus non habens ullum omnino peccatum, nec quod suam vitam contraxit, nec quod de vita primi Parentis traxit, habebit & Regnum cælorum, & vitam æternam. Respondete Pelagiani, vincite hominem resistentem vobis. Vos enim dicitis: vitam quidem habebit iste non baptizatus æternam, sed non habebit Regnum cælorum. Ille contra: imò & vitam, & Regnum cælorum. Quare enim patrimonium Regni cælorum ab ipsis innocentibus? à quo Regnum cælorum non acquiritur, profecto magno bono fraudatur. Quæ est ista iustitia? Dic quare? quid offendit parvulus non baptizatus, nullam habens culpam, nec suam, nec de parente tractam? quid offendit, dic mihi, ut non intret in Regnum cælorum, ut sit exul à societate Angelorum? Videris enim tibi misericors, quia non auferes ei vitam, damnas tamen, quem separas à Regno cælorum. Damnas, non enim percussis, sed in exilium mittis. Nam & qui exulantur, vivunt, in doloribus corporis non sunt, non torquentur, non carceris tenebris affliguntur, hæc illis sola pœna est, non esse in patria. Si amatur patria, magna pœna; si autem non amatur patria, peior est cordis pœna. An enim parvum malum est, in hominis corde, si societatem non querit Sanctorum, si non desiderat Regnum cælorum? Sed si, quod vis, parva sit pœna, & ipsa parva magna est, si nulla est culpa. Hic defende iustitiam Dei. Quare vel parva pœna infligitur innocenti, in quo nullum invenitur omnino peccatum? Responde, si potes. Hæc Augustinus Pelagianis. Hæc ego aliter sentientibus: Vos dicitis, Deum tam multos eorum, quos ad imaginem suam finxit, & ad felicitatem æternam creavit, non quidem æternis flammis addixisse, sed tamen sponte suam, nullamque prævisam culpam cælo eliminasse, vobisque misericordes, clementesque videmini, quia non infertis quidem eis pœnam, damnatis tamen, cum cælo excluditis. Dicit mihi, quæ est ista iustitia? quid offenderunt, si nullam habent culpam? Defendite*

dite Iustitiam Dei . Nec enim parva pena est , non esse in patria . Et si parva esset , quare vel parva pena infligitur innocenti , in quo nullum omnino invenitur , nec praevidetur peccatum ?

Eadem S. Augustini mens ex fidelissimo ejusdem Discipulo S. Prospero Aquitano magis adhuc , magisque patebit . Is enim lib. 2. de Vocat. Gent. cap. 35. *Frustra* , inquit , *dicitur , quod ratio operandi non habet in electis , cum ad hoc operentur , ut electi sint .* Vides in arbitrio operantium esse , ut eligantur , Deo quidem gratiam ad opus offerente , sed homine oblatam acceptante ; eo serè modo , quo in arbitrio ægrotantis est , ut sanetur , & vivat : non quod pharmacum ipse præparet , sed quod maxima arte , ac labore à Medico paratum accipiat ; unde totum pretium , & gloria reparatæ sanitatis ad Medicum ; fructus verò , & utilitas ad ægotam pertinet ; tam enim multum est , quod Medicus facit potionem temperando , ac porrigendo ; tam verò parùm est , quod ægotus facit accipiendo , ut merito omnia Medico , nihil ægroto debeatur : sed nisi ægotus acciperet , nihil quoque medicina juvaret . Idem de peccatore dicas , gratiam recipiente , aut recusante , sicque aut ad vitam , aut ad mortem , aut ad electos , aut reprobos pertinente , utcumque voluerit , modò id semper observes , etiam ipsum velle , ipsumque accipere , & hominis esse , & Dei ; sed Dei magis , quàm hominis ; sicut sanari , & laborantis est , & medentis ; sed medentis magis , quàm laborantis . Imò (secus ac in ægroto) illud ipsum , quod diximus , hominis esse , illud , inquam , velle , & accipere , totum quoque à Deo , & gratia est , quæ si non esset , homo nec vellet , nec acciperet , sed repugnaret . Unde optimè Apostolus dixit : *Non est currentis , neque volentis , sed miserationis Dei .* Vult homo , & currit ; sed hoc ipsum velle , & currere , & hominis est , & Dei ; hominis quidem , quia homo est , qui currit , non Deus ; homo est , qui consentit , non Deus : sed hoc ipsum & currere , & consentire , magis est Dei , quia non curreret , nec consentiret homo , nisi Deo per gratiam miseratione . Sic cum Musicus manu cytharam pulsat , totus ille sonus , ac pulsus , & à manu , & à cythara est ; magis tamen totus ab anima , quia nisi anima esset , nec manus , nec cythara moverentur ; hoc verò est Deus , & gratia homini operanti , quod est anima manui pulsanti , hoc discrimine , quod voluntas potest pulsante Deo non velle , manus verò non potest imperante anima non moveri . Idem S. Prospero responso tertio ad Gallos ita scribit : *Ideo non sunt predestinati , quia tales*

P

futu-

*futuri ex voluntaria pravariatione præsciti sunt. Et respons. 12. ad obiectiones Vincentianas explicans hæc verba: Exjerunt ex nobis, sed non fuerunt ex nobis: si enim fuissent ex nobis, mansissent utique nobiscum, inquit, voluntate exjerunt, voluntate ceciderunt, & quia præsciti sunt casuri, non sunt prædestinati; essent autem prædestinati, si essent reversuri, & in sanctitate, ac veritate mansuri. Tota ergo causa, quod prædestinati non sint ex Prosperi sententia, non Dei, sed hominis voluntas fuit; Deo, quantum est ex se, omnibus ad salutem prompto, sed peccatore salutem recusante, & mortem ante vitam eligente. Planè si quis cogitaverit, fuisse Prosperum Augustini Discipulum fidelissimum, eique coævum, atque acerrimum defensorem (ut ex ejus Epistola de Prædestinatione ad Augustinum constat) is negare non poterit, Prosperi sententiam Augustini sententiam esse. Plura S. Prosperi testimonia omittimus, quæ jam supra recitata sunt; sed & ipsi concinit S. Fulgentius lib. 1. ad Monimum circa medium, ubi ait; *Ostensusus itaq; Deus, quod reddendum præsciverit, & quid donandum, prædestinavit illos ad supplicium, quos à se præscivit voluntatis malevitio discessuros, & prædestinavit ad Regnum, quos ad se præscivit misericordia prævenientis auxilio redituros, & in se misericordia subsequenteris auxilio esse mansuros.* His verbis præscientiam operum electioni, & reprobationi aperte supponit; unde subdit: *Quia misericors est Dominus, & justus, prædestinavit justos ad gloriam, & impios ad penam.* S. Anselmus Augustini fidelissimus Sædator Orat. 28. juxta correctissimam Editionem Gabrielis Gerberonis Congregationis S. Mauri, ita Christum alloquitur: *Æquali dilectione pro omnibus passionem suscepisti, æqualiter omnibus vitam æternam præparasti.* Ergo ex sententia S. Anselmi tota inæqualitas, quæ inter reprobos, electosque versatur, non ex Dei voluntate, sed ex culpa hominis procedit. Idem tenet Commentator Matth. apud S. Anselmum in caput 6. ad illa verba: *Fiat voluntas tua*, hæc habet: *Due sunt voluntates in Deo: una Misericordia, quæ non est cogens, neq; aliquid libero arbitrio aufert, quâ omnes homines vult salvos fieri, quod tamen in libera eorum potestate positum est. Est & alia, quæ est de effectibus rerum, de qua dicitur: omnia quacumq; voluit, fecit. Huic nemo potest resistere, de qua dicitur: voluntati ejus quis resistet? Hæc Providentia concordat semper; alia verò non semper. Si enim velit per Misericordiam de aliquo pravo, quid sit justus, & conferat ei gratiam suam, &**

damus

tamen ille per liberum arbitrium contradicat, nec gratia Dei consentiat, hæc voluntas Dei non concordat Providentiæ. Itaque homines resistunt voluntati Misericordiæ, & non resistunt voluntati Iustitiæ. In terra multi contradicunt voluntati Dei, illi scilicet, quæ est ex Misericordia: Cui enim vellet pravos etiam salvare, si vellent; tamen ipsi contradicunt operibus huic voluntati.

Non minus eleganter nostram hanc sententiam Angelicus Doctor duobus præcipue locis expressit. Sic enim lib. 3. contra Gentes cap. 259. loquitur: Considerandum est, quod licet aliquis per motum liberi arbitrii divinam gratiam nec promereri, nec advocare possit; potest tamen se ipsum impedire, ne illam recipiat. Dicitur enim de quibusdam Job. 21. Recede à nobis, scientiam viarum tuarum nolumus. Et Job. 24. Ipsi rebelles fuerunt lumini. Et cum hoc sit in potestate liberi arbitrii, impedire receptionem gratiæ, non immerito ei imputatur, qui impedimentum ponit. Deus enim, quantum ex se est, paratus est omnibus gratiam dare; vult enim omnes salvos fieri, sed illi soli gratiæ privantur, qui in se ipsis impedimentum gratiæ posuerunt; sicut Sole mundum illuminante in culpam imputaretur ei, qui oculos clauderet, licet videre non posset, nisi lumine Solis præventus. Et in illa verba Joannis: Nemo venit ad me: Sicut grave per naturam non potest sursum ferri, nisi trahatur ab alio; ita cor humanum ex se ad inferiora tendens non potest sursum elevari, nisi tractum per gratiam. Si verò non elevatur, non est defectus ex parte trahentis, qui quantum ex se est, non deficit, sed est propter impedimentum ejus, qui non trahitur. Vides hinc iterum ex sententia Angelici Doctoris velle Deum, quantum ex se est, omnes salvos fieri, velle omnes illuminare, velle omnes trahere, sed eos solos non salvari, non illuminari, non trahi, qui impedimentum ponunt, & qui nolunt; sicque nullum ex parte Dei volentis, sed tantum ex parte hominis resistentis impedimentum esse; & ideo voluntatem Dei salvandi omnes, non ad solos prædestinatos (isti enim impedimentum non ponunt) sed etiam ad reprobos extendi. Hanc verò Dei voluntatem omnes salvandi, quantum ex parte Dei est, efficacem esse, dubitari non potest; si enim inefficax sit, impedimentum non solum ex parte hominis, sed præsertim ex parte Dei esset; illa enim inefficax voluntas salvandi v. g. Judam, impediretur à contraria, & efficaci voluntate non salvandi; quod enim majus impedimentum operis, quam efficax voluntas non operandi? aut quid magis morari aliquem potest, ut non

ambulet Romam, quàm efficax voluntas non ambulandi? Si ergo, ut docet S. Doctor, nullum ex parte Dei impedimentum est, quo salventur omnes, sequitur, ejus voluntatem omnes salvandi, quantum ex se est, efficacissimam esse. Quodd si aliquando inefficax vocatur, ideo est, quia effectum non consequitur, humano nolente arbitrio. Ex quibus omnibus perspectum est, nostram sententiam Augustini sententiam esse, sive Augustinum ipsum, sive illius Magistrum, ac præcipuos Discipulos consideres. Idem S. Doctor 1. ad Timoth. 2. lect. 1. *Christus JESUS est Mediator Dei, & hominum, non quorundam, sed inter Deum, & omnes homines, & hoc non esset, nisi vellet omnes salvare.* Et in Epist. ad Hebr. cap. 12. lect. 3. *Deus vult omnes homines salvos fieri, & ideo gratia nulli deest, sed omnibus, quantum in se est, se communicat.*

XII. Ex hæcenus dictis facillè illud Calvinii Sophisma dissolves: *Si sum prædestinatus; quidquid egero, certissimè salvabor: si non sum prædestinatus, quidquid boni egero, certissimè damnabor. Quid ergo superest, nisi ut agam, quod lubet, & quamdiu licet, voluptatibus fruam, cum datà semel, fixâq; Prædestinationis sententiâ nihil mihi ad vitam eternam aut nocere peccata, aut prodesse virtutes possint.*

Respondeo enim primò, hanc argumentationem totius generis humani consensu, ipsorumque Calvinistarum exemplo, & usu falsitatis convinci: Nihil enim in hoc mundo geritur, quod non immutabili Dei Præscientiæ, ac voluntati subiaceat, juxta illud Apostoli ad Ephes. 1. 11. *Qui operatur omnia secundum consilium voluntatis sue.* Nemo igitur diutiùs vivit, quàm Deus velit, nemo metit, nemo dives evadit, nemo hostem in bello vincit, nemo ad portum appellit, nisi quantum, & quando Deus ab æterno disposuit. Quis verò ita unquam desipuit, ut diceret: vel Deus ab æterno disposuit, ut hunc morbum evaderem, vel ut morbo extinguerer? Si primum: ergo certissimè sanabor, quamvis medicinis non utar: Si secundum, ergo certissimè extinguar, quibuscumque tandem remediis utar; nullis ergo utar, ac genio dum licet, indulgebo, cum Dei voluntas mutari, aut falli non possit. Aut quis unquam non navim ad transfretandum conduxit, non semen ad messëm faciendam sparsit, non omnem operam ad comparandas divitias, vel obtinendam victoriam adhibuit, quodd crederet, omnia fato agitari, ac divina voluntate, nutuque immutabili evenire. Planè deliria sunt ista,

ista, non argumenta. Si ergo pro terrena vita nemo non laborat, quamvis sciat, omnia divino nutu contingere; cur non æquè laboret pro vita cælesti; quamvis non ignoret, nullum ad eam pervenire, nisi divina voluntate prædestinatum? Non te movet Prædestinatio, ut pro terrestri Regno bene pugnes; cur te morabitur, ut pro cælesti Regno non bene viyas? Imò hoc multo magis; fieri enim potest, ut qui bene pugnat, non ideo vincat, at fieri non potest, nec unquam factum, aut futurum est, ut qui benè vivit, cælesti Regno non potiatur. Quot Jacobus Patriarcha laboribus, quot David præmiis, & artificiis egit, ut ad Regnum perveniret, quod tamen sibi à Deo destinatum esse jam olim, certoque didicerant? Nihil ergo Prædestinatio operibus, nihil opera Prædestinationi obstant; sic ergo agendum, & conandum est, ac si nulla Dei Prædestinatio; sic verò omnia Deo tribuenda, & spes omnis in eum collocanda est, ac si nulla hominis industria, & prudentia esset. *Deinde* non ideo neganda hominis in agendo libertas est, aut operandi necessitas tollenda, quia libertatis, operumque cum divina Prædestinatione consensus, ac sœdus ignoras. Num ideo moveri Solem, terram in aëre, punctoque suspendi, magnetem in Polum figi, & mille alia negabis, quia eorum rationes, & causas, quibus fiunt non intelligis? Constat, Deum justum esse, constat, Evangelicam legem observandam, constat, orandum esse, constat, esse liberum arbitrium; sed non satis constat, quomodo ista cum Prædestinatione, Dei que voluntate conveniant; num ideo negabis, quod constat, quia non assequeris, nec intelligis, quod non constat? Nemo Christianorum negat, esse in Christo naturam divinam, humanamque, quamvis ignoret modum, quo sibi tam distincta connectantur. Nemo Deiparam dubitat, Matrem simul, ac Virginem esse; quamvis pugnantia videantur in una, eademque planta fructum nasci, nec florem corrumpi. Idem de Prædestinatione dicas. Pugnare tibi cum libertate humana illius certitudo videtur, nec modum capis; at sufficit Christiano, ita Deum revelasse; nec ideo falsa, quia tibi occulta. Denique si ex te quæram, cur tanto labore, impendiis, ac periculo pugnes, & non potius victoriam otiosus expectes, cum certum sit, neminem victurum, nisi quem Deus voluerit; voluntatem verò Dei immutabilem esse? respondebis utique; quia constat nemini Deum victoriam velle, nisi conanti; & ideo unum, idemque esse, nolle certamen, quod nolle victoriam; nolle seminare, quod nolle metere; nolle

nolle cursum, quod nolle metam. Idem ergo de Prædestinatione dicendum; cur oras, cur operaris, cur bellum cum vitijs geris, & non potiùs soluto cingulo, desertâque militiâ quieti, ac delitijs vacas, cùm Prædestinatio certa sit, nec mutari possit? quia constat, Deum neminem nisi bene operantem, ac Christianè viventem ad Cælum eligere, unde unum, idemque sit, nolle operari, quod nolle ex electis esse, nolle virtutem, quod nolle Cælum. Sanè, si hujus Dilemmatis aliqua vis esset, nemo eam meliùs ipso Dæmone intelligeret, & tamen iste, ac si nulla Prædestinatio esset, sed omnia ex creaturarum industria penderent, tentando, insidiando, persuadendo, obiecta, & occasiones offerendo, noctu diuque mille nocendi artes moliendo, nihil non agit, ut hominem seducat, trahatque in suas partes. Agnoscit ergo liberas hominum actiones non ex fato, sed ex hominum arbitrio pendere, talesque fieri, quales homo esse voluerit, nihilque Prædestinationem impedimenti afferre, quod minùs homines, aut boni, aut mali, aut felices sint, aut infelices, reprobi, aut electi, utcumque maluerint. Quis ergo tantùm infaniam, ut credat, se aliquid argumentando invenisse, quod nec Dæmon invenit? aut meliùs Logicam callere, quàm calleat Dæmon? Quacumque ergo ex parte Dilemma illud Calvinii expendas, vanissimum est, & omnium hominum, Dæmonumque judicio planè falsissimum; cessarent enim insidiæ, tentationesque omnes, sic Dæmone philosophante: Aut Judas est prædestinatus, aut non est prædestinatus? si prædestinatus, frustra illum tento: si non prædestinatus, etiam me non tentante, ac nihil agente, tandem damnabitur.

Tres ergo sunt in hoc, aliisque similibus de Prædestinatione paralogismis hallucinandi causæ. *Prima*: quòd ex iis, quæ occulta sunt, ad ea neganda movearis, quæ manifesta sunt: quod planè absurdissimum est philosophandi genus; oportet enim ex certis ad incerta, ex claris ad obscura, & non ex incertis ad certa, ex obscuris ad clara pervenire. Quid enim aliud esset, certa ex incertis, & clara ex obscuris, velle discere, quàm velle cæcum de coloribus interrogare, aut noctuam de Sole? Aut quis non agricolam rideret, qui arcum cælestem, quem oculis toties usurpat, esse negaret, quia non intelligit, à quo, quâ manu, quâ arte, quâ ratione, & quibus coloribus in aëre, & momento pingatur? Et ideo monuit optimè Augustinus Lib. de Bono Persever. cap. 14. *Non ideo negandum, quod apertum est, quia comprehendere non potest, quod occultum est.* *Secunda*, erroris causa

causa est, quodd homines sibi persuadeant, non esse amplius in eorum potestate, ut inter electos numerentur. Quæ persuasio planè falsissima est: Sicut enim cum gratia Dei (quæ nemini volenti deest) in eorum potestate est, ut bene vivant, & in bono perseverent; ita ineorum potestate est, ut ad Electos pertineant, cum impossibile sit, bene viventē, & in bono perseverantē ex electis non esse, & ideo monebat Apostolus: *Satagite, ut per bona opera certam vocationem vestram faciatis.* (a) Tertia causa est, quodd sibi perperam imaginentur, Deum velle aliquos salvari, qui ad prædestinatos pertineant; alios verò, multoque plures non salvari, quos reprobos appellamus; & ideo cum Prædestinatio, & Reprobatio ex sola Dei voluntate pendeat, credunt, nihil amplius homini superesse, quo fatalem, & insuperabilem hanc voluntatem mutare in aliam, magisque propitiam possint. Sed hoc iterum à veritate alienissimum est: Deus enim, ut suprà prolixè ostensum, quantum ex se est, neminem perire, sed omnes enixè, ac efficaciter salvari vult, & ideo, qui pereunt, arbitrio suo pereunt, qui non salvantur, arbitrio suo non salvantur; at quod arbitrio suo faciunt, utique non facere possunt. Cum ergo dicunt; *Si prædestinatus sum, quidquid egero, pœnitebo tandem, & salutem adipiscar;* falsum dicunt. Si bene non egeris, non Deum perseveranter oraveris, non Christianè vixeris, tandem nec pœnitebis, nec prædestinatus eris. Sicut exadverso, si bene vixeris, si constanter oraveris, tandem perseverabis, erisque de prædestinatis. Verbo: *Perditio tua ex te Israel, ex me tantum auxilium tuum* (b) Et eleganter quoque S. Augustinus de natura & gratia cap. 67. *Quiescant ingrati, & adversus Deum murmurare desistant. Rectè enim fortasse querebantur, si erroris, & libidinis hominum nemo victor existeret. Cum verò ubiq; sit præsens, qui multis modis aversum vocat, docet credentem, consolatur sperantem, diligentem adhortatur, conantem adjuvat, exaudit deprecantem; non tibi deputatur ad culpam, quod invitatus ignoras, sed quod negligis querere, quod ignoras. Neque illud, quod vulnerata membra non colligis, sed quod volentem sanare contemnis. Ubi iterum vides, totam causam perditionis, non ipsi Deo, quasi mederi, ac sanare nolit, sed soli homini adscribi, quodd sanare, & mederi volentem nolit admittere.*

XIII. Ex hæcenus disputatis colliges, hanc esse Prædestinationis seriem. *Primò.* Deus videlicet, qui omnes homines amat, voluit

(a) 2. Petri 1. v. 10. (b) Osee 13.

luit etiam omnes salvare, nullumque perire. *Secundo*. Atque ut hanc omnes salvandi voluntatem suavius exequeretur, statuit omnium hominum sortem ex merito, demeritoque primi hominis pendere, ut videlicet isto non peccante, tota posteritas & in terris, & postea in Cœlis felicissimam vitam agitare. Ne verò peccaret Adam, & innocentia decideret, tot illum præstans, tot dotibus corporis, animique vallavit, ut videretur vinci non posse. *Tertio*. Sed Adamo infelicitè peccante, tota quoque posteritas, quippe ex Patre rebeli nata omni jure ad cœleste Regnum spoliata est, quod peccatum Originale vocamus. *Quarto*. Verum ne hominis delicto Dei consilium, omnesque salvandi voluntas effectu careret, decrevit Deus, Unigenitum suum mittere humana carne indutum, cujus merito, & originale, & alia omnia peccata iis remitterentur, qui mediis uti vellent ab eo præscriptis. *Quinto*. Ut autem vellent, singulis ob meritum Salvatoris validissimæ gratiæ ab æterno paratæ, quibus humana voluntas ad malum prona in bonum flecteretur. *Sexto*. Parvulos quod attinet, qui sine Baptismo decedunt, cœlesti quidem Regno, quippe paternæ culpæ reos, nec expiatis exclusit; non exclusit tamen naturalibus bonis, & à peccato præservavit, æternoque supplicio, quo si adolescerent, puniendi erant: quæ planè magna portio amoris, & gratiæ est; cum sola præservatio à peccato pluris valeat, majorisque pretii sit, quàm Regnum ipsum cœleste, quo, si ipsis optio daretur, carere vellent, quàm peccato involvi. Non ergo neglecti dici possunt, qui tanto bono donati sunt, tantoque malo liberati. Fatendum tamen, quia nunquam parvulis ante baptismum sublati Deus æternam vitam voluit, istos ad alium finem, classemque Providentiæ pertinere. *Septimo*. Quia ergo Deus omnes amavit, salvarique voluit, omnibus quoque copiosissima media suggestit, quibus salvari possint. Quod si oblati ad salutem mediis uti aliqui nolint, ac peccatis usque ad mortem insistant, recusentque oblatam sæpius veniam, eos damnare justissimè statuit, sicut enim quia bonus est, gratis salvare statuit, citraque omne meritum etiam prævisum, solo videlicet misericordiæ, & amoris instinctu; ita quia justus est, non gratis, sed ob culpam salutem prævisam punire decrevit; quàm enim misericordis est, velle citra meritum amare, tam est justus, nolle citra meritum punire. Nihil ergo aliud *Prædestinatio* est, quàm *antecedens*, & *efficax* Dei voluntas hominem ad vitam æternam promovendi, dandi, efficacissima

summa ad hunc finem media, quibus cum videat, aliquos bene usuros, istos *consequente* etiam, ac *executrice voluntate* salvare proponit, & hi solum ac proprie *prædestinati* appellantur. Tota tamen antecedentis illius voluntatis ratio est sola, & unica Dei Bonitas, & Misericordia; non verò hominis merita etiam prævisa, cum ista non sint causa, sed effectus efficacis illius, & beneficæ voluntatis. Imò in illa ipsa voluntate consequente, quâ Deus statuit, Petro vitam æternam conferre, quia prævidet, præscriptis à se mediis bene usurum; nihil ipsius hominis meritum in Prædestinationem influit, Deumque movet, qua parte ab homine est, sed tantum qua parte à gratia est, quæ gratis, citraque debitum datur. Et ideo absolutissimè dicendum est, Prædestinationem gratuitam omnino esse, & opus solius amoris, sicque Prædestinationem non esse ex prævisis hominum meritis; sed potius ex prævisis Dei donis, & gratijs, juxta illud Psalmistæ: *Qui coronat te in misericordia, & miserationibus*. Et illud Joan. 1. *Ex plenitudine ejus nos omnes accepimus gratiam pro gratia*. Reprobatio verò nihil aliud est, quàm voluntas Dei consequens, hominem æternâ penâ plectendi, quia prævidet, usque ad mortem peccatis inhæsurum, & gratias à Deo copiosissimè datas, & cum quibus salvari facillimè poterat, recusaturum; ita videlicet, ut tota ratio damnationis sic hominis culpa divinam Justiciam provocantis, oblatamque misericordiam respicientis.

Rebus ergo ita discussis restat, ut ad ea, respondeamus, quæ opponi possunt. Nihil enim tam est verum, quod impugnari non soleat, sicut ex adverso nihil tam falsum, quod non aliquo veritatis colore tingatur; imò quia nemo falsum credit, nisi deceptus; ideo tam falso, quàm deceptor solenne est, veritatem, ac fidem profiteri, quam non habent.

XIV. *Opponitur igitur Primò*: Christum Dominum non pro omnibus, sed pro Electis tantum orasse; sic enim Joan. 17. Patrem precatur: *Ego pro eis rogo, non pro Mundo rogo; sed pro his, quos dedisti mihi, quia tui sunt*. Hic apparet Christum pro solis prædestinatis, quos Pater ei dederat, & qui ad Patrem pertinebant, non verò pro Mundo, hoc est, pro Reprobis orasse; non ergo Christus pro omnibus, etiam Reprobis passus est: Cum enim multò minùs sit orare, quàm mori; quis sibi persuadeat, voluisse pro iis mori, pro quibus nec voluit orare?

Respondetur primò: Christum pro omnibus orasse, ac orando

do gratiam omnibus, etiam reprobis meruisse, quâ converti, salvari-
 que facillimè possent, si vellent, quod ex suprâ dictis certum est, &
 apertissimè docuit Augustinus. Nam præter illa, quæ paulò antè re-
 citavimus, Serm. 4. de S. Stephano ita loquitur: *Jubet Deus, & di-
 cit: diligite inimicos vestros, orate pro persequentibus, & calumnian-
 tibus vos. Attendite ipsam Dominum, qui hoc iussit, quod fecit: nonne pendens in Cruce ait: Pater ignosce illis? quando ergo in Cruce
 pendens orabat, videbat, & prævidebat omnes inimicos; sed multos
 ex illis futuros amicos; ideo omnibus veniam postulabat. Illi senie-
 bant, ille orabat, illi dicebant Pilato, crucifige, ille clamabat Patri,
 ignosce: pendebat, & tamen petebat. Et serm. 109. de Temp. Cum
 venerit Dominus, redditurus est singulis pro merito. An hoc vultis,
 ut reddatur avertis, quod redderetur conversis? Fratres iustum vide-
 tur vobis, ut illic ponatur Judas, ubi positus est Petrus, & ipse ibi po-
 neretur, si se correxisset: sed de venia desperans potius sibi collum la-
 queo ligavit, quàm Regis clementiam imploraret: itaq; Fratres, sicut
 dicere ceperam, non est, unde reprehendamus Deum. Et in respon-
 so ad articulos sibi falsè impositos, art. 1. loquens de Redemptione,
 & Sanguine Christi. Poculum quippe immortalitatis, quod confectum
 est de infirmitate nostra, & virtute divina; habet quidem in se, quod
 omnibus profit, sed si non bibitur, non proficit. Ex quibus intelli-
 gis, ex sententia Augustini, Orationem, ac Redemptionem Christi
 ad omnes quidem etiam Reprobos (qualis erat Judas) pertinuisse;
 sed ideo non omnibus profuisse, quia non omnes acceptare voluerant:
 omnibus, & paratum, & porrectum est poculum; sed non omnibus
 profecit, quia non omnes biberunt; profecisset, si bibissent. Ad-
 vertis etiam, Christum non tantum paucis illis, quos futuros aliqua n-
 do amicos prævidebat; sed omnibus, qui sæviebant, dicebantque
 Pilato: *crucifige*, veniam à Patre postulasse. Deinde sciendum est,
 Christum Dominum Joan. 17. Mundo valedicentem pro tribus
 personarum generibus preces suas ad Patrem fuisse. Primò à versu
 nono, usque ad vigesimum pro solis Apostolis rogat, quibus tantum,
 & non toti Mundo conveniunt, quæ illic à Christo dicuntur, videli-
 cet: *quod sermonem suum eis dederit: quod Mundus eos odio habuerit:*
quod non sint de Mundo: quod eos in Mundum mittat &c. Postea à
 versu vigesimo non pro solis Apostolis, sed pro omnibus Fidelibus
 (quos inter multi utique reprobi erant) orat iis verbis: *Non pro eis
 autem rogo tantum, sed & pro iis, qui in me credituri sunt per Verbum
 eorum**

eorum; ubi apertè ostendit, se priùs pro solis Apostolis ad Patrem precatum esse. Denique versu 21. rogat, & pro toto Mundo. *Ut credat Mundus, quia tu me misisti*. Ubi vides, licet Christus à speciali illa oratione, quæ solos Apostolos complectebatur, Mundum excluferit; non exclusisse tamen à reliqua oratione sua, in qua petebantur, quæ toti Mundo convenirent, videlicet, ut in Christum crederent. Licet ergo Christus præcipuè pro Apostolis, pro Fidelibus, pro Prædestinatis oraverit; non ideo tamen reliquum Mundum orationis suæ expertem voluit, ut etiam S. Paulus clarè 1. ad Timoth. 4. iis verbis insinuat: *Qui est Salvator omnium hominum, præsertim Fidelium*. Vides, in hoc reprobos, & electos pares esse, quòd omnes ad Redemptionem pertineant, sed in hoc distingui, quòd Electi præcipuas partes Redemptionis obtineant, quia soli ejus effectum consequuntur. Planè cum S. Joannes testetur, Christum esse *Advocatum pro peccatis totius Mundi*, sequitur, orasse quoque pro peccatis totius Mundi, alioquin tam frustra esset Advocatus, qui non orat, quàm frustra est Musicus, qui non cantat. Omnes ergo redempti, omnes commendati, omnes Christo ad salutem commissi; sed electi præcipuè, non tamen soli. Oravit ergo pro Mundo, & non oravit: Oravit prece illa communi, omnesque complectente; non oravit oratione illa speciali ad solos Apostolos, aliosque electos spectante, quomodo intelligendus etiam est Angelicus Doctor 3. p. q. 21. a. 4. ad 2. Cum enim nihil aliud sit oratio, quàm expressio desiderii; sicut Christus omnibus etiam reprobis salutem ardentissimè optavit, ita pro omnibus quoque ardentissimè precatus est. Qua in re observandum venit, Deum rebus quidem omnibus à se creatis, multoque magis à se redemptis, nullo excepto, providere; ita tamen, ut hæc ipsa providentia partim sit omnibus communis, partim verò sit aliquibus specialis, suosque gradus habeat. *Pusillum, & magnum ipse fecit, & æqualiter est ei cura de omnibus*, inquit Sapiens cap. 6. *Æqualiter*, quia ex parte ipsius Dei unus, idemque amor est, quo omnes complectitur, nullique deest, ac singulis non necessaria tantum, verum etiam copiosa pro singulorum statu, ac conditione distribuit. Hæc tamen æqualitas nihil obstat, quin inter creata, magis homines, inter homines magis Christianos; inter Christianos, magis prædestinatos; inter prædestinatos verò eos magis curet, ac pluribus beneficijs ornet, qui magis in illum sperant, seque totos ejus divinæ voluntati committunt. *Tibi cura est de omnibus, præcipuè de servis, qui totam*

spem suam posuerunt in sola misericordia tua. (a) Si Christus, quia omnium Advocatus, pro omnibus quoque intercessit, pro Apostolis tamen magis, quam pro reliquis Fidelibus; & prædestinatis magis, quam non prædestinatis. Sicut enim pater inter multos filios, magis morigeros, quam discolos amat; ita Deus, quippe omnium hominum Pater, omnes quoque homines diligit; eos tamen dilexit magis, quos morigeros, quam discolos futuros esse prævidit; quamquam, & qui morigeri, illius gratiâ; & qui discoli, propriâ culpâ tales futuri erant. Deus enim neminem bonum futurum esse prævidet, nisi quem bonum facturum erat: Sicut artifex, qui truncum in silva oculis notat; non aliter prævidet ex illo futuram esse statuam, nisi quia ipse facturum est; potest enim sine artifice truncus esse, sed non potest esse statua. Ergo, ut dicebam, pro omnibus oravit Christus, pro electis tamen maximè.

XV. *Opponitur secundò.* Matth. 26. dicitur: *Hic est sanguis novi, & æterni Testamenti, qui pro multis effundetur.* Eademque loquendi formula passim in Scripturis occurrit; si pro multis, ergo non pro omnibus.

Resp. Imò, quia pro omnibus, ideo pro multis; qui enim veriùs multi dicuntur, quam omnes? Et ideo Apostolus ad Rom. 5. *Sicut per inobedientiam unius peccatores constituti sunt multi;* Ubi vides, idem Apostolo esse, *omnes*, quòd *multos*. Quòd si Adamus omnes perdidit, Christus verò non omnes redemit, sequitur, fortius peccatum Adami ad perdendum, quam Christi sanguinem ad redimendum fuisse, sicque non erit verum illud Apostoli: *Ubi abundavit delictum, superabundavit gratia*, sed potius dicendum erit: *Ubi abundavit gratia, superabundavit delictum.* Deinde non pro omnibus, sed pro multis dicitur Christi sanguis effusus, quia non omnibus profuit. Ergo & pro omnibus effusus est, & non pro omnibus. Pro omnibus quoad efficaciam, non pro omnibus, quoad fructum. Quantum ex parte ipsius Christi, datus est omnibus, sed quia non omnes accipere voluerunt, eoque in bonum uti; non profuit omnibus, sed multis, quia non omnes, sed multi voluere. Quid efficacius Sole ad illuminandum, si oculos aperias? Quid ineffacius, si micanti oculos claudas, aut velum opponas? Idem dicas de Christi sanguine. Sed ea quoque ratione *multos* dixit Euangelista, ut ingentem Electorum numerum ostenderet. Planè is tantus est, ut aliqui

(a) S. Bernard. serm. 68. in Cant.

qui velint, tertiam partem Angelorum, qui ceciderunt, æquare. Angeli verò tam multi sunt, ut si singulis hominibus, decem assignes, hominum verò quotquot sunt, fuerunt, eruntque sint tricies millies, decies centena millia: hoc est, triginta millia millionum; (cùm tamen dubium non sit, multò plures esse, cùm in sola China, quæ non omnino est decima sexta pars Orbis terrarum, teste Daniele Batholo in sua Geographia Morali, trecenti milliones hominum numerentur; quot ergo erunt in Empyreo, Globo terrestri infinitis penè spatiis vastiore?) sequitur Angelorum trecenties mille Exercitus fore, quorum singuli millies mille, hoc est, millionem completantur. Si ergo tot erunt Beati, quot tertiam partem Angelorum conficiunt; sequitur centies millies milliones Beatorum fore. Et in immensum summa excrescet, si ex sententia Sanctorum (a) Dionysii, Thomæ, (b) & Bernardini (c) dicas, plures Angelos esse, quàm Stellas, arenas, folia, herbas, ac omnia creata, quod forsan innuere Jobus voluit, cùm dixit cap. 24. *Nunquid est numerus Militum ejus?* Alii multitudinem Prædestinatorum ex proportionem Martyrum colligunt, quos Romæ tantùm millies mille, & quingenta quinquaginta millia S. Birgitta in *Revelationibus suis lib. 3.* censeferi posse testatur; quantus ergo erit aliorum Sanctorum numerus, toto Orbe sparforum? Alii denique ex magnitudine Cæli Empyreici coniiciunt, quod decem millionibus vastius terrâ esse, mathematici docent; quot ergo civibus indigebit, ne maxima parte vacuum sit? Sed utrumque res se habeat; Prædestinatorum multitudinem innumerabilem esse, ipsa Scriptura sæpissimè, ac præsertim Apocalyp. 7. testatur. Quæ omnia ed spectant, ut ostendam, optimè Evangelistam dixisse, Christi Sanguinem pro multis effusum iri. *At inquires:* Si Christus pro omnium salute passus est, & oravit, nec tamen omnes salvantur, sequitur; Christi orationem non semper, & pro omnibus, sed aliquando tantùm, & pro multis exauditam fuisse. Resp. Orationem, ut bene advertit S. Thomas 3. par. quæst. 21. art. 1. Nihil aliud esse, quàm *explicationem propriæ voluntatis apud Deum, ut illam impleat.* Tunc ergo exauditur Christi oratio; cùm ejus voluntas impletur. At voluntas Christi erat, ut salvarentur omnes, si vellent; non salvarentur, si nollent, quæ

(a) S. Dionys. de celest. Hierarch. cap. 9. (b) S. Thom. 1. p. q. 50. a. 3.
(c) S. Bernardin. serm. 49. Antonius Glielmus Congreg. Oratorii discursu 43.

quæ voluntas in Christo semper impleta est; semper ergo ejus quæ oratio exaudita. Taceo, tantam esse gloriam, tantumque gaudium, vel unius Beati, ut id longè omnium damnatorum mala, & dolore superet, sicque vel unius Animæ salutem, dignam Christi Sanguine, ac precibus mercedem fuisse. Nam quoddamnati dolent, & cruciuntur, id totum ab igne, causisque creatis est, quæ illos torquent: Quoddamnati gaudeant, & felices sint, id totum à Deo immediatè, clareque viso procedit. Illa ergo inter Damnatorum pœnas, & gaudia Beatorum, quæ inter Deum, & creaturas proportio est. Deinde, quoddamnati puniantur, opus est Justitiæ: quoddamnati gaudiis exundent, opus amoris, & Misericordiæ; at verò quis nescit, Deum validius amando, & miserendo, quàm vindicando, & puniendo agere, cum hoc invitus, illud sponte, & ideo impensius agat? In pœnis damnatorum semper Misericordia Justitiæ miscetur, ejusque brachium avertit, ne toto impetu, quantumque damnati merentur, in miseros ruat. At in Beatis nihil Misericordiam, nihil torrentem voluptatis moratur, quo minùs toto alveo, plenoque fluat. Denique sola Justitia est, quæ damnatos persequitur; at in Beatorum delicias, & Justitia, & Misericordia conspirant, certantque, quæ magis felices eos reddat; tantò ergo perfectius, & excellentius opus, quantò pluribus, & melioribus causis; sicut & major lacus, in quem plures amnes volvuntur. Et hæc causa Augustino fuit, ut diceret, omnes in damnatis gemitus, pœnasque cessaturas, si vel momento Deum videre possent, sicque vel unâ Paradisi stillâ in eos ignes cadente, Quid ergo erit æternitas, si tantum est momentum? Quid erit mare, si tanta est gutta? Verba Augustini sunt: *Tanta est dulcedo future gloriæ, ut si una gutta in infernum deflueret, totam damnatorum amaritudinem dulcoraret.*

XVI. *Opponitur tertio; Hæc ipsa fuit Massiliensium, & Semipelagianorum sententia, qui passim docebant, velle Deum omnes salvos fieri, modò ipsi vocanti Deo consentiant. Ideo enim non omnes salvos fieri, & in agnitionem veritatis venire, quia ipsi nolint petere, cum Deus velit dare; nolint querere, cum Deus velit ostendere; nolint pulsare, cum Deus velit aperire. Ita refert S. Augustinus lib. 4. contra Julianum cap. 8.*

Resp. Non omnia, quæ Pelagiani, aut Semipelagiani, aliique Hæretici docebant, falsa esse; alioquin falsum erit, Christum natum, passum, mortuumque esse, quia ista etiam Hæretici fatebantur

tur. Imò quàm plurima vera falsis studiosè miscebant, ut tantò securiùs, ac cautiùs fallerent. An verò, quia Dæmon professus est, *Christum esse Filium Dei vivi* Luc 4. id verum non erit? Sicut ergo non omnia ideo falsa, quia Dæmon dixit; quantò magis non ideo falsa, quia docuit Pelagius? Non ergo Semipelagiani hæretici erant, vel quia crederent, Deum omnibus efficacissimè salutem velle; vel quia dicebant, neminem saluum fieri nisi qui vellet; hæc enim & verissima erant, & ab Augustino, ac Catholicis omnibus concessa; sed quia docebant: *Prædestinationis nomine fatalem quandam induci necessitatem: à Deo non omnia merita præveniri: Electorum numerum augeri posse, & minui: priorem esse hominis obedientiam, quàm gratiam: initium salutis esse ex eo, qui salvatur, non ex eo, qui salvat: gratiam à voluntate præcedi, quàm tantiam Medicum quærat: Fidem, aut saltem initium Fidei non ex gratia, sed ex naturæ viribus esse: eum adiuvari à gratia, qui ceperit velle, ipsum autem velle à gratia non dari: quod credimus, nostrum esse, quod operamur, Dei esse.* Hi sunt errores Semipelagianorum, quos Prosper, & Hilarius in Epistola ad Augustinum recensent, quæque optimè ab Augustino refutantur. Ubi etiam adverte, aded illos speciosis rationibus, ac auro pietatis obductos fuisse, ut quod mireris, non solum sanctitate, ac doctrinâ præcipuos in Gallia; verum etiam in Africa ipsum Augustinum occuparent, priusquàm Episcopatu fungeretur, ut ipse, in libro de Prædestinatione attestatur. Neque enim induci poterant, ut crederent, sperari æternam salutem à se posse, nisi arbitrio, & viribus suis relinquerentur, hoc est, nisi spem suam fragili cymbæ, & non validissimo Myoparoni committerent. Quibus eleganter Augustinus in eodem Libro de Bono Perseverantiæ cap. 21. & Homil. 14. respondet: *Absit à nobis, ideo desperare de nobis, quia spem nostram in ipso habere iubemur, non in nobis, cum scriptum sit: Maledictus homo, qui spem habet in homine, & Bonum est confidere in Domino, quàm confidere in homine Quid times, ne pereas, cuius capillus non peribit? non perit capillus, quem, cum tondetur, non sentis, & perit anima tua, per quam sentis.* Et de Prædestinatione Sanctorum cap. 11. *Miror homines, infirmitati suæ se magis committere, quàm firmitati promissionis Dei: sed incerta est mihi, inquis, de me ipso voluntas Dei. Quid ergo? Tua ne tibi voluntas de te ipso certa est?* Cæterum alia, quæ Semipelagiani docebant, vera quidem erant, & ab Augustino admissa, sed instar lactis veneno

mi-

miscabantur, ut quantò dulcius, tantò nocentius libarentur.

XVII. *Opponitur quartò: S. Augustinus variis locis illam sententiam Apostoli: Deus vult omnes salvos fieri.* Multò aliter exponit, quàm à nobis explicata sit. Docet enim, non ita intelligendam esse, quasi Deus omnes omnino homines, quantum ex se est, salvare velit; sed quòd nullum sit genus hominum, nulla conditio, in qua non plurimi sint, qui salutem consequantur.

Resp. Augustinus, prout illi cum Pelagiani certamen erat, hanc Apostoli sententiam explicabat. Nam & in eo sensu vera est, quam obiectio insinuat; idque refellendis Pelagianis satis erat. Verum cum ex proposito rogatus est, quid de voluntate Dei omnes salvandi, quid de hoc ipso Apostoli loco sentiret, ingenuè, citraque ambages respondit, ut supra notatum est. Ut ergo de mente Augustini ferre iudicium possis, *prænotandum est*, non semper in causa gratiæ unam, eandemque sententiam tenuisse. Prius enim quàm Episcopatum iniret, Semipelagianorum erroribus tinctum fuisse, dubitari non potest. Docebat enim, fidem ex viribus naturæ esse, & illius merito gratiam dari, ut ipsemet *Libro de Bono Perseverantiæ cap. 3. & 4.* fatetur, ac etiam *in libro Retractionum*. Rursus cum in Libro de hominis arbitrio docuisset, pœnas, quibus innocentes parvuli ante Baptismum affliguntur, occultis à Deo præmiis compensari: *Quis autem novit, quid parvulis in secreto Iudiciorum suorum bonæ compensationis reservet Deus?* Epistola tamen 28. ad Hieronymum id ipsum recantat. Taceo inferni supplicia, quibus infantes ante Baptismum extinctos puniri censebat, quantumvis id alibi in dubium revocaverit. In iis ergo, quæ Augustinus contra Pelagianos, aut Semipelagianos de gratia disputavit, certum est, neminem illo pulchrius, fortiùs, eloquentius, ac veriùs scripsisse, adeò ut quidquid Ecclesia de gratia credendum proposuit, id totum non ex sententia tantum, sed etiam ex verbis Augustini derivaverit. Id verò quòd Augustinus ex professo contra Pelagium defendit, non aliud fuit, quàm gratiam, non ex præcedente merito, sed ex solo Dei proposito, meroque beneplacito conferri; hic cardo, hic scopus omnium Augustini de gratia Disputationum. Reliqua, quæ velut incidenter, & hanc causam comitari poterant, Augustinus aut omisit tanquàm occulta, & incerta; aut se ignorare professus est; aut disputando, & inquirendo potiùs, quàm decidendo scripsit. Et ideo S. Cælestinus Pontifex Epist. ad Episcopos Galliæ, eximius alio-

alioquin Augustini prædicator de huiusmodi accessoriis, & honorariis Quæstionibus hæc habet: *Profundiores verò, difficilioreſq; partes intercurrentium quæſtionum, quas latiùs pertractârunt, qui Hæreticis responderunt, ſicut non audemus contemnere; ita non neceſſe habemus adſtruere.* Imò ipſe Auguſtinus lib. 2. de Bono Perſeverantiæ cap. 21. *Unde recolant, inquit, adverſus hæreſim Pelagianam iant ante aliquot annos iſta dicta eſſe, atq; conſcripta, quæ nunc eis diſplicere mirandum eſt: quamvis neminem velim ſic amplecti omnia mea, ut me ſequatur, niſi in iis, in quibus me non errare perſpexerit. Nam propterea nunc facio Libros, in quibus opuſcula mea retractanda ſuſcepi, ut nec me ipſum in omnibus me ſecutum fuiſſe demonſtræm; ſed proficienter me exiſtimo, Deo miſerante, ſcripſiſſe, non tamen à perfectione cepiſſe: quandoquidem arrogantius loquar, quàm veriùs, ſi vel nunc dico, me ad perfectionem ſine ullo errore ſcribendi jam in iſta ætate veniſſe. Sed intereſt, quantum, & in quibus rebus erretur.* Sanè quàm difficilis intellectu ſit Auguſtinus, quantoq; periculo ab iis legatur, qui omiſſâ cauſâ, quam ille contra Pelagianos agebat, alia Prædeſtinationis arcana quærent, quæ ille nſcire potiùs voluit, quàm quæri; nemo illuſtriori exemplo, ac malo ſuo, quàm Cornelius Janſenius Epicoſopus Iprenſis docuit: Is enim in ſuo Auguſtino Libro proamiali cap. 11. & 18. teſtatur, ſe in omnibus Auguſtini Libris evolvendis ſupra viginti duos annos operam navâſſe, omneſq; tricies percurriſſe. Quis non crederet, poſt tantum ſtudium, tot annorum induſtriam nemini magis Auguſtini mentem potuiſſe compertam eſſe? Et tamen cùm omiſſâ cauſâ, quam Auguſtinus ex profeſſo agebat, alia rimatur, quæ non agebat Auguſtinus, in pernicioſiſſimas hæreſes, & ab Auguſtino alieniſſimas incidit, quas primò Theologi Chriſtiani calamo damnârunt, ac demum Innocentius X. Pontifex Maximus anathemate percuffit. Taceo Calvinistarum, ac Lutheranorum ex Auguſtino ruinas. Semper ergo oportet huius S. Doctõris ſtudioſum, in ſcopum, & argumentum reſpicere, quod ſibi diſputandum præſcripſerat, alioquin ſi aliud, quàm ſcopum attendas, errabis ſæpiùs, quàm tanges. Exemplum eſt in præſcientia futurorum conditionatorum. Dicebant Pelagiani, ex duobus parvulis, quorum unus baptizatus, alter non baptizatus decedat; eum, qui Baptiſmo caret, ideo Sacramento privatum eſſe, quia Deus peccata prævidebat, quæ, ſi vixiſſet, commiſſurus erat. Auguſtinus inter alia argumenta, quibus ineptiſſi-

H

mum

num hoc commentum refutat, etiam illud urget, repetitque sapius: Deum, quæ futura sunt, scire, non verò scire, quæ futura non sunt. Ita lib. 1. de Prædestinatione Sanctorum cap. 14. lib. 2. ad Bonifacium cap. 7. & alibi. Quibus verbis negare videtur, posse à Deo certissimò sciri, quæ futura non sunt; sed tantum ea conici juxta dispositionem, ac pericula causarum secundarum. Sed cum Augustinus non id ex professo tractet, sed cursum tantum, & aliud agens, nemo dixerit, hanc Augustini sententiam esse: Aliud enim est Augustini dictum, aliud Augustini sententia; hæc enim discussionem, & examen requirit. Non dissimile exemplum ex Augustino proferri posset de pœnis parvulorum sine Baptismo decedentium. His ergo prius observatis restat, ut ad obiectam Augustini auctoritatem respondeamus. Dicimus enim, Deum efficaciter velle, & non velle omnes salvos fieri. Vult, si utantur mediis ab illo sapientissimè præscriptis; non vult, si mediis uti nolint. Non verò omnibus eadem, sed aliis alia præscripsit, ut postea copiosius dicetur. In qua quidem Dei voluntate aliud est facillimum, aliud difficillimum capto. Quis enim non facillè capiat, Deum nolle iis salutem, qui salvari nolint? At ex adverso quis unquam rationes, & causas compertas habuit, cur uni, non alteri media, & gratias providerit, quibus efficeretur, ut vellet? Planè hæc est altitudo, quam Paulus expavit, & quam mirari potius conveniat, quàm metiri. Jam verò non aliter ab Augustino Dei propositum omnes homines salvare volentis intellectum fuisse, quàm à nobis explicatum est, ex illis patet, quæ suprâ clarissimis testimoniis ostensa sunt. Unum tantum, aliud ve repetemus. Idem ergo Augustinus de Spiritu, & Littera cap. 13. ita loquitur: *Vult quidem Deus omnes homines salvos fieri, & in agnitionem veritatis venire, non tamen eis adimendo liberum arbitrium, quo bene, vel malè utentes iustissimè judicentur, quod cum sit, infideles contra voluntatem Dei faciunt, cum ejus Evangelio non credunt.* Observa, ex Augustini sententia benignâ Dei voluntatem in omnes etiam reprobos extendi, nullumq; excludi, nisi qui libero arbitrio nolit. Quod etiam apertissimè S. Prosper fidelissimus S. Augustini Discipulus docuit, qui Responso tertio ad Gallos ita scribit: *Ideo non sunt prædestinati, quia tales futuri ex voluntaria prævaricatione præsciti sunt.* Tota ergo causa, quod prædestinati non sint, non Dei, sed hominis voluntas fuit, Deo, quantum ex ipso est, omnibus ad salutem parato, sed peccatore salutem recusante, & mortem ante vitam malente.

lente. Idem Augustinus *l. 1. de Nat. & Grat. cap. 17.* Cùm ei Pelagius objecisset: Deus potest omnia sanare. Respondet: *Deus utiq; hoc agit, ut sanet omnia, sed agit iudicio, nec ordinem curandi accipit ab aegroto.* Non ergo negat Augustinus, Deum velle omnibus salutem, imò quoad hoc cum Pelagio consentit, sed tantum negat, modum sanandi ex hominis voluntate pendere, Vult sanare omnes, sed non eodem modo, nec hominis arbitrio, sed suo. Denique sapientissime Augustinus eam regulam inculcat. *Deus neminem deserit, nisi prius deseratur,* ut suprà quoque notatum est. Atqui falsissimum id est, si aliquos propria voluntate, nullàque eorum culpà salvos esse nolit: quid enim aliud est deserere, quàm nolle salvare? Atqui jam ab æterno quàm plurimos, imò pleròque salvare noluit, deseruit ergo, & deseruit, ut dicis, non quia prævídít deserturos, sed quia voluit: quid amabò hoc est aliud, nisi prius deserere, quàm deseratur? Aut quæ desertio major, ac prior fingi potest, quàm quæ omne tempus, omnem hominis voluntatem, omnemque culpam prævolarit, & qua postea homo certissime periturus est. Si ergo Deus quantum ex se est, non vult omnes salvos fieri; sequitur, eum ab æterno prius aliquos deserere, quàm deseratur. Atqui hoc Augustinus, hoc ratio negat: Cur enim voluit condere, si voluit destruere? Nemo sapiens hoc fecit, quãtò magis non fecit Sapiencia? *Nec enim,* inquit Augustinus, *amas, & deseris.* Tam non est amoris deserere, quàm non est hederæ non hærere. Tunc ergo credam, voluisse prius deserere Deum, quando mihi ostendes, voluisse Deum non amare. Planè cùm constet, Deum ideo hominem condidisse, quia amavit; oportet mihi ostendas, quid causæ fuerit, ut quamprimum creavit, mox voluntatem suam, & amorem mutaverit, ut quem prius diligendo creaverat, mox creatum non diligendo reprobaverit. Præsertim cùm divina voluntas immutabilis sit, nec alia esse possit, nisi postquàm objectum aliud esse cepit. Quid ergo mutatum est, ut hominem, quem prius amavit, & ideo condidit, mox non amaverit, & ideo deseruerit? Quid inquam, mutatum est? Deus? at mutari non potest: Homo? at nihil deliquit, quò in alium mutaretur: quò ergo fieri potuit, ut prius amaret, ac postea non amaret, & ideo desereret, nulla in Deo, nulla in homine facta mutatione? Fixum ergo, ratumque sit, Deum non deserere, nisi deseratur, & hanc esse Augustini sententiam.

XVIII. *Opponitur quintò.* Divinæ, & efficaci voluntati nemo resistit; si ergo Deus vult omnes salvos fieri; sequitur, omnes salvos futuros, nullumq; periturum.

H 2

Resp.

Resp. Si quid hæc obiectio convinceret, sequeretur, neminem quoque peccaturum; quid enim efficacius vult Deus, quantum est de se, quam non peccari? nemo enim dixerit, non velle Principem efficaciter, quod prohibet indicta morte, quantum magis si morte, ac supplicio æterno? Cujus ratio est, quia Deus aliter cum causis necessariis, aliter cum liberis agit. Cum necessariis agit, ut effectus necessario sequatur, & ideo nunquam non id sequitur, quod jubet: Cum liberis verò agit liberè, & ideo licet ex parte sua salutem efficaciter velit, ac media de se potentissima suggerat eam obtinendi; relinquit tamen, ut ex S. Augustino vidimus, homini libertatem ea recusandi, si malit. Vult enim salvare hominem, si velit; at si nolit, vult punire; sicque Dei voluntas nunquam non impletur. Idque magis explicari adhuc potest familiari Sanctis Patribus exemplo, quod jam supra libavimus. Nemo negat, Solem, eiusque lucem ad illuminandum efficacissimam causam esse; hic tamen, quod cum causa libera concurrat, sæpe non illuminabit, homine videlicet oculos claudente, aut velum, ne influat, opponente; stare ergo potest efficacia causæ etiam effectui cessante. Ita Deus; Erat, inquit, Joannes 1. *lux, quæ illuminat omnem hominem venientem in hunc Mundum.* Ecce tibi lucem omnem Mundum illustrantem! sed nunquid omnes illuminati sunt? minimè inquit: *sed hoc est iudicium, quia lux venit in Mundum, & dilexerunt homines magis tenebras, quam lucem,* Joan. 3. Vides hinc iterum lucem omnia illuminantem, & non omnia illuminantem. Omnia, quantum ex parte sua est: non omnia, quantum ex parte hominis est: *dilexerunt,* inquit, *magis tenebras,* hoc est, clauferunt oculos Soli, noluerunt fulgurantem admittere, noctem, quam diem maluerunt, sicque in tenebris, & umbra mortis jacuerunt, nullâ Solis, sed suâ culpâ. Iki ergo sunt, de quibus Job 24. dicitur: *Ipsi fuerunt rebelles lumini, nescierunt vias ejus; qui dixerunt, recede à nobis, scientiam viarum tuarum nolumus.* In quæ verba Gregorius: *Lumini ergo rebelles sunt, qui elationis suæ sententiis jaculis veritatis obiciunt, ne salubriter in corde feriantur.* Narrat Solinus c. 24. Atlanticos Africæ populos adeo Solem averfari, quod ejus radijs torreantur, ut orientem alii convitiis, & jaculis impetant, alii verò in silvas, & speluncas se condant. *Ubi,* inquit, *torrente Sidere, oderunt Deum lucis.* Tales sunt Reprobi. Habent Solem, habent lucem, sed eam oderunt, & persequuntur, multoque minus admittunt: quem ergo, si non videant, & ideo impingant,

& cæ-

& cadant, quem, inquam, nisi se ipsos accusabunt? Audi iterum S. Thomam lib. 3. contra Gentes cap. 159. *Considerandum est, quod sit in potestate liberi arbitrii impedire receptionem gratiæ, & ideo non immerito ei imputatur, qui ponit impedimentum: Deus enim quantum est ex se, paratus est, omnibus gratiam dare, vult enim omnes salvos fieri; sed illi soli gratiæ privantur, qui in se ipsis gratiæ impedimentum præstant.*

XIX. *Opponitur Sexto.* Si Deus, quantum est ex se, vult omnibus, & voluntate quidem efficaci vitam æternam; cur ergo non dat omnibus media, quibus prævidet fore, ut illam adipiscantur?

Responderi multa ad hanc oppositionem possunt. *Primo*, id quod Apostolus, & post eum Augustinus, omnesque Patres responderunt; id videlicet ad Dei judicia pertinere, arcana quidem, sed tamen iusta; & ideo tam non licere hominibus explorare, quam non licet mancipio secretum Principis cubile irrumpere, intraque velum proterve, nec vocatum irruere. *Noli scrutari, si non vis errare*, inquit Augustinus. Et in Libro de Spiritu, & Littera cap. 34. *Jam si ad illam profunditatem scrutandam quis me voluerit coarctare, cur illi ita suadet, ut persuadeat; illi vero non ita; duo solum mihi respondenda occurrunt. Primo: O Altitudo Sapientiæ, & Scientiæ Dei, quam incomprehensibilia sunt judicia ejus! Deinde non est iniquitas apud Deum. Cui ista non sufficiunt, querat alium me doctiorem, sed caveat, ne inveniat presumptiosorem.* Hæc perpetua est Augustini responsio, quoties hanc illi litem Pelagiani moverunt. Nec planè mirum est, non posse nos causas hujus divini, & secretissimæ voluntatis intelligere, cum nec earum rerum intelligamus, quæ nobiscum sunt, quæque ante oculos versantur. Cur magnes in solum Aquilonem, non in Meridiem, non in Orientem voluitur? Cur Laurus nunquam fulmine icitur? quod etiam de dormientibus Plutarchus testatur lib. 4. *Convival. quæst.* Cur teste Aristotele lib. 4. *de Animalib.* Aquila quamvis voracissima, ac calidissimi sanguinis, nunquam sitit, nec bibit? Cur musca senis pedibus, magnus verò Elephas quaternis tantum incedit; cum tamen sicut magnæ domui plures columnæ, ita magno corpori plures pedes convenisse videantur? Cur truncato arbori ramo alius ramus, non verò truncato homini brachio, aliud brachium succedit? Si ergo, istorum, quæ videntur, quæque in terris fiunt, ratio quidem est, sed tamen reddi non potest; quanto magis illorum quæ in cælis fiunt, quæque videri non possunt? quod si causa reddi

reddi non potest, cur illam quæris? prius de terra, si potes, postea de cælo responde. Nec verò in huiusmodi rebus imprudentis consilii est, sed prudentissimi ignorantiam fateri; paris enim dementiæ est, velle scrutari inscrutabilia, quàm velle videre invisibilia; quem enim non risu, & contemptu dignum censes, qui oculis gustare, aut auribus videre aliquid vellet? Atqui non minoris insaniæ est, intellectu, ac ratione humana capere velle, quæ omnem intellectum, & rationem longissimè superant, *ideo enim creduntur, quia non capiuntur, nam si caperentur, non crederentur*, inquit, idem Augustinus *lib. de Bono persev. cap. 14.* qui etiam optimè monet, ut suprà quoque advertimus, *non idcirco à nobis neganda esse, quæ manifesta sunt, quia non comprehenduntur, quæ occulta sunt.* Quis enim neget, mare fluere, ac refluere, quia hunc motum non capit? terram in puncto suspendi, quia causas nescit? totum, & quamvis vastissimum circulum in vno centro compingi, quia rationem ignorat? totam animam in toto corpore, & totam in qualibet ejus parte reperiri, quia de modo non constat? & denique quis motum localem inficiatur, quia solvere Zenonis argumenta non potest? Hæc si vera sunt in rebus naturalibus, quantò veriora in rebus divinis, in quibus idem, quod in coloribus accidit, ut videlicet, licet pulcherrimi sint, nigri tamen, obscurique videantur, quia remoti. Constat ergo Deum amare, constat bonum, ac justum esse; constat, gratiam dari, quæ libertatem non tollat; constat libertatem dari, quæ gratiam non impediatur; constat, Dei scientiam falli, & errare non posse; at quomodo hæc omnia inter se conveniant, nec unum alteri obstet, non satis constat; num ergo negabis, quæ constant, quia aliqua ignoras, quæ non constant? At hoc delirare, non philosophari est. Demus, Deum aliquid velle, ac facere posse, quæ fateamur, nos intelligere non posse; tam enim si humano intellectu caperetur, non esset Deus, quàm si conchâ caperetur, non esset mare; ergo quæ patent, non negentur, quæ verò non patent, vera esse credantur. Optimè etiam huc facit alia S. Gregorij Magni regula, quàm in Moralibus tradit, videlicet, veritatem, & æquitatem divinarum Judiciorum, quæ adhuc occulta nobis sunt, ex iis metiendam, ac probandam esse, quæ dum laterent, ejus bonitati haud consentanea videbantur, sed postea experientia, & exitus docuit, justissima fuisse. Quis, cum videret, servire Josephum, duci Susannam, Hebræos Juvenes in flammam jactari, Daniele leonibus proici; quis, inquam, cum ista spectaret, non

non continuò crederet, periisse innocentiam, nec Deo cordi esse? Atqui contrarium exitu patuit, nunquam videlicet magis vicisse, ac triumphasse pietatem, quam cum victa, & oppressa videbatur. Idem de aliis Dei judiciis, ac Prædestinatione dicendum est. Modò ista non capis; at nec illa capiebantur: modò dura videntur, at illa quoque dura videbantur: sed illa tandem æquissima fuisse exitus ostendit; ergo idem de istis aliquando exitus ostendet. Noli ergo de tela ante fimbriam judicare, & finem expecta, ac quæ futura sunt, ex præteritis discere. Verba S. Gregorii sunt: *Sed ecce cùm hac audivimus, cordi nostro quæstio oritur, cur omnipotens, & misericors Deus in tantam cecitatem cadere rationem mentis humanae permiserit? Ne verò quispiam ultra, quàm debet, occulta Dei judicia discutere præsumat, restat subiungitur: Nunquid Deum quisquam docebit scientiam? cùm in his enim, quæ de nobis aguntur, ambigimus, debemus alia, quæ nobis sunt certa conspiceret, & eam quæ de nostra nobis incertitudine surrexerat trepidationis querelam placare.* Cùm Romæ causa aliqua in Senatu agitabatur, de cuius meritis non satis constaret, in hæc verba loco sententiæ Patres pronuntiabant: *Non liquet.* Idem in causa Prædestinationis dici possit: cur Petrus, non Judas emendatus, cùm utrumque Deus posset? *Non liquet:* cur Jacobus, non Esau dilectus? *Non liquet.* Cur aliqui vocati, ut sequantur; aliqui vocati, nec sequantur, cùm Deus omnes istos vocare posset, ut sequerentur? iterum, iterumque, *non liquet.* Quid minùs postulare à Christianis Deus potest, quàm ut cum illo tanquàm cum reo agant, & absolvant, ac iustissimum credant, quamdiu in causa non liquet? Sic Apostolus, sic Augustinus respondit: quoties non in Senatu, sed in Ecclesia lis ista Deo movebatur.

Ipse tamen Augustinus optimè advertit, licèt modò penetrari à nobis abyssus ista divinorum Judiciorum non possit; id tamen in altera vita futurum. Verba Augustini sunt *serm. 22. de verbis Apostolis. Et lib. 2. de Civit. Dei: Videbimus istorum occultorum aperitissimam rationem. . . . Manifestabitur in iudicio, cur hæc mentes mortalium modò lateant, cùm tamen in hac re Justorum mentes non lateat, iustum esse, quod latet.* Id ipsum insinuat Apostolus; sibi videlicet in cælos admissò arcana verba audita esse, quæ non liceat homini loqui: quid verò arcanum magis, quodque minùs exponi possit, quàm negotium Prædestinationis? Audivit ergo Paulus, sed sub rosa, & cum pacto silenti. Ubi observa, non dixisse Paulum, quæ loqui

loqui homo non potest, sed que non licet. Si Paulus audivit, si loqui potuit, sed non licuit; ergo hujusmodi arcanorum rationes, & causas dantur, illæque Beatis compertæ sunt, nobis tamen inter Mortales versantibus occultæ; quid ergo miraris, videre Aquilas, quod novæ quas latet? Legitur in vita S. Angelæ Fulginatis, ei quoque cœlestia contemplanti, ac in extasim raptæ subitò divinatorum Judiciorum momenta, & causas patuisse, ac singillatim, ac velut radio descriptas oculis objectas esse; tantam verò in illis æquitatem, pulchritudinem, sanctitatem, ac sapientiam effuluisse, tantoque eorum aspectu, & gaudio, & amore perfusam, ut paratissima esset, si Deo ita libitum foret, illa experiri, æternumque subiacere. Ergo dum velum pendet, non accusentur, non damnentur, quæ necdum spectantur; erit tempus judicandi, velo sublato, ac theatro patente. Sed Augustinum ipsum audiamus de hac impermeabili abyssò pro more suo elegantissimè perorantem; sic enim Serm. 22. de Verbis Apostoli loquitur. *Dicis itaq; mihi, cur adhuc quæritur? quis enim voluntati ejus resistit? O homo tu quis es, ut respondeas Deo? quis sit ille, attende, quis sis tu, attende: ille Deus est, sed tu homo. Sed justitiam tibi loqui videris tu, & fons ille justitiæ siccatus est? Si injustum loqueris, unde tibi nisi à justo Deo? quid ergo dubitas justum, à quo est omne justum? aut si injustum loqueris, debes tacere. Primum ergo fundamentum Fidei pone, nunquid iniquitas est apud Deum? latere te æquitas potest, esse illi iniquitas non potest. Expectas à me fortasse, ut dicam tibi, quare cuius vult miseretur, & quem vult indurat? sed si, & tu homo, & ego homo, ambo audiamus: O homo tu quis es, ut respondeas Deo? melior ergo est fidelis ignorantia, quam temeraria scientia. Si homo sum; non indignor; excedam hominem si possum, & fortè attingam. Quod si æquitatem illam, quæ est apud Deum, modo non videmus, finiatur via, & veniemus ad Patrem; non potest videri tempore viæ, videbitur tempore Patriæ; ibi æquitatem Dei videbis, illic leges in Verbo, & sine Codice. Cum ergo perveniemus ad speciem, æquitatem Dei videbimus, & iam non erit ibi dicere, quare huic subvenit, & huic non? quare ille ductus est, ut baptizaretur, ille autem cum bene catechumenus vixerit, subit à ruinâ mortuus est, & non pervenit ad Baptismum? ille cum sceleratè vixerit, cum Mæchus, cum Scenicus, cum Venator, egrotavit, baptizatus est, decessit, & peccatum in eo deletum. Quære merita, non invenies, nisi penam, quære gratiam, & ecce, O Altitudo divitiarum! Petrus negat, La-*
tro

trō credit. O Altitudo divitiarum! hoc nos putas perscrutari posse, quod Apostolus expavit? quæris tu rationem, & ego expavescō altitudinem. Tu ratiocinare, ego mirer: tu disputa, ego credam. Altitudinem video, ad profundum non pervenio, & altitudo! Nemo ergo quærat à me occultorum rationem. Paulus dicit, inscrutabilia sunt iudicia ejus, & tu scrutari venisti? si inscrutabilia scrutari venisti, & investigabilia vestigare venisti, crede, jam periisti. Tale est velle scrutari inscrutabilia, & investigare investigabilia, quale est, videre invisibilia, & fari ineffabilia. Et tract. 53. in Joan. Quod si nos ultimus dies proficientes invenit, ibi discemus, quod hic nos potuimus.

Alterum, quod responderi ad factam objectionem potest, illud est: in hac dispari gratiarum dispensatione, non tam quærendum esse, cur Deus hanc tibi gratiam tribuat, non illam; sed potiùs, cur tu illā, quam tribuit, uti nolis. Sicut si carcere clausus à Principe clavem acciperet, quā erumpere custodiā posset januis apertis, nec tamen clavibus uti, sed murum carceris everti vellet, non tam quærendum esset, cur Princeps clavem offerret, non murum everteret, sed potiùs, cur oblata clavī uti captivus nollet? ejus enim nihil interest, clavī, aut muro evadere, modò evadat: at Principis plurimū referre potest, cur unum, quā aliud malit. Non ergo tam quærendum est, cur Princeps hoc potiùs modo, quā illo juvare reum velit; sed quærendum, cur reus juvari hoc modo nolit, quo Princeps jubet? Idem de Deo dicas, cujus voluntas quantò certiùs justissima, & sapientissima est; tantò minùs examinanda, & judicanda est; quis enim examinat certā?

Tertiò denique respondetur, Deum ad diversissimos gradus gloriæ, & per diversissima quoque media juxta infinitæ providentiæ suæ sapientissimas regulas homines destinasse; nec enim minor in ordine supernaturali, quā naturali varietas est. Inter tot stellarum, gemmarum, florum, plantarum, brutorum, volucrum, hominumque millia, nullum alteri simile; alia species, alius color, alia figura, aliæ dotes, aliæ facies, alii mores. Cum enim omnis creatura sit vestigium quoddam, & exemplar divinæ perfectionis; nulla verò creatura totam, integramque exprimere possit (nam si omnia, quæ in Deo sunt, exprimeret, jam infinita non esset) opus pluribus, & variis fuit, ut quod singula non possent, omnia conjunctim, ac quantum licet, explicarent. Verba Doctoris Angelici sunt 1. p. q. 47. Dicendum est, quod distinctio rerum, & multitudo est ex intentione primi agentis, quod est Deus. Producit enim res in esse propter suam

suam bonitatem communicandam creaturis, & per eas representandam, & quia per unam creaturam sufficienter representari non potest, producit multas creaturas, & diversas, ut quod deest uni ad representandam divinam bonitatem, suppleatur ex alia. Nam bonitas, quæ in Deo est simpliciter, & uniformiter, in creaturis est multipliciter, & diversim. Unde perfectius participat divinam bonitatem, & representata ea totum Universum, quàm alia quæcumq; creatura. Sicut ergo infinita Dei perfectio causa est varietatis in bonis naturæ, ita quoque in bonis gratiæ, & ideo alia gratia est, quæ datur Petro, alia quæ Paulo, alia quæ Iudæ; sic tamen alia, ut omnibus ad bene operandum accommodatissima sit, non secus, ac in magno exercitu, & à periculis Duce, non omnibus eadem arma tribuuntur, sed aliis gladius, aliis lancea, aliis tela, aliis faces, omnia tamen ad pugnandum, & vincendum aptissima. Quod ergo militibus sunt alia arma, hoc sunt Christianis aliæ gratiæ; nec si miles lanceam abiiciat, Ducis est crimen, nec si Christianus gratiam recuset, Dei est culpa: & potuit, & debuit miles, debuit, & potuit homo. Idem ergo est interrogare, cur Deus non eandem Iudæ, & Petro gratiam dederit, quod interrogare Imperatorem, cur non eadem arma pediti, equitiquæ non eandem lanceam tribuerit? Sufficit, omnibus datum esse, quo commodissimè vincere, ac triumphum mereri possent; si noluit, crimen militis, non Ducis fuit. Alio nec minùs apto exemplo explicari id ipsum potest. Statuit Rex aliquis adolescentem sanguine sibi junctum, sed ærumnis confectum, & in exilio procul degentem, in filium, Regniq; hæredem adoptare. Missis ergo Legatis ad patiatum vocat, utq; iter facilius, nulloq; labore absolvat, jubet servos, comites, equos, currus, aut si malit aquâ vectari, navim instructissimam adornari, ac multam pecuniam offerri, dariq; electionem, curru, equo, an navigio iter aggredi malit, & ad thronum capeffendum venire. At ignavus adolescens, & otio diffuens, molestiam itineris causatus, domi hære, ac oblatam purpuram recusare. Rex socordiâ tantam gratiam respicientis offensus, alium in Regnum adlegere, ac throno imponere, primo illo in exilio, otioq; & ærumnis marcente; qui ubi intellexit, alium ad Imperium evectum, omnia querelis, & accusationibus implet, & culpam totam in Regem refert, qui ad iter, Regnumq; capeffendum non illa media submiserit, cum quibus certò prævidebat, iter arrepturum fuisse: nam si currum illum igneum, quo Eliás in Cælum abreptus est,

aut

aut Angelum misisset, qui Prophetam capillo sublatum Babylonem per aëra transvexit, aut alas commodasset tot aliis volucris multo homine inferioribus concessas, certo se viam ingressurum, & ad Regnum, quo vocabatur, perventurum fuisse. Si hoc, inquam, ignavus ille diceret, quis non merito irrideret, ac non injustas tantum, sed insanissimas querelas crederet? At id ipsum faciunt, & dicunt peccatores, quicumque iis gratiis, quas à Deo copiosissime acceperunt, abusi, ac propterea coelesti Regno exclusi, culpam in Deum referunt, frigideque interrogant, cur non auxilia tribuat, quibus praevidebat, certissime consensuros, ac postea salvatum iri? quibus respondendum est, velle Deum, omnes salvos esse, modo tamen, ac ratione non qualicumque, sed à se sapientissime praescripta; sicut vult aëstatem, vult autumnum esse, Sole tamen non in quocumque, sed in Cancris, Leonis, Librae signo metante; & ideo stultus omnino esset, quicumque in Aquario, aut Piscibus messem, & vindemiam quæreretur. Vult ergo Deus, & Petrum, & Judam salvos esse, sed non eodem modo, nec eadem gratia Petrum, quam Judam. Quid enim non fecit, ut Judam salvaret, & ab exilio peccati, quo tenebatur, ad poenitentiam primo, ac deinde ad aeternum Regnum properaret? in Collegium Apostolorum accepit, inter amicos conscripsit, testem sanctitatis, ac miraculorum suorum fecit, docuit, monuit, minatus est, praedixit, osculo, amplexu strinxit, ac jam jam sceleri pertinaciter accinctum cum armata cohorte ad terram allisit; quid amabo facere amplius debuit, ut obstinatissimum expugnaret? Habuit ergo Judas, & pedes, & currum, & navim, quibus iter salutis ingrederetur. At si gratiam Petro, & Magdalene datam haberet, vitam mutasset. Verum quid hoc aliud est, quam cum inertis illo Adolescente, quadrigam Eliae, & volucrum pennas optare, cum ad iter faciendum equus, & rheda, navisque sufficiant. Deinde quis novit cum ea gratia, quae Petro, & Magdalene data est, Judam conversum iri, cum forte plures, ac majores gratias utroque acceperit? Etiam Epulo Evangelicus Fratres suos ad meliorem frugem redituros sperabat, si ad illos mortui mitterentur; sed responsum est: *Habent Moysen, & Prophetas, audiant illos, etiamsi aliquis ex mortuis ad eos venerit, non credent.* Vult ergo Deus & Petrum, & Judam, & Reprobos, & Electos, omnesque homines salvos esse, vult omnibus media dare, non solum quae sufficiant, sed etiam quae abundant. Cur vero non dat alia, quibus praevidet, salvatum iri? quia id tam

non convenit varietati, ordinique, ac legibus gratiæ à se præscriptis, quàm non convenit Univerſo æſtatem eſſe, niſi Sole Cancrum obtinente, quàm non convenit homini, alio modo, quàm oculis videre, aut alia ratione, quàm pedibus iter facere. Sicut ergo non ideo oportuit, mutare leges naturæ, quia tu illi ſubiici reculas, ita non oportuit mutari ordinem gratiæ. Totam hanc doctrinam ipſe Auguſtinus paucis quidem, ſed clariffimis verbis inſinuat lib. 1. de Nat. & Grat. cap. 17. *Hoc utiq; agit Deus, ut ſanet omnia, ſed agit iudicio ſuo, nec ordinem accipit ab ægroto.* Ecce concedit Auguſtinus, velle Deum omnes ſalvos eſſe, ſed non eodem ordine, iſdemque remediis; nec ex voto, arbitrioque hominis, ſed ſuo. Sicut enim noluit diſpoſitionem, nexumque cauſarum naturalium ſingulorum electioni permittere; ita multoque minùs ordinem, ac nexum cauſarum ſupernaturalium, quæ quantò nobiliores, tantò minùs cauſarum ex alieno iudicio, nutuque pendere. Quòd ſi tamen tibi iſta non ſufficiant, quæ convincendo etiam pertinaciſſimo ſufficere deberent; redeo ad prima, & cum Auguſtino iterum, iterumque inculco: *Noli ſcrutari, ſi non vis errare.*

XX. *Obiicitur ſeptimò.* Hæc ſententiæ, quæ dicit, Deum, quantum ex parte ſua eſt, omnibus æqualiter gloriam velle, videtur Sacris Litteris adverſari, & iis præſertim, quæ S. Apoſtolus ſæpiſſimè ad Rom. 9. & 11. repetit: Illic enim cùm diſputationem aggreſſus eſſet, cur Deus rejeſtis Judæis, Gentiles ad Fidem elegiſſet, id totum in Dei voluntatem, occultumque propoſitum refundit. Verba Apoſtoli ſunt: *Cum enim nondum nati fuiſſent, aut boni, aut mali aliqui egiſſent, ut ſecundum electionem propoſitum Dei maneret, non ex operibus, ſed ex vocante dictum eſt eis: quia maior ſerviet minori, ſicut ſcriptum eſt: Jacob dilexi, Eſau autem odio habui Moysi quoque dicit: Miſerebor, cuius miſereor, & miſericordiam præſtabo, cuius miſerebor; igitur non volentis, neque currentis, ſed miſerentis eſt Dei Dicit enim Scriptura Pharaoni: in hoc ipſum excitavi te, ut oſtendam in te virtutem meam, ergo cuius vult miſeretur, & quem vult obdurat An non habet figulus poteſtatem ex eadem maſſa faciendi aliud quidem vas in honorem, aliud in contumeliam? quod ergo quærebat Iſrael, hoc non eſt conſecutus, electio autem conſecuta eſt; cæteri verò excacati ſunt, ſicut ſcriptum eſt: dedit eis Dominus Spiritum compunctionis, oculos, ut non videant, aures, ut non audiant uſque in hodiernam diem; concluſit enim Dominus omnia in incredulitate, ut*
omnia

omnium misereatur. Haftenus Apostolus, ex quibus argumentari ita licet: Deus Jacobum dilexit, Esau odio habuit; quæro, vnde tanta disparitas, ut unus diligeretur, alter odio haberetur? ex parte hominis? at nondum nati, nondum operati erant, ergo ex parte Dei; si ergo Deus ante omne opus alium diligit, alium odio habet; sequitur Deum, quantum ex se est, non in omnes æqualiter propensum esse. Neque dicas: Nihil quidem mali operatum Esau fuisse, antequam nasceretur; prævisum tamen malè operaturum, & ideo non amore, sed odio dignum fuisse. Primum enim in Scripturis inauditum est, Deum aliquem odio, aut pœna prosequi propter peccata, quæ nondum fecit, sed quæ facturus est; amat enim Deus, qualis aliquis est, non qualis futurus est. Deinde: si Deus unum diligit, quia prævidit bonum; alium verò odio habet, quia prævidet, malum futurum esse; quid opus Apostolo fuit, tam longam disputationem texere, tot causas inquirere, se in omnem partem versare, ac tandem ad occulta, & inscrutabilia Dei judicia, velut ad asylum confugere, cum facillimè se labyrintho explicare, totamque causam duobus verbis absolvere potuisset, si dixisset, unum dilectum, alium rejectum esse non ex operibus quidem bonis, malisve, quæ jam fecisset, cum nondum nati essent, sed quæ prævidebantur facturi, si nascerentur. Rursus ea verba: *non ex operibus, sed ex vocante, & ut propositum Dei maneret, dictum est: quia Jacob dilexi, Esau autem odio habui*; clarissimè insinuant, quòd unus præ alio diligatur, non operibus, sed Dei proposito adscribi. Si ergo Deus nullam operum rationem habet, sed sola sua voluntate Esau à Jacobo distinguit, non ergo, quantum ex se est, omnes vult æqualiter salvari. Illa quoque verba: *Miserebor, cuius misereor*, clarè significant, Misericordiam à Deo non omnibus, sed aliquibus tantum præstari, nam si omnibus: non diceret, *Miserebor, cuius misereor*, sicut quia omnes homines moriuntur, frustra dicitur, eos mori, quos Deus vult, cum velit omnes. Idem, & præcipuè ex illis verbis colligitur: *cuius ergo vult, miseretur, & quem vult obdurat: an non habet figulus potestatem &c.* Si enim aliquorum miseretur, quia vult, aliòs verò obdurat, quia vult; sequitur, voluntatem Dei non omnibus propitiā esse; quis enim propitiā illis dicat, quos obdurat? hoc est quorum non miseretur, ut exponit Augustinus. Et sicut, quòd ex eodem luto, eadamque massa alia sint vasa ad honestos, alia verò ad sordidos usus; nihil aliud, quam figuli voluntas in causa est; ita quod Pharaò, quod Judas ex repro-

reprobis; quòd Paulus, quòd Petrus ex electis sint; nullam planè aliam causam, quàm Dei voluntatem Paulus agnoscit.

Cùm hæc objectio multa complectatur, ad singula respondendum est.

Primò igitur observa, hunc Apostoli locum, unum ex illis esse, de quibus S. Petrus scribit 2. 3. *Sicut & charissimus Frater noster Paulus Secundum datam sibi sapientiam vobis scripsit; sicut & in omnibus Epistolis, in quibus quedam sunt difficilia intellectu, quæ indocti, & instabiles depravant.* Et planè his maximè Pauli verbis Lutherus, & Calvinus ad errores suos muniendos abusi sunt. Cùm ergo clarissimis Scripturæ testimoniis ostensum sit, Deum velle omnes salvos fieri, omniumque misereri; quæ ratio patitur, ut clarissima, & planissima testimonia, obscurissimis illis, & abditissimis cedant? Nam quæ clara sunt, per obscura impugnari non debent, sed obscura potiùs per clara monstrari; alioquin si certam veritatem incertis rationibus urgeas, idem fuerit, quod velocissimum cervum lenta testudine, aut claudis, cæcisque canibus leporem venari. Quæ igitur Paulus de Gentium vocatione prosequitur, vera quidem sunt, sed *difficilia intellectu*, & ideo obscura, non ergo probationi idonea. Adde, quæ in Scripturis uno loco dicuntur, cum aliis conferenda esse, id enim veritati, quod remotis procul stellis contingit, ut videlicet conjunctæ non solæ appareant. Tu dicis, *non est currentis*, ego respondeo: *Sic currite, ut comprehendatis*. 1. ad Corinth. 9. Tu dicis: *Non est volentis*; ego respondeo: *Si volueritis, & audieritis me, bona terræ comedetis* Isa. 1. vers. 9. *Si volueris servare mandata, conservabunt te: Ante hominem vita, & mors, quod placuerit ei, dabitur illi*: Eccl. 15. Tu dicis: *Esau odio habuit*: at ego respondeo: *Nihil odit eorum, quæ fecit*. Sap. 11. 25. Tu dicis: *Est solius Dei misereantis*; at ego respondeo: *Misereamur impio, & non discet iustitiam*. Isa. 16. *Curavimus Babylonem, & non est curata*. Isa. 51. 9. *Quoties volui congregare filios tuos, & nolui*? Matth. 23. 37. Non ergo est solius misereantis, & curantis Medici, sed etiam volentis ægroti. Tu dicis: *Cujus vult, misereatur*; at ego respondeo: *Omnium enim misereris, quia omnium Dominus es*. Sap. 11. *Et neminem perire vis* 2. Pet. 3. Tu dicis: *quos vult, indurat*; at ego respondeo: imò Deus est, qui monet, & jubet: *Si vocem ejus audieritis; nolite obdurare corda vestra*. Psalm. 4. Non ergo obdurat, qui prohibet obdurari. Et iterum, Deus est,

de

de quo Apostolus: *Ipse autem neminem tentat*. Jacob. 1. si non tentat, quāto minùs obdurat? Tu dicis: *Deus excitavit Pharaonem, ut in ipso ostendat potentiam suam*. At ego respondeo: *ne dicas; ille me implanavit, non enim sunt ei necessarii homines impii* Eccl. 15. Denique tu dicis: *Nunquid non habet figulus potestatem aliud quidem vas faciendi in honorem, aliud verò in contumeliam?* At ego respondeo: *Nunquid voluntatis ejus est mors impii, & non potius ut convertatur, & vivat?* Ezech. 18. *Nunquid non vult omnes salvos fieri, & in agnitionem veritatis venire?* Ad Timoth. 3. Ergo vult omnes vasa honoris, & vitæ, non vasa mortis esse, aut contumeliæ. Si ergo Scripturæ cum Scripturis conferantur, ut fieri oportet; vera sunt, quæ Paulus dixit, sed falsa, quæ ex Paulo colliguntur, nec eo sensu intelligenda, quem cortex verborum ostendat.

Secundo circa ea verba: *cum nondum nati essent, aut quidquam boni, vel mali egissent, dictum est: Jacob dilexi, Esau autem odio habui*, sciendum est, si sensum litteralem, & proximum eorum verborum attendas, non de electione, aut reprobatione intelligenda esse; sed tantum de temporali felicitate, in qua Jacob prælatum est, Regno in eum, eiusque posteritatem translato, ac Esau, & Idumæis adempto, ad quos alioquin jure Primogenitorum spectabat. Sic enim apud Malachiam cap. 1. (ex quo Paulus hanc sententiam accepit) legere est: *Dilexi Jacob, Esau autem odio habui, & posui montes ejus in solitudinem, & hereditatem ejus in dracones deserti*. Et ipse Paulus loco citato: *Non ex operibus, sed ex vocante dictum est: quia major serviet minori*; totum ergo odium fuit, quod major serviret, & in catenis Babylonis hæreret, minore regnante, & libertati restituto. Est verò idiotismus, & phrasis Hebraica, quæ Hebræi, cum comparativis careant, dicunt, odio haberi, *qui minùs diliguntur*; & non esse, qui sunt quidem, sed infra alium; quod mille exemplis ostendi ex Sacris Litteris posset. Unum tantum, alterumve dabimus: Gen. 29. in textu Hebraico dicitur: *Videns autem Dominus, quod odio haberetur Lia*; hoc est, quod minùs, quàm Rachel diligeretur. Et Luc. 14. *Si quis non odit Patrem suum, & Matrem suam, non potest meus esse Discipulus*, hoc est, nisi quis minùs Patrem, & Matrem, quàm me dilexerit. Et Matth. 5. *Audistis, quia dictum est, diliges proximum tuum, & odio habebis inimicum tuum*, id est, minùs inimicum, quàm amicum diliges. Et Joan. 12. *Qui odit Animam suam in hoc mundo, in vitam æternam custodit*

eam; hoc est, qui minùs vitam temporalem, quàm spiritualementem diligit. Et 1. ad Corinth. 3. *Nec qui plantat, nec qui rigat, est ali- quid, sed qui dat incrementum*; hoc est, qui plantat, qui rigat, nihil ferè agit, si cum Deo componas incrementum dante. Nihil ergo aliud est *odium*, quàm *minor dilectio*, alioquin si de vero odio, & reprobatione intelligas, sequetur: Jacobum, omnesque ex eo genitos inter electos (nam non de sola persona, sed toto genere, ac posteritate Propheta, & Apostolus loquuntur) Esau verò, omnesque Idumæos inter Reprobos esse, quod falsissimum est, cum Esau, & Jobum (qui ex Esau familia fuit) aliosque multos Idumæorum, constet testimoniis Patrum, ipsaque Scripturâ ad vitam æternam pervenisse. Sed Paulus ex sensu litterali ad mysticum, & allegoricum transit; hoc est, ex terrena felicitate, quæ non ex meritis, sed ex Dei proposito Jacobo potiùs, quàm Esau collata est, ad mirabilem vocationem assurgit, quâ Gentiles ad Christianam fidem præ Judæis electi sunt. Sicut enim Jacobus nullo suo merito regno potitus est, ita Gentilis nullo merito suo ad fidem vocatus est, utrumque sine merito; utrumque non volentis, non currentis, non operantis, sed miserentis Dei fuit, id dogma catholicum est, quodque citra hæresim negari non potest, gratiam videlicet primam, seu primam vocationem, nullis meritis dari, alioquin non gratia, sed debitum esset. Et hanc esse Apostoli mentem, constat tum ex ipso contextu, tum etiam ex Augustino lib. 1. ad Simplicianum quæst. 2. ubi sic loquitur: *Et primò intentionem Apostoli, quæ per totam Epistolam viget, tenebo, quam consulam; hæc autem est, ut de operum merito nemo gloriatur, de quibus audebant Israelita gloriari, quod data sibi legi ser vissent, & ex hoc Evangelicam gratiam tanquam debitam meritis percepisse; unde nolebant eandem gratiam dari Gentilibus, tanquam indignis, nisi Judaica Sacramenta perciperent, non enim intelligebant, quia hoc ipso, quod gratia est, operibus non debetur, alioquin gratia jam non est gratia. Et ideo multis locis gratia præponitur operibus, non ut opera extinguat, sed ut ostendat, non esse opera præcedentia gratiam, sed consequentia, ut scilicet non se quis arbitretur percepisse gratiam, quia bene operatus est; sed bene operari non posse, nisi per gratiam; nec enim ut ferveat, calefacit ignis, sed quia fervet; nec ideo bene currit rota, ut rotunda sit, sed quia est rotunda; sic etiam nemo bene operatur, ut accipiat gratiam; sed quia accepit. Hactenus Augustinus, ex cujus verbis intelligis, nihil Apostoli verba*

ba nostræ sententiæ, & hæcenus dictis obstare, cum nihil aliud Apostolus velit, quam primam vocationem non operibus deberi, sed Dei Misericordiæ, quod omnes Catholici fateri debent. Quod si omnino velis, Esau vero, formalique odio habitum, ac reprobatum esse; sanè nulla hujus odii, & reprobationis alia causa esse potuit, quam peccatum, & voluntas delinquentis, non verò voluntas omnia diligentis Dei. Audi non me, sed ipsum Augustinum, sic enim in expositione quarundam propositionum ex Epistola ad Romanos num. 60. scribit: *Quod autem Jacob dilexi, Esau autem odio habui, nonnullos movet, ut putent, Apostolum Paulum abstrulisse arbitrium, quo promeremur Deum bono pietatis; vel malo impietatis offendimus. Sed respondemus, præscientiâ Dei factum esse, quâ novit, etiam de nondum natis, qualis quisq; futurus sit.* Et lib. 1. ad Simplician. quæst. 2. *Non igitur odit Deus Esau hominem, sed odit Deus Esau peccatorem.* Odit enim Deus in homine impietatem, & in aliis, eam punit per damnationem, in aliis admittit per justificationem, quemadmodum ipse judicat esse faciendum, judiciis illis inscrutabilibus. Et quod ex numero impiorum, quos non justificat, facit vasa in contumeliam, non in eis odit, quod facit, quippe in quantum impii, sunt execrabiles; in quantum autem vasa sunt, ad aliquem usum faciunt, ut per eorum ordinatas penas, vasa, quæ fiunt in honorem, proficiant. Non itaq; odit Deus, nec in quantum homines sunt, nec in quantum vasa sunt; id est; non quod in eis facit creando, nec quod in eis facit ordinando. Sicut enim Judex in homine odit furtum, sed non odit, quod datur ad metallum, illud enim fur, hoc Judex facit; ita Deus. Et iterum: Noluit ergo Esau, & non cucurrit. Sed etsi voluisset, & cucurrisset, Dei adjutorio pervenisset; qui etiam velle, & currere vocando præstaret, nisi vocatione contempta reprobatus fieret. Vides hæc iterum aperte fateri Augustinum, non ideo reprobatum esse Esau, quod Deus non vocaverit, aut quod velle, & currere (quod ad gratiam efficacem pertinet) præstare noluerit; sed quod Esau vocantem contempserit. Causa ergo, ob quam Judæos (de quibus in persona Esau loquitur Paulus) aliosque reprobos Deus odio habet, non est Dei, sed hominis voluntas, hoc est, peccatum; nam si non peccarent, nihil esset, teste Augustino, quo possent odio haberi. Et planè nihil ex parte Dei ad convertendum Judæos defuisse, clarissimum est Scripturas legenti: *Quid debui, inquit, facere vineæ meæ, & non feci? Isa. 5.* Et: quoties

volui congregare filios tuos, & noluiſti? Matth. 23. Voluit ergo Deus, ſed noluit Judæus; quid ergo conqueri poteſt, ſi volente Deo, noluit ipſe? Audi eleganter Gregorium. Hom. 10. in Evang. *Sed in omnibus ſignis, quæ vel naſcente Domino, vel moriente eo monſtrata ſunt, conſiderandum nobis eſt, quanta fuerit in quorundam Judæorum corde duritia, qui hunc nec per Prophetiæ donum, nec per miracula agnoverunt. Omnia quippe elementa Auctorem ſuum veniſſe teſtata ſunt. Deum enim hunc eſſe, cæli agnoverunt, quia Stellam protinus miſerunt. Mare cognovit, quia ſub plantis ejus calcabile ſe præbuit. Terra cognovit, quia eo moriente contremuit. Sol cognovit, quia lucis ſue radios abſcondit. Saxa, & parietes agnoverunt, quia tempore mortis ſciſſa ſunt. Infernus agnovit, quia hos, quos tenebat, mortuos reddidit. Et tamen hunc, quem omnia inſenſibilia elementa Dominum ſenſerunt, adhuc infidelium Judæorum corda Deum eſſe minimè cognoscunt, & duriora ſaxis, ſcindi ad pœnitentiam nolunt.* S. Leo, quoque Serm. 8. de Paſſione Domini: *Traxiſti enim Domine omnia ad te, & cum expandiſſes tota die manus tuas ad populum non credentem, & contradicentem tibi, conſitendæ Majestatis tuæ ſenſum totus Mundus accepit. Traxiſti Domine ad te, cum in execrationem Judaici ſcleris unam protulerunt omnia elementa ſententiam. Cum obſcuratis luminaribus Cæli, & converſo in noctem die, terra quoque motibus quateretur inſolit, univerſaque creatura impiorum ſe uſui denegaret. Traxiſti Domine omnia ad te, quoniam ſciſſo Templi velo Sancta Sanctorum ab indignis Pontificibus receſſerunt, ut figura in veritatem, Prophetia in manifeſtationem, & Lex in Evangelium verteretur.* S. Auguſtinus quoque in ea verba: *Quoties volui congregare filios tuos: ſicut gallina congregat pullos ſuos ſub alas, optimè advertit, non quemcumque amorem, & providentiam Dei erga Judæos, ſed maximam, ac præcipuam oſtendi: Mirus, inquit, eſt amor omnibus ſerè avibus ad conſervandos, & protegendos pullos ſuos, ſed præcipuè gallinis, quæ pullos colligunt ſub alas, hoc eſt, ſummum cum deſiderio, & ſollicitudine eos fovent. Si ergo Deus tot miraculis, tot prodigiis, tot beneficiis egit, ut Judæi converterentur, qualia, & quanta nullibi, & nunquam facta ſunt; quis dicat, aut omnino, aut non ſerid, nec efficaciter voluiſſe? Quid ſi & ſerid, & efficaciter voluit, nec tamen converſi ſunt, ergo illorum culpa, non Dei fuit; nec conqueri poſſunt, ſe ideo periſſe, quia ipſos Deus odio habuit: ſed ideo Deum ipſos odio habuiſſe, quia perire voluerunt.*

runt. Et planè non gratis Judæos, sed maximâ eorum culpâ reje-
ctos esse, Apostolus eodem ipso loco, qui nobis obiicitur, clarissi-
mè docuit. Nam cap. 10. 23. ita loquitur: *Ignorantes enim Dei*
iustitiam, & suam quærentes statuere, Justitiæ Dei non sunt subiecti.
Et vers. 22. *Expandi manum meam ad populum non credentem, &*
contradicientem mihi. Et cap. 11. vers. 20. *bene propter infidelita-*
tem suam fracti sunt. Et vers. 20. *Nunc autem misericordiam con-*
secuti estis propter eorum incredulitatem. Et cap. 10. vers. 12. *Non*
enim est distinctio Judæi, & Græci, num idem Dominus omnium. Si
ergo apud Deum nulla est distinctio Judæi, & Græci, sequitur,
Deum quantum ex se est, æqualiter in Judæum, & Græcum pro-
pensum, affectumque fuisse. Si ideo fracti sunt rami, quia de ope-
ribus Legis præsumentes noluerunt Evangelio subdi, si Deo ad cre-
dendum invitante, & ideo *tota die manum suam ad eos extendente,*
ac auxilium porrigente noluerunt credere; non accusare Judæi alium,
quàm se ipsos possunt: sicut non posset, qui in flumen lapsus amico
inclamante, & manum non cursim, sed constanter, totaque die
porrigente, mallet mergi, quàm juvari. Tales Judæi erant. Ipsi
odio, invidiâ, ambitione, velut torrente rapiebantur. Deus testi-
bus Isaia, & Paulo, *manum tota die extendebat,* ne absorberentur;
absorberi tamen, quàm levare maluerunt; quem inculcabis? Opitu-
lari, an absorberi volentem? Quid si porro quæras: cur juvari, cur
credere noluerint? Respondet Augustinus tract. 53. in Joan: *Quare*
credere non potuerint, si à me quæres, citò respondeo: quia noluerunt.
Agit quippe gratia in voluntatem humanam non more fulminis,
resistentia quæque frangentis; sed more Solis, lucem suam, nisi ad-
mittas, aliò, citraque strepitum transferentis.

Pergit Apostolus: Moyse enim dicit: *Miserebor, cui misereor,*
non ergo est volentis, neque currentis, sed miserebor Dei. Obiicie-
bant Judæi, æquum non esse, ut Gentiles, qui nihil boni, multum-
que mali operati fuerant, Justificationem, æternamque vitam con-
sequerentur. Quibus respondet Apostolus: mirari eos non debere,
cùm hæc natura sit gratiæ, ut gratis detur, citraque meritum; alio-
quin si merentibus, & ex debito daretur, jam non gratiam, sed de-
bitum, nec donum, sed stipendium fore, quale mercenariis datur.
Justificatione ergo (de qua, ut postea dicetur, præcipuè, & ex
professo Apostolus agit) primamque vocationem ad Fidem, *non vo-*
lentis, non currentis, non merentis, sed miserebor Dei esse, quæ om-

nia certissima sunt, nec ab alio, quàm hæretico negari possunt. Cæterùm cum contra Calvinii, & Lutheri errores indubitatum sit, duo ad fidem, aliosque actus supernaturales requiri; *gratiam* videlicet Dei, & *consensum* hominis, sicque utriusque voluntatem, explicandum superest, cur Apostolus dicat, non esse *volentis*, neque *currentis*? Quomodo enim non est currentis, cum juxta celebre illud Augustini dictum: *Qui creavit te sine te, non salvabit te sine te*? Et ad Simplicianum lib. 1. quæst. 2. *Ut velimus, & suum esse voluit, & nostrum, suum vocando, nostrum sequendo*. Ut enim in terris, ita multoque magis in cœlis æterna lege sancitum est, beneficium non conferri invito. *L. invito ff. de R. l.* Si ergo Deus nullam, nisi volentem salvat, nullumque nisi currentem coronat, quomodo verum erit, non esse volentis, neque currentis? Verissima tamen Apostoli sententia est. *Nam primò*; quia, ut suprà notavimus, cum Hebræi comparativis careant, dicunt, illud non esse, aut nihil esse, quod minus alio est; qua ratione alibi dixit Apostolus: *neque qui plantat, neque qui rigat, est aliquid*; non quoddam revera, qui plantat, aut nihil sit, aut nihil agat; sed quoddam minimum sit, quod agit, si cum eo componas, quod agit Deus, cum plantatis, & rigatis incrementum donat; neque tamen maximum illud, quod facit Deus, sequeretur; nisi parùm illud præcederet, quod facit homo. Quanquam, & hoc ipsum parùm quod facit homo, sit quoque, factum, & opus Dei, *nam sine me nihil potestis facere*, inquit Christus Joan. 15. Ubi Augustinus: *Sive ergo parùm, sive multum, sine illo fieri non potest, sine quò nihil fieri potest*. Et in Psalmo 102. *Vocat undique Deus ad penitentiam: vocat beneficiis creaturæ; vocat per Lectorem, vocat per tractatorem, vocat per intimam cogitationem, vocat per flagellum correptionis, vocat per misericordiam consolationis*. Merito ergo dicit Apostolus, non esse volentis hominis, sed miserentis Dei; quia tam parùm est, quod facit homo, tam multum, quod facit Deus, ut ad hoc multum illud parùm velut lumen cicindelæ ad lucem Solis penitus evanescat. Sic quoddam ægrotus sanetur, dicimus, non esse ipse ægroti, sed Medici; quanquam enim nihil possit medicina, nisi ægrotus accipiat; accipere tamen tam exiguum est, ut tota gratia sanitatis merito ad solum Medicum pertineat, qui morbum cognovit, qui causam invenit, qui remedia paravit, qui potionem miscuit, qui que pharmacum ita morbo, & genio laborantis aptavit, ut posset, & vellet sumere, nec nauseam sentiret. Quia ergo ratione tu dicis, non esse volentis, nec optan-

optantis ægroti, sed curantis Medici, ut sanetur; eadem Apostolus dicit non esse *currentis*, nec *volentis hominis*, sed *miserentis Dei*, ut peccator salvetur: agit ægrotus, agit peccator; sed nihil est, quod agunt, si cum Medico, & Deo comparentur. *Secundò* dicitur Justificatio, & salus hominis non *volentis*, neque *currentis* esse; non quoddam homo non sit, qui velit & currat, sed quia ipsum velle, ipsumque currere Dei munus est; nec enim vellet, nisi Deo voluntatem parante; nec curreret, nisi Deo otiosum, & cunctantem trahente. Cum ergo Dei gratia sit, quæ hominis conatum prævenit, excitat, adjuvat, committatur, & sequitur; cum voluntas hominis nec inchoare opus, nec prosequi, nec finire possit; cumque nihil penitus boni, conducensque æternæ salutis habeat, quod à gratia, hoc est, à Deo miserante non acceperit; meritò dicit Apostolus: *non esse currentis, neque volentis*; quia licet velit, & currat, non suis tamen viribus, sed gratiæ facit. Sicut si debitori nihil habenti mille aureos amicus donec æri alieno diluendo; meritò dixeris, quod debitum solvat, non esse volentis, neque solventis debitoris, sed miserentis, & donantis amici. Cum ergo tria ad opus aliquod faciendum pertineant, principium videlicet, medium, & finis; & nihil istorum homo velit, aut faciat, nisi gratia moliente, meritò nihil homini, sed omnia gratiæ tribuuntur. Tantoque magis, quia solis naturæ viribus nec se homo ad gratiam disponere, nec aliud præstare potest, cujus causâ Deus dare illi gratiam dicatur, de quo vide S. Thomam 1. 2. quæst. 109. art. 6. Bellarminum de Grat., & libero arbitr. lib. 6. cap. 5. Sed audi Augustinum lib. 1. ad Simplicianum quæst. 2. *Præcipitur, ut rectè vivamus; sed quis potest rectè vivere, & bene operari; nisi iustificatus ex fide? præcipitur, ut credamus, sed quis potest credere, nisi aliqua vocatione, hoc est, aliqua rerum testificatione tangatur? qui habet in potestate tali visu attingi mentem suam, quo ejus voluntas moveatur ad fidem? Quis autem animo amplectitur aliquid, quod eum non delectat? At quis habet potestatem, ut vel occurrat, quod eum delectare possit; vel delectet, cum occurrerit? Cum ergo nos ea delectant, quibus proficimus ad Deum, infunditur hoc, & præbetur gratiâ Dei, non nutu nostro, aut industriâ, aut operum meritis comparatum, quia ut sit nutus voluntatis, ut sit industria studii, ut sint opera charitate ferventia; ille tribuit; ille largitur Igitur non volentis, neque currentis, sed miserentis est Dei; quandoquidem nec velle, nec currere, nisi eo movente, atque excitante poterimus.*

Et

Et S. Bernard. lib. de grat. & liber. arbitr. *Conatus nostri & cassi sunt, si non adjuventur, & nulli sunt, si non excitentur.* Tertiò denique, ac præsertim verissimum est, *non volentis, non currentis, sed miserationis Dei esse;* Quia licet in negotio æternæ salutis voluntas humana suffragium præstet, partesque suas agat; totum tamen meritum, totumque operis pretium à sola gratia, non voluntate hominis est. Quod enim opus sit supernaturale, quod Deo placitum, quod peccatum deleat, quod animam iustificet, quodque meritorium sit æterni præmii, illique consequendo prosit, id totum gratiæ debetur. Ut enim Rege ancillam ducente, filius ex nuptiis natus, hæres quidem Regni est, sed paterno, non materno jure: Ita voluntate Deo per fidem, & gratiam nuptâ, quidquid bonorum operum ex hoc connubio nascitur, cælum quidem meretur, sed Dei solius beneficio, nulloque merito voluntatis, nihil enim juris ancillæ ad Regnum. Quod etiam hoc ipso capite II. exemplo infitionis illustrare iis verbis Apostolus voluit: *Cum enim esses oleaster, insertus es in bonam olivam.* Quemadmodum enim si oleastro, alterive sterili trunco furculum punicæ, cedrivæ arboris immittas; flores quidem, & poma cedri, aut punicæ erunt juxta illud Poëta:

Miraturq; novas frondes, & non sua poma;

Sed totum id à furculo, non trunco proveniet. Ita prorsus de operibus hominis sentiendum est: Si enim bona sunt, & præmio digna, non radici, sed inferenti debent, hoc est, non sibi, sed Deo, nec trunco, sed gratiæ; quod duobus verbis eleganter Bernardus expressit Serm. 6. in Cantica; *Proinde meritum meum, miseratione Domini.* Sanctus quoque Augustinus libro de Gratia, & libero Arbitrio cap. 6. *Bona sua coronat Deus, non merita tua; nam si merita tua sunt, mala sunt; quæ verò mala sunt, non coronat Deus; quod si bona sunt, Dei dona sunt.* Et cap. 6. *Quid est hoc, quod cum Apostolus Dei gratiam commendans dixisset: non ex operibus, ne forte quis extollatur; cur hoc dixerit, rationem reddens; ipsius enim, inquit, figmentum sumus; creati in Christo JESU in operibus bonis. Quomodo ergo non ex operibus, ne quis extollatur? Sed audi, & intellige. Non ex operibus dictum tanquam tuis, ex te ipso tibi existentibus, sed tanquam suis, in quibus te Deus finxit, idest formavit, & creavit.* Et observa illam Apostoli vocem: *creati;* Creatio enim ex nihilo est; sicut ergo creavit ex nihilo, ita redemit, & salvavit ex nihilo, hoc est, nullo merito præcedente.

Addit

Addit Apostolus: *Dicit enim Scriptura Pharaoni: in hoc ipsum excitavi te, ut ostendam in te virtutem meam, ergo cuius vult misereatur, & quem vult indurat.* Hic videtur Apostolus duo docere sententiæ nostræ adversa. *Primo*, Deum aliorum quidem miseri, alios verò indurare, hoc est, non miseri, ut semper exponit Augustinus; non ergo Deus omnium misereatur, sed aliquorum tantum. *Deinde* quod unus misereatur, alterius verò non misereatur, non peccatis Paulus adscribit, non humano arbitrio, sed meræ, unicæque Dei voluntati: *Cujus, inquit, vult misereatur, & quem vult indurat.* Hæc ferè præcipua, & maxima difficultas est, quæ, ut penitus, solideque evolvatur, altius, & à suis principiis petenda solutio est.

Observandum ergo, totum scopum Epistolæ ad Romanos esse, ut ostendat Apostolus justificationem, remissionem peccatorum, & jus ad cœlestem hæreditatem non ex Circumcisione, non ex ceremoniis, non ex operibus Legis esse, in quibus Judæi suam spem collocabant; sed ex fide in Christum, quod cum in præcedentibus capitulis præsertim tertio, & quarto Paulus fusè, lateque probasset; tandem *cap. 9. 10. & 11.* probat, ideo Gentiles ad hanc Justificationem veniam peccatorum, adoptionem, æternamque hæreditatem pervenisse, quia in Christum crediderunt: Judæos verò repulso esse, quia licet per innumera miracula, ab ipsoque Messia inter ipsos nato, educato, mortuoque efficacissimè vocati, fidem amplecti renuissent, idque partim falsâ, ac præposterâ Legis Mosaicæ æmulatione; partim contemptu ipsius Christi, cujus paupertatem, & humilitatem aspernabantur; partim quoque odio sanctissimæ ipsius Legis, quâ flagitia sua redargui videbant. Quod verò Deus primò Judæos in Populum, filiosque suos, ac hæredes cœlestium honorum elegerit, rejectis Gentilibus; deinde Gentes assumpserit, Judæosque repulerit; ac tandem sub Mundi finem etiam Judæi ad Christi fidem perventuri sint, docet Apostolus, id non ex bonis Gentilium operibus (qui fortè peiores Judæi erant) sed ex mera Dei voluntate, & inscrutabili providentia fluxisse, qui Justificationem, & Adoptionem voluit potius ex fide in Christum, quàm ex carnali Abrahamæ propagatione, & Lege Mosaica pendere: Mille enim aliique modi Deo supererant, quibus homines justificaret; quod verò non aliter justificari voluerit, quàm ex fide in Christum, id dicit Apostolus ex sola Dei voluntate, occultisque judiciis provenisse. Non ergo hic disputat Apostolus, cur unum major, minorve gratia tribuatur? cur unus ad fidem, non alius per-

perveniat? cur unus ad Electos, alter ad Reprobos pertineat? Nihil, inquam, istorum propositum Apostolo fuit; sed tantum, cur Deus voluerit potius per fidem in Christum, quam per opera Legis, in quibus Judæi tantoperè gloriabantur, justificari? Hunc esse Apostoli unicum scopum, patet caput tertium, quartum, & undecimum legenti. Si ergo ex Apostolo quæras: cur Gentiles, qui verum Deum ignorabant, non verò Judæi, quorum tota lex nihil aliud resonabat quàm Deum, cur, inquam, illi non isti justificationem adepti sint? duas assignat Apostolus causas. *Primam, & universalem Dei voluntatem, propositum, & electionem: ut secundum electionem propositum Dei maneret* cap. 9. v. 11. *Electio autem consecuta est*, cap. 11. v. 7. hoc est, quòd Gentile, potius fideles, quàm Judæi infideles ad veniam peccatorum, & adoptionem filiorum pervenerint, causa fuit Dei propositum volentis hominem non per Legem Mosaicam, eiusque opera externa, sed per fidem in Christum justificari. *Secunda, & particularis causa, quam Apostolus expendit, illa est: quòd Gentiles in Christum crediderint, Judæi verò credere noluerint: Gentes, quæ non sectabantur iustitiam, apprehenderunt iustitiam; iustitiam verò, quæ ex fide est. Israel verò sectando legem iustitiæ, in legem iustitiæ non pervenit: quare? quia non ex fide, sed quasi ex operibus; offenderunt enim in lapidem offensionis* cap. 9. v. 30. & iterum: *Ignorantes enim iustitiam Dei, & suam quærentes statuere, iustitiæ Dei non sunt subiecti; finis enim Legis Christus ad iustitiam omni credenti*, cap. 10. v. 3. Et iterum: *propter incredulitatem fracti sunt, tu autem fide stas* cap. 11. v. 20. Ubi vides, totam causam reprobationis Judæorum ex eorum infidelitate, non ex Dei arbitrio provenire, qui mallet eos credere, & salvari. Si enim iterum ex Apostolo quæras: an ergo non velit Deus Judæos quoque ad fidem, æternamque salutem pervenire? imò, inquit, Apostolus, & quàm maximè: *Non enim est distinctio Judæi, & Græci, nam idem Dominus omnium, dives in omnes, qui invocant eum*. cap. 10. v. 12. quasi dicat: sicut non minùs est Dominus Judæi, & Græci, ita non minùs Judæi curam, & providentiam habet; nec curam quamcumque, sed curam *divitem*, hoc est, copiosam, & affluentem. Cum enim verum Deum agnoscant, & adorent; tantum invocent, & eis non deerit. Quid verò minùs peti potest ab ægroto, ut curetur, quàm ut invocet Medicum? & quid minùs à Mendico, ut ditetur, quàm ut petat à Principe? Et infra *Ad Israel autem dicit: tota die expandi manus meas ad populum non*

cre-

*credentem, & contradicentem mihi . cap. 10. v. 21. Quis non dicat, donare ferid, & efficaciter velle, qui tota die, imò qui triginta tres totos annos nihil aliud egit, quàm ut manum ad dandum paratam, & porrectam haberet, rogaretque, ut vellent accipere? Si ergo non acceperunt, nulla culpa fuit volentis dare, sed nolentis datum accipere. Et rursus: sed & illi si non permanferint in incredulitate, inferentur . cap. 11. v. 23. paratus ergo Deus est, misereri, & inferre, modò velint; nec ut velint, gratia eis deest; cùm enim cupiat Deus, ut inferantur, cupit quoque, ut velint, cùm non aliter, quàm volendo inferi possint; nec enim necessitate inferuntur, ut plantæ, sed inferuntur voluntate, ut homines. Et paulò post: *conclufit enim Deus omnia in incredulitate, ut omnia misereatur*, hoc est, omnes cùm Judæi, tùm Gentiles sunt peccatores, & indigent gratiâ Dei; sicut ergo nullus omnino est, qui non sit miser; ita nullus omnino est, cujus non misereatur. Non enim dicit Apostolus: *ut aliquorum*, sed *ut omnium* misereatur. Nullum ergo ut à miseria, sic à misericordia excludit. Cujus ergo non miseretur Deus, si miseretur etiam Judæi, hoc est, omnium perfidissimi, durissimi que. Et denique Christus ipse: *Quoties volui congregare filios tuos, sicut gallina congregat pullos suos sub alas, & nolulistis. Matth. 23.* quibus verbis non quemcumque amorem, & providentiam Dei erga Judæos, sed maximam, & præcipuam ostendit; nam ut Augustinus hîc notat: *mirus est amor omnibus ferè avibus ad conservandos, & protegendos pullos suos, sed præcipuè gallinis, quæ illos colligunt sub alas, hoc est summo cum desiderio, & sollicitudine fovent.**

His prænotatis de mente, & scopo Apostoli, verba ipsa expendamus.

Cujus, inquit, vult misereatur, hoc est, pro sua voluntate, nulloque operum respectu Christianis potiùs, quàm Judæis Justitiam, adoptionem, æternamque vitam largitur. Quid enim credentes in Christum potiùs, quàm non credentes justificentur; id non ex natura, pretioque intrinseco fidei est, sed ex Dei merissima voluntate, qui gratiam justificantem, & cœlestem gloriam veteri æquè, ac novo Testamento, ac mille aliis mediis sibi notis adstringere poterat. Si ergo quæras, cur potiùs Christianum, quàm Judæum adoptaverit, respondet Apostolus: quia voluit. Nihil huc opera, nihil merita, nihil humana voluntas facit. Volebat Judæus salvari, sed nolebat in Christum credere: volebat Cœlum tanquam Abrahæ promissum;

L

sed

sed volebat Legis Mosaicæ merito, non dono Evangelii. *Currebat*, hoc est, per ritus, per ceremonias, per vaticinia Prophetarum, per figuras, totamque Mosaicæ Legis, pompam velut quodam cursu ad Messiam suam ferebatur; nec tamen pervenit, quia credere recusabat. Gentilis ex adverso, non lege, non Templo, non Sacerdotio, non Oraculis, non cognitione veri Dei adiutus, otio, somnoque vult in profundissima nocte marcebat, & tamen quia credidit, iustificatus, adoptatus, redemptus, electus fuit. Merito ergo iterum, iterumque inculcat Apostolus, *non volentis, non currentis, non operantis, sed misereantis Dei esse*. Et huc duorum geminorum Jacobi, & Esau, Pharaonis, & figuli ab Apostolo tam enixe commendata exempla faciunt. Nec tamen conqueri Judæus potest, nam ipse quoque Misericordiam, & Adoptionem consequetur, si modò credat; ut verò credat, nihil non agit Deus, nihil non egit, ut suprà expendimus: *sed & illi, si non permanserint in incredulitate, inferentur*, inquit, Apostolus ad Rom. 11. Velint ergo, & credant; credant, & inferentur, Deo semper parato, imò urgente.

Sequitur: *Et quem vult, indurat*, hoc est, *non misereatur*, ut semper explicat Augustinus *Epist. 105. Tract. 53. in Joan. Lib. 1. ad Simplicianum q. 2.* & alibi sæpe. At videtur sibi Apostolus, aliisque Scripturis contradicere. Hic enim dicit: Deum aliquos obdurare, hoc est, aliquorum non miseri; cum cap. 11. v. 37. scribat: *Deum omnium miseri*. Et Sap. 11. *Misereris enim omnium, quia omnia potes*. Et Joan. 1. *illuminat omnem hominem venientem in hunc Mundum*, hoc est, sicut nullus est hominum, qui vivat, & non veniat in Mundum; ita nullus est, quem non illuminet, & illuminando misereatur. Quomodo ergo aliquorum non misereatur, si misereatur omnium? Sed facilis est ex dictis responsio. *Misereatur enim Deus omnium, & non omnium misereatur*. Misereatur omnium, qui fide viva in Christum credunt, quales Gentiles erant ad fidem conversi: & non misereatur omnium, eorum videlicet, qui credere nolunt, quales erant Judæi. Cur verò credentium potius, quam non credentium, cum, & istorum, & illorum miseri possit, si velit? id enim verò ad voluntatem illam, occultamque propositum pertinet, quod inaccessum esse Apostolus profitetur, quodque venerari nos potius, quam scrutari oportet. Sufficiat ex Sacris Litteris didicisse, quod jam suprà, & evidentissimè ostendimus; etiam Judæis gratiam efficacissimam, & abundantissimam dari,

ri, quâ credant, sicque ad vasa misericordiæ pertineant, si velint; nam si nolint, non tam quærere debent, cur Deus infidelium non misereatur, quàm potius, cur ipsi esse infideles, nec misericordiam consequi velint? Sicut si paratus ego sim debita tua, quibus ad carceres rapiendus es, auro solvere, nec ipse acceptare aurum velis, sed argentum poscas; non tam quærendum est, cur auro magis, quàm argento solutionem offeram, quàm potius, cur ipse auro redimi nolis? velle enim hoc, vel illo modo solvere, arbitrii mei, & charitatis est; nolle verò oblatam solutionem accipere, voluntatis, & contumaciæ tuæ, tua interest solvi, non verò modum solvendi præscribere: Sic Judæi redimi quidem volebant, sed per legem, non per Evangelium, non per fidem in Christum, cujus humilitatem, paupertatem, & Crucem superbi aspernabantur; At Deus non aliter eos redimere, quàm per hanc ipsam Fidem, & Crucem statuerat. Quem ergo accusabis? nolentem hoc pretio solvere, aut nolentem hoc pretium accipere? Et huc optimè faciunt illæ Christi sententiæ: *tolle quod tuum est, & vade; an non licet mihi facere, quod volo? an oculus tuus nequam est, quia ego bonus sum?* Matth. 20. Et iterum: *Confiteor tibi Pater Domine Celi, & Terræ, quia abscondisti hæc à prudentibus, & sapientibus, & revelasti ea parvulis; ita Pater, quia sic fuit placitum ante te.* Luc. 10.

Sed expendendum adhuc superest, quid sibi illa vox velit: *obdurat*, quod diligentius omnino explicandum à nobis est.

Sciendum ergo, quod à nullo Catholicorum negari potest; Deum nullius peccati, multoque minùs obdurationis, quæ omnium est maximum, autorem esse: *Nolite*, inquit, *obdurare corda vestra*. Non ergo facit, quod vetat, alioquin seridè, efficaciterque repugnantia vellet; esse videlicet, & non esse peccatum: non esse, quia prohibet, esse quia facit. Et: *Ne dicas ipse me implanavit Eccl. 15.* At quæ major implanatio, quàm urgere aliquem, ut agat, quod prohibes? *Deus neminem tentat, Jacob. 1.* quantò minùs impellit? pejus enim est facere, quàm suadere. *Nolo mortem peccatoris: Ezech. 13.* At quæ major mors, quàm peccati? Rogamus quotidie, *ne nos inducat in tentationem*: At vanè, nulloq; fructu, si Deus inevitabiliproposito, & voluit ab æterno, & agit, ut peccem. Cùm enim Deus omnia non manu, ut homines, sed voluntate operetur; si causat peccatum volendo causat, peccatum, ergo non repugnaret divinæ voluntati, sed conveniret; non ergo peccatum esset, sicut enim non est curvum, quod respondet li-

ne ea rectæ, nec dissonum, quod convenit regulis Musicæ; ita non potest malum, nec peccatum esse, quod divinæ voluntati; hoc est, quod primæ regulæ bonitatis, & honestatis respondet; si ergo furer volente Deo (ut olim Egyptiis Judæi) non jam crimen, sed meritum erit; tam ergo non facit Deus peccatum, quàm ars non facit errorem; nam si error est, non juxta, sed contra artem est. Quæ omnia tam clara sunt, ut nec ipsos Gentiles, hoc est, cæcos laterent. Sic enim Lucianus in Jove: *Si Parca omnium rerum est causa; ergo si quis patrem occiderit, Parca in culpa est. Si Minos rectè velit uti iudicio, multò æquius fatum pro Sisypho, & Tantalò puniet; quid enim illi iniuste egerint, quando Diis obtemperarunt?* Deus prohibet parricidium; & tamen movet, & cogit ad parricidium, inquit, Calvinus. Quod si ita est, sequitur, peccatum non esse peccatum. Sicut enim peccatum artis nihil aliud est, quàm defectus contra regulas artis; ita peccatum moris nihil aliud est, quàm error, & defectus contra voluntatem divinam, hoc est, contra primam, supremamque regulam honestatis. Si ergo Deus, & non vult peccatum, quia prohibet, & vult peccatum, quia impellit, imò, ut Calvinus ait, ad peccatum cogit; sequitur, & peccatum fore, quia repugnat Deo prohibenti, & non fore, quia obsequitur Deo cogenti. Imò potius non peccare, quàm peccare dicendus erit, quia sicut Deus magis, & efficacius vult, quod ipse facit, & alios cogit, ut faciant, quàm non vult, quæ tantum prohibet fieri (prohibere enim est voluntas tantum signi, facere, voluntas operis) sicque non peccatum, sed prudentia, & obsequium erit; plus enim obedire teneor Deo cogenti (cùm id vitare non possim) quàm Deo vetanti. Quod si obedis, ergo non peccas, nec pœnam mereris, quis enim nisi de Tyranno audivit, servum punivisse, quia volenti, & urgenti obtemperavit? Sed & hoc ipsum dogma totam Religionem, hoc est, fidem Scripturarum evertit: Si enim omnium mendaciorum causa, & author est Deus; ergo suspicari meritò de illo possim, omnibus Prophetis, & Evangelistis, ut hominem ad sui cultum, & amorem provocaret, mendacia inspirasse; quid enim iustius, quàm omnium mendaciorum Authori fidem negare? Nihil ergo in Scripturis erit non mendacii suspectum. Deinde cùm peccatum sit infinita Dei injuria; imò tanta, ut si naturæ mortalis esset, eum dolore, ac morte conficeret, & ideo nullo bono creato compensari potest; quàm ergo non potest Deus sui injuriam, & destructionem velle; tam non potest velle, ac causa-

re

re peccatum. *Non potest*, inquit Paulus, *se ipsum negare*. 2. ad Timoth. 13. At quo magis negare se possit, quam id faciendo, quod illius Majestati, Bonitati, felicitati, dominioque infinite repugnat, ut repugnat peccatum? Si ergo vellet peccatum, vellet se ultimum finem non esse, vellet sibi creaturam præponi, vellet se Deum non esse. Vide S. Thomam q. 79. a. 1. & 2. & de malo q. 3. Adde, quod observat S. Basiliius Homil. 2. in Hexamer. Nullum contrarium à dissimili, & contrario nasci. Quando enim aut ficus spinas, aut Laurus uvas, aut ignis aquam, aut ars errorem produxit? At nihil magis contrarium Deo, quam peccatum, cum hoc sit summum malum, illud sit summum bonum; majus ergo absurdum est, Deum authorem peccati facere, quam ficum authorem spinæ, ignem authorem aquæ, aut solem authorem noctis. Planè cum quidquid facit Deus, sit quædam participatio, & imitatio Dei, sicut umbra imitatio corporis, & parelium, ac radius quædam imitatio Solis; quæro, quid in Deo sit, quod imitari peccatum possit? Nam ut non potest nigram esse imitatio alibi, nec turpe imitatio pulchri, aut curvum imitatio recti; ita nec culpa imitatio Dei. Nec juvat Calvinum, Deum, ut ipse comminiscitur, peccatum operari, sed sine honesto, misericordiæ videlicet in electos, justitiæ in reprobos ostendendæ? Nam *Primo*, cum peccatum sit infinita Dei injuria, quippe infinitæ Majestati facta, nullus finis, nullumque bonum creatum est, quo compenari possit, sicut non potest infinitum debitum, finito pretio, & ideo tam impensè monuit Apostolus, 3. ad Rom. 3. *non esse faciendâ mala, ut eveniant bona*; alioquin, & adulteria, & perjuria licebunt boni alicujus, aut Reipublicæ causâ. *Deinde* quid indignius Deo, quam sibi gloriam per flagitia parare; quasi aut tam impotens sit, ut non possit, aut tam malignus, ut non velit, nisi per dedecora, & infamia clarescere, ut olim Erasistratus, & Catalina incenso Templo, everlaque Patriâ. *Rursus* quæ clementia, & misericordia dici potest, spoliare, ut alios vestias, vulnerare, ut alios sanes? *Si malevola est benevolentia, quod fieri non potest, potest, & ille, qui veraciter, sincerè, miseretur, cupere esse miseros, ut misereatur*, inquit, Augustinus lib. 2. Confess. cap. 2. Latronum ergo, & Tyrannorum, non Dei sunt hæc beneficia, quæ fingit Calvinus. *Adde*, quamvis daretur per impossibile, Deum omnino peccatum velle; sufficeret, id ab eo permitti, nec opus esset positivo influxu; sicut enim, ut vitrum in terram cadat, casuque elidatur, utque accipiter, aut canis prædam

invo-

involet, sufficit, venatorem permittere, nulloque alio impulsu opus est; ita ut in peccatum cadat homo, utque in voluptates illicitas ruat, sufficit permittere Deum; cum tam pronum sit homini peccare, quam vitro cadere, quamque falconi, aut cani in prædam rapi. Cur ergo Deus agendo, & cauendo se omnium malorum, scelerumque complicem faciat, tanto sanctitatis suæ damno, & dedecore, cum possit, si peccatum velit, id totum, & innoxie permittendo obtinere? Non ergo causat Deus peccatum, sed permittit; hoc enim iuste facere potest, illud nisi impiè non potest. Denique non esse Deum causam obdurationis, aliorumque peccatorum, inductione omnium Causarum probatur: Nec enim potest Deus esse *Causa materialis* peccati, cum in eo nullum sit malum, alioquin non esset summum, & infinitum Bonum. Nec est *Forma peccati*, cum potius sit Forma totius innocentiae, & sanctitatis. Nec est *Finis peccati*, cum peccatum sitaversio à Deo ultimo omnium rerum fine. Nec est *Causa Principalis effectiva* peccati, cum peccatum sit defectus, & non esse; defectus verò reducitur semper in causam aliquam deficientem, & imperfectam; sicut inquit S. Thomas 1. p. q. 49. a. 1. *Defectus in motu corporis potest contingere, vel propter debilitatem virtutis motivæ, ut in pueris; vel propter solam ineptitudinem instrumenti, & tibiæ, ut in claudis.* Nec etiam Deus *Causa per accidens* est peccati; quemadmodum ignis incendendo lignum, per accidens causa est, ut forma ligni corrumpatur; id enim dicitur per accidens fieri, quodd necessarid consequitur ad actionem agentis; sicut corruptio ligni sequitur necessarid ad ejus inflammationem; at peccatum non necessarid sequitur ad influxum, & concursum Dei, cum hic sit indifferens, ut postea dicetur, nec tollat libertatem, sed relinquat locum eligendi oppositum, si homo velit, & gratiâ, quæ ad peccatum vitandum nunquam deest, utatur. Nec denique Deus est *Causa peccati indirecta* (sicut Gubernator somno indulgens, nec officii sui partes adimplens causa est, ut navis mergatur) quia, ut inquit S. Thomas 1. p. q. 49. a. 3. ad 3. *Deus non deficit ab agendo, quod est necessarium ad salutem.* Vide eundem Angelicum Doctorem 1. 2. q. 79. a. 1. Nullo ergo modo potest Deus dici causa peccati. Audi ipsum S. Doctorem loco citato a. 2. *Peccatum nominat ens, & actionem cum quodam defectu, sicut statua nominat lignum cum quadam figura, & claudicatio nominat motum cum quadam obliquitate: defectus autem ille est ex causa creata, scilicet libero arbitrio, in quantum deficit ab ordine*

dine primi Agentis. Unde defectus iste non reducitur in Deum sicut in causam; sed in liberum arbitrium, sicut defectus claudicationis reducitur in tibiam curvam, non autem in virtutem motivam, à qua tamen causatur, quidquid est motionis in claudicatione, & secundum hoc Deus est causa actus peccati, non tamen est causa peccati; quia non est causa huius, quod actus sit cum defectu.

Sed dices: Si ergo Deus peccatum non causat, cur dicitur obdurare? Respondeo, id duplici ex causa esse. Primum enim sciendum est, peccatum esse malum, imò omnium malorum maximum: Sicut verò nullum est dissonum, nisi in aliquo sono, nullum curvum, nisi in aliqua linea, nulla umbra, nisi cum aliquo corpore, nullusque morbus, nisi in aliquo membro; ita nullum est malum, est nullumque peccatum, nisi in aliquo, vel cum aliquo bono. Malum est homicidium, sed homicidium non esset, nisi viveres, nisi intelligeres, nisi vigiles, nisi movereris, nisi bonum aliquod appeteres, quæ omnia bona sunt; quis enim dicat, vivere, intelligere, moveri, bona non esse? si bona, ergo à Deo bonorum omnium principio, & exemplari; cum tam sit impossibile, bonum aliquod esse, non faciente Deo, quam impossibile est, vivum aliquem esse, non tribuente fonte; aut telam, non texente artifice. Dicitur ergo Deus obdurare, excacare, vasa in perditionem facere; quia facit, quidquid boni, & positivi in huiusmodi peccatis est, quamvis non faciat id, quod est malum, videlicet privationem boni, honestique. Tota enim natura, & malitia peccati in eo est, ut deficiat à norma rectæ rationis, legisque æternæ, hoc est, ut careat debita rectitudine. Est ergo peccatum defectus, & pertinet ad non esse, at non esse non potest in summum, plenumque esse tanquam in causam reduci, nec indiget Deo, sicut aliquid non vivere, non indiget animâ, & aliquid non esse pictum, non indiget pictore, ideoque optime notat Augustinus Lib. 12. de Civit. cap. 7. Eorum, quæ deficiunt, & quæ non sunt, nullam causam effectivam. sed defectivam tantum querendam esse, qualis utique non est Deus. Nemo, inquit, querat causam male voluntatis; non enim est efficiens, sed deficiens, quia illa nec effectio est, sed defectio. Et Lib. 83. Quæstion. Deus non est auctor mali, quia non est causa tendendi ad non esse. Et S. Thom. lib. 3. contra Gentes cap. 4. a. 2. Defectus in effectu consequitur defectum in principiis actionis, sicut ex aliqua corruptione seminis, sequitur partus monstruosus, & ex curvitate cruris sequitur claudicatio: Et 1. p. q. 49. a. 1. ad 3. Nunquam sequitur

dur malum in effectu; nisi præcesserit aliquod malum in agente, vel materia. Cum ergo nullus in Deo sit defectus, frustra in illo quæritur causa, & origo peccati; sicut in flamma frustra quæritur origo frigoris, & in Cedro frustra quæritur origo vermis, & corruptionis. Tota ergo, & sola causa peccati voluntas creata est: in hac enim multiplex defectus reperitur. Defectus videlicet *Originis*; quia creatura est ex nihilo facta: defectus *Naturæ*, quia sicut Deus est pelagus *Entis*, hoc est, omnis Entis perfectiones complectitur, ita creatura est gutta Entis; hoc est finitæ, & limitatæ perfectionis, aded ut paucissimæ sint perfectiones, quas habet, innumeræ, quas non habet, & ideo non Ens potius, quàm Ens dicenda est: cum enim denominatio fiat à potiori, & forma prævalente, sicquæ *Æthiops* absolute dicatur niger, licet candidis dentibus; sequitur, creaturam quoque non Entis potius, quàm Entis nomen mereri, quia nulla proportio est perfectionum, quas habet, ad illas, quas non habet. Est etiam in creatura defectus *Cognitionis*: Unde sequitur defectus amoris, & efficacis voluntatis, quæ origo est omnium peccatorum. Denique, ut alia quàm plurima omittam, est in voluntate defectus Virtutis ad prosequendum bonum arduum, vincendumque juxta normam rationis, impetum boni delectabilis concupiscentiam moventis. Cum ergo voluntas creata, hominis præsertim, tot titulis deficiat; quid mirum est, etiam in operando (nam operatio sequitur esse) semper ad defectum, & malum tendere, nisi per gratiam adjuvetur? Ex quibus tandem conficitur, Deum, licet ad omnem entitatem peccati concurrat, nulla tamen ratione causam peccati dici posse: *tum* quia causa mali semper est deficiens, quod Deo non convenit, *tum* quia esse non potest dici causa non esse, sicut scriptio non potest esse causa non scripti, & albedo non potest esse causa non albi: *tum* quia malum non continetur in Deo, nec *formaliter*, nec *eminenter*, nec *exemplariter*; quomodo ergo causa, in qua nulla ratione effectus continetur? *tum* quia non potest esse effectus, qui non pendet à causâ, quique causâ non eget; at peccatum, cum sit non esse, non potest pendere à Deo, sicut error non pendet ab arte, cum possit esse sine arte, & non lucidum, seu obscurum non pendet à Sole, cum possit esse sine Sole: *tum* quia, quando ad aliquod opus duæ causæ concurrunt, quarum una, non altera deficiens est; defectus operis soli causæ deficienti adscribitur; ut claudicatio non animæ, sed tibie curvæ; incertitudo conclusionis ex duabus præ-

præmissis, quarum una est evidens, alia inevidens, seu probabilis; præmissæ probabili non evidenti; sonus dissonus non peritissimo Musico, sed cytharæ fractæ, aut discordantibus nervis: *tum* quia peccatum est recessus à lege; at Deus concurrente ad entitatem omnis peccati, non recedit à lege, sed potius legem, & ordinem primi Entis, primæque Causæ, & universalis Gubernatoris implet; ejus officium est, in omne bonum influere, alioquin daretur aliquod bonum, quod non esset à primo Bono; & aliquod Ens, quod non esset à primo Ente. Imò peccaret Deus peccato omnium maximo, nisi ita concurreret, quia contra officium, legesque primi Entis, & omnium Creatoris ageret, sicque non esset Deus, quod omnium malorum pessimum est. *Tum* quia, ut loquitur S. Thomas 1. 2. q. 79. a. 1. ad 3. *Effectus causæ mediæ procedens ab ea, secundum quod subditur ordini Causæ primæ, reducitur etiam in Causam primam. Sed si procedat à causâ mediâ, secundum quod exit ordinem causæ primæ, non reducitur in Causam primam: sicut si Minister faciat aliquid contra mandatum Domini, hoc non reducitur in Dominum sicut in causam. Et similiter peccatum, quod liberum arbitrium committit contra præceptum Dei, non reducitur in Deum sicut in causam.* *Tum* denique, quia Deus concurret ad omnes hominum actiones concursu generali, & indifferenti (quod omnes Catholici admittunt, quocumque tandem modo concursum illum indifferentem exponant) relicta videlicet humanæ voluntati libertate, hoc, illudve agendi: Ut enim Deus uno, eodemque nutu voluntatis suæ (quem Theologi actionem virtualiter transeuntem vocant) omnia quamvis diversissima creavit; ita vno, eodemque voluntatis suæ nutu ad omnes, & diversissimas hominis actiones concurret: *Omnia portans Verbo virtutis suæ Verbo*, inquam, *non verbis*, uno, non pluribus, sed vno omnia complectente. Effectus verò, quod sit talis in specie, non tribuitur causæ universali, & indifferenti (cùm hujus influxu etiam oppositum fieri potuisset) sed causæ particulari, & specificæ, quod exemplo Solis clarissimum est: Is enim in omnes flores, fructusque arborum calore influit, unde cessante influxu, ut hujus contingit, nulli erunt flores, nullique fructus: Quia tamen influxus Solis universalis est, & ad omnes producendos fructus indifferens (nam idem æstatis calor, qui cum spica granum, & cum vite uvas produxit, cum Lauro baccas, cum quercu glandes, & cum malo poma produxisset) ideo fructus non Soli, sed plantæ tribuitur, hoc est,

M

non

non ideo est pomum, quia à Sole, sed quia à malo; nec proles ex homine nata filia Solis, sed hominis dicitur, nam quantum ex parte Solis erat, poterat Aquila, aut Cygnus nasci. Multò minùs monstra Soli tribuuntur, cum hujus influxus sit ad perfectà, nisi defectus impediat causæ secundæ. Idem de influxu Dei dicas: Audi Angelicum Doctorem 1. 2. q. 80. a. 1. ad 3. *Deus est universale principium omnis interioris motus humani. Sed quòd determinetur ad malum voluntas humana, hoc directè quidem est ex voluntate humana, & à Diabolo per modum persuadentis, vel appetibilia proponentis.* Et lib. 3. contra Gentiles cap. 66. a. 5. *Secunda agentia sunt quasi particulariter, & determinantes actionem primi Agentis.* Vide quæstionem tertiam de malo a. 2. *Nec obstat, deformitatem actûs ab ejus entitate inseparabilem esse; nec enim ideo sequitur, Deum, si ad unum, etiam ad aliud concurrere; nam in actû quoque visionis una eademque res est, esse actum vitalem, & esse imaginem objecti, & tamen quòd sit vitalis, non ab objecto, sed potentia, & quòd sit imago, non à potentia, sed objecto habet: Ita in actû homicidii, quidquid boni, & entis est, à Deo est fonte omnis boni; quidquid mali, & deformis, ab hominis voluntate fonte omnis mali.* Idem de *obduratione* dicas, cujus causâ totam hanc disputationem texuimus. Et hæc ratio est, cur in Sacris Litteris, eadem obduratio, jam Deo, jam homini tribuatur, utriusque enim est diversa ratio. Nunc audi Augustinum de Genesi ad litteram cap. 5. *Non dicimus, Deum fecisse tenebras, quoniam speciem ipsam Deus fecit, non privationes, quæ ad nihilum pertinent, quas tamen ab eo ordinatas intelligimus, cum dicitur: & divisit Deus inter lucem, & tenebras; ne vel ipsæ privationes non haberent ordinem suum, Deo cuncta regente atq; administrante: sicut in cantando interpositiones silentiorum certis, & moderatis intervallis, quamvis vocum privationes sint, bene tamen ordinantur ab iis, qui cantare sciunt, & suavitati universæ cantilenæ aliquid conferant. Et umbræ in picturis eminentiora quæq; distinguunt, ac non specie, sed ordine placent. Nam & vitiorum nostrorum non est Author Deus, sed tamen ordinator est, cum eo loco peccatores constituit, & ea perpeti cogit, quæ merentur. Ad hoc valet, quòd oves ponuntur ad dexteram, hœdi autem ad sinistram. Quædam ergo facit Deus, & ordinat, peccatores autem in quantum peccatores sunt, non facit, sed ordinat tantum. Ipso ergo faciente, pulchra sunt singula, & ipso ordinante, pulchra sunt omnia.* Addi potest, & alia horologii gnomici simili-

similitudo: In hoc enim duo ad umbram concurrunt, Sol, & ferrum; & licet sine Sole umbra non esset, ea tamen, cum privatio lucis sit; non à Sole, sed à ferro, aliove corpore opaco est. Id tantum à Sole habet, ut per certa intervalla, ordinatimque procedat, ac Solis cursum ostendat: Ita obduratio, aliudve peccatum sine Deo non esset, nec tamen à Deo est, sed à libero, ferreoque arbitrio; id solum à Deo habet, ut ad bonum ordinetur, sicque etiam invito peccatore cursum Solis ostendat; hoc est, divinæ Sapientiæ, Providentiæ, Bonitatis, ac Justitiæ testimonium præbeat. Ergo quot umbræ, tot testimonia Solis, & quot peccata, tot argumenta Dei.

Alia quoque ratione hæc *obduratio*, simileque loquendi modi, quibus Scripturæ uti solent, explicari possunt. Si videlicet dicas, nihil in Sacris Litteris frequentius esse, quam ut de Deo, eiusque operibus humano modo fermocinentur; Sicut enim non intelligeret Gallus Arabicè, aut Persicè loquentem, ita nec homo intelligit Deum, nisi humanè loquentem. Nec mirum est, Deum, qui, ut ab hominibus amaretur, humanam naturam induit, voluisse etiam, ut ab hominibus intelligeretur, humanam linguam imitari; & ideo videmus mille locis, Deo in Scripturis manus, pedes, cor, dolorem, iram, pœnitentiam, aliosque humanos affectus tribui; non quod ista revera in Deo sint, sed quod istorum effectus: Facit enim Deus Omnipotentiâ, Amore, Justitiâ, Misericordiâ, Patientiâ, quod homines manu, corde, ira, pœnitentiâ, & somno solent. Hac ergo ratione dicitur Deus *obdurare*, *excæcare*, non quod revera id faciat, & velit; aut quod ejus beneficia, & influxus eò spectent, cum potius ex natura sua, Dei que clementia, ac intentione ad solvendam cæcitatem, & obdurationem dirigantur (quid enim ad molliendum cor Pharaonis, ad eliminandas tenebras Judæorum aptius, potentiusque facere Deus potuit, quam quod fecit?) Sed quod ex Dei longanimitate, & clementia non alius sequatur effectus, quam major cæcitas, majorque obduratio. Sic dicimus, Magistrum pœnis, & flagellis nihil aliud agere, quam ut contumacem Discipulum magis, magisque obduret: Dominum beneficiis, & indulgentiâ servos indomitos, & insolentes reddere; non quod hoc velint, sed quod non alius effectus sequatur, quam si id vellent, dataque operâ molirentur. Eadem ratione, qui manu crystallum tenet, illudque cadere, elidique permittit, dicitur fregisse, cum tamen id solum permiserit, & casus, ac damnum vitri non positivè ab homine permittente, sed

à fragilitate cadentis vitri proveniat, cadit enim, & frangitur, quia vitrum est: Sic qui laxatis vinculis Leonem permittit in hominem ruere, dicitur hominem occidisse, non quia positivè occidit, sed quia permisit, effectu non minùs ex hac permissione, quàm ex positivo influxu sequente: Ita Deus dicitur humano sensu obdurare, quia ita ipso permittente non minùs obduratio in voluntate humana sequitur, quàm in aqua sequatur frigus, igne ac calore subducto; tam enim pronum est homini durari, & cæcari, quàm innatum est aquis, cessante igne frigere, aut terræ obscurari cadente Sole: illo tamen discrimine, quòd, ut suprà vidimus, Deus nunquam occidit homini, nunquam desinit misereri, nisi planè repulsus: Si enim quæras, cur permittat? Respondetur, id partim ex judiciis occultissimis quidem, sed non injustis provenire; partim ex impedimentis, quæ voluntas Deo vocanti opponit; nec enim deserit, nisi deserentem; quod de ipso Pharaone omnium obduratorum Principe Augustinus testatur; sic enim in lib. 84. quæst. loquitur apud Bedam in cap. 9. ad Roman. fol. 225. *Si expurgaveris vetus fermentum, & non adhuc parvulus in Christo ut lacte potandus sis, & perveneris ad virum perfectum, de quo dicitur: Sapientiam loquimur inter perfectos; tunc demum, rectè, & non præposterè audies, si qua sunt de Animarum occultissimis meritis, & de gratia, vel iustitia secreta Omnipotentis Dei.* Nam de Pharaone facile respondetur, prioribus meritis, quibus afflicto in Regno suo peregrinos, dignum effectum, cui obduraretur cor, ut nec manifestissimis signis iubentis Dei crederet. Ex eadem ergo massa, id est, peccatorum; & vasa misericordia protulit, quibus subveniret, cum eum deprecarentur, & vasa iræ, quorum supplicio illos erudiret, id est, Pharaonem, & populum ejus: quia quamvis essent utriq; peccatores, & propterea ad unam massam pertinerent, aliter tamen tractandi erant, qui uni Deo ingemuerant, ut eis subveniret, & aliter illi, quorum injustis operibus ingemuerant. Pertulit ergo in multa patientia vasa iræ, & eo ipso, quo ait, in multa patientia; satis significavit, priora eorum peccata, in quibus eos pertulit, & opportunè tunc vindicavit, quando de illorum vindicta subveniendum erat his, qui liberabantur, & ut notas faceret divitias gloriæ suæ in vasa Misericordiæ. Nunquid enim latebat Pharaonem, quantum bonum consecuta fuerant illa terræ per adventum Josephi? Illius ergo rei gesta cognitio, ejus vocatio fuit, ut Populum Israël misericorditer tractans, non esset ingratus. Quòd autem huic vocationi obtrema-

pera-

perare noluit, & exercuit crudelitatem in eos, quibus humanitas, & misericordia debebatur, meruit pœnam, ut induraretur illi cor, & tantam cæcitatem mentis pateretur. Hæc autem vocatio, quam sive in singulis hominibus, sive in populis, atq; in ipso Genere humano per temporum opportunitates operatur, altæ, & profundæ ordinationis est, & comprehendendi non potest, nisi fortè ab iis, qui diligunt Deum ex toto corde. Tanta enim charitate fundati possunt iam fortasse cum Sanctis comprehendere longitudinem, latitudinem, altitudinem, & profundum. Illud tamen constantissima fide retinendum, neq; quidquam Deum injustè facere, neq; ullam esse naturam, quæ non Deo debeat id, quod est. Ex quibus Augustini verbis clarum est, obdurationem, & cæcitatem, si propriè loquamur, non ex Dei voluntate, sed hominis culpa, liberoque arbitrio provenire. Quod etiam nec minùs luculenter Scriptura ipsa testatur, quæ optima sui interpret est: Nam Sap. 2. *Excæcavit, inquit, eos malitia eorum.* Et Job. 24. *Ipsi fuerunt rebelles lumini, qui dicunt Deo: recede à nobis.* Et Joan. 1. *In Mundum venit, & sui enim non receperunt.* Et Joan. 5. *Non vultis venire ad me, ut vitam habeatis.* Et Joan. 3. *Lux venit in Mundum, & dilexerunt homines magis tenebras, quàm lucem, erant enim mala opera eorum.* Ubi cernis causam obdurationis, & excæcationis non in divina, sed humana voluntate esse. Quod adhuc multoquæ manifestiùs ex iis ipsis locis constat, qui nobis opponuntur: ubi enim Isaïæ 6. dicitur: *Excæca cor populi huius, ut videntes non videant, & audientes non intelligant, ne fortè convertantur, & sanem eos.* Salvator ipse hunc Isaïæ locum Matth. 13. ita exponit: *Et adimpletur in eis prophetia Isaïæ Prophetæ: Audietis, & non intelligetis, incrassatum est enim cor populi huius, & oculos suos clauferunt, ne quando videant oculis, & auribus audiant, & corde intelligant, & convertantur, & sanem eos.* Et Act. ultimo: *Bene Spiritus Sanctus locutus est per Isaïam Prophetam: aure audietis, & non intelligetis, & oculos suos compresserunt, ne fortè videant, & convertantur.* Ubi iterum advertis, totam causam excæcationis in solos Judæos referri. Sic etiam ubi Exodi 7. habetur: *Ego obdurabo cor Pharaonis,* id in textu Hebraico sæpius Pharaoni, eiusque malitiæ, perversæque voluntati adscribitur: nam eodem cap. 7. vers. 12. *Et roboravit, inquit, se cor Pharaeo, & non audivit.* Et vers. 22. & 23. *Roboravit se cor Pharaeo, & non audivit, & non posuit cor suum ad hoc.* Et cap. 8. vers. 15. *Et aggravavit cor suum, & non audi-*

*audivit. Et vers. 32. Et aggravavit Pharaon cor suum etiam vice
 hac. Et cap. 9. vers. 7. Et aggravavit se cor Pharaon, & non dimisit:
 Et vers. 22. Et non posuit cor suum ad Verbum Domini. Et cap. 10.
 vers. 35. Et vidit Pharaon, quod cessasset pluvia, & addidit ad peccan-
 dum, & non aggravavit cor suum: Et vers. 27. Et dixit Pharaon:
 peccavi hac vice: Dominus iustus, & ego, & populus meus impii. Et
 cap. 14. vers. 5. Et vertit se cor Pharaon, & servorum eius. Quam-
 vis ergo improprio, humanoque more loquendo, & ex causis supra
 libatis, dicatur Deus, cor Pharaonis obdurasse, quia obdurari per-
 misit; vera tamen, & propria huius obdurationis causa ipsius Pha-
 raonis malitia, & avaritia fuit, nolentis populum dimittere, cuius
 operas, & servitia sibi, regnoque utilissima, & quaestuosula censebat:
 si ergo, quando dicit Scriptura: *Manus Domini fecit hæc omnia*; non
 intelligis propriam manum, ne Deum facias corporeum; & cum
 iterum dicit: *tactus dolore cordis intrinsecus, poenitet me fecisse ho-*
minem; non intelligis propriam poenitentiam, propriumque dolo-
 rem, ne Deum facias mutabilem, & corruptibilem; cur etiam quan-
 do dicitur, obdurasse cor Pharaonis non intelligas in propriam,
 & metaphoricam causam obdurationis, ne Deum facias impium,
 & seductorem? Id enim multò peius est, quàm facere corporeum, &
 mortalem, Obdurat ergo Deus, obdurat peccator; sed peccator
 faciendo, Deus non impediendo. Sed audiamus disertissimum de
 hac re Augustini testimonium, sic enim *Tract. 53. in Joan.* Ratioci-
 natur: *Excavavit oculos eorum, & induravit cor eorum. Hic dici-*
tur nobis: si non potuerunt credere, quod peccatum est hominis non
facientis, quod non potest facere? Audisti Fratres mei propo-
sitam quaestionem, nempe quàm profunda sit, cernitis; sed responde-
mus, ut possumus. Quare non poterant credere, si à me quaeratur, citò
respondeo, quia volebant; malam quippe eorum voluntatem prævidit
Deus, & per Prophetam prænuntiavit ille, cui abscondi futura non
possunt. Sed aliam causam, inquis, dicit Prophetam, quia induravit
cor eorum. Etiam hoc eorum voluntatem meruisse respondeo; sic enim
excavat, sic obdurat Deus, deserendo, & non adiuvando, quod occul-
to iudicio facere potest, iniquo non potest. Quid ergo dicemus? nun-
quid iniquitas est apud Deum? absit: si ergo absit, sive quando adju-
vat, misericorditer facit, sive quando non adiuvat, iuste facit, quia
omnia non temeritate, sed iudicio facit. Porro si iudicia Sanctorum
iusta sunt, quantò magis Sanctificantis, & iustificantis Dei? iusta ergo
*sunt,**

sunt, sed occulta. Ideo cum quæstiones huiusmodi in medium venerint, quare alius sic, alius autem sic, non nobis iudicium de iudicio tanti Iudicis usurpemus; sed contremiscentes exclamemus: O altitudo divitiarum Sapientiæ, & Scientiæ Dei, quàm inscrutabilia sunt iudicia ejus, & investigabiles viæ ejus! Unde dictum est in Psalmo: iudicia tua abyssus multa. Non ergo mei Fratres ad hanc penetrandam altitudinem, ad hanc abyssum discutiendam, ad inscrutabilia perscrutanda expectatio vestræ charitatis impingat. Agnosco modulum meum; altius est hoc incrementis meis, & fortius viribus meis, puto, quia & vestris. Ipse enim Dominus JESUS suis illis magnis, & præcipuè electis Discipulis dicebat: multa habeo vobis dicere, sed non potestis portare modò. Ambulandum est, proficiendum est, crescendum est, ut sint corda nostra capacia earum rerum, quas capere modò non possumus. Quòd si nos ultimus dies proficientes invenerit, ibi discemus, quod hic non potuimus. Si quis autem istam quæstionem liquidius, & melius novit se posse, & confidit exponere, absit, ut non sim paratior discere, quàm docere, tantum ne audeat quisquam liberum arbitrium sic defendere, ut nobis orationem, quàm dicimus: ne nos inferas in tentationem; conetur auferre: rursus ne quisquam neget voluntatis arbitrium, & audeat excusare peccatum. In utroq; ergo illius beneficia cognoscamus: nam agendæ sunt gratiæ, quia data est potestas, ut filii Dei fiamus, & orandum, ne succumbat infirmitas. Sic ergo dictum est, non poterant credere, ubi intelligendum est, quòd volebant, quemadmodum dictum est de Domino Deo nostro: negare se ipsum non potest. De omnipotente dictum est, non potest. Sicut ergo, quòd Dominus negare se ipsum non potest, laus est voluntatis divinæ; ita quòd illi non poterant credere, culpa est voluntatis humanæ. Hinc & illi non poterant credere, non quia mutari in melius non possunt, sed quamdiu talia sapiunt, non possunt credere; hinc excacantur, & indurantur, quia negando divinum adiutorium, non adjuvantur. An fortè & hoc de supernæ medicinæ misericordia factum intelligendum est, ut quoniam superba, & perversa voluntatis erant, & suam iustitiam constituere volebant, ad hoc desererentur, ut excacarentur, ad hoc excacarentur, ut impleretur facies eorum ignominiâ, atq; ita humiliati quærerent gloriam Domini, & non suam. Hic planè Augustinus clarissimè simul, & elegantissimè mentem suam exposuit; nec credo, in omnibus Augustini operibus luculentius testimonium esse. Primò enim quæstionem proponit, qua ratione ad Deum referri causa indurationis

nis

nis non debeat, cum de ipso Isaias dixerit: *excacavit oculos eorum, & induravit cor eorum*? *Secundò*, ad propositam quæstionem respondet: duas hujus obdurationis assignari rationes posse, quæ tamen in unum reducantur: *primam*, & præcipuam, voluntatem Judæorum fuisse, quod videlicet nollent credere, quodque meruerint, ut indurarentur, hoc est, ut à Deo defererentur; meruerint, inquam, quia operibus Legis, & superbiâ tumidi nollent fidei subjecti esse; nollent in Mediatorem, & Salvatorum credere. Quod verò id nollent, imò non possent; id non ex gratiæ defectu, diviniæque voluntate (cum mutari utique in melius possent, quæ potestas à gratia erat) sed ex eorum malitia provenisse, qui quamdiu talia saperent, in sensu composito, ut Theologi loquuntur, credere non poterant; sicut quamdiu oculos aliquis claudit, non potest videre: quod igitur non possent credere, culpæ ipsorum fuisse. *Tertiò*. Quantum verò ex parte Dei est; ideo illum dici obdurasse, quia obdurationem non impedivit; ideo verò non impedivisse, *tum* quia superbia, & perversitate sua id merebantur: *tum* ut implerentur facies eorum ignominia, & hac saltem ratione humiliati discerent, quod superbi discere non poterant: *tum* denique, quia hoc ad occulta, non tamen injusta Dei judicia pertinet. *Quartò*: Non per Deum stare (qui est scopus Disputationis nostræ) ut etiam excacati, obduratique salventur, *tum*, quod eorum obduratio, à peccatis, propriæque voluntate, non divina sit, *tum* quia etiam dum eos excacari Deus permittit, gratiam tamen largitur, quâ potestatem habeant, in filios Dei evadendi, quaque mutare perversam voluntatem in bonam possint. *Deniq;* docet Augustinus, duo in hac quæstione Christianis inconcussa tenenda esse: *primò*, nullam in Deo esse iniquitatem: *deinde*; nemini libertatem, & potestatem ad credendum, beneque vivendum deesse. Hæc ergo Augustini sententia est, totam obdurationis causam in malitiam, & voluntatem humanam referentis, etiam ex illa parte, qua Deum permittentem, & non impredientem spectat, quod licet non omnes modò intelligent, intelligent tamen aliquando, velo mortalitatis ablato.

Sed audi Augustinum Serm. 88. de temp., vel potius, ut notant in ultima Augustini editione Patres Benedictini Parisienses, Cæsarium Arelatensem Augustino coævum, Faustiique, ac Pelagianorum hostem accerimum, qui multa de gratia, & libero arbitrio ex Sacris Scripturis, sanctisque Patribus contra eandem hæresim collegit,

git, quæ postea Felix Papa per Epistolam suam confirmavit, ut videre est apud Philippum Labbæum de Scriptor. Ecclesiast. Is ergo, seu Augustinus, seu Cæsarius, ita scribit. Rogo vos *Fratres charissimi*, ut primò hoc fideliter, & frimiter credat *Dilectio vestra*, quia nunquam priùs Deus deserit hominem, nisi priùs ab homine deseratur. Cum enim & semel, & secundo, & tertio unusquisq; gravia peccata commiserit, expectat tamen illum Deus, ut convertatur, & vivat. Cum verò in peccatis suis ceperit permanere, de multitudine peccatorum nascitur desperatio, ex desperatione obduratio generatur. Dum homines negligentes imprimis despiciunt peccata sua, quia parva sunt, crescentibus minutis peccatis, adduntur etiam crimina, & cumulum faciunt, & demergunt. Quod cum factum fuerit, impletur hoc, quod scriptum est: Peccator, cum venerit in profundum malorum, contemnit. Quæ ideo Charitati Vestræ insinuare volui, ut intelligatis, quia & obduratio non Dei potentia compellente dicitur, sed Dei remissione, vel indulgentiâ generatur, ac sic Pharaonem non divina potentia, sed divina patientia credenda est obdurasse, nam quoties eum Dei plaga percussit, afflictus penituit. At ubi ei remissio divina indulgentiam dedit, iterum se in superbiam elatus erexit. Hoc ergo definitissimè credite *Fratres*, & hoc intelligite, quia quoties Dominus dixit: Ego indurabo cor Pharaonis; non aliud intelligi voluit, nisi: ego, inquit, suspendo plagas meas, unde eum per indulgentiam meam contra me obdurari permitto. Sed fortè aliquis dicat: quare illum Deus parcendo indurari fecerit, & quare flagella removerit? hoc loco securus ego respondeo: ideo Deus toties flagella removet, quia Pharaon pro ingenti cumulo peccatorum suorum, non tanquam filius ad emendationem meruit corripì, sed tanquam hostis permissus est indurari. De hac abduratione etiam Propheta ex persona populi ad Dominum clamat dicens: indurasti cor nostrum, ne timeremus te, quam rem multis præcedentibus sacrilegiis in Populo Judeorum impletam esse cognovimus. Nemo ergo cum Paganis, aut Manichæis Dei justitiam reprehendere, aut culpæ præsumat, sed certissimè credat, quod Pharaonem non Dei violentia, sed propria iniquitas, & indomabilis superbia contra Dei præcepta fecerit obdurare. Quid est autem, quod dixit: ego indurabo cor ejus, nisi, cum absuerit gratia mea, obdureo illum nequitia sua. Sicut enim quoties nimio frigore aqua constringitur, Solis calore superveniente resolvitur, & decedente eodem Sole iterum obduratur; ita nimirum peccatorum frigore refrigescit charitas

tas multorum, & velut glacies obdurantur, & cum eis iterum calor divina Misericordia supervenerit, resolvuntur. Quod etiam erga Pharaonem impletum est, à quo quoties flagella remota sunt, contra Deum se obduravit; quoties verò afflictus est, humiliter supplicavit. Quare autem Deus noster non omnes ita misericorditer flagellat, ut nullum contra se obdurari permittat? aut illorum iniquitati adscribendum est, aut ad inscrutabilia Dei judicia referendum. Quam rem etiam circa Vernaculos nostros exercere consuevimus, quos nimis delicate, aut remisse nutrimus, vel quibus frequenter peccantibus indulgemus: cum enim peiores de ipsa remissione redduntur, solemus bis exprobrantes dicere: ego te talem feci, ego tibi parcendo proterviam tuam, negligentiamq; nutrivi. Et hæc non dicimus, quòd ex voluntate nostra in tantam sint superbiam devoluti, sed quia magis de bonitate, vel indulgentia nostra fuerint obdurati. Ita & Deus de Pharaone fecisse dignoscitur. Nos verò Fratres Charissimi, qui in veritate agnoscimus, quòd ex multitudine peccatorum desperatio nascitur, & ex desperatione obduratio generatur; quoties nobis aliqua peccata surrepserint, sine ulla mora medicamentum elemosynæ, vel penitentia festinemus animarum nostrarum vulneribus providere. Utiliter enim malagma, vel sibula calidis adhuc vulneribus apponitur, & citò ad sanitatem vulnus reducitur, quòd putrescere longa abusione non sinitur. Hactenus Augustinus, vel Cæsarius. Circa cujus verba aliqua observentur. Primo, perpetuam esse hujus Sancti Doctoris sententiam, quam in hoc etiam Sermone tantoperè auditoribus inculcat: Deum videlicet hominem non deserere, nisi prius ab homine deseratur per peccatum videlicet actuale: nam si de originali intelligatur, cum nemo hoc careat, frustra poneret Augustinus discrimen inter eos, qui Deum deserunt, & eos, qui non deserunt, cum nemo peccato originali careat. Ut taceam illum, qui solo originali tenetur, dici non posse, Deum deserere, cum ipse peccatum hoc non faciat, sed ab alio factum contrahat potius, quàm committat. Si ergo Deus neminem deserit, nisi desertus, quomodo in illo Prædestinationis decretorio momento, & in quo summa rerum incommutabiliter vertitur, tot hominum myriades deseruit, ab iis non desertus, hoc est, nullo eorum peccato, demeritoque prævisio? Planè ut hæc omnium maxima desertio, ita non potuit à Deo initium ducere, sed à prævisis hominum peccatis. Prius ergo quàm peccata hominum præviderentur, sicque quantum ex parte Dei fuit, nemo desertus, nemo exclusus,

nemo

nemo reprobus; ergo nemo non electus. *Secundo*, Obdurationem peccatoris non à Dei voluntate, non à potentia, sed ab hominis malitia, ejusque peccatis ortum ducere, longa serie commissis, nullaque pœnitentiâ deletis; tunc enim permittente Deo, sed homine agente, & promerente obduratio nascitur. *Tertiò*. Deum quamvis desertum, nunquam tamen ita hominem licet obstinatissimum deferere; ut non ei gratiam tribuat, quâ & possit pœnitere, imò & quâ actu pœniteat, si velit, ut Pharaonis exemplo patuit, qui Deo flagellante jam in Moſen exarsit, eiſque mortem minatus est; jam pœnituit, suumque peccatum & agnovit, & palam confessus est: *Dominus*, inquit, *iustus est*; ego autem, & *populus meus impii*. Quem ergo peccatorem deserat Deus, si non deseruit Pharaonem? aut quis tam obduratus, qui non possit, quoad Pharaon & potuit, & fecit?

Quartò denique si quis ad primum peccatum, aut cujuscumque hominis, aut Adami, aut etiam Angelorum deveniat, interrogetque, cur Deus hominem permiserit in primum peccatum illud delabi? Respondendum erit primò, invecundam hanc quæſtionem esse, cum Deus profiteatur, se illud velle ignorari, quæ ergo audacia est, scire velle, quæ Deus velit non sciri? perinde ac si tonsor aliquis, aut agaſo, non vocatus, non admiſſus, Regium thalamum irrumpat, velitque explorare, quid, & quare in arcano, & Senatu decretum? quid tonsori, & ſenatui? quid mancipio & thalamo? *Deinde* ſciſcitanti, cur ergo aut Angelus, aut homo primum peccatum admiſerit? respondendum est: quia voluit. Quòd si porrò inſiſtas: cur voluerit? respondeo, ſtultam hanc eſſe quæſtionem, nec reſponſo dignam; cum enim prima, & ſola peccandi cauſa ſit creature voluntas, idem eſt, quærere cauſam, cur voluerit, quòd quærere, cur prima cauſa non habeat aliam cauſam? hoc enim ipſo, quod eſt prima, aliam non habet, & ideo nec alia quærenda eſt. Eodem modo, ſi quæras, cur Deus primum peccatum in Angelo, & Adamo permiferit? respondendum erit, quia Angelus oblata gratiâ uti noluit, obicemque poſuit vocanti, & adiuvanti Deo. Quòd ſi pergas ſciſcitari: cur Deus hoc impedimentum auſſerre noluerit, aliamque gratiam, quâ prævidebat, uſurum, non in ſuppeticas miſerit? respondebitur, quia id ordo ſingulis creaturis præſcriptus exegit; nam ut in naturalibus, ita in ſupernaturalibus rebus, omnibus quidem neceſſaria ad ſinem obtinendum media præbentur, non tamen eadem omnibus, ſed aliis alia. Quòd ſi ruruſus inquiras: cur hunc potius, quam aliud ordi-

nem, seriemque mediorum Deus homini, aut Angelo parare voluerit? respondeo, importunam hanc esse, absurdamque questionem: cum enim divina voluntas sit prima rerum omnium, & rectissima causa, nullam aliam, & priorem causam habet: Idem ergo est, causam primæ Causæ inquirere, quàm petere, cur prima principia non per alia probentur, cur triangulus habeat tres angulos, aut cur circulus sit rotundus; si enim est prima causa, non habet aliam; si non habet aliam, non est quærenda.

Pergit Apostolus: *Dicit enim Scriptura Pharaoni: Quia in hoc ipsum excitavi te, ut ostendam in te virtutem meam.* Iam supra ostendimus, non ideo velle Deum peccata, ut ex illis aut Potentiæ, aut Misericordiæ ostendendæ occasionem capteret, cum infinita alia media non desint, hunc finem innocenter, nulloque hominum damno consequendi; majoris enim potentiæ est, facere, & conservare, quàm perdere, & demoliri, nec misericordia, sed crudelitas esset, miseros facere, ut possis misereri; id enim perinde fuerit, ac si Medicus aliquos vulneret, ut peritiam curandi aliis ostendat. Audi S. Augustinum in Psalm. 58. *Est quædam iniquitas, quam qui operatur, non potest fieri, ut ei misereatur Deus; ipsa est defensio peccatorum: Si enim quid mali fecerint, volunt Deo imputari. Nemo est, qui audeat dicere bonum est adulterium, bonum est furtum, sed quomodo ista defendunt. Si Deus nolisset, id non fecissem, quid vis faciam fato meo? ergo peccatum tuum defendis, ut Deum accuses? Ideo excusatur reus, ut culpetur Iudex? Prorsus talem iniquitatem operantium non misereatur Deus.* Si ergo voluntatem Dei antecedentem consideres, ideo Deus Pharaonem creavit (idemque de omnibus peccatoribus dicas) ideo Regem fecit, ideo peccatorem sustinuit, ut Deo serviret, ut Cælo potiretur, ut peccata corrigeret, ac pœnitentiâ deleret. Hoc, inquam, Deus voluit, hoc unicè intendit. Quod si peccator Dei patientiæ, & Misericordiæ non cedat, gratiasque oblatas iterum, iterumque respuat, tunc demum vult Deus voluntate consequente peccato tanquam veneno ad aliorum sanitatem, & correctionem, aliosque honestissimos fines uti, quales sunt: Potentiæ, Misericordiæ, Gloriæque suæ manifestatio; sicque instar peritissimi Pictoris non auro tantum, minioque; verum etiam umbris, & atramento imaginem Bonitatis, & sapientiæ suæ pingere; nam ut in tabula, ita & in Mundo, non alia res magis picturam, & lumen, quàm umbra commendat. Non ergo vult Deus Pharaonem peccare, sed postquam

quàm peccare Pharaon statuit, vult peccato Pharaonis ad bonum uti; sicq; , ut toties inculcat Augustinus, Deus non est *Author*, sed *ordinator* peccati, prohibet enim fieri, sed facta in bonum vertit, more videlicet sapientissimi Medici non facientis quidem venena, sed facta in medicinas, & sanitatem aptantis. Quod ergo de cloacis Romanis Plinius notat lib. 36. cap. 8. *Eas fuisse operum omnium di-ctu maximum, suffossis montibus, atq; Urbepensili, subterq; navigata*; hoc de peccatoribus dicas, Deo non minorem in illis ordinandis, quàm in bonis quibuscumque Providentiam suam testante; quanto enim magis malum à bono distat, tantò majoris potentiae tam remota, & pugnancia jungentis. Cloaca ergo Pharaon, cloaca Herodes, cloacæ omnes impii, sed non ideo istis turpior Mundus, sicut nec illis turpior Roma, Deo etiam turpia in miracula vertente.

Sed nemo Apostoli sententiam meliùs Apostolo ipso exponet. Dixerat in hoc capite: *Quia ad hoc excitavi te* (hoc est, ut Hebraicus, Chaldaicus, & Græcus textus habent: *sustinui, conservavi te*) *ut ostendam in te potentiam meam*; quod qua ratione sit intelligendum, idem Apostolus ad Rom. 2. jam suprà iis verbis clarissimè ostenderat: *An divitias Bonitatis ejus, & Patientiae, & Longanimitatis ignoras? quoniam Benignitas Dei ad penitentiam te adducit; secundum autem duritiam tuam, & impenitens cor tuum thesaurizas tibi viam in die irae*: Quam sententiam textus Græcus majori cum emphasi expressit: *eis μετάνειαν σε ἀγει*; hoc est: *ad penitentiam te agit, urget, impellit*: in quæ verba Hieronymus: *Sicut qui paulatim arcum intendit, tempus dat alteri, ut fugiat, quod si fugere nolit, tantò fortius sagittâ emissâ configitur*; Sic Deus, qui lanceos habet pedes, sed ferreas manus, tarditatem supplicii gravitate compensat. Quod ergo Deus Pharaonem sustinuit, totq; prodigiis, & flagellis admonuit; id ad *divitias Bonitatis, Patientiae, & Longanimitatis* ejus pertinuit, nec alio fine, quàm ut eum ad penitentiam adduceret, imò ut Græcus habet; *urgeret, impelleret*. Sed illo recusante, & secundum *duritiam, & impenitens cor suum* divinam iram provocante; successit voluntas consequens, quâ decrevit Deus malitiam Pharaonis ad majorem gloriam, potentiam, & justiciam suam ostendendam vertere, illâque uti ad populum suum in vera fide, ac Religione confirmandum. Duo ergo ad sustinendum, ferendumque Pharaonem Deum permoverunt, Benignitas, & Justitia; Benignitas, ut converteretur,

tur; Justitia, ut puniretur; sed ut prius Benignitas, quam Justitia, (sicut, & in quolibet non pessimo Principe prior pacis, quam belli voluntas) noluit enim Justitiam, & Potentiam suam in illo experi-ri, nisi postquam toties, & tamdiu Benignitatem frustratus est. Vbi etiam observa, ex hoc ipso loco ad *Roman. 2.* clarè ostendi, Deum non esse causam *obdurationis*, Dei enim patientia peccatorem ad *pœnitentiam* adducit, ut hîc Apostolus docet, Obduratio verò non adducit ad pœnitentiam, sed potius abducit; non ergo Deus causa obdura-tionis, quam potius expellit. Simile est illud Isajæ: *expectat Domi-nus, ut misereatur vestri*; expectat, inquit, non ut puniat, & per-dat, sed ut misereatur, & parcat.

Denique: *An non habet*, inquit Apostolus, *figulus potestatem, ex eadem massa aliud quidem vas in honorem, aliud in contumeliam faciendi?* Aliud hoc argumentum est: quo Beatus Apostolus senten-tiam suam confirmat: Opponentibus enim Judæis, & causam flagi-tantibus, cur Deus Gentiles in populum suum elegisset? respondet, nullum quæstioni, nullum querelæ locum esse: tam enim Judæos, quam Gentiles peccatores, & utrumque populum sine omnibus ope-ribus bonis, & cum multis operibus malis fuisse; cum ergo uterque nihil haberet, quod gratiâ dignum esset; eadem ratione Deum vnum præ alio adoptasse, ac Legis Evangelicæ Sectatores Judæis prætulisse, quâ figulus ex eadem massa aliud vas in honorem, aliud in con-tumeliam facit: Id enim tam injustum non esse, quam non est inju-stum, si cum duo tibi centum talenta debeant, alteri debitum remit-tas, ab alio exigas; nam quod exigas, justitia est, quod remittas, gratia, quam rationem perpetuò Augustinus urget. Sic etiam, si è duobus fratribus æquè sordido, ac plebeio sanguine natis, unum Prin-ceps in filium, & hæredem adoptet, alium conditioni suæ relinquat, nec relictus habet, quod conqueratur; nec electus, quo gloriatur; hic enim accepit, quod non merebatur, ille non accepit, quod non debebatur. Idem de Judæo, & Gentili dicas. Uterque ad eandem massam pertinebat, quia uterque peccator, uterque adoptione indi-guus; quod verò Gentilis præ Judæo assumptus; id meræ gratiæ, & voluntatis fuit, tantoque minor Judæo dolendi causa, quod, & ipse pertinere ad Electos possit, si velit, & credat; nam si nolit, se ipsum arguere, sibi que irasci, non Deo debet. Potest etiam hæc senten-tia hoc modo explicari. Si Deus permittat, alios in peccatis suis pes-sum ire, ut olim Pharaonem, alios verò non permittat, ut Nabucho-
dono-

donosorem Regem; tam id Deo verti vitio non posse, quam non potest figulo, aliud vas in honorem, aliud in contumeliam facienti: utitur enim Deus jure, ac potestate sua, cum instat optimi Regis duobus æquè reïs, æquè pœnam, ac supplicium meritis, uni clementissimè parcat, alterum justissimè punit, tantoque justius, quòd etiam isti veniam, ac gratiam obtulerat, volebatque indulgere, nisi maluisset perire. Cæterùm iam suprà ostendimus, Deum voluntate antecedente, & quantum ex se est, neminem facere vas in contumeliam, sed solum voluntate consequente, destinando videlicet ad pœnam, quos prævidit malo pertinaciter, & usque ad finem inhæsurus. Duo ergo ad faciendum vas in contumeliam concurrunt, peccator, & Deus: peccator delinquendo, Deus plectendo; cum verò plectit, potentiæ, & justitiæ est; cum non plectit patientiæ, & misericordiæ. Semper ergo verum est, quod dicit Apostolus: in potestate figuli esse, aliud vas in honorem, aliud in contumeliam facere; hoc est, in potestate Dei esse, aut parcere, aut punire, utcumque voluerit.

Sed ut totam hanc, longamque Disputationem, quâ sententiam Apostoli exposuimus, in compendium colligamus, retexere omnia lubet, & sub unum aspectum ponere. Conqueruntur Judæi, adoptionem, & hæreditarem cœlestium bonorum Abrahæ, ejusque posteris promissam ad Gentiles velut externos, nihilque meritis deferri, nec æquum putant, majorem fidei Christianæ (quâ Gentiles præferbantur) quam Legis Mosaicæ tot sæculorum possessione insignis rationem haberi. Respondet Apostolus verum quidem esse, inscrutabili Dei judicio fidem Christianam Mosaicæ prælatam, & non huic, sed illi veniam peccatorum, gratiam justificantem, adoptionemque adstrictam esse, idque sola Dei voluntate, nulloque vel ad opera Legis Mosaicæ, quibus tantoperè Judæi fidebant, vel ad demerita, & peccata Gentilium respectu. Sed id nec mirum, nec novum, nec iniquum videri Judæis debere: An enim Jacobus, licèt secundo loco genitus, non ante ortum, sicque nullo operum merito, solaque Dei electione prælatus in Regno fratri majori fuerit? cur ergo Deus non possit Christianam legem præferre Mosaicæ? An figulus non habeat potestatem ex eadem massa vas aliud in honorem, aliud in contumeliam fingendi? Cur ergo non habeat potestatem Deus, ex eadem peccatorum, nihilque merentium massa Christianos potiùs, quam Judæos adoptandi? Maximè cum, & istos adoptare paratus sit, modò Christum acceptent, ejusque se legi subdant; quid enim iusti-

justius peti posse, quàm ut figulo lutum obediat? An non Nabuchodonosoris, & Pharaonis Regum meminere? quorum, cum vterq; peccator esset, sicque privari Regno, perdiq; meruisset, uni tamen, licet immerito, benignissimè Deus pepercerit, alterum quia poenâ dignum justissimè punierit? Si ergo nulla iniquitas, imò maxima æquitas Principis, duobus æqualiter supplicium meritis, ita poenam moderari, ut clementia rigori mixta uni indulgeat, alterum pleat multò minùs aspergi Deo invidiæ, & iniustitiæ qualemcumque notam posse, si cum Judæi, & Gentiles æquè indigni essent (imò ob ingratitudinem Judæi magis) cumque nec operibus Mosaicæ Legis, nec Fidei Christianæ adoptio, & Regnum deberentur, voluerit tamen fidem in Christum medium ad Regnum, & adoptionem consequendam potius esse, quàm Mosaicam Legem, quòd si rationem quærant, cur antiquis illis, cur Templo, cur Sacrificijs, Evangelium, & Crucem Deus prætulit; id arcanum supra hominis modulum, & captum esse, & ideo non quæstionem, sed fidem, & obsequium mereri; tam enim non esse hominis, de Arcanis Dei, quàm non esse servi de arcanis Principis judicare. Hactenus Apostoli Sententia.

Ex quibus tandem facilè ad *objectionem* initio factam *respondere* est. Opponebatur enim: Deum cujus vult, misereri, & quos vult indurare, aliosque facere vasa Misericordiæ, alios vasa contumeliæ; non ergo omnium, sed aliquorum tantum misereri. *Respondes* enim, ea verba Apostoli non de gratia Vocationis intelligi, quæ omnibus datur, sed de gratia adoptionis, ipsaque æterna gloria, quam cum posset Deus, tam Judæis, quàm Christianis dare; noluit dare Judæis, quamdiu tales essent, sed Christianis tantum Evangelicam Legem observantibus. Quod si velis omnino etiam de gratiis actualibus ad evitanda peccata, Legemque implendam intelligi; dicendum est, Deum aliorum quidem misereri; alios verò ut obdurentur, permittere, sed tamen nec ipsos obduratos profus deferere, quando etiam, dum obdurari permittit, potestatem largitur, quâ in melius mutantur, quæ potestas non aliunde, quàm à gratia proficiscitur. Nam, ut ait S. Augustinus Lib. 1. *Retract.* cap. 22: *In potestate quippe hominis est, mutare in melius voluntatem, sed hæc potestas nulla est, nisi à Deo detur, de qua dictum est: dedit eis potestatem filios Dei fieri.* Et Lib. 1. de Sermonibus Domini. cap. 15: *Nulla uest anima, quamvis perversa, in cuius conscientia non loquatur Deus, & in Psalm.*
6. post

6. post medium, de peccatoribus obduratis loquens: *Dedit Deus eos in reprobum sensum, nam ea est cacitas mentis, in eam quisquis datus fuerit, ab interiore Dei luce secluditur, non tamen penitus, dum in hac vita est.* Idemque docet *Tract. 53. cap. 12.* in *Joan.* ubi de obduratis Judæis agit, quem locum jam supra, fufeq̃ue recitavimus. Semper ergo verum est, Deum etiam dum punit, Justitiam Clementiâ miscere, nec unquam peccatorem ita deferere, ut non juvet, sicq̃; etiam deferendo non deferere, & non miserendo misereri: eo ferè modo, quo in motibus violentis, & aliunde impressis videmus ita corpus aliquò ferri, ut nò cesset in contrariam partem niti: Sol enim aliq̃ue Planete quamvis motu primi Mobilis in occasum rapiantur, non tamen cessant motu singulis proprio in ortum volvi, & ignis, quamvis impetu deorsum actus, sursum tamen etiam dum cadit, eluctatur, quæ in fulmine causa est obliqui motûs. Eadem Deo natura est: sicut enim ignis etiam cadendo ascendit, & stellæ etiam occidendo oriuntur, ita Deus etiam non miserendo miseretur, etiam puniendo, & vindicando parcit, cum hoc ei naturale, illud violentum sit. Neque mirum ita cum peccatoribus & in Mundo agere Deum, quando etiam cum damnatis, & in inferno id agit, ubi citra condignum, hoc est, non absq̃ue misericordia Justitiam exercet; quid ergo mirum est, nunquam Dei Misericordiam peccatoribus deesse, quando ne damnatis unquam deest? Quo fit ut etiam ipsa obduratio, quantum ex parte Dei est Misericordia dici possit; nam ut optimè, acuteq̃ue notat Bernardus Serm. contra ingratos: *Ingratis Misericordiæ res est, in hac parte subtrahere Misericordiam, ne culpa ex beneficiis crescat, juxta illud Prophetæ: Misereamur impio, & non discet justitiam.*

XXI. Opponitur octavò. Deus specialem, multoq̃ue majorem Electorum, quàm Reproborum curam habet: nam de Electis dicitur: *propter electos breviabuntur dies illi: nemo rapiet eas ex manu mea: crediderunt quotquot præordinati erant in vitam eternam &c.* atqui hæc major Dei cura non aliunde provenire potest, quàm quia Deus aliquos vult, aliquos non vult ad gloriam pertinere. Sic etiam quod aliis detur gratia perseverandi, aliis non detur, nulla causa esse potest, quàm quia alios Deus elegit, alios non elegit.

Respondeo. Primò: Quamvis adhæc, istisq̃; similia responderi nihil posset, non ideo tamen neganda essent, quæ de voluntate salvandi



omnes

omnes toties, & tam disertis verbis Scripturæ testantur; tùm quia cùm verum sit unum, & falsa vero opposita sint infinita, oporteret eum, qui falsa refellit, infinitarum rerum scientiam habere, quod homini est impossibile; cùm etiam quia omni rationi adversatur, at quis defera certa, & clara propter rationes incertas, & obscuras; perinde ac si aliquis dari tempus neget, quia nescit quid sit tempus, aut neget, lucere stellas, quia lucis, & stellarum naturas ignorat. Ita velle Deum omnes salvos fieri, certum ex Scripturis, clarumque est: Quibus verò modis, quibusve gratiis hanc voluntatem suam in Electos, in Reprobos exequatur, id omnino incertum, obscurumque est, quæ ergo ratio permittit, ut propter hoc incertum neges illud certum, propter hoc obscurum neges illud clarum. Quæ doctrina, licet in omnibus locum habeat, multò tamen maxime in causa Prædestinationis, & Gratia, quam & omnes Scripturæ, & omnes Patres fatentur inscrutabilem; quid ergo scrutari, & investigare volunt, quæ ipsi consentiunt, scrutari nos, & in vestigare non posse? aut cur rationes eorum petunt, quæ omnem rationem longissime superant? Cessent ergo interrogare, de quibus respondere non licet.

Si tamen scire omnino aliquid velint, cùm dicunt Deum majorem Prædestinatorum, quàm non Prædestinatorum curam habere, quæro, quid per majorem hanc curam intelligant? merum, internumque Dei affectum? At qui sunt ipsi, ut de occultis, intimisque Dei affectibus judicare audeant? *Quis enim novit sensum Domini, aut quis Consiliarius ejus fuit?* Latro est, non amicus, qui scrinium Principis sine clave, & permissu irrumpit. An per majorem hanc curam intelligunt majores, fortioresque gratias Prædestinatis, quàm Reprobis dari? At hoc aut falsum, aut planè incertissimum est. Nam de Angelis & Magister Sententiarum Lib. 3. & S. Thom. 1. p. q. 62. a. 6. eleganter docent, eos ita fuisse in gratia conditos, ut Lucifero multò majores gratia datæ fuerint, quàm Angelis Sanctis, & fidelibus, sed naturæ, & ordinis inferioris. De hominibus id ipsum, & Sacra Pagina, & experientia testantur: comparet enim aliquis gratias ex vna parte Zachæo, ex altera Judæ datas, videbitque longè plures, & majores fuisse, quibus hic reprobis ad poenitentiam vocatus est: Zachæum enim semel tantum Christus invisit, cùm eoque pransus est, & tamen solo aspectu, & colloquio in alium mutavit. At Judam, & Amicum, & Apostolum, & Thaumaturgum, & Convivam, & testem omnium miraculorum, actionumque suarum habuit

buit, quarum vel una etiam durissimis cordibus in amorem rapiendis sufficere poterat. Illum beneficiis, illum minis, illum osculis, illum tot annorum convicū, velut perpetua obsidione pulsavit, nec tamen vicit; negari ergo non potest, plura huic reprobo auxilia, quàm prædestinato Zachæo impensa esse. Id ipsum observat S. Augustin. ad Simplician. Lib. 1. q. 2. *Nathanael credidit ad unam sententiam, quam à Christo audivit. Miraculo facto in Cana Galilee crediderunt in eum Discipuli eius. Multos loquendo invitavit ad fidem. Multi nec suscitatis mortuis crediderunt. De Cruce, & morte ejus contristati Discipuli titubaverunt, & tamen Latro tunc credidit, cum eum non præstantiorem videret, sed consortio Crucis æqualem. Multi ex eorum numero, à quibus crucifixus erat, qui videntes eum miracula facientem contempserunt, Discipulis ejus prædicantibus crediderunt.* Idem Augustin. lib. de Prædest. & Grat. cap. 15. & lib. 12. de Civit. cap. 6. docet, duobus æqualibus auxiliis à Deo datis, consentire unum, dissentire alium, nullo gratiæ, sed arbitrii tantum discrimine. Quæ duo loca paragrapho sequenti recitabimus. Idemque docet S. Thomas 3. p. q. 69. a. 8. ad 2. & cap. 8. ad Roman. Lect. 3. ubi: *Hæc vocatio est efficax in Prædestinatis, quia huiusmodi vocationi assentiunt.* Idemque ex Sacris Litteris constat: Negari enim non potest, plures Judæis, quàm Sydoniis, & Sodomitis gentilibus gratias provenisse. Luc. 10. Matth. 13. & tamen magis Judæi, quàm Gentiles peccarunt, magisque puniendi prædicuntur. Sicut ergo non ideo unus magis peccat, quàm alter, quia unus minorem gratiam habet, quàm alter; ita non ideo unus peccat, alter non peccat, quia unus minorem, alter majorem gratiam habet. Et planè ipsa divinæ Bonitatis ratio exigit, ut in dandis majoribus, aut minoribus gratiis major, minorve necessitas, & infirmitas peccatoris attendeantur; ideo enim plura remedia Judæ reprobo adhibita, quàm Petro electo, quia illi gravior morbus, & ideo pluribus remediis curandus, juxta illud Christi: *Non est opus benevalentibus Medico, sed male habentibus:* & ovis perdita studiosius quæsitæ, & in filium errantem indulgentior, & liberalior pater, quàm in semper obsequentem. Si ergo reprobis, aut æqualis, aut etiam major gratia, quàm prædestinatis datur, non potest ex hoc capite, quantumque pertinet ad voluntatem antecedentem salyandi omnes, major Dei in secundos, quàm in primos cura inferri. Si verò de gratia illa agatur, quam congruam, & efficacem, seu potius effectricem appellant; aut primam,

aut *intermediam*, aut *finalem*, hoc est, perseverantiæ intelligis? Non *primam*, aut *intermediam*; constat enim hujusmodi gratias *congruas*, tam *primas*, quàm *intermedias*, sæpissimè, maximoq; numero etiam reprobis dari, quoties videlicet actu credunt, honesteque operantur, & aliquas tentationes vincunt (quis enim tam reprobus, ut succumbat omnibus?) Non ergo hoc Electorum, Reproborumque discrimen. Nec etiam ad gratiam *finalis perseverantiæ* recurri potest; quamvis enim hæc propria Electorum sit; non tamen idèd solùm aliis datur, aliis non datur, quia Deus alios elegit, alios reprobavit, sed quia alii bonis operibus, ac præsertim assidua prece eam à Deo impetrarunt; alii verò peccatis se indignos illà reddiderunt; poterant & ipsi impetrare, si gratiis à Deo acceptis bene usi essent, assidueque perseverandi donum efflagitassent, ut videre est apud S. Doctorem 1. 2. q. 114. a. 9. ad 1. ac etiam 1. 2. q. 110. & S. Augustinum Lib. de Perseverant. à cap. 2. & cap. 22. ubi hæc habet notatu dignissima: De ipso cursu vestro bono, rectoq; condiscite, vos ad prædeterminationem divine gratiæ pertinere: Vos ipsam obediendi perseverantiam à Patre Luminum, à quo omne datum optimum, & omne donum perfectum, semper debetis & quotidianis orationibus poscere, atq; hæc faciendo considerare, non vos esse à prædeterminatione populi ejus alienos, qui etiam hoc, ut faciatis, ipse largitur. Non ergo vel ex gratiis naturâ suâ robustioribus, vel ex gratiis congruis tam primis, quàm mediis, ac etiam finalibus colligi potest, Deum alios voluntate antecedente ad vitam elegisse, alios exclusisse; cum hujusmodi gratiæ, ut ostensum est, aut defacto dentur reprobis, aut impetrari etiam ab istis possint, sicque quod iis careant, non minor Dei cura est, sed major illorum socordia. Alioquin qua veritate posset Christus Matth. 8. v. 12. ubi de Regno cœlesti agit, vocare Reprobos *Filios Regni*, si ab æterno exclusit, si nunquam filii, nunquam hæredes, numquam jus ad Regnum habuere? Nam si Deus, aliquos ab æterno elegit, alios non elegit, idque arbitrio, & sponte sua; Electi tantùm filii Regni, non verò Reprobi dici possent, cum isti nec jure suo, nec voluntate, & proposito Dei vnquam ad Regnum destinati fuerint; sicut nec filius, hæresque Regni Gallici dici aliquis posset, qui nec sanguine, nec adoptione, nec electione, nec alio titulo ad Regnum pertineret. Si reprobis filii Regni sunt, ergo aliquando ad Regnum destinati. Neque obtrudas voluntatem, vel potius velleitatem Dei inefficacem; quis enim unquam tam alienè à communi sensu locutus est,

ut

ut Regni hæredem appellaret, quem Rex aliquis nec efficaciter adoptare, nec efficaciter in Regnum admittere voluisset? Quæ responsio quam ipsi Evangelio consentanea sit prudentum arbitrio relinquimus: Verba Evangelii sunt Matth. 8. *Multi ab oriente, & occidente venient, & recumbent cum Abraham, & Isaac, & Jacob in Regno Cælorum, filii autem Regni eiicientur in tenebras exteriores.* Eodem modo 1. ad Ephes. S. Paulus omnes Christianos Ephesios, & consequenter etiam Reprobos, qui inter illos versabantur, *prædestinatos, & electos vocat, non ergo semper non electi, semper non inscripti.*

An ergo, dices, non habet Deus majorem Prædestinatorum, quàm non Prædestinatorum curam? At ego vicissim quæro: an non major sit bonitas, omnes, quàm paucos ad Cælum eligere? Et si major bonitas; cur neganda maximo Bono? aut cur id magis Deo negatur, quàm quodd *Solem suum oriri faciat super bonos, & malos; quodque pluat super iustos & iniustos?* Si ergo Deus & bonis, & malis, & prædestinatis, & reprobis ea parat, & præbet, quæ ad vitam temporalem pertinent, ob quam tamen creati non sunt; quantò magis ea paravit, & præbuit, quæ ad vitam æternam pertinent, ad quam & creati, & redempti sunt? Neque enim ad vitam æternam tanquam ultimum finem creasset, nisi vitam quoque æternam illis voluisset: Sicut enim, qui militem ad pugnandum, & vincendum conducit, quid aliud efficaciter vult, nisi pugnare, & vincere militem? Et qui conducit Nautam ad navigandum, quid aliud efficaciter propositum sibi habet, quàm ut naviget, & ad portum aliquando perveniat? Si ergo (quod nemo Catholicus negare possit) & prædestinati, & reprobi ideo conditi à Deo, ideo redempti sunt, ut æternâ vitâ potiantur, sequitur, voluisse efficaciter, quantumque ex se est, utrosque salvari. Absolutè tamen dicendum est, majorem Deum Prædestinatorum, quàm reproborum curam gerere, eosque longè tenerius, ardentiusque amare, tum quia Prædestinatis, si non semper aut plures, aut majores, eas tamen gratias confert, quibus prævidet assensuros, quæque omnibus spectatis ad consequendum ultimum finem aptiores dici possunt: tum quia prædestinatos prævidet, spe, amore, observantiâ Mandatorum, & finali perseverantiâ sibi inseparabiliter, æternumque conjunctos fore. Sed, ut suprâ notavi, hæc ad arcana Dei, & scrinium pertinent, hoc est, ad illa, quæ teste Apostolico: *Non licet homini loqui.*

Ad illa, quæ opponebantur, videlicet: *propter Electos breviantur*

buntur dies illi Matth. 24. Resp. Meritò dici: *propter Electos bre-*
viatos esse dies illos; quia re ipsa omnia salutis tam intrinseca,
 quam extrinseca media ex voluntate illa proveniunt, quam habuit
 Deus salvandi omnes; sed quia soli Electi iis mediis bene utuntur,
 Reprobis verò nihil profunt, optimo jure Electorum tantum, non
 Reproborum fit mentio. Planè nemo negaverit, brevitatem perse-
 cutionis aptissimum medium perseverandi non solum Electis, ve-
 rum etiam Reprobis esse; imò quantò isti sunt imbecilliores, tantò
 magis iis consultum brevitatem tentationis, sed quia, ut dixi, præde-
 stinati tantum hac Dei suavissimâ Providentiâ usi sunt, iisque solum
 profuit, ideo de Prædestinatis tantum, non de Reprobis dicitur: *pro-*
pter eos breviatos dies persecutionis esse. Qua ratione jam suprà quo-
 que notavimus, alicubi dicere Scripturas, pro aliquibus tantum Chri-
 sti sanguinem sparsum esse, quia licet omnibus effusus, non tamen
 omnibus profuit.

Ad illud Joan. 13. *Ego scio, quos elegi*; Resp. Voluntate conse-
 quente, quæ prævisam culpam supponit, non omnes electos esse, ut
 suprà explicatum est.

Ad sententiam Actorum 13. *Crediderunt, quotquot præordinati*
erant ad vitam æternam. Non ergo omnes præordinati, sed aliqui
 tantum. Resp. verissimè id dici; non enim omnes voluntate con-
 sequenti præordinati, electique ad vitam æternam sunt, sed ii tan-
 tum, qui mediis à Deo præscriptis usuri erant. Sic ad Ephes. 1.
 omnes Ephesios (inter quos multi utique reprobi) *prædestinatos*,
 & electos vocat, voluntate utique antecedente, quantumque erat ex
 parte, & intentione Dei, naturaque ipsius fidei, & gratiæ, quæ
 quoddam semen est æternæ gloriæ; ut taceam, in Græco, & origi-
 nali textu non haberi *πρεκαταρτισμένοι* præordinati: nec etiam *προκα-*
ταρτισμένοι prædestinati; sed *τεταγμένοι* hoc est, *ordinati*, bene af-
 fecti, amantes, cupidique æternæ vitæ. Alioquin dicendum esset,
 omnes, quotquot Antiochiæ crediderant, præordinatos ad vitam
 æternam fuisse, quotquot verò tunc non crediderant, damnatos esse,
 quorum utrumque absurdissimum, & incredibile est.

Ad Philipp. 4. *Apocalyp. 20. & 22. & Daniel. 12.* aliqui tantum
 non omnes *scripti* dicuntur in *Libro Vitæ*: Sicut ergo non omnes
 scripti in libro Vitæ; ita non omnes voluit Deus salvari. Resp. Imò
 de Reprobis etiam dicitur, *Libro Vitæ inscriptos esse: Qui peccave-*
rit mihi, delebo eum de libro meo; Exodi 32. *Aufferet Deus partem*
eius

eius de Libro Vitæ. Apoc. 22. Si ergo etiam Reprobi in Librum Vitæ scribuntur, sequitur, etiam Reprobis Deum salutem voluisse; qua enim ratione in Librum Vitæ scripsisset, quos nolisset ad vitam pertinere?

Non omnes, sed aliqui tantum, hoc est, prædestinati dicuntur *Filio à Patre dati.* Joan. 6. & 16. Et: Non posse *rapi de manu Filii.* Joan. 10. *Omnia fieri propter Electos* 2. ad Timoth. 2. 10. Resp. Hæc quoque certissima esse, citraque dubium, nec pugnare cum voluntate omnes salvandi: quanquam enim Deus, quantum ex se est, & voluntate antecedenti per certa, & destinata media voluerit, & paraverit omnibus vitam æternam; quia tamen prævidit, non omnes, sed aliquos tantum iis bene usuros, ideo istis tantum re ipsa vitam æternam dare proposuit; de istis ergo intelligenda sunt omnia, quæ citatis locis habentur.

At inquires, si Deus Reprobos æquè, ac Prædestinatos salvare vult; sequitur, quantum ex parte Dei est, non fuisse Prædestinatos majori, magisque speciali beneficio affectos, Beneficium enim ex voluntate, & affectu beneficientis æstimatur; at ut tu dicis, non magis in Electos, quam Reprobos, quantum ex parte sua erat, Deus propensus affectusque fuit; non ergo Electis magis beneficus, quam Reprobis. Resp. & quæro, quid nomine *specialis beneficii* intelligas? Illud, quod tibi tantum, non alteri datur? at hoc sordidissimi, & lividissimi animi est, nolle videlicet pro speciali beneficio habere, nisi alteri negatum; sicque magnitudinem gratiæ non ex pretio, & merito sui, sed ex damno alterius metiri. Quod me creavit, quod me redemit, quod me Cælo adscipserit, nolo inter singularia beneficia cenferi, nisi alios deferat, alios damnet. Planè non amantium, non Electorum, sed invidorum vota sunt ista. Imò, inquit, Augustinus lib. 1. de Civit. Dei cap. 28. *Optandum tibi potius est, ut salvandorum amplior sit numerus, quam ut inter paucos emineas.* Amantibus enim tantò grandius, tantoque optatius beneficium, quantum pluribus datum. Cum enim bonum alterius in Electis, & amanti-bus gaudium excitet, sequitur, tantò majus illorum gaudium fore, quantum major numerus Beatorum. Quod ergo voluerit Deus omnes salvos esse, id ad speciale Electorum beneficium spectat; quantum enim magis Deum amant, tantò magis & de numero Candidatorum gaudent, & infinitam Dei Bonitatem laudibus attollunt. Deum ergo omnes, quantum ex se est, amplexum esse, omnes salvos voluisse,

non

non detrimenta, sed fomenta amoris, gaudii, & gloriæ in Electis sunt, sicque ad augendum, non minuendum beneficium pertinent. Sive ergo beneficium Dei, & antecedentem voluntatem *absolutè* consideres, ut Electis propriam: sive *comparativè*, ut omnibus etiam Reprobis communem, sequitur, semper maximum, & specialissimum Dei donum, ac beneficium esse. Dende si Deus tibi soli bene vellet, nullâ hominum aliorum curâ, teque solum in filium, & hæredem adoptâset, aliis omnibus Regno exclusis; an, inquam, non tibi speciale hoc beneficium videretur? Atqui amor, quo te Deus prosequitur, talis est, tamque ardens, & in tua commoda intentus, ac si solus amareris, nec alium præter te haberet Deus curandum, amandumque; quid ergo refert plures amari, quando ita amaris, ac si tu solus, nemo alius esset. *Sic intendit Dominus singulis, ac si vacaret à cunctis: & sic si simul intendit omnibus, ac si vacet à singulis*; inquit, Gregorius lib. 25. Moral. cap. 13. Quodd si tamen omnino velis, non aliud esse magnum, ac speciale beneficium, quam quod aliis negatur; cogita, quam multis, infinitisque creaturarum negatum sibi, quod tibi concessum: Poterat enim Deus infinitos alios homines, & creare, & hæredes Cæli facere, nec tamen voluit; tibi ergo tributum, quod infinitis aliis negatum; idque nullo tuo jure, nulloque merito, sed sola Dei Bonitate. Ergo negari non potest, etiam ex hac parte, factaque cum aliis, qui neglecti sunt, comparatione, voluntatem te salvandi maximum, ac speciali Dei beneficium esse, quippe te innumeris aliis prælato.

XXII. *Opponitur Nonò*: Cum tam multi hominum alii pereant, aliis salventur; quæro, unde tantum Reproborum, Electorumque discrimen? ex parte Dei, an hominum? Non Dei; is enim omnibus æqualiter salutem voluit. Ex parte hominis? ergo homo est, qui in causa salutis se ipsum *discernit* contra illud Apostoli: *Quis autem te discernit?* 1. ad Corinth. 4. sicut enim, quodd ex una arbore pomum, ex altera ficus nascatur, non potest hæc diversitas fructuum Soli adscribi, (quippe æquali ratione in omnes plantas agenti) sed plantarum diversitati, aliter, aliterque gignentium; ita in causa salutis non poterat illa Deo adscribi, Deo, ut dicimus, in omnes æquali.

Resp. Duplicem discretionem statui posse; aliam, quæ fiat viribus naturæ, aliam, quæ viribus gratiæ. Primam non secundam damnat Apostolus. Cum enim e. g. fidelis ab infideli per fidem
discer-

discernatur; fides verò voluntatem hominis, & gratiam requirat; sequitur, discretionem fidelis ab infideli necessario, & à voluntate hominis, & à gratia Dei pendere? non ergo Apostolus omnem hominis voluntatem excludit, sed illam tantum quæ gratiâ careat, suisque viribus pugnet. Verba Apostoli sunt. *Nec unus infletur adversus alterum; quid enim habes, quod non accepisti? Si autem accepisti, quid gloriaris, quasi non acceperis?* Vides, non aliam hîc ab Apostolo discretionem improbari, quàm illam, quæ suis, non divinis viribus fiat. Sicque hanc Apostoli sententiam ipse Augustinus exposuit Lib. de Spirit. & Litt. cap. 34. *Consentire vocationi divinæ, vel ab ea dissentire propriæ voluntatis est, quæ res non solum non infirmat, quod dictum est: quid habes, quod non accepisti? Verum etiam confirmat: accipere enim, & habere anima non potest, nisi consentiendo, ac per hoc, quod habet, & accipit, Dei est; accipere autem, & habere, utiq; accipientis, & habentis est.* Et in Psalm. 58. & 85. præclare, eleganterque: *Deus meus misericordia mea. O nomen, sub quo nemini desperandum est! Deus meus, inquit, Misericordia mea. Quid est Misericordia mea? Si dicas, salus mea; intelligo, quia dat salutem. Si dicas, refugium meum; intelligo, quia confugis ad eum. Si dicas, fortitudo mea; intelligo, quia dat tibi fortitudinem. Misericordia mea quid est? totum quidquid sum, de Misericordia tua est. Sed promerui te, invocando te. Ut essem, quid feci? ut essem, qui te invocarem, quid egi? si enim egi aliquid, ut essem, iam eram, antequàm essem. Porro si omnino nihil eram, antequàm essem, nihil à te promerui, ut essem. Fecisti, ut essem, & tu non fecisti, ut bonus essem? Dedisti mihi, ut sim, & potuit mihi alius dare, ut bonus sim? Si tu dedisti mihi, ut sim, & alius mihi dedit, ut bonus sim; melior ille, qui mihi dedit, ut bonus sim, quàm illa, qui dedit mihi, ut sim. Porro qui a nemo te in Misericordia largior, à quo accepi, ut essem, accepi ab illo, ut bonus essem: Deus meus Misericordia mea! arguens enim superbiam Apostolus non ait, non habes; sed ait: quid enim habes, quod non accepisti? Non arguit, quia dicebas, te habere; sed arguit, quia ex te esse volebas, quod habebas. Imò & habere te agnosce, & ex te nihil habere, ut nec superbus sis, nec ingratus. Quamvis ergo fidelis ab infideli propriâ voluntate discernatur, quia tamen hanc ipsam voluntatem non à se, sed à Deo habet; ideo gloriari non potest, quasi non acceperit, quod solum Apostolus prohibet. Et lucere, & calefacere ferrum candens quis nescit? quia tamen id facit non suâ sed aliena dote; ideo non*

P

ferro,

ferro, sed igni laus tota tribuitur; ita laus tota operis non voluntatis, sed gratiae est, quia ut voluntas bene operetur, non à se, sed à gratia habet. Quod si tamen omnino velis, nihil humanam voluntatem ad discretionem Reprobi, Electisque conferre, id quoque verum erit; quidquid enim in opere aliquo est, quod ad ordinem supernaturalem pertinet, quodque aeternam vitam meretur, id totum, uniceque à gratia est, nihil præter naturalia conferente voluntate: naturalia verò (qualia sunt, esse actum liberum, esse vitalem) tam nullam ad aeternam vitam obtinendam proportionem habent, quam nullam habent ad Regnum promerendum, terram colere, aut hortum rigare. Et hæc ratione verum est, quamvis inter duos æquali gratiâ instructos unus velit, alius nolit; eum, qui vult, non voluntate sua, sed gratiâ discerni, quia voluntas ut voluntas nihil habet dignum vitâ aeternâ, at nihil non est causa discernendi.

XXIII. *Opponitur Decimò.* Si vult Deus omnes homines salvos fieri, cur ergo tot parvuli tam infidelium, quam fidelium parentum sine culpa pereunt?

Resp. Aliud est perire, aliud beatum non esse: parvuli, qui sine Baptismo decedunt, beati quidem non sunt, nec tamen pereunt: & licet culpâ propriâ careant, non tamen carent alienâ, & paternâ: quamvis enim damnari nemo possit paternâ culpâ, potest tamen paternâ culpâ iis bonis privari, quæ liberaliter à Principe accepturus erat, patre innoxio, nec in principem delinquente, ut quotidiana exempla ostendunt. Adamo ergo peccante non is solum, sed tota ejus posteritas iustissimè Dei donis, gratiâ videlicet, & gloriâ, aliisque dotibus innocentiae privata est, non tamen aeternis suppliciis addicta: & ideo de non baptizatis dicitur quidem Joan. 3. *Nisi quis renatus fuerit ex aqua, & Spiritu sancto, non potest intrare in Regnum Celorum* non dicit Christus: *aeternis ignibus punietur, sed non intrabit in Regnum Celorum*; hoc est: non torquebitur quidem ut rebellis, sed tamen non erit hæres, quia filius Rebellis. Audi Augustinum: Is enim licet ardore disputandi contra Pelagianos severius aliquando de parvulis senserit, alibi tamen mitius pronuntiat. Nam Lib. 3. de libero Arbitrio. cap. 23. ita loquitur: *Dicunt aliqui: qualis in futuro iudicio locus parvulo deputabitur, cui nec inter iustos locus est, quoniam nihil recti fecit, nec inter malos, quoniam non peccavit? Respondeo, superfluum quæri de meritis ejus, qui nihil meruit: non enim timendum est, ne non potuerit esse sententia media inter premium, & supplicium, cum sit vita media inter*
pec-

peccatum, & rectè factum. Vides sententiam mediam ab Augustino Parvulis non baptizatis inter supplicium, meritumque constitui. Neque hanc sententiam unquam Augustinus retractavit, cum tamen Lib. 1. *Retractat.* & præsertim Epist. 26. diligenter hos libros, & hanc parvulorum causam expendat. Et lib. 5. in Julianum cap. 8. *Non dico, parvulos sine Christi Baptismo morientes tantâ penâ plectendos esse, ut eis non nasci potius expediret.* Planè si crederet Augustinus, æterno igne torqueri, certissimum foret, consultius eis non nasci, quàm æternum cruciari futurum fuisse, juxta illud Christi: *Meliùs fuisset, si nunquam natus esset homo ille.* Et infra: *Quis dubitaverit, parvulos non baptizatos in damnatione omnium levissima futuros, quæ, qualis, & quanta erit, quamvis definire non possim, non tamen audeo dicere, quod eis, ut nulli essent, quàm ut ibi essent, potius expediret.* Et cap. 93. *Enchiridii* docet: parvulos ob peccatum originale penâ omnium mitissimâ puniri: at pœna ignis perpetua dici non potest omnium mitissima, cum infinito quasi excessu omnium peccatorum venialium, & totius Purgatorii pœnas longissimè superet; quæ ergo omnium mitissima? Sanctus quoque Nazianzenus Serm. in Sacrum Lavacrum: *Parvuli, inquit, nec cælesti gloria, nec suppliciis à justo Judice afficientur, utpote qui licet Baptismo consignati non fuerint; improbitate tamen careant.* In quæ verba Nicetas antiquus Nazianzeni Commentator hæc habet: *Ex verbis Nazianzeni manifestum est, hujusmodi infantes nullis pœnis torqueri.* Gregorius quoque Nyssenus Magni Basilii Frater orat. de Infantibus: *Immatura mors infantium demonstrat, neq; in doloribus, & mæstitia futuros eos, qui sic vivere desierunt.* S. Ambrosius lib. 2. de Abraham cap. 11. *Nisi quis renatus fueris ex aqua, & Spiritu Sancto, non intrabit in Regnum Cælorum: utiq; nullum excipit, non infantem, non aliqua præventum necessitate: habeant illi apertam pœnarum immunitatem, nescio, an habeant Regni honorem.*

Sed omnium luculentissimè S. Thomas fidelissimus Augustini Discipulus, & cui in hac causâ parvulorum uno agmine Theologi omnes suffragantur. Is enim de Malo quæst. 5. art. 2. ita loquitur: *Pœna proportionatur culpæ, & ideo peccato actuali mortali, in quo invenitur aversio ab incommutabili Bono, & conversio ad bonum commutabile, debetur & pœna damni, scilicet carentia Visionis divinæ, respondens aversioni, & pœna sensus respondens conversioni. Sed in peccato originali non est conversio ad creaturam, sed sola aversio à Deo,*

vel aliquid in versioni respondens, scilicet, destitutio Animæ à iustitia originali; & ideo peccato originali non debetur pena sensûs, sed solum pena damni, scilicet carentia visionis divinæ. Rursus pena sensûs nunquam debetur habituali dispositioni; non enim aliquis punitur ex hoc, quod est habilis ad furandum, sed ex hoc, quod actu furatur. Sed habituali privationi absq; omni actu debetur aliquod damnum, puta, quia non habet scientiam litterarum, ex hoc ipso indignus est promotione ad Episcopalem dignitatem. In peccato autem originali invenitur quadam concupiscentia per modum habitualis dispositionis, quæ parvulum facit habilem ad concupiscendum, adultum autem actu concupiscentem; & ideo parvulo defuncto cum originali non debetur pena sensûs, sed solum pena damni, quia scilicet non est idoneus ad visionem divinam propter privationem originalis iustitiæ. Et art. 3. Post mortem in anima non mutatur dispositio voluntatis, neq; in bonum, neq; in malum. Unde cum pueri ante usum rationis non habent actum inordinatum voluntatis, neq; etiam post mortem habebunt. Non est autem absq; inordinatione voluntatis, quod aliquis doleat, se non habere, quod nunquam potuit adipisci; sicut inordinatum esset, si aliquis rusticus doleat de hoc, quod non esset Regnum adeptus. Quia ergo pueri post mortem sciunt, se nunquam potuisse illam gloriam cælestem adipisci, ex ejus carentia non dolebunt. Animæ ergo puerorum naturali quidem cognitione non carent, qualis debetur animæ separatæ secundum suam naturam, sed carent supernaturali cognitione, quæ hic in nobis per fidem plantatur, eo quod nec hic fidem habuerunt in actu, nec Sacramentum Fidei susceperunt. Pertinet autem ad naturalem cognitionem, quod anima sciat, se propter beatitudinem creatam, & quod beatitudo consistat in adeptione perfecti boni: Sed quod illud bonum perfectum, ad quod homo factus est, sit illa gloria, quam Sancti possident, est supra cognitionem naturalem, juxta illud Apostoli: Nec oculus vidit, nec auris audivit, nec in cor hominis ascendit, quæ præparavit Deus diligentibus se, nobis autem revelavit Deus per Spiritum suum, quæ revelatio ad fidem pertinet: & propter hoc, quia animæ parvulorum se privari tali bono non cognoscunt, ideo non dolent; sed hoc, quod per naturam habent, absq; dolore possident. Et in lib. 2. Sentent. distinct. 33. quæst. 1. Acerbitas pænæ sensibilis delectationi culpæ respondet. Apoc. 18. Quantum in delitiis fuit, tantum date illi tormentum, & luctum. Sed in peccato originali non est aliqua delectatio, sicut nec operatio, delectatio enim operationem consequitur,

tur, ut ex 10. Exhibitor: patet; ergo peccato originali non debetur pena sensibilis. Et infra: pena debet esse proportionata culpæ, ut dicitur Esaiæ 27: defectus autem, qui per originem traducitur, rationem culpæ habens, non est per subtractionem, vel corruptionem alicujus boni, quod naturam humanam consequitur ex principiis suis: sed per subtractionem vel corruptionem alicujus, quod naturæ superadditum erat: nec ista culpa ad hunc hominem pertinet, nisi secundum quod talem naturam habet, & ideo nulla alia pena sibi debetur, nisi privatio illius finis, ad quem donum subtractum ordinabat, hoc est autem divina visio; & ideo carentia huius visionis est propria, & sola pena originalis peccati post mortem, unde sicut culpa non fuit per operationem ejus, ita nec pena per passionem ipsius esse debet. In aliis autem perfectionibus, & bonitatibus, quæ naturam humanam consequuntur ex suis principiis, nullum detrimentum sustinebunt pro peccato originali damnati. Et art. 2. Recta ratio non patitur, ut aliquis perturbetur de eo, quod in ipso non fuit, ut vitaretur, propter quod Seneca probat, quod perturbatio in sapientem non cadit: sed in pueris est recta ratio, nullo actuali peccato obliquata; ergo non turbabuntur de hoc, quod talem penam sustinent, quam vitare nullo modo potuerunt. Et infra: Sciendum, quod ex hoc, quod caret aliquis eo, quod suam proportionem excedit, non affligitur, si sit rectæ rationis; sicut nullus sapiens affligitur, quod non potest volare sicut avis, vel quia non est Rex, vel Imperator, cum sibi non sit debitum, affligeretur autem, si privaretur eo, ad quod habendum aliquo modo aptitudinem habuit. Dico ergo, quod omnis homo usum liberi arbitrii habens proportionatus est ad vitam æternam consequendam, quia potest se ad gratiam præparare, per quam vitam æternam merebitur, & ideo si ab hoc deficiant, maximus dolor erit eis, quia amittunt illud, quod suum esse possibile fuit: Pueri autem nunquam fuerunt proportionati ad hoc, quod vitam æternam haberent, quia nec eis debebatur ex principiis naturæ, cum omnem facultatem naturæ excedat; nec actus proprios habere potuerunt, quibus tantum bonum consequerentur, & ideo nihil omnino dolebunt de carentia Visionis divinæ, imò magis gaudebunt de hoc, quod participabunt multum de divina Bonitate, & Perfectionibus naturalibus. Et ad 5. Quamvis pueri non baptizati sint separati à Deo, quantum ad illam conjunctionem, quæ est per gloriam; non tamen ab eo penitus sunt separati; imò illi coniunguntur per participationem naturalium bonorum, & ita etiam de ipso gaudere poterunt naturali cognitione, & dilectione.

Hactenus.

Haftenus Divus Thomas, cujus rationibus addi etiam illa potest, videlicet, peccatum originale nullam reprehensionem mereri; quis enim audiyit unquam, propter originalem culpam reprehensum aliquem ab Ecclesia, aut Patribus esse? Planè quæ in liberam hominis potestatem non cadunt, quæque vitari non possunt, extra omnem reprehensionem sunt, nam ut eleganter scribit Augustinus Libro de duabus Animabus cap. 11. *Non hic scrutandi mihi libri erant, unde discerem, neminem vituperatione, suppliciove dignum, qui id non faciat, quod facere non potest. Nonne ista cantant in montibus Pastores, in theatris Poetae, & indocti in Circulis, & docti in Bibliothecis, & Magistri in Scholis, & Antistites in Sacris locis, & in Orbe terrarum Genus humanum?* Si ergo propter culpam originalem, quam vitare non potuit, nemo potest vituperari, quanto minus torqueri? Planè longè atrociùs flammæ dolent, præsertim diuturnæ, quàm verba; quis ergo tam absurdè sentiat, ut dicat, posse torqueri parvulos, qui non possunt reprehendi? posse puniri flammis, qui non possunt verbis? Ex quibus omnibus facillè intelligas, magnum parvulorum, & adultorum discrimen esse: Si enim Deus parvulos ad gloriam non elegit, non ideo sequitur, eos damnari; at id sequitur in adultis, in quibus, rem ipsam si consideres, unum idemque est, non eligi, quod damnari, cum medium non detur. Ubi etiam observa, nulla re magis Augustini animum (ut ipse profitetur, præsertim *epistola 28. ad Hieronymum*) agitatam, tortumque fuisse, quàm hac de parvulorum pœnis quæstione; unde ut se hoc nodo explicaret, in alias, aliasque sententias flexit. Aliquando enim docuit: animas non creari à Deo, sed per traducem ab Adamo proficisci. *Epist. 28. aliquando: Deum in aeterna vita, inq. secreto iudiciorum suorum aliquid bonæ compensationis parvulis reservare, quoniam quamquam nihil boni fecerint, tamen nec peccaverint aliquid.* Lib. 3. de Libero arbitrio. Quam sententiam suam licet in *epistola 28. ad Hieronymum* retractet, non tamen ut erroneam, & falsam, sed tantum ut minus firmam, validamq. Aliquando totam pœnam parvulorum sine Baptismo morientium dixit, ab aliquibus non in anima statui, quam concedebant ad videndum Deum admitti, sed in corpore, quod negabant resurrecturum; quam tamen sententiam fatetur Augustinus, vel sola novitate sibi displicere *Epist. 28. aliquando aeternis ignibus cruciari dixit. Lib. de Fide ad Petrum cap. 27. aliquando pœnam omnium mitissima. Enchirid. 93. aliquando, se prorsus animi pendere* osten-

ostendit, & quid statueret, planè ignari. *Lib. 5. in Julian. cap. 8.* Et Epist. 28. ad Hieronym. Ubi: *Cum ad pœnas ventum est parvulorum, magni mihi crede, angustiis arctor, nec quidquid respondendum penitus invenio* Quamvis autem desiderem, rogem, votis ardentibus exoptem, & expectem, ut per te mihi Dominus hujus rei auferat ignorantiam, tamen si minimè meruerō patientiam mihi petam à Domino Deo nostra. Denique in hac quæstione id evenit Augustino, quod Venatoribus solet, ut videlicet odore, ac desiderio prædæ, quam insequuntur, nec capiunt, toties mutant locum, quoties spem invenienti. At ego id quoque ad arcana Dei pertinere censuerim. Constat, sine Baptismo ad vitam æternam, hoc est visionem beatificam non perventuros, id enim Evangelium expressit. Constat, sensibilibus pœnæ immunes fore, id enim ratio, omniumque Theologorum auctoritas convincit, reliqua latent, & ideo semper id tenendum, quod magis divinæ Bonitati congruat juxta illud Sap. 1. *Sentite de Domino in bonitate.* Si enim ipse Deus *superexaltat misericordiam iudicio,* quantò magis id faciant homines, qui misericordiâ indigent? & si clementia prima virtus in Principe est, quantò magis erit prima in omnium Principum Principe? Planè de Deo pessimè merentur, quicumque formidabilem magis, quàm amabilem faciunt, sicque ex aureo in ferreum mutant, talemque aliis fingunt, qualem nollent sibi esse: si enim experiri clementem ipsi cupiunt, quare aliis inclementem, & inexorabilem faciunt? Imitantur ergo Poëtam, qui aliquem à suis Diis ita descripsit:

*. . . . Vultus est illi Jovis,
Sed fulminantis: magna pars Regni trucidis
Est ipse Dominus, cujus aspectum timet,
Quidquid timetur*

Ita Poëta Plutonem pinxit: at non ita Theologi Deum, quem definiunt *Summum Bonum*; non summum terrorem esse: nam esse terrorem, etiam Africæ Monstris, & Basiliscis convenit; non ergo est proprietas Dei: non quidd negemus, timendum esse Deum; sed quidd dicamus, oportere rationibus timendi prævalere rationes amandi.

Ergo, ut dicebamus Deus parvulos Cælo exclusit ob peccatum, non proprium, sed paternum: Non ideo tamen naturalibus bonis exuit, sicque si non fecit beatos, quia perduellium parentum filios,
& cul-

& culpâ originali asperfos; at nec fecit miseros, quippe cæterâ innocentibus.

Deinde in hac parvulorum causâ considerandum est, licet Deus ad cœlestem gloriam non eos admiserit; alio tamen, multoque majori beneficio affecisse, quod illi ipsi longè cœlo prætulissent, & nos quoque, si electio daretur, multò majoris pretii, quàm Cœlum duceremus. Id verò beneficium fuit, quodd fato præmaturo abreptos innocentia suæ personalis sacuros reddidit, & quàm plurimis peccatis cum venialibus, tum mortalibus, ac præsentissimis, infinitisque peccandi periculis subduxit, quibus procedentibus annis certissimè implicandi erant, addicendique perpetuis gehennæ incendiis, juxta illud Sap. 4. *Raptus est, ne malitia mutaret intellectum ejus*; quod præsertim de filiis infidelium verissimum est. Hoc verò innocentia personalis donum, & immunitatis à peccato tantum est, ut ipsi parvuli millies Cœlo carere malint, quàm vel uno peccato involvi, nullusque Christianorum est, cujus non idem votum esse debeat. Quid ergo conqueri de Deo possunt, aut quid ipsis mali fecit, si non quidem Cœlo, sed alio beneficio donavit, quod multò præstantius Cœlo est, quodque & ipsi, & omnes sapientes, si potestas eligendi daretur, longè Cœlo præferrent? Quodd si Deus id egit, quod & ipsi, & nemo alius non optaret, ergo nulla dolendi, nulla conquerendi, sed magna laudandi, grateque agendi causa est.



§. II.

Dari omnibus hominibus ad æternam vitam consequendam, non tantum necessarias, & qualescumque, sed copiosissimas, & abundantes gratias, quibus si velint, facile, commodeque obtinere illam possint.

S V M M A R I A.

- I. *Ex voluntate efficaci salvandi omnes, optimè inferri voluntatem omnibus quoque, quantum ex parte Dei est, efficaces, & copiosissimas gratias offerri.*
- II. *Possè causam aliquam & dici, & esse efficacem, quamvis effectus non sequatur, idque exemplis Luciferi, & Adami ostenditur.*
- III. *Efficaces ex natura sua, & copiosas gratias dari ex Sacris Literis, & qua ratione jugum Christi leve, & suave dicatur, ostenditur.*
- IV. *Sape reprobis, & renuentibus æquales, aut etiam majores gratias dari, quam electis, & consentientibus. Neque tantum externas, verum etiam, multoque magis internas. Ubi Augustini, & Thomæ testimonia expendantur.*
- V. *Idemque probatur ex effusissima etiam in bruta, aliasque creaturas insensibiles Dei Bonitate, & Providentia.*
- VI. *Et in ipsum hominis corpus.*
- VII. *Et quia homo Dei opus est.*
- VIII. *Idemque, ex corporis humani structura.*
- IX. *Ac præsertim hominis Redemptione.*
- X. *Ipsaque experientia.*
- XI. *Neque id tantum de fidelibus, verum etiam infidelibus credendum esse, quod variis, multisque rationibus probatur, præsertim verò testimonio Augustini, ejusque præstantium Discipulorum.*

Q

XII.

- XII. Nihil obſtare doctrinam S. Thomæ de infidelitate purè negativa.
- XIII. Si homini auxilia gratiæ deeſſent, tranſgreſſionem mandatorum ex ſententia Auguſtini nequaquam tranſgreſſoribus imputatum iri.
- XIV. Nullis quantumvis obduratiſſimis peccatoribus abundantiffimas gratias deeſſe.
- XV. Quo ſenſu Auguſtinus dicat, gratiam non omnibus dari.
- XVI. Cauſa Parvulorum ſine Baptiſmo decedentium non obeſſe oſtenditur.
- XVII. Exponitur Auguſtinus.
- XVIII. Falsam eſſe eorum opinionem, qui contendunt gratiam omnibus quidem præparari, non tamen omnibus dari.
- XIX. Exponitur Apoſtoli ſententia ad Roman. 10. quomodo credens, quomodo audient ſine prædicante &c.
- XX. Nemini quamvis perditiffimo cuſtodiam Angelicam ſubtrahi, ubi de peccatorum meſura, deq; prava conſuetudine, modiſq; eam expugnandi.
- XXI. Nemini orandi, petendiſq; gratiam deeſſe. Ubi de gradibus Orationis, deq; auxilio remoto.

I. **I**D quidem ex iis, quæ ſuperiori Paragrapho diſputavimus, facile conici poteſt: Si enim Deus, quantum ex ſe eſt, vult omnes efficaciter, impenſeque ſalvari; ſequitur, non minùs efficaciter, impenſeque media, & gratias homini dari, quibus hunc finem obtinere poſſit; voluntati enim finis reſpondet voluntas, & cura mediorum.

II. Sed hîc iterum in memoriam revocandum, quod jam ſuprà probavimus, poſſe cauſam aliquam eſſe, diciſq; efficacem, quamvis effectus non ſequatur, ſi videlicet ceſſatio, & ſuſpenſio effectus non ex defectus virtutis in cauſa, ſed aliunde proveniat: illa enim dicitur cauſa efficax, quæ omnem, & neceſſariam virtutē ad ponendum effectum habet: nemo enim negaverit, Solem cauſam, efficacem illuminationis eſſe, quia nihil ei ad illuminandum & aërem, & terram deeſt, ipſoſque facto omnia illuminat, niſi nubem, aut velum, aliudve impedimentum opponas, quale opponunt, qui lucenti, & mille radiis ad illuminandum conanti oculos ſtudioſè claudunt; tunc enim ceſſabit quidem illuminatio, non tamen Solis, ſed Solem impediētis culpā. Aliud ergo eſt cauſa efficax, aliud effectrix; iſta, quam effectus conſequi-

sequitur; illa quæ omnem necessariam virtutem ad consequendum effectum habet, nisi aliunde impediatur. Idem de gratia dicas. Alia effectrix est, quæ voluntatem expugnat; alia efficax, quæ virtutem expugnandi habet, quæque ipso facto voluntates omnium expugnat, quotquot impedimentum nullum ponunt; unde quoddam vna, eademque gratia alium flectat, alium non flectat; non gratiæ, sed voluntatis culpa est: Sciendum enim, hanc esse libertatis creatæ naturam, ut quamcumque etiam efficacissimam gratiam possit eludere, cassamque reddere; quod si potest, quid mirum est, si aliquando agat? sicut enim nulla gratia est, quæ tollat libertatem; ita nulla est, quæ tollat potentiam resistendi; quid ergo novi, absurdique, imò quid non rationi, & experientiæ consentaneum, resistere aliquando illam, quæ semper potest resistere, juxta illud Act. 7. *Uos semper Spiritui Sancto resistitis?* Non quoddam major sit in voluntate virtus resistendi, quam in Deo potentia superandi, sed quoddam Deus nolit potentiam, sed gratiam uti, hoc est, non cogere liberam, sed invitare, ac more nobilis, castique Amatoris petere consensum, non rapere. Et verò hæc creatæ voluntatis etiam potentissimis gratiis resistendi facultas, nullibi clariùs quam in Lucifero, & Adamo apparuit; Nam ex una parte nihil in iis erat, quo possent ad malum inclinari: non appetitus cum ratione certamen, non indigentia alieni, & extranei boni, non perversi, & inoliti mores, non ignorantia, non cupiditas, non difficultas honesti, non aliquid eorum, quæ homines ad peccandum illiciunt. Ex adverso, nihil eorum aberat, quo possent facillimè in officio contineri, & ad bonum, ac virtutem complectendam propè compelli; summa tranquillitas animæ, perfectissima Dei cognitio, & par cognitioni amor, summa quoque & facilitas, & suavitas operandi honesta, spes certa futurorum, secunda, & plena possessio præsentium, ac denique omnia, quæ optare aliquis ad sanctitatem, & felicitatem posset. Et tamen inter tot præsidia virtutum, quis unquam credidisset, cadere illos, quam stare maluisse? cujus si causam postules, dari alia non potest, quam voluntatis humanæ libertas, quæ præsentibus, & honestis, incerta, & flagitiosa præposuit, nec validissimis gratiis, quibus ad bonum rapiebatur, vinci se passa est. Ita Angelicus de peccato Luciferi 1. p. q. 63. a. 7. *Peccatum Angeli processit non ex aliqua pronitate, sed ex solo libero arbitrio.* Et ad 3. cum sibi objecisset: *quantò magis aliquid inclinatur in aliud, tantò minùs potest ab illo discere; sed Angelus quantò est Superior, tantò magis inclinatur in Deum, ergo*

minus potest à Deo peccando deficere: respondet: Quod quantacumq; inclinatio ad bonum in supremo Angelo, tamen ei necessitatem non inducebat, unde potuit per liberum arbitrium eam non sequi. Sententia ergo S. Doctoris est, quantacumque inclinationem ad bonum quæ necessitatem non infert (& consequenter quantacumque gratiam, cujus tota efficacia in eo est, ut instar validissimi ponderis & intellectum, & voluntatem ad cognoscendum, prosequendumque bonum inclinet) & posse à libera voluntate vinci, & de facto in supremo Angelorum, primoque homine victam esse quorum uterque deliquit, deflexitque à bono, non aliquo gratiæ defectu, sed voluntatis arbitrio. Certè de Adamo S. Augustinus Lib. de Corrept. & grat. cap. 11. hæc habet: *Quid ergo, Adam non habuit Dei gratiam? imò verò habuit magnam, sed disparem: ille in bonis erat, quæ bonitate sui Creatoris acceperat, & in quibus nullum prorsus patiebatur malum, nullaq; tali rixa à se ipso adversus se ipsum tentatus, atq; turbatus, in illo beatitudinis loco, suâ secum pace fruebatur.* Ergo nec Lucifero, nec Adamo, nec aliis multis magna gratia defuit; sed defuit magna, & bona voluntas. Hanc verò magnam, validissimamque gratiam, quam etiam cadentibus, & respuentibus dari diximus, appellat Augustinus *sufficientissimam facultatem*: sic enim Lib. 3. de Libero arbitrio cap. 16. loquitur: *Ex eo igitur, quod non accepit, nemo reus est. Ex eo verò, quod non facit, quod debet, iuste reus est; debet autem, si accepit voluntatem liberam, & sufficientissimam facultatem.* Hanc ergo, ut loquitur Augustinus, sufficientissimam, & validissimam gratiam, non quomodocumque, nec parva manu, sed abundantissimè hominibus dari ex Sacris Litteris manifestè probatur. Nam:

Jacobi 1. c. 4. *Qui dat omnibus affluenter, & nemini improperat.* Nota illa verba *omnibus, & affluenter: omnibus*, ut nullum excludat: *affluenter*, ut copiam ostendat. Et ideo Gen. 17. Deo nomen Saddai tribuitur, quod mammeum, uberrimum, & instar Cornucopiæ abundantissimum significat, ut meritò dixerit Augustinus: *Erubescat humana pigritia; plus enim paratus est Deus dare, quam homo accipere.* Et Thomas Angelicus in hæc verba: *Deus dat liberaliter, quia non vendit, sicut multi: dat generaliter, quia non uni, sed omnibus: dat abundanter non parcè: dat curialiter, & officiosè, quia non improperat.* Planè cum Deus sit summum bonum, tam naturale, & ingentum est illi copiosè dare, quam ingentum est mari, copiosè, & non guttatim effluere.

i. ad

1. ad Timoth. 6. *Sperate in Deo vivo, qui præstat nobis omnia abundè ad fruendum, quæ verba, licèt videantur de bonis temporalibus accipienda, multò tamen magis de spiritualibus intelligenda sunt, quæ sunt finis temporalium, & quibus multò perfectiùs anima Deo assimilatur, & conjungitur.*

Ad Titum cap. 3. *Secundùm misericordiam suam salvos nos fecit per lavacrum regenerationis, & renovationis Spiritus Sancti, quem effudit in nos abundè per JESUM Christum.*

Et ad Roman. 10. *Idem est Dominus omnium, dives in omnes, qui invocant illum.*

Et ad Ephes. 2. *Deus autem, qui dives est in misericordia, propter nimiam charitatem suam, quâ dilexit nos, convificavit nos in Christo, ut ostendat abundantes divitias gratiæ suæ. Hic iterum audis divitias misericordiæ, abundantiam gratiæ, excessum charitatis &c. Non quòd in Deum cadere excessus aliquis possit; quid enim excedat infinitum? sed quia & merita, & vota, & expectationem hominum amando excessit; nemo enim, quæ Deus præstitit, ausus esset optare.*

Et ad Rom. 8. v. 32. *Qui etiam proprio filio suo non pepercit, sed pro nobis omnibus tradidit illum; quomodo non etiam cum illo omnia nobis donavit? Si omnia donavit, ergo non parcet. Et si donavit illis, pro quibus Filium dedit; ergo non prædestinatis, non paucis, sed omnibus, quid enim potuit negare, quibus Filium dedit? Planè sicut omnia, quæ hominibus donat Deus, sunt incomparabiliter minora Filio; ita absurdissimum est dicere Deum, qui dedit hominibus; quod incomparabiliter majus, noluisse dare, quod incomparabiliter est minus; hoc est omnia ad salutem consequendam necessaria, & opportuna.*

Et Deuter. 10. *Cùm Moses ea verba præmisisset: Si tamen audieris vocem Domini Dei tui, & custodieris præcepta ejus, quæ in lege hac conscripta sunt, ut revertaris ad Dominum Deum tuum in toto corde tuo, & in tota anima tua; mox addit: Mandatum hoc, quod præcipio tibi, non supra te est, nec procul positum, sed juxta te est, sermo valde in ore tuo, & in corde tuo, ut facias illud. Quæ verba applicans S. Paulus legi Evangelicæ, ac præsertim præcepto Fidei amplectendæ, quod tamen ex natura sua difficillimum est (cùm res actu, cognituque difficillimas complectatur) ita ad Rom. 10. concludit: Hoc est verbum fidei,*
quod

quod prædicamus. Ecce & Moyſes, & Apoſtolus ad omnes Hebræos, Romanosque loquebantur, hoc eſt, ad omnes illos, qui ad Legis Moſaicæ, & Evangelicæ obſervantiam invitabantur, inter quos multi utique peccatores, reprobi que; & tamen eas gratias, & auxilia omnibus promittunt, quibus non utcumque, ſed tam facile, comodeque legem obſervarent, quàm facile ea videmus, & tangimus, quæ nobis vicina, & ante oculos poſita ſunt. Quod etiam faciunt illa Chriſti verba, omnes juſtos & injuſtos ad ſubeundam Legem Evangelicam invitantis Matth. 11. *Tollite iugum meum ſuper vos; iugum enim meum ſuave, & onus meum leve eſt.* Ubi nota, cùm omnes homines ad iugum Evangelicum ſerendum ea ratione invitentur, quod ſit leve, & ſuave; ſequi, id intelligendum eſſe, non ſolùm de iugo Evangelico ſecundùm ſe, & ex natura ſua; (ſic enim durum potius & grave eſt) verùm etiam ſecundùm vires ſerentium, quas à gratia Dei acceperunt; alioquin fruſtranea eſſet, & vana invitatio; ſicut fruſtra paralyticum ad ambulandum provocares; quamvis enim ambulatio ſecundùm ſe ſit homini naturalis, & ideo non facilis tantùm, verùm etiam jucunda; homini tamen paralyſi adſtricto impoſſibilis eſt & ideo fruſtra ſuadetur. Eodemque ſenſu dixit Joannes Epist. 1. *Scimus, quia mandata ejus gravia non ſunt.* Circa quas Scripturæ ſententias obſervandum eſt, legem, ac mandata Evangelica, & iugum; hoc eſt, oneroſa, & levia appellari; oneroſa, ſi eorum naturam, viresque hominis morbidas attendas; levia verò, & ſuavia, ſi gratiam ſpectes, quæ omnibus, qui ad fidem invitantur, à Deo offertur: non quod gratia onus, & difficultatem Evangelicæ Legis tollat, ſed quod vires tribuat, eam difficultatem vincendi: nam & rota non tollit, aut minuit pondus rhedæ, imò multò augeat, & tamen novo hoc onere facit eam velociùs agi, quod ſi rotam currui adimas, pondus quidem minues, ſed immobilè reddes; idem de velo navium de aliis, penniſque avium dicas, de quibus more ſuo eleganter Auguſtinus Serm. 24. de Verb. Apoſt. *Habent & aves pennarum ſuarum ſarcinas, portant illas, & portantur. Tu ſi miſericordiam velis præbere avi, præſertim æſtate & dicas: miſeram iſtam aviculam onerant penna, & detrahas onus, hæc in terra remanebit, cui ſubvenire voluiſti. Porta ergo pennas pacis, alas accipe charitatis; hæc eſt ſarcina, ſic implebitur lex Chriſti.* Duplici ergo ratione mandata Dei, & gravia, & levia dicuntur. *Levia*, vel quia ob magnitudinem, exceſſumque amoris, & gratiæ tota planè difficultas extinguitur, juxta illud Angelici Do-

Doct̃oris Opusc. de diligendo Deo: *Anima, quæ amat, operatur magna, & reputat parva: operatur multa, & reputat pauca: operatur diu, & reputat breve.* Et illud Bernardi: *Labor meus vix est unius horæ, & si plus est, non sentio præ amore.* Et ideo eleganter S. Gregorius amorem vocat machinam cordis (*machina cordis vis est amoris*) sicut enim parvis machinis ingentia onera nullo ferè labore levantur (quales erant Archimedis, unâ, leviq̃ue trochleâ integras Romanorum triremes in altum rapientes, & quibus totum se globum terrestrem moturum centro spondebat, si locus standi daretur) ita nullum cor tam vitiis grave, quodd tolli in Cælum nequeat, amore moliente, ut in Magdalena, ipsoq̃ue Augustino patuit, cujus sunt illæ voces lib. confess. 9. cap. 1. *Quam suavè mihi subito factum est, carere suavitatibus nugarum, & quas amittere metus fuerat, iam dimittere gaudium erat: & ubi erat, & de quo imo, altoq̃ secreto evocatum est in momento liberum arbitrium meum, quo subderem cervicem legi jugo tuo, & humeros levi sarcinæ tuæ Christe JESU adiutor meus, & Redemptor meus.* Sed hæc gratia omnem penitus difficultatem bene operandi extinguens singularis, & paucorum est. Alio modo magis obvio, & quotidiano dicitur jugum Evangelicum leve, quia licet gratia onus, & difficultatem operandi non tollat, facit tamen eam superare. Ex adverso lex Evangelica gravis dicitur, tùm ob datam rationem, quia videlicet ejus difficultatem gratia non penitus delet, sed vincit, juxta illud Christi Domini: *Regnum Cælorum vim patitur, & violenti rapiunt illud:* tùm etiã, ac præsertim in sensu composito, hoc est, quamdiu amorem creaturæ retines, nec ei expellendo gratiã uti statuis, tam diu lex Evangelica non solum difficilis, verùm etiã impossibilis observatu est: At si gratiã uti velis, ut facillè posses, Evangelium observabis, evadetq̃ue onus leve, quod prius gravissimum videbatur. Res exemplo declaratur. Fac ægrotum aliquem esse, qui vehementi febris laborans ardentissimam sitim patiat̃ur; facillè tamen sanari possit, si videlicet Medici tantum opem, manumq̃ue imploret, ac paucissimas sanguinis uncias, quo aliàs & noxiè abundat, è venis mittat. In hac, inquam, hypothesi, ægrotò & difficillimum, & facillimum est, ardentissimam sitim vincere, potuq̃ue omni abstinere: difficillimum quidem, quamdiu febris urit, quæ desiderium bibendi accendit, facillimum verò, quia nihil facilius, quàm sanitatem consequi implorato tantum Medico, emissâq̃ue exigua parte superflui sanguinis; sic enim obventa sanitate,

te, extinctaque febris, sitis, ardorque immoderatus bibendi sponte sua cedit. Idem de peccatore dicas non corpore, sed animâ laborante: febris illi vitium est; sitis, amor illicitis fruendi: durum est avaro, alienis abstinere; durum impudico sine thalamo vivere; verum quamdiu impudicus, & avarus est; sed facile remedium, ut desinat esse, oratio videlicet, & largitio superfluum in pauperes (ut alibi fusiùs ostendam) quis ista non possit? aut quod facilius obtinendæ sanitatis remedium, quàm tantum rogare Medicum, ut velit sanare? quod nisi facias, quis veniam socordiae dabit? Si ergo dicas avaro, ne amet pecuniam; aut impudico, ne amet voluptatem; respondebunt, se id non posse: sed si dicas: ut à Deo petant, ne ista ament; quis eorum respondere audebit, se ne petere quidem posse? Audi Augustinum lib. de perfect. Justit. ante medium: *Non est grave, quod diligendo fit; nam perfecta charitas facit præcepti sarcinam levem, nec solum non prementem onere ponderum, verum etiam sublevantem vice penarum. Anima ergo, quæ illa gravia sentit, oret gemitu voluntatis, ut impetret donum facilitatis.* Ergo quod grave est violentiâ morbi, leve est facilitate remedii. Quæ omnia ed spectant, ut ostendam omnibus, qui ad Legem Evangelicam invitantur, reprobis videlicet, electisque gratiam non qualemcumque, sed talem offerri, quæ lex Evangelica suavis, facilisque observatu fiat, quod nisi esset, gratia vix dici posset, cum difficultas æterna opus, cui annexa est, moraliter impossibile reddat; Nemo enim diu facit, quod ægrè ac difficulter facit. Ex allatis ergo Scripturæ verbis manifestum est, Deum non tantum serio omnium salutem velle, verum etiam ad hanc consequendam non avarè, non parcè, sed effusissimè quantum est de se omnia media suppeditare, quæ non modò sufficiant, imò abundant. Agit videlicet Deus more splendidissimi alicujus, nobilisque parentis, qui filium Regni hæredem peregrè, & in longinqua profecturum non necessariis tantum sumptibus instruit, qui videlicet ad vitam ægrè sustentandam, iterque pedibus metiendum sufficiant, sed etiam iis adornat, qui ad facile, commodè, jucundeque viam superandam, fallendosque itineris labores conferre possint; hinc rhedæ, hinc famuli, hinc supellex & viaticum patre, filioque dignum. Ita cum hominibus Deus, quippe filiis, Regni que hæredibus. Videant ergo, quàm benè de divina bonitate, ac magnificentia sentiant illi, quicumque gratias reprobis, hoc est, plerisque hominum datas, tam ex natura sua tenues, imbel-

imbelleſque faciunt , ut cum iis nemo ad ſalutem pervenerit , nemo perveniat , nemo perventurus ſit .

Qua in re obſervandum eſt , non omnem à nobis gratiam ſufficientem excludi , quod Janſenius docuit , quodque Summi Pontifices damnârunt , ſed ſolùm eam gratiam ſufficientem non admitti , quæ ex natura ſua talis eſt , quæque numquam effectum ſuum completum aſſequitur . Eam vero gratiam ſufficientem agnoſci , & doceri , quæ ſubindè impletur , ſubinde repugnante libero arbitrio non impletur , effectumque ſuo culpâ voluntatis caret , quamque S. Auguſtinus clariſſimè , & frequentiffimè docuit , ut ex laudatis ſuprà ejus textibus patet , & quam tota Societas Jeſu amplectitur , graviſſimique alij doctores .

Qui igitur gratiam ſufficientem ſtatuunt , quæ nunquam effectum ſuum completum aſſequitur , talem mihi videntur ſtatuerè gratiam , quæ non eſt gratia , hoc eſt , de qua nemo ſperare æternam felicitatem ſuam poſſit ; quis enim ſperet , ſe cum ea gratia æternam ſalutem obtenturum , cum quâ nemo obtinuit , nemo obtenturus eſt ? aut quis morbo ſuo pharmacum optet , de quo conſtet , nullum unquam ſanatum eſſe , nullum ſanatum iri , imo quot quot acceperunt , morti ceſſiſſe ? Hæc eſt ergo nimia illa charitas , quâ dilexit nos , hæc copioſa redemptio , hæc ſuperabundans gratia , hæc divitiæ miſericordiæ toties in Scripturis decantatæ , toties promiſſæ ? dare videlicet auxilia tam ex natura ſua parca , tamque invalida , ut ab Orbe condito , ſpatioque ſex mille annorum inter tot hominum myriades non unus repertus ſit ; cui illa ad æternam vitam profuerint , nec deinceps ad mundi finem profutura ſint , quæque nemo petere , nemo optare poſſit ad æternam vitam conſequendam , quippe cùm acceperit , certiffimè periturus ? Ut ſilentio præteream , quod illi dicunt , huiusmodi ſufficientes gratias potentiam quidem agendi dare , ſed nunquam actum . Quis enim inter tot millia cauſarum , vel unicam cauſæ ſpeciem ſeu naturalem ſeu artificialem vidit , aut ſaltem narratam ab alijs audivit , cujus nullum unquam individuum in opus , ac finem ſpeciei , naturæque ſuæ congruum prodierit ? aliquem ignem , qui nunquam arſerit ? aliquam aquam , quæ nunquam madefecerit ? aliquam ſtellam , quæ nunquam luxerit , aliquod ſpeculum , quod nunquam Imaginem obiecti retulerit ? Planè tam nova hæc ſunt , tam inaudita ; ut nec dici debeant , cùm careant ratione , nec credi poſſint , cùm careant exemplo . Imò ſi aliquid in rerum natura eſſet , de quo dici tam inſolita ,

R

& pro-

& prodigiosa deberent, dici tamen de gratia non possent, quam talem esse oportet, ut maximi beneficii rationem habeat; at beneficium non est, quod nemo optare, nemo petere, & à quo nemo sperare æternam salutem potest; quis enim speret nunquam facta, nunquam futura? Planè tale beneficium est, gratiam hominì dare, quā nemo unquam operatus est; quale est remedium dare, quo nullus ægrotus sanatus est, scutum dare, quo nullus aduersus hostem defensus est; cibum dare, quo nemo refectus est. Sed reliqua videamus.

Hæc ipsa, & effusissima Dei in homines bonitas non necessaria tantum, sed copiosa tribuentis ex aliis etiam Scripturæ, Patrumque testimoniis ostendi potest, docentium: sæpe reprobis æqualia, aut etiam maiora, quàm electis auxilia conferri; sicque quoddam illi damnentur, non defectui gratiæ, sed eorum malæ voluntati, & socordiæ adscribi. Id ex celebri illa Christi sententiâ manifestè patet, Judæis impœnitentiam exprobrantis Matth. 11. *Tum cepit exprobrare Civitatibus, in quibus factæ sunt quàm plurimæ virtutes, quod non egissent penitentiam: Væ tibi Bethsaida, væ tibi Corozaim, quia si in Tyro, & Sidone factæ fuissent, quæ factæ sunt in vobis, olim in cilicio, & cinere egissent penitentiam; verumtamen dico vobis, Tyro, & Sidoni remissius erit in die iudicii, quàm vobis. Et tu Capharnaum usq; in infernum descendes; quia si in Sodomis factæ fuissent virtutes, quæ factæ sunt in te, fortè mansissent usq; in hanc diem; verumtamen dico vobis, quia terræ Sodomorum remissius erit in die iudicii, quàm tibi.* Hic (si modò veritatem fateri ingenuè velis, removeasque alienas illas, tortasque interpretationes, quibus nihil tam clarè dicitur, quod obumbrari non possit) hic, inquam, apertissimè docet Christus, cum iisdem gratiis, quæ Judæis impœnitentibus datæ sunt, Tyrios, & Sidonios pœnitentiam facturos; sicque cum una, eademque gratia alium pœnitere, non pœnitere alium.

Neque cum Jansenio dicas, Christum loqui de parî gratia externa, non verò de parî interna: Id quippe absurdissimum est: Christus enim de illa gratia loquitur, cum qua fieri pœnitentia potest; at non potest cum sola externa; sicut non potest cum sola luce externa oculus videre, si careat interna facultate videndi: unde quàm non potest cæco imputari, quoddam magis impingat, cadatque, quàm ille, qui sanis oculis est; quia licet utrique Sol luceat, unus tamen interna videndi facultate caret, alter non caret: ita non posset Judæis impœnitentia præ Sidoniis exprobrari, si utrisque æqualiter quidem Christus

stus prædicaret, æqualiter miracula ederet, sed non utrisque gratiam internam æqualiter daret, sine qua tam nihil prædicatio, & miracula profunt, quàm nihil surdo prodest optima, & dulcissima cantilena. Responderent ergo Christo Judæi: quid surdis fabulam canis? prius surditatem tolle, ut sublaturus es Sidoniis, & tunc æquè, ac Sidonii prædicantem audiemus; nam si illis surditatem tollis, nobis non tollis, hoc est; si illis internam gratiam præbes, nobis non præbes, mirum non est, si nos non audimus, & audiunt illi? si nos non pœnitemus, & pœnitent illi. Deinde cum dicit Janfenius: gratiam internam majorem Sidoniis, quàm Judæis à Deo paratam esse, licet auxilia externa paria essent; cum, inquam, hoc dicit Janfenius, divinatore potius, quàm Theologum agit: Interna enim, & occulta sciri nisi per externa non possunt; alioquin si externa removeas, tam sciri nequit, quid Deus intra Judæorum, & Sidoniorum conscientias egerit, essetve acturus, quàm sciri non potest, quid in corpore humano agat anima, nisi vultu, colore, aliove signo prodente. A nobis ergo, qui per externa tantum de internis arbitramur, ita sentiendum est, ut credamus, illis plures, majoresque gratias internas datas esse, qui plures, & majores externas accepere, nam externa ad interna tanquam finem diriguntur. Sicut ergo, qui videt quàm plurimos remos adornandæ Classi, aut quàm plurimas machinas expugnandæ Urbi à Principe parari, nullus dubitat, quamvis non videat, parem quoque Remigum, militumque numerum conductum iri, sine quibus nihil machinæ, remique proficerent; ita dicendum de Deo, cujus externa vocatio nulla esset, nisi jungeretur internæ, & ideo idem foret, non vocare, quàm sic vocare, nam ut optimè notavit etiam Juris Consultus: *Nihil, & inutile paria esse dicuntur*. L. quoties ff. de Sadiſd. cogat. Observet Janfenius opera naturæ & gratiæ, videbitque externis organis, & instrumentis (nisi contrarium per accidens, extraque ordinem contingat) internas quoque vires, & potentias sociari. Plantæ non solum radices habent, sed etiam vim internam, & nutritivam, quæ alimentum trahant: avibus & alæ, & vis volandi: animalibus & oculus externus, & in oculo sensus videndi. At lapides, aliaque inanimata, sicut vitam non habent, ita nec organa, & instrumenta vivendi. Idem de gratia dicendum, nunquam videlicet gratiam, & vocationem externam sine interna esse. Quod tantò certius est, si & ordinem naturæ, & Officium Angeli tutelaræ attendas: Ordinem quidem

dem naturæ, quia cū objecta externa sensum, sensus phantasiā, phantasia intellectum, intellectus voluntatem quodam nexu, ac serie cauſandi naturaliter moveant, fieri non potest, ut ex iis, quæ foris audiuntur, & spectantur, non proportionatæ, paresque illis externis in intellectu, & voluntate, ipsaque conscientia, cogitationes, cognitiones, trepidationes, aliiq̃ue motus, & affectus animi existant, quos nemo non experitur, quoties prodigiosi aliquid videt, auditque: Officium verò Angeli Tutelaris quod attinet, quis ausit negare, etiam si ponas Judæorum tam stupidos, & saxeos fuisse animos, ut Christo cū verbis, tum prodigiis diuinitatem suam asserente nihil moverentur; quis, inquam, negare ausit, non id Custodem Angelum egisse, ut internis, piisq̃ue cogitationibus, illustrationibus, inspirationibus, ac præsertim flagello timoris illorum conscientias agitare, urgeretq̃ue ad credendum iis, quæ foris, tantaq̃ue coruscatione veritatis agebantur. Quod si Christus de vocatione externa verissimè dixit Joan. 4. *Nisi ego venissem, & signa in eis fecissem, quæ nemo alius fecit, peccatum non haberent*: quantò magis, veriusq̃ue dicendum erit de vocatione interna, eos qui istā caruissent, non peccaturos; cū, ut dixi, multò hæc magis ad credendum, quàm illa necessaria sit; sicut ad scribendum magis necessaria manus, quàm penna, & ideo magis etiam excusandus, qui non scribit, si careat manu, quàm si careat pennâ, nam hujus defectus suppleri potest, illius non potest. Denique nescio, an dici aliquid possit à Dei genio, ac dignitate magis alienum, quàm eum imitatione vanitatis humanæ pompam sui amoris foris tantum expromere, ac instar Romani illius Cæsaris pictis tantum convivii invitatos frustrari; cū potius experiamur, in omnibus operibus suis plura, & majora intus condere, quàm in superficie forisq̃ue exponat. Compara, quæ in plantis, quæ in brutis, quæ in hominibus, quæ in Cœlis, quæque in Sacramentis videntur, cum iis, quæ non videntur, & intelliges, verissimè à Propheta dictum: *quia Deus absconditus es*, hoc est, minimè ostentationis, pompæque amicum, ac instar Solis pretiosa quæque in fundo, occultoque elaborantis. Quantò ergo potiori jure id quoque de operibus gratiæ dicendum erit, quæ rationem beneficii, & hominis utilitatem pro fine habent; Deum videlicet vocando, dicendo, miracula patfando, non tantum foris, verum etiam, multoque magis inspirando, illustrando, excitandoque intus, & in anima operari; nam sine interna hac vocatione tam externa illa nihil

nihil prodesset, quàm evertendis mœnibus nihil machinæ bellicæ profunt, foris quidem, & aspectu terribiles, sed intus vacuæ. Potest quidem Deus dare, aut negare gratiam, cum nemini debeat, sed si dat, dubium nullum est, talem dare, quæ juvare hominem possit, & quâ nisi utatur, exprobratione, pœnaque se dignum reddat; at talis non est sola gratia, & vocatio externa: nam ut frustra ligatum ad fugiendum invitas, viamque monstras, quâ exeat, & non exeuntem injustissimè accusas, nisi aut ipse solvas, aut saltem instrumenta solvendi offeras; ita frustra ad pœnitendum miraculis, & prædicatione Judæos Christus vocabat, frustra præ Sidoniis arguebat, si nihil in eorum cordibus per internam gratiam agebatur, quo solverentur. Aut ergo injusta exprobratio Judæorum præ Sidoniis fuit, aut si justa, non minùs per internam vocationem Judæi, quàm Sidonii ad exeundum, & pœnitendum adjuti, quod etiam eleganter S. Prosper magnus, & fidelissimus Augustini Discipulus iis verbis expressit lib. 2. de Vocat. Gent. cap. 26. *Gratia Dei in omnibus justificationibus principaliter præminet, suadendo exhortationibus, terrendo periculis, incitando miraculis, dando intellectum, inspirando consilium, corq; ipsum illuminando, & fidei affectionibus imbuendo: quæ opitulatio per innumeros modos sive occultos, sive manifestos omnibus adhibetur: & quod à multis refutatur, ipsorum est nequitia, quod autem à multis recipitur, & gratia est divinæ, & voluntatis humanæ.* Ubi vides S. Prosperum de gratia internæ vocationis apertissimè loqui.

Dicunt alii, ideo Judæos præ Sidoniis objurgatos esse, quia pares Sidoniis quoad gratiam sufficientem erant, quâ poterant pœnitere; licèt impares essent quoad gratiam efficacem, & ad actum prædeterminantem, quæ solis Sidoniis destinabatur. Sed planè si affectus, & præventio absit, nemo non videt, quàm parùm hæc responsio ad rem præsentem faciat: Gratia enim sufficiens ad pœnitendum, quam illi statuunt, talis intrinsecè, & ex natura sua est, ut tantùm detur ad posse, non verò ad agere, & ideo, quàm actus secundus creatus necessariò, & essentialiter à causa prima, hoc est, à Deo pendet; tam necessariò præter gratiam sufficientem, quæ dat posse, requiritur gratia alia intrinsecè efficax, quæ det agere, sine qua, ut ipsi, ajunt, tam nequit actus secundus, & operatio esse, quàm nequit aliquid esse non dependens, non proveniens à Deo; & idè ab Orbe condito repertus est nemo, qui cum hac sola gratia sufficienti, quam
illi

illi docent, actu, vereque poenituerit. Quæ si ita sunt, sequitur, non posse Judæos præ Sidoniis objurgatione dignos constitui. Nam primò nemo paria ab iis exigit, quibus paria non dedit; at Judæis, & Sidoniis paria non dantur; istis enim gratia sufficiens, & efficax datur, illis sufficiens tantum; quid ergo mirum est, minùs reddidisse, qui minùs acceperant, minùs vicisse minùs armatos? minùs navigasse, minùs vento adjutos? Si Princeps aliquis duos habeat belli Duces, quorum utrumque in bellum, & hostem mittat; sed primum manipulo tantum; alterum Phalange instructum: primus verò hostem non aggrediatur, ut poterat; alter aggrediatur, & fundat: primus quidem nec laudem nec præmium merebitur, imò potiùs poenam, quia non fecit, quod poterat (suppono enim aggredi potuisse) Sed non propterea poteris exprobrare, quòd in tanta virium disparitate non æquè, ac secundus pugnavit, & vicit; nam ut quis *absolute* arguatur, sufficit non fecisse, quod poterat: ut verò quis arguatur *comparative* ad alium, necessaria est paritas virium, comparatio enim est æqualium, non inæqualium. Idem de Judæis, & Sidoniis dicas: isti Phalangem, illi manipulum acceperant, hoc est; Judæi gratiam sufficientem tantum (cujus ad efficacem minor proportio, quàm manipuli ad Phalangem est) Sidonii & sufficientem, & efficacem; quid ergo mirum est, tam disparem effectum secutum esse ex tam dispari causa? Quæ incommoda locum non habent in ea gratia sufficiente, quàm prædicamus: ea enim, cum ex natura sua, & copiosa & efficax sit, hoc est, virtutem producendi effectum de se habeat; nec ad posse tantum agere, verum etiam ad agendum tribuatur, & cum illa ipso facto quàm plurimi agant, egerintque; si contingat te non agere; non gratiæ defectus erit, sed voluntatis tuæ vitium. Nec refert, Deum prævidisse, cum illa te non acturum; prævisio enim nihil mutat naturam rei, causæque prævisæ; nec etiam tenebatur Deus, non dare eam gratiam, quàm prævidebat, te non usurum; sicut nec ideo tenebatur abstinere creando Soli, ac luci, quibus tamen quàm plurimos prævideat ad perniciem, & flagitia usuros. Accedit, moraliter saltem impossibile esse (ut nihil dicam de impossibilitate physica) cum sola gratia illa sufficienti poenitere, quàm impugnamus: Illud enim moraliter impossibile dicimus, quod tam difficile homini est, ut nunquam, aut rarissimè ab eo fiat: at cum gratia sufficiente, qualem illi statuunt, non tantum rarissimè, sed nunquam omnino factum, nec futurum est, ut quis poeniteat: at
quod

quod moraliter est impossibile, quomodo exprobrari, imputarique Judæis, quomodo tam gravi pœna, quàm est æterna, puniri potuit? id planè perinde est, ac si aliquem tota die ludere aleâ jubeas, nec sub pœna capitis alium numerum, quàm senarium jacere, quod physicè quidem possibile est (alioquin ne semel quidem eveniret) at moraliter impossibile. Quantò ergo minùs dicendum, præcipere Deum Judæis, ut cum sola sufficienti illa gratia pœniteant, æternùm perituri, nisi faciant; cùm tamen id eo genere impotentia moralis impossibile sit, quàm major dari non potest, hoc est tale, ut nunquam, & à nullo homine, vel factum, vel futurum sit.

Hanc ipsam de auxiliis æqualibus sententiam, quibus alii cooperantur, alii verò non cooperantur, tradit quoque S. Augustinus de Civitate Dei *Lib. 12. cap. 6.* ubi quærit, cur pulchra mulieris facie duobus oblata æqualiter corpore, æqualiter animo, æqualiter tentatione perversa affectis, unus amorì succumbat, alter obstitat, maneatque pudicus; quærit, inquam, quæ ratio sit in causa tam pari tam disparis voluntatis? concluditque: non id dispari animo, dispari corporis temperamento, dispari tentationi (cùm omnia paria supponantur) sed dispari tantùm voluntati, pro suo arbitrio malum pro bono eligentis tribuendum. Quæ Augustini sententia, tam siue anxia disquisitio vanissima erit, nisi paritatem quoque auxiliorum ponas, alioquin facillimè responderi possit, ideo stetit unum alio cadente, non quòd impares animo aut corpore, aut tentatione, sed quòd impares viribus essent, hoc est, unus minori, alter majori gratiâ fulciretur: cur ergo tam anxie, & per partes imparitatem quærit Augustinus, cùm illa in promptu sit? Si enim cessaret admiratio, & difficultas Augustini, posita aliqua corporis, animi, aut tentationis disparitate; quantò magis cessare debet posita inæqualitate gratiæ? Aut ergo Augustinus omnia etiam ex parte gratiæ æqualia supponit, aut si non supponit, vana est illius inquisitio, vana ratiocinatio. Sed ejus verba audiamus: *Si enim aliqui duo æqualiter affecti animo, & corpore videant unius corporis pulchritudinem, quâ vis à unus eorum ad illicitè perfruendum moveatur, alter in voluntate pudica stabilis perseveret, quid putamus esse causâ, ut in illo fiat, in illo non fiat voluntas mala: Neque enim pulchritudo illa corporis, nam eam non fecit in ambobus: quandoquidem amborum non dispariliter occurrit aspectibus: an caro intuentis in causa est? cur non & illius? an verò animus? cur non utriusque? Ambos enim & animo, & corpore æqualiter affectos fuisse*

fuisse prædiximus. An dicendum est, alterum eorum occulta maligni spiritus suggestionem tentatum, quasi non eidem suggestioni, & qualicumque suasioni propria voluntate consenserit? Hanc igitur consensionem, hanc malam, quam male suadenti adhibuit voluntatem, quæ in eo res fecerit, quarimus. Nam ut hoc quoque impedimentum ab ipsa questione tollatur, si eadem tentatione ambo tententur, & unus ei cedat, atque consentiat: alter idem qui fuerat, perseveret: quid aliud apparet, nisi unum voluisse, alterum noluisse à castitate deficere? Idem Augustinus Lib. de Prædest. & Grat. cap. 15. quærens, quid causæ fuerit, ut Nabuchodonosor, non Pharaon Rex punientem Deum agnovit, respondet: id non ad Dei præscientiam referendum esse, non ad disparem causam, non ad conditionem, & dignitatem inæqualem, non ad defectum externæ, aut internæ vocationis, sed ad solum merumque arbitrium; quamvis enim deseruerit Deus Pharaonem, id iusto iudicio factum, Deo quidem permittente, ut pro sua libertate caderet, non ideo tamen ne caderet, gratiam, & auxilium subtrahente. Verba Augustini sunt. An forte si pie de Deo, sicut expedit, sentiamus; etiam Pharaoni datam misericordiam reperimus? Patientia enim Dei valere ei debuit ad salutem, quæ differens iustum, meritumque supplicium, miraculorum verbera densabat. Nunquid non potuit sicut flagellis cedens expulsi populum, ita miraculis credens Deum tantæ virtutis agnoscere? Si dicitur, Pharaonem non potuisse mutari, quia eum præsciverat Deus non esse mutandum: respondetur: Dei præscientiam non cogere hominem, ut talis sit, qualem præscivit Deus, sed præscire talem futurum, qualis futurus est, quamvis eum non sic fecerit Deus. Existere nihilominus fortasse aliquem reor, qui dicat, minus idoneam ad salutem viam, si nulla intrinsecus vocatione pulsatus, tamen quispiam flagelletur. Unde Nabuchodonosor ergo penitentiam meruit fructuosam: nonne post innumeras impietates flagellatus penituit, & Regnum, quod perdiderat, rursus accepit? Pharaon autem ipsis flagellis est durior effectus, & periit. Hic mihi rationem reddat, qui divinum consilium nimium altum sapienti corde dijudicat; cur medicamentum unius Medici manu confectum, aliis ad interitum, alii valuerit ad salutem? Nisi quia Christi bonus odor, alii est odor vitæ in vitam, aliis odor mortis in mortem. Quantum ad naturam, ambo homines erant: quantum ad dignitatem, ambo Reges: quantum ad causam, ambo captivum Populum Dei possidebant: quantum ad penam, ambo flagellis clementer admoniti. Quid ergo

ergo fines eorum fecit esse diversos, nisi quod unus manum Dei sentiens, recordatione propria iniquitatis ingemuit: alter libero contra Dei misericordissimam veritatem pugnavit arbitrio? Ubi observa, ex ipso Sacro textu manifestum esse, Deum non solum externis prodigiis, verum etiam internis inspirationibus Pharaonis animum pulsasse: Cum enim Moses, & Aaron primo ingressu Dei mandatum exposuissent, & ille superbe, impieque respondisset: *quis est Dominus, ut audiam vocem ejus, & dimittam Israël?* Nescio Dominum, & Israël non dimittam. Postea tamen flagellis, & prodigiis fractus, & Deum agnovit, & peccatum suum confessus est: *Misit, inquit, Pharaos, & vocavit Moysen, & Aaron dicens: peccavi etiam nunc: Dominus iustus est, ego & populus meus impii.* Hæc verò agnitio Dei sine gratia interna fieri non potuit, & ideo optimè argumentatur Augustinus: *nunquid non potuit sicut flagellis cedens expulit Populum; ita miraculis credens, Deum tantæ virtutis agnoscere?*

Hanc quoque æqualitatem auxiliorum agnovit S. Thomas in cap. 8. ad Rom. Lect. 3. ubi: *Hæc vocatio est efficax in predestinatis, quia huiusmodi vocationi assentiunt.* Disparitas ergo non semper ex gratia, sed ex voluntate est; quod etiam Dominicus Soto insignis S. Thomæ Discipulus his verbis explicavit Lib. de Natur. & Grat. cap. 15. *In adultis reddenda est proxima causa, cur cum duos æquè sit Deus paratissimus convertere, presentissimèq; utrumq; misericordiâ adspiret, hunc trahat, illum non trahat, quæ revera reddi non potest, nisi quod alter præbeat assensum, & cooperetur, alter verò minimè.* Vides hic à Soto supponi, Deum ex parte sua æquè ad utroq; convertendos paratissimum esse, quod dici non potest, nisi utrique parem gratiam adspiret. Quod verò non uterque trahatur, id esse, non quod Deus non æqualiter juret, sed quod homo non æqualiter velit. Idemque S. Doctor 3. p. q. 69. a. 8. ad 2. *In baptizatis quod major, vel minor gratia appareat, potest dupliciter contingere: uno modo, quia unus in Baptismo percipit minorem gratiam, quam alius propter devotionem majorem.* Alio modo, quia etiam si æqualem gratiam percipiant; non æqualiter eâ utuntur, sed unus studiosius in ea proficit, alius per negligentiam gratiæ Dei deest. Ubi nota, D. Doctorem non loqui tantum de gratia habituali, verum etiam de actuali, quæ per Sacramenta non minus, ac habitualis æqualiter dispositis, æqualiter confertur, ut idem docet q. 62. a. 2. Deinde illa verba: *non æqualiter eâ utuntur, sed alius gratiæ Dei deest,* significant gratiam actualem, quæ sola dat

usum, & actualem influxum, & ideo ei soli dicimur *deesse*, sicut qui Soli oculos claudit, ne videat, non dicitur *deesse* oculo, aut facultati visivæ, quæ dat potentiam videndi; sed dicitur *deesse* Soli, ac luci, quibus ad actualem visionem excitatur.

Imò idem Angelicus clarissimè tradit, non solum æquali, verum etiam majori gratiâ internâ à Deo instructam vocationi subinde non respondere, ac consensum negare: Docet enim 1. p. q. 62. a. 6. & q. 63. a. 7. Angelos gratiam, quâ converterentur ad Deum, consecutos esse juxta mensuram perfectionum naturalium, sicque Luciferi quippe omnium perfectissimo maximam quoque ante alios gratiam contigisse. Verba S. Doctoris sunt: *Dicendum quod secundum gradum naturalium Angelis data sunt dona gratiarum, & perfectio beatitudinis, ut puta si edificator lapides polit ad construendam domum, ex hoc ipso, quod aliquos pulchrius, & decentius aptat, videtur eos ad honoratiorem partem domus ordinare: Sic igitur videtur, quod Deus Angelos, quos altioris naturæ fecit, ad majora gratiarum dona, & ampliorem beatitudinem ordinaverit. Et idem apparet ex parte ipsius Angeli: Non enim Angelus est compositus ex diversis naturis, ut inclinatio unius naturæ impetum alterius impediat, aut retardet, sicut in homine accidit. Quando autem non est aliquid, quod retardet, aut impediat, naturam id secundum totam suam virtutem movetur; & ideo rationabile est, quod Angeli, qui meliorem naturam habuerunt, & fortius, & efficacius ad Deum sint conversi, quia secundum intensiorem conversionis in Deum datur major gratia, & gloria. Unde videtur, quod Angeli, qui habuerunt meliora naturalia, habuerunt plus de gratia, & gloria. . . . Fuit autem Demonum peccatum superbia, cujus motivum est excellentia, quæ fuit major in superioribus Angelis, & ideo dicit Gregorius, quod ille, qui peccavit, fuit superior inter omnes, dum enim cunctis agminibus Angelorum prelatum eorum claritatem transcenderet, ex eorum comparatione elatior fuit. Et hoc videtur probabilius; quia peccatum Angeli non processit ex aliqua pronitate, sed ex solo libero arbitrio, unde magis videtur consideranda esse ratio, quæ sumitur à motivo excellentiæ ad peccandum. Eademque opinio est Magistri Sententiarum in 3. Distinct. 2. ubi: Angeli, qui naturâ magis subtiles, & sapientiâ amplius perspicaces creati sunt, hi etiam majoribus gratiæ muneribus præditi sunt. Et nota verba Angelici Doctoris, non solum de gratia habituali, verum etiam actuali intelligenda esse: Dicit enim: Angelos, qui meliorem*

liorem naturam habuerunt, fortius, & efficacius ad Deum conversos esse; at hæc fortior & efficacior conversio opus est gratiæ actualis, ut taceam, gratias actuales proprietates esse habituales, & ideo majori habituali majores quoque actuales debentur, nisi obicem ponas; at Lucifer ante peccatum nullum obicem posuit, unde sequitur, si majorem habituales habuit, majorem quoque actuales habuisse.

Idem S. Thomas 1. 2. q. 106. a. 2. ad 2. cum præmisset: *etiam littera Evangelii occideret, nisi adesset interior gratia fidei sanans*, adiungit: *Si quis post acceptam gratiam novi Testamenti peccaverit, majori penâ dignus est tanquam majoribus beneficiis ingratus, & auxilii sibi dato non utens. Nec tamen propter hoc dicitur, quod Lex nova iram operatur, quia quantum est de se, sufficiens auxilium dat ad non peccandum.* Si, ut ait S. Doctor, peccans post acceptam gratiam novi Testamenti majori penâ dignus est; tanquam majoribus beneficiis ingratus, sequitur, multos cum majori gratia tam interna, quàm externa (nam sola externa beneficium dici non potest, cum juxta S. Doctorem *ad litteram occidentem* pertineat) in novo Testamento gravius peccare, quàm peccaverint alij cum minori gratia in Testamento antiquo; sicque cum majori gratia peccare aliquos, cum tamen alij cum minori, aut non peccent, aut saltem non tam graviter peccent.

Id etiam videtur apertissimè Christus insinuasse, cum Matth. 12. dixit: *Viri Ninivite surgent in iudicio cum generatione ista, & condemnabunt eam, quia penitentiam egerunt in prædicatione Jonæ: & ecce plus quàm Jonas hic. Regina Austri surget cum generatione ista, & condemnabit eam, quia venit de finibus terræ audire sapientiam Salamonis, & ecce plus quàm Salamon hic.* Hic docet Christus, Judæos majoribus beneficiis, & gratiis donatos, quàm Ninivitas, Austrique Reginam fuisse, & tamen Judæos non credidisse, cum Ninivite, & Regina Jonæ, ac Salamoni crediderint tantò Christo minoribus, & ideo Judæos à Ninivitis condemnatum iri. Neque hic iterum opponas, hæc Christi verba de gratia externa, non interna intelligenda esse, nam ut jam dicta omittam, Christus loquitur de majori beneficio Judæis quàm Ninivitis præstito, & de quo præ Ninivitis ad credendum, & pœnitendum moveri debuerant; at gratia externa, nisi internæ respondeat, majus beneficium dici non potest, nec ad magis credendum, ac pœnitendum sufficit, cum, ut suprà ex S. Thoma notavimus, gratia externa sine interna ad litteram occidentem pertineat.

neat. Planè desiperet Medicus, qui crederet, se majus beneficium vulnerato præstitisse, quoddam validiori ad sanitatem, sed pulchriori ad speciem, aut majori emplastro plagas obduxisset. Ipse quoque Seraphicus Doctor de hac ipsa æqualitate gratiarum ita loquitur *Distinct. 16. p. 2. a. 2. q. 1. Ex æquali gratia aliquando magis fervens elicitur motus, aliquando minus, secundum cooperationem liberi arbitrii*. Nec verò mirari oportet, cum fortiori, aut æquali gratia alium dissentire, alio consensum dante: cum enim nulla gratia tam valida sit, cui dissentire non possis; quid mirum est, aliquando dissentiri, hoc est aliquando fieri, quod semper fieri potest? Imò potius mirandum esset, si quod fieri potest, fieret nunquam. Sed jam alia videamus.

V. Hæc ipsa effusissima in homines bonitas ex iis etiam arguitur, quæ in bruta animantia, omnesque etiam insensibiles creaturas videmus à Deo quotidie conferri: Quod enim brutum tam vile, cui non omnia ad vitam necessaria, imò etiam commoda pro singulorum natura non copiose suppetant? Arbori datæ radices, quibus alimentum rapiat, fibræ, quibus transmittat, folia, quibus protegetur, flores, quibus ornetur, pluviam, rores, lucis, umbræque vicissitudo, quibus nunc frigore, nunc calore, iustâ, æqualique temperie foveatur. Quid dicam, singulas ferè stellas singulis arboribus propitias? aliæ siquidem crescente, aliæ cadente Lunâ proficiunt: aliæ Martem, aliæ Venerem, aliæ Cancrum, aliæ Taurum amant; Vites, & oleæ Virgiliarum exortu concipiunt, Solstitio florent. Quid ventos maturandis fructibus paratos? aliæ enim Aquilonibus, aliæ Favoniis germinant. Quid nives tegendis, fovendisque seminibus lanæ instar hyeme injectas? Quid si arborum aliquæ ultra solita, & communia naturæ beneficia, peculiaribus prædiis indigeant, quando ista defuere? Sic vitibus, quia Sole, & aprico gaudent, ne calore nimio læderentur, dati adversus æstum largissimi pampini. Tritico, ne à vermibus, qui à terra proveniunt, infestaretur, dati longiores calami, quibus in altum, terræque procul injuriam fugerent. Rosæ spinis armatæ, ne passim, impuneque carpantur. Lillia, quæ flore prægrandi, multoque onusta, crassioribus caulibus, thyrsisque imposita, ne oneri cedant. Terra quia naturæ sicca, solidaque; tot fontibus, tot fluviis, pluviisque rigata: & ne displiceat nuditate, aut homini vilescat, quippe infimum elementum, tot florum illecebris vestita, tot preciosis metallis, & gemmis impleta, quodque mirissimum est, tam gravis, ingensque moles, cui sustinendæ non Alpes,

non

non Apennini, non omnium columnarum fulcimenta, licet ære, aut adamante compacta sufficiant; ita vno puncto, seu centro libratur; ut licet in medio aëre suspensa, licet tot hominum, pecudum, ædificiorum, Urbium, Montiumque oneribus prægravata in nullam partem inclinet, sed immota, inconcussa perduret; cumque levissimam pilam ne uno quidem momento aër sustineat, sustinet tamen jam sexies mille annis Orbem Terrarum semper pendulum, nunquam caducum, succollante Dei Providentiâ. Denique nihil non copiosè, & affatim in fines ususque suos instructum. Eadem in corpus humanum naturæ benignitas, quod tot membris, tot fibris, tot nervis, tot visceribus, tot humoribus, tot venis distinxit, ut ei non solum ad necessaria, sed etiam ad jucundè, commodoque operandum nihil penitus desit. Dati oculi, ne impingeret; pedes, ne caderet, manus, ne torperet, os, dentes, stomachus, ne inediâ consumeretur: comæ ad ornatum, genæ & facies ad venustatem, vox, quæ non tantum animi arcana transfunderet, verumetiam audientes cantu mulceret. Taceo mille alia divinæ Providentiæ in animantes miracula, in quibus nihil desideres, quod deceat, quod conducat, quod prosit, quodque immensam Creatoris beneficentiam non mille argumentis prodat. Quis ergo, nisi planè desipiat, suspicari possit, in omnes creaturas tam copiosum, tam splendidum, in solos homines tam parcum, modicumque fuisse, ut eis, quæ ad animæ salutem necessaria sunt, aut subtrahat, aut tam inclementer, avareque suppeditet, ut difficilimè, ægerrimeque consequi eam possint. Magis ergo bruta animantia, imò creaturas inanimes diligat, quàm animas immortales, sui que imagine impressas, & cœlesti Regni hæredes? Magis plantis providebit, quàm filiis? magis curabit, quæ in obsequium, & famulatum hominis condita sunt, quàm hominem ipsum creaturarum omnium finem, mundi que Principem? Planè id nihil aliud foret, quàm nobilissimam Dei perfectionem, quæ amor est, penitus deformare, & inordinatissimam reddere, quippe qui minimis rebus maximam curam, maximis verò minimam impendat, sicque contra leges justæ charitatis vilissima impensè diligat, pretiosissima verò, qualia animæ sunt, aut omnino negligat, aut cordi non habeat puerorum videlicet amores imitatus, qui rerum ignari, pommum præ auro, vitrum præ margaritis eligunt, chariusque habent. Cumque, ut dixi, homo sit sublunarium creaturarum finis, creaturæ verò sint media in commodum, obsequiumque hominis creata,

ut

ut eum videlicet aut vestiant, aut pascant, aut oblectent, aut medeantur, aut hospitio recipiant, si Deus, inquam, minùs homini, quàm aliis creaturis provideat, planè inconsultissimum facies, quippe qui media fini præponat, perindeque agat, ac si opulentissimus Princeps splendidissimam Filio domum adornet, familiam pretiosa veste, penuariam electissimis cibis, Aulas supellectile Regia instruat, Filio interim Regni hærede, omniumque Domino gelu argente, seminu-do, & vix famem tolerante. Quæ si tam absurda sunt, ut in nullum hominem cadant, quantò minùs cadent in Deum? aut ergo Deus talis non est, qualem nobis & Scripturæ, & ratio depingunt; aut si talis est, non minùs in homines, quàm in alia benignus, quæ homini serviunt.

VI. Huc etiam spectant, quæ Deus corpori, vitæque temporali degendæ tam largè, affluenterque providit, ut omnem planè admirationem vincant, & ex iis facillè colligas, quid de anima sentiendum sit, tantò corpore præstantiori, quantò Rex suo palatio, artifex suis instrumentis præstantior est. Ergo corpori vestiendo, ornando-tue quot in avibus plumæ, in piscibus purpuræ, in pecudibus pelles, in vermibus serica, in mari uniones, in montibus metalla, gemmæque parata? Quotque flores, herbæque in remedia morborum? quot liquores siti, quot escæ fami delendæ per Elementa dispersæ? quid de illis dicam, quæ tanto numero, tanta varietate, non ad necessitatem, sed ad delicias homini data? quot colores oblectandis oculis, quot soni demulcendis auribus? quot artes fallendo tempori inventæ? Et hæc omnia aded in universum genus humanum effusa, ut nullam toto orbe nationem reperiās tam barbaram, tam incultam, tam à vera Religione alienam, cui non remedia, non vestes, non cibi, non tecta, non omnia denique fovendo corpori necessaria natura impensè providerit. Audi Senecam in hoc ipsum argumentum ita differentem lib. 4. de Beneficiis: *Tot arbuta non uno modo frugifera: tot varietates ciborum per totum annum digestæ: iam animalia omnis generis, alia in sicco, solidoque, alia in humido nascentia, alia per sublimè demissa, ut omnis rerum nature pars tributum aliquod nobis conferret. Unde istum, quem trahis spiritum? unde istam, per quam actus vitæ tue disponis, atque ordinas lucem? unde sanguinem, cuius cursu vitalis calor continetur? unde ista palatum tuum saporibus exquisitis la- cessentia? Neque enim necessitatibus tantummodo nostris provisum est, usque in delicias amamur.* Si ergo quæ ad conservandum, recrean-
dum.

dumque corpus necessaria sunt, desiderari Deum à nullo mortalium voluit, quantò minùs id de Animabus voluisse dicendus erit? Quid enim aliud est corpus, quàm Animæ instrumentum? Si ergo adorando instrumento tantà curà laboratum est, quantò magis laboratum fuerit, ne quid deesset artifice? alioquin quid pingendæ imagini profint exquisitissimi colores, cæco, & manco Pictore? aut conficiendo bello acutissimi, & limatissimi gladii, laguente, invalidoque milite? Cùm ergo Deus animas hominum æternæ felicitati condiderit, in eumque finem corpori velut Instrumento adstrinxerit, planè studium instrumento impensum manifestissimo argumento est, multò magis curatum esse, ne quid ad hunc finem obtinendum artifice, hoc est, animæ deesset.

VII. Accedit, nihil causis maximè intellectualibus tam naturale, insitumque esse, quàm ut opera, quæ ab ipsis procedunt, commendatissima habeant, tantoque magis, quantò illa nobiliora sunt, pretiique majoris. Si quis peregrinum florem in horto domestico manu sua conseruit, aut vivacissimis coloribus, summaque arte imaginem adumbravit, aut ingenti studio poemata confecit, quàm anxie, quantaque curà laborat, ne pereant, ne grandine, ne pulvere, alioque casu corrumpantur? Ita Cæsar Commentarios, quos nocturnis horis elucubravat, ne Naufragus quidem, ac hoste persequente dimisit. Ita Parrhasius domo incendio conflagrante, nihil aliud, quàm Adonidem suum servari optabat. Ita res quoque sensu carentes, arbores exempli causâ, poma à se producta & sinu ferunt, & succo alunt, & foliis, tunicisque corticum vestiunt, & non priùs dimittunt, carpique patiuntur, quàm jam matura, suisque numeris absoluta. Quid ergo de Deo dicemus, inter cujus opera nihil pulchrius, nihilque præstantius animâ humanâ, & immortalî, in qua divinitatis imago velut in tersissima crystallo non sculpta, non picta, non opere plumario intexta, sed naturaliter ingenua efflorescit, hoc, inquam, tam regium opus, nulloque pretio æstimabile, Deus non cordi habeat, impenseque custodiat?

VIII. Sed præsertim hæc ratio convincit, quòd in hominis structura, non peritissimi tantùm Conditoris & Artificis, verum etiam amantissimi Patris officium, ac partes sustineat Deus: cùm enim carnalis pater modicam tantùm sanguinis sui portionem corpori formando præstet, circa animam verò nihil penitus agat, solus est Deus, qui paterni sanguinis indigestam massam elaborat, distinguit, & in tot.

tot organa, perfectumque corpus componit, idque multò nobiliori ratione, quàm Sculptor ex rudi marmore statuam, aut Pictor in nuda, rasaque tabula pulcherimam Helenam fingat. Quantò ergo iustiori titulo statuarium, & Pictorem dicimus, non qui saxum, & tabulam dedit, sed qui eam sculpsit, pinxitque; ita longè magis pater vocandus est, qui corpus humanum tam stupendo opere ex paucis humani sanguinis guttis confecit, quàm qui guttas ipsas suggessit. Animam verò quod attinet, præcipuam videlicet hominis partem, ea solius Dei opus, & specimen est, ut proinde live corpus, live Animam spectes; nemo ita hominis pater, ut Deus est. Cum ergo tantam videamus esse hominum in suas proles charitatem, tamque iis alendis, educandis, custodiendis, augendisque sollicitudinem, tantam quoque in eos clementiam, si erratorum penituerint, sinumque paternum repetierint; quis hæc ipsa non multò magis in Deo agnoscat omnium Patrum maximo, & præstantissimo; Ille, qui amorem filiorum omnium hominum, imò omnium Leonum, Tigridumque animis impressit, ille, inquam, filios suos non amavit? aut si amavit, non feridò, non officiosè, non efficaciter; sed vel simulatè, vel perfunctoriè tantum? Sicque in illo amoris affectu, quo nullus innocentior, nullus iustior, vinci se ab hominibus, imò à brutis, & serpentibus feret? Planè tam hæc sunt Deo indigna, ut ne cogitari de illo quidem sine scelere possint. Ergo si Deus omnium Pater, imò si magis Pater, quàm reliqui hominum; sequitur, ut omnes feridò, officiosè, & efficaciter diligat: & si diligit, ut omnibus affatim, copioseque provideat; nec enim pater esse potest, nisi vehementer diligat, nec vehementer diligere, nisi vehementer quoque provideat, & curet. Aut ergo pater non est, aut si est, non utcumque, non perfunctoriè, sed flagrantissimè amat.

IX. Sed nihil æquè hunc Dei in homines beneficentissimum amorem, ut opus Redemptionis ostendit: Si enim amantis est, amato uniri, ei que similem fieri, quæ major unio, non dico reperiri; sed vel cogitari illà potuit, quæ cum divina, humanaque natura intercessit, quæque in Sacra Eucharistia singulis Fidelium offertur? aded ut caro, sanguis, & Divinitas Redemptoris, carni, sanguini, naturæque hominis fidelis verè misceatur: atque ut hanc ipsam Unionem Deus operi manciparet, quot miraculis, quot prodigiis actum? Deinde: quæ major similitudo effingi potuit, quàm ut Deus deposita, aut potiùs velatà Majestate, non solum naturam, verùm etiam mis-
ferias

serias, inopiam, labores, lacrimas, ipsamque hominis mortalitatem indueret? Planè tanta hæc fuit, tamque prodigiosa similitudo, ut neque re ipsa parem unquam habuerit, nec etiam omnibus Poëtarum mendaciis fingi par aliqua potuerit: nam quodd Achilles, & Hercules Amicarum gratiâ positis armis togam, & colum, ornatumque muliebrem induisse fingantur, quid rogo id est, si cum Mysterio Incarnationis componas? Quantò enim major inter Deum, & hominem, inter naturam, & tunicam distantia, tantò major quoque magisque stupenda Dei cum homine conjunctio: quid Achilles, & Hercules ad Deum? quid palla muliebris auro, gemmisque intexta ad ipsam, veramque hominis naturam? Quid aliquorum dierum scena, & ludus (nec enim Achilles, & Hercules semper faminam egerunt) ad perpetuam, & hypostaticam Unionem? quanquam nec mirum est, plùs fecisse Deum, quàm Poëtæ fabulari potuerint; cum istorum fingendi facultas finita sit, infinita verò potentia, & dilectio Dei. Quem ergo majorem amorem, & similitudinem cum amato illà velis, quam nec fingendo, nec mentiendo quidem assequi ullus hominum potuit? Rursus si certissimum amoris argumentum est pati, quis magis, aut plura passus est, quàm Deus pro homine? poterat enim vel uno suspirio, unàque lacrima, imò vel unico verbo homines redimere, sed ut amorem, & misericordiam suam testaretur, utque maximos etiam peccatores ad maximam fiduciam invitaret, neque magnitudine scelerum spem veniæ deponerent, voluit ea ferre, quæ omnem necessitatem, omnemque modum, & exemplum superarent: voluit, inquam, mari, quod potuit guttâ; voluit non sufficere charitati, quod sufficiebat Redemptioni; voluit totus in nostros usus expendi. Utque B. Thomas Villanovanus eleganter exclamat: *Dilexisti me Domine supra modum, dilexisti me sine modo. Et qui omnia in numero, pondere, & mensura fecisti, in me diligendo omnem modum, pondus, & mensuram excessisti.* Et tamen post tot amoris argumenta, & pignora, quæis adhuc anxius, & disputas, ac velut de re incerta, & nuper ex Indiis audita, frigide interrogas, an verum sit, Deum amare? perinde ac si quis algens, geluque confectus, postquam diu igni assedit, & calore refectus est, circumstantes per otium interroget: an verum sit, quod Aristoteles, & Philosophi passim testantur, ignem calidum esse? quid ex Philosophis, & Theologis quæris? te ipsum, & beneficia toties, ac tanti pretii accepta, ac sanguinem pro te venis omnibus sparsum interro-

T

ga,

ga, & ista quovis Philosopho, & Theologo melius, certiusque testimonium amoris in homines dabunt. Quid enim est serid, & efficiam amare, si illud non fuit? aut quæ tu dabis veri amoris paria exempla? Planè aut nemo unquam serid amavit, aut amavit Deus. Postquam verò, ut amorem suum hominibus probaret, etiam in eorum pretium Unigenitum dedit; optimè infert Apostolus: *Quomodo non cum illo omnia nobis donavit?* Quasi dicat, quid negabit Deus petenti, postquam etiam non petenti Unigenitum sponte donavit? qui plantam integram dedit, negabit pomum? qui thesaurum profudit, circa micam rixabitur? Et planè quid sunt omnia bona, & beneficia creata, si cum Dei Filio comparentur, quàm micæ, & guttæ? ergo guttam non dabit, qui dedit mare? hoc est, non dabit gratiam, qui dedit Filium? Planè aut ratio, & Apostolus fallunt; aut Deus donato Filio negare nihil ampliùs potest.

X. Et denique id ipsum experienciâ constat: Quis enim gratias, & adminicula numeret quibus Ecclesia abundat, Christianis partim sanctificandis, partim expiandis, partim in accepta gratia conservandis, sicque ad æternam vitam promovendis. Quot Sacramenta? quot libri, quot Tempa, quot exempla, quot Sacrificia, quot conciones, quot cateche ses, quot Sacerdotes, quot Missionarii, quot Indulgentiæ, quot Collegia utriusque sexûs vel tuendæ, vel recuperandæ innocentia? quot Religiosorum cohortes juvandis peccatoribus promptæ? Denique mille modi, mille artes repertæ, quibus & sanis, & infirmis, & morientibus subveniretur, tantâ copiâ, tantâ varietate, tantaque illecebrâ, & condimento pietatis, ut ferè mirum sit, inter tot præsidia, & blandimenta virtutum perire aliquem posse: *Heu quot sunt ad salutem viæ*, exclamat Chrysostomus; & Augustinus in Psalm. 102. *vocat undiq, ad correctionem, vocat undiq, ad penitentiam, vocat beneficiis, vocat per Lectorem, vocat per tractatorem, vocat per intimam cogitationem, vocat per flagellum correctionis, vocat per misericordiam consolationis.* Et Propheta legis Evangelicæ felicitatem depingens Isa. 35. *scissæ sunt, inquit, in deserto aquæ, & torrentes in solitudine; & quæ erat arida, erit in stagnum, & sitiens in fontes aquarum: in cubilibus, in quibus prius dracones habitabant, orietur viror calami, & iunci: & erit ibi semita, & via, & via sancta vocabitur, & hæc erit vobis directâ via, ita ut stulti non errent per eam.* Planè si vel centesimam eorum partem Christiani faciant, ne pereant, quæ faciunt, ut pereant; nemo illorum beatus non esset, ut meri-

merito scripserit eloquentissimus Salvianus lib. 3. ad Eccl. *O Cæcitas, & insania! quanto studio infelicissimi hominum id efficitis, ut miserissimi in aternitate sitis, quod minore cura, minore ambitu id vobis præstare potuistis, ut semper beati esse possëtis.* Quod si Christianorum aliquem etiam perditissimum interroges, an expertus ipse non fuerit mille Dei beneficia, mille gratias, mille internas, externasque inspirationes, occasiones poenitendi? fatebitur. Si porro urgeas: an ingenuè, bonaque fide dicere possit, Deum sibi defuisse, seque justam de illo conquerendi causam habere? negabit: idem secundus, idem tertius, idem quartus, idem alii, omnesque respondebunt. Si ergo nemo in Cælo, nemo in terra, nemo in inferno repertus, qui causam suæ damnationis adscripserit Deo, qui gratiam accusaverit; cur ergo nos quoque non omnium testimonio, non experimentis, non oculis, & conscientie propriæ credimus, sed vanis cavillationibus circa fontes Nili rixamur, nodumque in scirpo quærimus, hoc est, ea insequimur, quæ inveniri non possunt, ea omittimus, quæ in oculis, & manibus sunt? Constat, Deum posse; constat, Deum velle; constat, Deum dare; constat, Deum usque ad sanguinem, & mortem tibi sanando laborasse; constat, te sanitatem, ac remedia nolle; & adhuc causam tuæ perditionis quæris, gratiamque incusas? quasi omnibus contentionibus nostris fieri possit, ut vera non sit illa Prophetæ sententia: *Perditio tua ex te Israël, ex me tantum auxilium tuum.* Duo sunt ergo hominis fines: perire, & salvari, hoc debemus Deo, illud nobis.

XI. Quæ omnia licet in Christianis maximè appareant, in cæteris quoque mortalium quamvis infidelibus, & barbaris suo modo intelligenda sunt: Si enim Milvi, Ciconiæ, hirundines Ægyptum, & plagas suas, viasque nôrunt, quibus mari transmissis hyeme protegantur; si apes suos flores, Aquilæ suum Solem, magnes suam Stellam, Cervi, Graculi, Merulæ, Ursi dictamnium, laurum, Mandragoras, herbasque alias medicas, quarum gustatu sanentur: si omnia flumina suum mare, omnia Elementa suum centrum agnoscunt, quod nemine docente rapiuntur, & in quo denique quiescunt, quis credat, tot hominum myriadas esse, qui Deum, finemque suum, & media ad illum perveniendi nesciant; sicque brutis, & saxis stupidiore, quod nullum istorum latet, ipsi tanto numero, tantoque tempore ignorent? Si nulla Natio tam remota, tam barbara, cui non Sol, non Stellæ, pluvie, non omnia ad vitam corporis necessaria suppe-

tant, quis credat necessaria ad vitam animæ defutura? Si omnibus iis Angelus tutelarior datus, quis credat, hunc cessaturum ea suggerere, sine quibus salvi esse non possint? Si pro illis quoque & passus, & mortuus est Christus, qui credat, non iis & illa omnia daturum, sine quibus frustra sanguinem, & vitam dedisset? Nemo tam imperitus, qui visa pulcherrima domo, non continuo intelligat, fuisse aliquem Architectum, qui struxit. Nemo, qui procul audito dulcissimo, & ordinatissimo cantu, ac voce, & fidibus mixto, non cogitet, esse aliquem Musicum, vocis, sonique authorem, visoque corpore, quod movetur, quod loquitur, persuasum non habeat, illud vivere, animoque constare, quamvis nec vitam, nec animum, nec Musicum, nec Architectum videat. Ita omnino sentiendum est, nullum in Europa, nullum in Asia, nullum in Africa, Americaque hominem esse, qui viso pulcherrimo hoc Mundi opere, non quodam naturali instinctu ad Opificem cognoscendum, amandum, colendumque moveatur? Aut siingas, contra quam in brutis experimur, tantum hominis naturam, & rationem non posse, quis dubitet, Angelum singulis datum, ipsumque Conditorum, ut in aliis rebus, ita in hac quoque tam necessaria defectum naturæ suppleturum? Audi Augustinum in Psalm. 77. *Corpus tuum videtur, anima tua non videtur: unde scis quia vivit, cuius animam non vides? unde scis, inquam? respondebis; quia loquitur, quia ambulat, quia operatur. Stulte ex operibus corporis agnoscis animam viventem; & ex operibus creaturæ non potes agnoscere Creatorem?* Rursus: Sicut ex illo principio omnibus naturaliter impressio: *vitam conservandam esse*, nemo non intelligit, esse comedendum, esse bibendum, manum opponendam, & perdendam esse, ferro capiti imminente, idque citra discursum, nulloque Magistro: ita ex illa, primaque regula omnium honestarum actionum, quamquam natura nullum non docuit, videlicet: *quod tibi non vis fieri, alteri ne feceris*, nemo non agnoscit parentes, & Magistratus observandos; homicidia sine iusta causa, furta, adulteria vitanda; quæ si contra naturæ, ac rationis imperium fiant, etiam nullo teste, nulloque vindice, mox apud Barbaros quoque conscientie flagella, timores, oculique carnifices; *nullum enim scelus, licet illud fortuna exornet, muneribus suis impunitum est, quoniam sceleris in scelere supplicium est*, inquit, Seneca Epist. 98. Denique, sicut inter tot hominum millia nemo fuit, qui totam vitam dormiendo egerit, nunquam experrectus; ita multoque minus repertus aliquis, qui

qui Deum, & ad salutem necessaria semper ignoraverit; hoc enim est animæ ignorantia, quod corpori somnus, nec hic esse perpetuus, nec illa potest.

Id ipsum ex Sacris Litteris ostendi potest: nam ad Rom. 1. ita de Gentilibus loquitur Apostolus: Quod enim notum est Dei, manifestum est in illis, Deus enim illis manifestavit; invisibilia enim ipsius à creatura Mundi per ea, quæ facta sunt, conspiciuntur; sempiterna quoque eius virtus, & Divinitas, ita ut sint inexcusabiles, quia cum cognovissent Deum, non sicut Deum glorificaverunt, aut gratias egerunt. In quæ verba Doctor Angelicus: Considerandum est, inquit, quod Deus homini dupliciter aliquid manifestat: uno modo infundendo lumen interius, per quod homo cognoscit: altero modo proponendo sapientia suæ signa externa, videlicet sensibiles creaturas: sic ergo Deus homini manifestatur. Et Sap. 13. A magnitudine speciei, & creaturæ, cognoscibiliter poterat Creator earum videri. In quæ verba S. Augustinus lib. 10. Confess. Percussisti cor meum verbo tuo, & amavi te: Sed & Cælum, & Terra, & omnia quæ in eis sunt undique mihi dicunt, ut te amen, nec cessant dicere omnibus ut sint inexcusabiles. Et Serm. 143. de Temp. Revelatur ira Dei super omnem impietatem. Quid est super omnem? non solum super Judæos qui Dei Legem acceperunt; verum etiam super impietatem Gentium, quoniam quod notum est Dei, manifestum est illis. Unde manifestum? adhuc audi: Deus illis manifestavit. Si queris, quomodo manifestavit, quibus legem non dedit? audi quomodo: invisibilia enim ejus à constitutione Mundi per ea, quæ facta sunt, intellecta conspiciuntur. Quare ergo inexcusabiles? quia cognoscentes Deum, non sicut Deum glorificaverunt. Non dicit, nescientes Deum, sed cognoscentes. Unde cognoscentes? ex his, quæ fecit. Interroga pulchritudinem terræ, interroga pulchritudinem Maris, interroga pulchritudinem dilatati, & diffusi aëris; interroga pulchritudinem cæli; interroga ordinem Siderum; interroga Solem; interroga Lunam; interroga ista, respondent tibi omnia: ecce pulchra sumus: pulchritudo eorum, confessio eorum est. Ista pulchra mutabilia quis fecit, nisi incommutabilis pulcher in se ipso? Et S. Prosper lib. 2. de Vocat. Gent. cap. 1. Quod est testimonium, quod semper Domino deservivit, & nunquam de ejus bonitate, ac potestate conticuit, nisi totius mundi inenarrabilis pulchritudo, & inenarrabilium beneficiorum ejus dives, & ordinata largitio? per quam humanis cor-
dibus quadam æternæ Legis tabula præbebantur, ut in paginis Ele-
men-

mentorū, & voluminibus temporū communis, & publica divinæ institutionis doctrina legeretur. Cælum ergo, Mare, Terra, & omnia, quæ in eis sunt, protestabantur gloriam Dei, & prædicatione perpetua maiestatem sui loquebantur Authoris. Et S. Hieronymus Epist. 3. ad Nepotianum: Totius Mundi una vox est, Deus est. Philo Judæus lib. 4. de Monarch. Si quis in civitatem veniat legibus optimis constitutam, quid aliud suspicabitur, nisi regi ab optimis Magistratibus? Quamobrem qui in magnam introjerit civitatem, Mundum videlicet, ibique contemplatus fuerit aëris temperiem, annuarum tempestatum conversiones, Solem, Lunam, Stellæ, diei noctisque moderatrices, & cæterorum errantium, fixorumque siderum, & Cæli totius in orbem agitationem, & choræ; nonne verisimiliter, aut potius necessariò de Patre, & Conditore, nec non Rectore cogitabit? S. Damascenus Lib. 7. Orthodoxæ Fidei cap. 1. Notitia Dei omnibus à natura est insita, neque id aliquis ratione utens ignorare potest. Et Tertullian. in Apologet. cap. 17. Summa est delicti nolentium agnoscere, quem ignorare non possunt. Ipsi Gentiles id ipsum fassi sunt, nam ut quàm plurimos alios præteream, Trismegistus in Pimandro cap. 5. Cum statuam absque fabro, & Pictore fieri nullus asserere audeat, miram huius Mundi constitutionem sine Conditore constituisse, putabimus? Tullius lib. 1. de Legib. Nulla Gens est tam immansueta, quæ non, etiam si ignoret, qualem Deum habere deceat, tamen habendum sciat. Sicut ergo nulla Natio est tam barbara, tamque ab humanis moribus aliena, cui Deus sui noticiam, tanquam primam regulam, primumque principium omnis morales, & honestæ actionis, seu naturæ, seu gratiæ instinctu non indiderit; ita quoque nulla est, quæ illum colendum, & invocandum esse ignoret; id enim, ex primo naturaliter sequitur; sicut qui novit, hunc patrem suum esse, mox intelligit, amandum, & honore prosequendum esse. Et ideo bene observat Tertullianus, hominibus in naufragio, aliove periculo constitutis, sponte quadam naturæ, nihilque cogitantibus has preces excidere: Adsit mihi Deus! O Deum immortalem! Deus videt. Quis enim, inquit, Tertullianus, ejusmodi eruptiones animæ non putaverit doctrinam esse naturæ? & unde hæc didicit Anima? certè non à Philosophis, non à litteris, non à Scripturis, non à disciplina; hæc enim pronuntiat, nondum Scholis formata, simplex, rudis, impolita, de compito, de textrino. Ergo didicit Magistrum naturam, & animam discipulam. Tertullian. lib. de Testimon. Animæ. At invocatio Dei est

est præcipuum, certissimumque medium, reliquas omnes gratias ab eo consequendi, juxta illud Apostoli: *Dives in omnes, qui invocant illum* ad Rom. 10. Et celebre illud Augustini: *Semel accipe, & intellige: non traheris? ora, ut traharis*. Patet ergo, nullum esse Mortalium, cui Deus non solum qualemcumque gratiam, verum etiam media, clavemque dederit, majorem semper, majoremque obtinendi; quis verò causari inopiam possit, si clavem ad thesaurum accepit? *Neque dicas*, loca, quæ suprà ex Sacris Litteris attulimus, non de omnibus omnino fidelibus, sed de Philosophis, & præcipuis eorum Magistris esse intelligenda, qui studio, solertiâ, discursuque humano ad Dei cognitionem pervenerunt. Nam *primò* obstant Sancti Patres, & quos laudavimus, & quos deinceps laudaturi sumus, qui non de aliquibus, & Philosophis tantum, sed omnibus omnino loquuntur. *Deinde* obstat quoque huic exceptioni ratio Scripturæ; hæc enim docet, Deum invisibilem per creaturas visibiles cognitum esse: Sicut ergo non Philosophi tantum, sed indoctissimi quisque visis statuâ, imagine, domo, navique plenè velis undas sulcante, continud intelligit, esse aliquem sculptorem, qui sculpsit, pictorem, qui pinxit, Architectum, qui struxit, rectoremque; qui navim gubernat; ita non Philosophi tantum, sed quicumque mortalium viso pulcherrimo hoc, maximoque Mundi opere, ignorare non potest, esse aliquem, qui fecit, & hunc Deum esse; neque enim aliud Dei nomine, quàm Mundi Conditorum, & Gubernatorem intelligimus: nam quiddam aliqui negaverint, id tam non obstat notissimæ huic veritati, quàm non obstat candidissimo illo, ab aliquibus, qui regio morbo laborant, non candidum videri; sicut enim id vitium oculi est, alieno colore infecti; ita illud est vitium animi, Deum testem, vindicemque scelerum metuentis, & ideo negantis; unde optimè dixit Augustinus in Joan. Tract. 106. *Exceptis paucis, in quibus natura nimiam depravata est, universum genus humanum Deum Mundi hujus fatetur Auctorem*.

Rursus quæro ex te: cur Deus non Philosophis tantum, verum etiam cuilibet mortalium facultates videndi, loquendi, ambulandi primasque illas notiones, & regulas agendorum impresserit, videlicet: *quod sibi quis fieri non velit, non esse aliis faciendum; parentes esse colendos &c.* cur, inquam, hæc omnibus, & non Philosophis tantum? respondebis: quia sine istis vita mortalis degi non potest: atqui multò minùs degi potest sine noticia Dei vita immortalis, ad quam

quam non Philosophi tantum, sed omnes omnino homines conditi sunt: quomodo enim amabunt, & colent ignotum? & nisi ament, & colant, quomodo post hanc vitam obtinebunt? *Quod si singas*, aliquem esse tam rudem, cui ne ad hanc quidem tam obviam veritatem ingenium sufficiat, quid aliud sequetur, quam Deum, qui omnes ad se cognoscendum, amandumque creavit, aliunde, ut in similibus solet, defectum naturæ suppleturum? Sic Globis cœlestibus, quia motu proprio carent, datæ Assiltrices Intelligentiæ, à quibus diu, noctuque volverentur: Sic Lunâ propriæ lucis experte, imperatum Solis, ut radiis suis vacuum impleret: sic nocti, quia obscuræ, datæ mille faces, & stellæ, quibus umbram temperarent: sic brutis, quia mente, ac ratione carent, provisum à natura, ut aliæ squamis, aliæ testis, aliæ lanis, aliæ plumis vestirentur: aliæ contra insidias, aut cursu, aut cornu, aut dolo, aut unguibus, aut dentibus, aut spiculis armatæ: Balenæ, quia visu imbecilli, ne ad scopulum impingeret, additus custos, qui duceret: coturnicibus, quia mole corporis graves, & hostium incursum impares, paratus auster, qui transfretantes levaret, additæque volucrum cohortes, quæ comitantur, & prædones arcerent: sic Ægypto, quia pluvias non habet, sereno semper Cœlo, & nubibus vacuo, subventum inundationibus Nili singulis æstatibus, miraque ratione, nec hæcenus comperta in terram excurrentis. Quid ergo mirum est, si dicamus Deum id cum hominibus facere, quod cum brutis, & inanimatis facit? An illi minor de hominibus cura, quam de servitiis hominum? aut major corporum, quam animarum providentia? Refert quidem Molina, sibi à multis narratum, Brasiliæ incolas priusquam à Lusitanis docerentur, nullum Deum cognovisse: Sed aliud est, Deum ignorare, aliud invincibiliter, citraque culpam ignorare, at ita Barbaros ignorare, quis Molinæ narravit? *Deinde* cum Deus nulli creaturæ vires, & facultates negaverit, quibus finem proprium consequeretur, ut supra ostendimus, quis credat, id soli homini negasse omnium sublunarium creaturarum nobilissimæ? At demus, ita ignorasse; id quoque magna beneficii, & gratiæ pars fuit: Cum enim peccatum sit essentialiter offensio, & iniuria Dei, sublata Dei cognitione, necessariò sequitur, nec iniuriam, nec peccatum, nec æternam pœnam esse. Ergo cum hac ignorantia impeccabiles redderentur, alioquin certissimo peccaturi, si agnoscerent, sequitur, hoc ipsum beneficium esse juxta illud Apostoli: *Melius enim erat illis non*
cogno-

cognoscere viam iustitiæ, quàm post agnitionem retrorsum converti ab eo, quod illis traditum est sancto mandato. 2. Pet. 2. Ergo sive Barbari agnoscant, sicque invocare illum, & salutem consequi possint: sive penitus ignorent, & ideo nec possint peccare; semper verum erit, ne illis quidem misericordiam deesse.

Sed ne videamur hæc nostra sponte, & iudicio comminisci, audiantur Augustini, ejusque nobilium Discipulorum sententiæ.

Sanctus ergo Augustinus Lib. 2. de Serm. Dom. cap. 15. Nulla anima est, quamvis perversa, quæ tamen ullo modo ratiocinari potest, in cujus corde non loquatur Deus. Et in Psalm. 6. Dedit eos Deus in reprobum sensum; nam ea est cæcitas mentis; in eam quisquis datus fuerit, ab interiori Dei luce secluditur, sed non penitus, dum in hac vita est. Et in Psalm. 18. Cum autem Verbum etiam caro factum est, & habitavit in nobis, mortalitatem nostram suscipiens, non permisit, ullum mortalium excusare se de umbra mortis; & ipsam etiam penetravit Verbi calor. Et in Psalm. 91. Non cessat Sathanas suadere malum, sed nec Deus cessat admoovere bonum. Sathanas autem non cogit invitum: in tua potestate est, consentire, aut non consentire. S. Prosper Lib. 2. de Vocat. Gent. cap. 17. & 29. In extremis mundi partibus sunt aliquæ Nationes, quibus nondum gratia Salvatoris illuxit, quibus tamen illa mensura generalis auxilii, quæ desuper omnibus semper hominibus est præbita, non negatur.... Ut neq; ulli perreuntium excusatio suppetat de abnegato lumine veritatis. Et cap. 14. Neq; ob hoc inexcusabiles sunt aliæ Nationes, quæ alienatæ à conversatione Israël, spem non habentes, & sine Deo in hoc mundo sub ignorantia tenebris perierunt, quia hæc abundantia gratiæ, quæ nunc universum mundum rigat, pari antea largitate non fluxit: adhibita enim semper est universis hominibus quædam supernæ mensura doctrinæ, quæ etsi parciore, occultiorisq; gratiæ fuit, sufficit tamen sicut Dominus judicavit quibusdam ad remedium, omnibus ad testimonium. Et cap. 21. Elaboratum est, quantum Dominus adjuvit, ut non solum in novissimis diebus, verumetiam in cunctis retrò sæculis probaretur, gratiam Dei omnibus hominibus adfuisse; quoniam sive manifestè, sive occultè, ipse est, ut Apostolus ait, Salvator omnium hominum, maxime fidelium. Et Lib. 1. de Vocat. Gent. cap. 25. Sive igitur novissima contemplemur sæcula, seu prima, seu media, rationabiliter creditur, omnes homines salvos fieri Deum velle, semperq; voluisse: & hoc non aliunde monstratur, quàm de iis beneficiis, eaq; providentiâ

V

Dei,

Dei, quam universis Nationibus communiter, atq; indifferenter impendit; fuerunt enim, ac sunt ejusmodi dona ita generalia, ut per ipsorum testimonia ad quærendum verum Deum possent homines adjuvari. Et cap. 23. de Infantibus loquens: Non irreligiosè, arbitror, creditur, quòd isti paucorum dierum homines ad illam pertineant gratia partem quæ semper universis est impensa Nationibus, quâ utiq; si bene uterentur, eorum parentes, etiam ipsi per eosdem juvarentur.

Paulus Orosius, qui Hieronymo, & Augustino viventibus Librum Apologeticum scripsit de Arbitrii libertate, ipsique Augustino inter carissimos fuit, pag. 453. disertissimè suam, quam utique ab Augustino didicit sententiam, his verbis exponit: *Mea semper hæc est fidelis, & indubitata sententia: Deum adiutorium suum, non solum in corpore suo, quod est Ecclesia, cui specialia ob credentium fidem dona largitur, verumetiam universis in hoc mundo Gentibus propter longanimitatem sui, aternamq; clementiam subministrare, non ut tu asseris cum Discipulo tuo Celestio, in solo naturali bono, & in libero arbitrio generaliter universis unam gratiam contributam, sed speciatim quotidie per tempora, per dies, per momenta, per atomos, & cunctis, & singulis ministrare: ex quo evidentissimè declaratum est, nemini hominum deesse adiutorium Dei, præsertim cum & seductor assistat, & insit infirmitas.*

S. Fulgentius Epist. 7. ad Venantium cap. 8. *Nec in aliquo vulnere, nec in aliquo tempore celestis potest deficere medicina.*

S. Anselmus in cap. 1. ad Rom. *Dominus illis manifestavit, id est, non solum naturalis ratio profuit, sed Deus quotidie adjuvit, ne sola natura sufficere videretur.*

S. Thomas epist. ad Hebræos cap. 12. Lect. 3. *Deus vult omnes homines salvos fieri, & ideo gratia nulli deest, sed omnibus, quantum in se est, se communicat.* Et in cap. 6. Joan. Cor. humanum ex se ad inferiora tendens, non potest sursum elevari, nisi tractum, si verò non elevatur, non est defectus ex parte trahentis, qui quantum est in se, nulli deficit, sed est propter impedimentum ejus, qui non trahitur; Deus enim omnibus ad trahendum manum porrigit, quantum in se, & quod plus est, non solum attrahit manum recipientis, sed etiam aversos ad se convertit. Ex quo ergo Deus paratus est dare omnibus gratiam, & ad se attrahere; non imputatur ei, si aliquis non accipiat, sed ei, qui non accipit. Et q. 14. de Veritat. a. 11. ad 1. *Si aliquis nutritus in silvis, vel inter bruta animalia ductum rationis sequeretur in appeti-*

tit

tu boni , & fuga mali , certissime est tenendum , quod ei Deus , vel per internam inspirationem revelaret ea , quæ sunt ad credendum necessaria , vel aliquem fidei predicatorem ad eum dirigeret , sicut misit Petrum ad Cornelium . Et ad 2. ibidem : Quamvis non sit in potestate nostra cognoscere ea , quæ sunt fidei ex nobis ipsis ; tamen si nos fecerimus , quod in nobis est , ut scilicet ductum naturalis rationis sequamur , Deus non deficiet nobis ab eo , quod nobis est necessarium . Idemque repetit Lect. 3. cap. 10. ad Romanos , additque : Sed tamen hoc ipsum quod aliqui faciunt , quod in se est , convertendo se scilicet ad Deum , ex Deo est , movente corda ipsorum ad bonum . Ubi supponit S. Doctor , hanc gratiam faciendi , quod in se est , omnibus dari .

XII. *Opponitur primò* . Docet S. Thomas , aliique Theologi , dari infideles aliquos , qui laborant infidelitate *purè negativa* , hoc est inculpabili , & invincibili ; non ergo omnibus ad eam infidelitatem vincendam datur gratia .

Resp. Aliquos Fidei articulos invincibiliter ignorari posse , quales sunt de Eucharistia , Necessitate Baptismi &c. sed omnes prorsus ignorari , ac præsertim illum de existentia , cultuque alicujus Dei , planè negamus ; cum sine hac cognitione nihil homini super sit , quo finem suum , ad quem conditus est , valeat adipisci . Sive ergo id naturæ , sive gratiæ instinctu homines agnoscant , semper agnoscunt . & licet Deus nos lateat , quibus modis , quibusque secretis spiraculis Deus etiam Barbaris lucem , & gratiam suam infundat , certum est , infundere , cum illi nec bonitas desit , ut velit , nec Omnipotentia , ut possit . Sicut ergo nullus terræ sinus impervius Soli , quod calorem suum non mittat , & metalla , gemmasque producat ; ita nullus sinus conscientiae impervius Deo , quem gratia , & radio veritatis non impleat : modus quidem , & ratio non patet , sed aliquando patebit , tunc videlicet , cum , ut docet Apostolus , *Dominus illuminabit abscondita tenebrarum , & manifestabit consilia cordium* 1. ad Corinth. 4. Et ipse Christus Matth. 8. *Dico autem vobis , quod multi ab oriente , & occidente venient , & recumbent cum Abraham , & Isaac , & Jacob in Regno Cælorum* . Nec Elias credere poterat , toto Israël in Idololatriam prolapso , septem milla virorum fuisse , qui genua Baal non curvaverant : Nec Jonas persuasum habebat , in maxima illa civitate centum viginta millia hominum degere , qui nesciebant , quid inter dextram & sinistram esset ; & tamen utrumque verum fuit . Ita S. Justinus Martyr cap. 28. *Apologia* Socratem Philosophum

sophum non tantum saluum, verumetiam Martyrem esse docet, quod vnicum Deum professus morte ab Atheniensibus punitus fuerit. *Et Orat. ad Antoniu. Imperat.* insigniores Philosophos, & quotquot de Gentilibus cum ratione vixerunt, Christianos appellat. Idem de Platone, Seneca, Trismegisto, alii dicunt. Sic quoque Melchisedechum, Jobum, Jetrum, aliosque Gentilium salutem obtinuisse ex Scripturis colligitur. Sanctus quoque Dionysius *cap. 3. de celesti Hierarchia* refert, multos Gentilium Angelorum ministerio, qui eis ad salutem necessaria revelaverint, salvatos esse. Referunt quoque Paulus *Diaconus Lib. 23.* Sigebertus, & Genebrardus in *Chronico ad Annum 796.* sub Constantino Sexto, & Irene Imperatoribus, cadaver Platonis cum aurea lamina ad collum, & hac inscriptione repertum esse: *Christus ex Virgine nascetur, & ego in illum credo: & tu Sol sub Constantino, & Irene Imperatoribus iterum me videbis.* alia ergo sunt hominum, alia Dei iudicia, qui ubique terrarum, & apud omnes Nationes aliquos habet, qui eum agnoscunt, & colunt, eiusque gratia, & beneficiis fruuntur, juxta illud Apoc. 7. *Vidi turbam magnam, quam dinumerare nemo poterat, ex omnibus gentibus, & tribubus, & linguis stantes ante thronum.* Nulla ergo gens, nullus populus, imò nulla hominum tribus, ex qua non coloniae, & delectus in Cælum ducantur. Planè præter omnium opinionem ob præcedentia aliqua bona opera quamplurimos vitam æternam consequi, dubium non est, quamvis aded occultis modis, secretisque rationibus, ut humanum animum fugiant, cujus vel unicum specimen ex lib. *Divin. Insinuat. cap. 30.* in Vita S. Gertrudis, & apud Blosium in *Monili Spirituali cap. 1.* videre est, ubi: *cum S. Virgo Gertrudis audisset in Concione, neminem posse salutem consequi, nisi saltem tantillum veræ charitatis habeat, ut ex amore Dei peniteat, abstineatque à peccatis: & ipsa apud se cogitaret, plurimos migrare ex hac vita, qui videntur penitere magis timore gehennæ, quam Dei amore; Dominus sic respondit: Quando video illos agonizantes, qui mei unquam dulciter rec. rdati fuerunt, vel aliquid meritorij operis peregerunt, in ipso mortis confinio exhibeo eis me tam piū, amabilem, & benignum, ut ipsi ex intimis cordis medullis doleant, quod unquam me offenderint, ac per talem penitentiam apti redduntur ad salutem consequendam, & perire non possunt.* Dices: illa noticia, quæ Barbari cognoscunt, Deum esse; vel est naturalis, vel est supernaturalis? non naturalis, quia hæc non sufficit ad inchoandam salutem, cum

cum *sine fide impossibile sit Deo placere*. Non supernaturalis; quia Deum esse cognosci naturaliter potest. Resp. eam quidem cognitionem naturalem esse, cum, ut observat S. Thomas 1. p. q. 2. a. 2. ad 1. sit magis praeambulum ad fidem, quam ipsa fides; *fides enim praesupponit cognitionem naturalem, sicut gratia naturam*: sed quia huiusmodi notitia praesertim apud Barbaros, & rudes est nimis vaga, confusa, & universalis; propterea à Deo supplente defectum naturae, ea per gratiae inspirationem magis completur ad ipsum Creatorem, velut rerum humanarum principium, & bonorum, malorumque remuneratorem cognoscendum, invocandum, colendum, timendumque. Et haec est illa fides inchoata, sine qua nemo placere Deo potest, & quâ si bene aliquis utatur, ad completam quoque, & Christianam fidem perventurus est.

XIII. *Opponitur secundo*: S. Augustinus saepius docere videtur, homini gratiae auxilia deesse, quibus legem & mandata observet, nec ideo tamen culpae immunem esse, quia volens, libensque in huiusmodi se necessitatem coniecit, indignumque gratiâ reddidit; sicut homicidium ebrio imputatur, quia liberum in suo causa, idemque Sanctus Thomas 3. contra Gentes cap. 160. n. 3. & S. Bonaventura in 2. Distinct. 28. a. 1. q. 2. docere videntur.

Resp. primo: Nihil hoc cum sententia nostra pugnare: Esto enim aliquo casu gratiâ careas, quia sponte impedimentum posuisti, v. g. tam longâ, & obstinatâ inebriandi, consuetudine te ipsum obligasti, ut usu in naturam verso citra gratiae prodigium (quod Deus exhibere non tenetur) explicari, & evolvi non possis, sicque moralem quandam peccandi necessitatem incidisti; at poteras non incidere, si videlicet iis gratiis usus esses, quas toties, tamque copiose à Deo acceperas; non ergo Deus tibi, sed tu Deo, & gratiae defuisti; nec magis conqueri de illius bonitate, & clementia potes, quam conqueri de amico possit, qui isto rogante, ac prohibente se ipsum in mare praecipitem dedit, merisusque est. Talis aliquando Augustinus fuit, qui Lib. 8. Confess. cap. 5. de se ipso haec habet: *Suspirabam ligatus non ferro alieno, sed mea ferrea voluntate. Velle meum tenebat inimicus, & inde mihi catenam fecerat, & constrinxerat me. Quippe ex voluntate perversa facta est libido: & dum servitur libidini facta est consuetudo: & dum consuetudini non resistitur facta est necessitas*. Cæterum necessitas ista, cum sit consequens, hoc est, voluntaria, & Deo, ac gratiâ repugnante contracta, nec libertati quic-

quicquam, nec ipsi divinæ Bonitati obstat, quam tuemur.

Resp. secundo. Verius tamen est, nullum esse, dum vivit tam perditum, tam peccatis assuetum, cui Deus gratiam resipiscendi, abstinendi quæ peccatis non donet; sic quæ nullum esse, qui vel physica, vel morali necessitate, quam consuetudo inducit, ad peccandum urgeatur. Id imprimis probant sententiæ Patrum, quos supra laudavimus; probant etiam omnes illæ Scripturæ, quæ perditissimos, & durissimos peccatores ad pœnitentiam vocari, expectari quæ à Deo testantur; possunt ergo, nam si non possent, frustra vocarentur, sicut frustra vincti, claudi, fracti quæ ad currendum vocantur: *Nolo, inquit, mortem peccatoris, sed ut convertatur, & vivat.* De omnibus etiam pessimis, & obstinatissimis loquitur, qualis Idololatræ Judæi erant; quantò enim peiores, tantò magis medico, & remediis egent, at si non daret gratiam, quæ converti possint, non eorum conversionem, sed majorem damnationem vellet, sic quæ clementius faceret, eos post peccatum morte, & inferno confestim puniendo, quàm illos expectando: nam expectare ad pœnitentiam, nec tamen vires pœnitendi, abstinendi quæ peccatis dare, quid aliud est, quàm non ad veniam, sed ad majorem damnationem pœnas quæ differre? Non ergo ad vitam, sed ad mortem expectat; nec istud clementia, sed severitas est. Relegantur Pharaonis, Nabuchodonosoris, ipsorum quæ Judæorum vulgatissima exempla; si enim istis quippe omnium pessimis, & obstinatissimis datæ vires, & gratiæ, ut pœniterent, quibus non dabitur? & si istis subventum, quis sperare non possit? nec enim credibile est, gratiam, quæ magis improbis, magis quæ indignis negata non est, minùs improbis, minùs quæ indignis negatum iri? Nequæ ulla consuetudo opponi potest; fac enim illam in naturam, & necessitatem conversam esse; at etiam ista vincti tempore, & solertiâ potest, ut in Leonibus, Tigris, Ursis, ipsi quæ serpentibus videre est, quæ constat, domari. Deinde nulla consuetudo est, quæ gratiæ non cedat; at huic comparandæ nunquam media peccatoribus defunt, oratio videlicet cum propria, tum aliena, ut suo loco dicitur; si jejunia peterent; opponeres imbecillitatem; si vigiliæ, diceret, vires non esse; si peregrinatio, & solitudines; negares vacare; si corporis afflictationes; morbum obtenderes; si largitiones in pauperes; domesticos sumptus: at quæ imbecillitas, quis morbus, quæ fragilitas naturæ, quæ paupertas, aliæ quæ causæ obstat possunt; ne petas à Deo? ne cum Augustino millies dicas

cas

cas: *Jubes Domine continentiam; da quod jubes, & jube, quod vis:* jubes temperantiam, jubes mansuetudinem, jubes pietatem; *da quod jubes, & jube quod vis.* Nullus ergo peccator tam deploratus, tam durus, cui negatum sit, *facere quod possit, & petere quod non possit*, alioquin pejor erit peccatorum, quam damnatorum conditio: isti enim, si non possunt pœnitere, at nec possunt novis peccatis damnationem, pœnalisq; augere, peccatores verò, ut tu dicis, & pœnitere non possunt, quia ob admissum peccatum gratiâ privantur, & possunt novis peccatis gravio rem damnationem mereri; pejùs ergo cum istis, quam cum damnatis agitur. Verum quidem est, commissio semel peccato dignum esse peccatorem, qui omnibus Dei auxiliis, ac beneficiis privetur; nam & jure humano sancitum est, posse ob ingratitude m omnem donationem revocari: at nos non quarimus, quid peccator mereatur, aut quid facere Deus possit; sed quid Deus faciat, quidq; promiserit se facturum? promisit verò peccatoribus omnibus, nullo excepto, quamdiu viverent, veniam, si pœniterent, omnesq; ad pœnitendum invitat; supponit ergo, id posse; nam si non possent, perinde id foret, ac homines invitare ad volandum, & volaturis prœmium spondere, nec tamen alas dare; non hæc promissio, sed illusio esset, qualis in summam Veritatem, & Majestatem non cadit. Quando ergo Patres in aliquibus Peccatorum necessitatem peccandi agnoscunt; vel nomine necessitatis magnam difficultatem intelligunt, ut observat S. Anselmus Lib. de Concord. q. 3. cap. 10. *Sapissimè*, inquit, *solemus asserere, impossibile nobis esse, quod sine difficultate perficere non valemus.* Et S. Thomas 3. p. q. 86. a. 1. ad 2. explicans Augustinum: *Dicitur, non posse sanari, qui non potest facile sanari.* Idq; in Sacris Litteris frequentissimum est Hierem. 13. v. 23. Matth. 10. v. 25. ad Hebræos 6. v. 4. Vel intelligendi sunt Patres de necessitate non absoluta, sed hypothetica, & conditionali: si enim mediis, quæ Deus præscripsit vincendis tentationibus uti nolis; non orare, non Sacramentis uti, non Verbum Dei audire, non occasionibus abstinere; quis neget, te necessariò peccaturum? at necessitas ista, cum libera sit, & vinci possit à peccato, non excusat. Eodem modo respondendum testimoniis Augustini, quæ Jansenius agglomerat Lib. 3. de Grat. Christi. Ut taceam, Augustinum contra Pelagium loqui de necessitate Naturæ, quatenus gratiâ caret; sic enim fatemur, necessariò peccaturum, sed negamus, gratiam abesse saltem incomple-

tam

tam, & remotam, quâ maiorem, & proximam consequi possit. Audi ipsum Augustinum tam malè à Janzenio intellectum: is enim præter toties citata lib. de Grat. & Libero Arbitrio cap. 16. ita loquitur: *Certum est, nos mandata servare, si volumus; sed quia præparatur voluntas à Domino, ab illo petendum est, ut tantum velimus, quantum sufficit, ut volendo faciamus.*

XIV. *Opponitur tertio.* Sunt multi peccatores, qui nullo pudore, nullo metu, nulloque conscientie fræno in peccata ruunt, de quibus Job. 15. *Bibunt sicut aquam iniquitatem.* Et Prov. 2. *Latantur, cum malè fecerint, & exultant in rebus pessimis;* ergo isti saltem videntur, nullâ gratiâ juvari, coerceri quæ à voluntate peccandi; quod præsertim in iis peccatis verum est, quæ subito motu iræ, aut amoris fiunt, in quibus vix conscientie, nedum gratiæ locus esse videtur.

Resp. Primo. Si loquamur de iustis, certum est, quoties urget præceptum, aut tentatio illud violandi, auxilium quoque sufficiens dari ad peccatum vitandum; ita enim ex Innocentii X. contra Janzenium Decreto, Synodoque Tridentina Sess. 6. cap. 11. constat, juxta celebrem illam S. Leonis sententiam: *Singulariter admonemur, ut donæ gratiæ non negligenter habeamus; iustè enim nobis instat præcepto, qui præcurrit auxilio.* Eleganter quæ expressit S. Augustinus lib. de Natur. & Grat. cap. 26. *Medicus, inquit, cum sanaverit hominem; iam de cætero sustentandum elementis, & alimentis corporalibus, ut eadem sanitas apto subsidio convalescat, atque persistat, Deo dimittit. Ipse autem Deus, cum ad perfectam sanitatem, hoc est, ad perfectam vitam, iustitiamque perduxerit, non deserit, si non deseratur, ut pèd semper, iustèque vivatur: Sicut enim oculus corporis etiam plenissime sanus, nisi candore lucis adjutus, non potest cernere; sic etiam homo etiam perfectissime iustificatus, nisi externa luce divinitus adjuvetur, rectè non potest vivere; sanat ergo Deus, non solum ut deleat, quod peccavimus; sed ut præstet etiam, ne peccemus.* Unde cum Patres aliquando dicunt, peccantibus Dei gratiam abfuisse, intelligendi sunt de gratia illa specialissima, & effectrice, cum qua nemo peccat, quæque per Antonomasiam, & excellentiam gratia vocatur. Cæterum, ut bene notat Bellarminus: ad vitandum peccatum non requiritur semper superna inspiratio, sed sufficit, vel occasionem removeri, vel objectum aliud offerri, quo voluntas distrahatur, vel terrorem incuti, vel reprimi phantasiam, ut bonum delectabile minus vivaciter, languideque, & velut fracto cuspide obiciat. Et hoc saltem

saltem illis verbis Apostoli probatur 1. ad Corinth. 10. *Fidelis Deus, qui non permittet vos tentari super id, quod potestis.* In quæ verba eleganter S. Ephrem Traç. de Patientia : *Si homines suis jumentis non plus oneris imponunt quàm ferre queant, multò minùs plus tentationum imponet Deus hominibus, quàm ferre possint.* Rursum si figulus vasa sua igne excoquit ed usq̃, dum ritè coquantur, nec rursus ulterius ea finit in igne, ne adurantur, fiantq̃, inutilia; multò magis idem facit Deus, ut igne tentationum ed usq̃, nos coquat, dum perficiat, ulterius verò tentatione aduri, & consumi non sinet. Et observa, Paulum universim ad Corinthios scripsisse, quorum plurimi peccatores, & reprobi erant, omnes ad quam sortem pertinerent, ignari. Sicut ergo nullum peccatum est, non contra rationem; ita nollum non contra conscientiam, quæ nihil aliud est, quàm ratio practica dictans in particulari, quid non liceat, liceatq̃ue. Et quemadmodum omne peccatum est contra conscientiam, & tamen aliqui, magnique peccatores vix eâ percelluntur, non quòd non pulset, & moveat, sed quia confestim animum ad alia, & placentia convertunt; eâ ferè ratione, quâ manus per ingentem flammam celerrimè ducta nihil adurit, non ignis, aut caloris defectu, sed quia pertransit: idem de gratia dicendum est. Quod etiam in Concilio Provinciali Senonensi Anno 1528. Decreto 15. istis verbis explicatum est: *Neg, tamen tanta gratia necessitas libero præjudicat arbitrio, cum illa semper sit in promptu, nec momentum quidem prætereat, in quo Deus non stet ad ostium, & pulset, cui si quis aperuit januam, intrabit ad illum.* Ubi pro singulis momentis, quibus gratia in promptu esse dicitur, intelligendum est illud tempus, quo, & quoties præceptum, aut tentatio urget, ut supra iisdem ferè verbis Orosius fidelissimus Augustini Discipulus exposuit. Et planè Concilii Senonensis magna autoritas est; non solum quia Provincialis, & ex flore collecti Ecclesiæ Gallicanæ, quam in rebus ad fidem pertinentibus, & præsertim in Augustini doctrina versatissimam semper fuisse negari non potest; verumetiam, ac præcipuè, quia cum Episcopis ex officio pastoralis incumbat, fideles sibi commissos docere, & in Christi nomine congregatis specialis Dei assistentia promissa sit, iis decernentibus longè major autoritas est, majorq̃ue fides adhibenda, quàm cuilibet cœtui privatorum, licèt alioquin præcellentium Theologorum.

Resp. Secundo. Sed quidquid de hac quæstione sit, an videlicet; quoties præceptum urget, etiam improbißimis peccatoribus gratia

detur, nostri instituti haud est, id indubitanter asserere, sed solum dicimus, nullum hominem esse, cui dum vivit, & ut loquitur Augustinus, *per mensuras temporum, per intervalla locorum*, non quam plurima gratiæ auxilia dentur, quibus & maiorem, completamque gratiam, & ipsam quoque vitam æternam consequi possit; id enim sufficit ad Dei Bonitatem planè ostendendam in omnes effusam, nihil interim contendendo, quando, quoties, quantoque numero ea auxilia præstentur: sicut enim aliud est, solem omnibus lucere, aliud semper lucere: ita aliud est, Deum omnibus gratiam dare, aliud semper dare; istud dubium, illud compertum, & à nobis hæcenus probatum est. Et hac ratione negari non potest, etiam in obstinatissimis peccatoribus conscientiæ voces, metusque nunquam extinguì, juxta illud Isaïæ 57. *Impius quasi mare fervens, quod quiescere non potest*. Et Job. 9. *Quis restitit ei, & pacem habuit?* Et cap. 15. *Sonitus terroris in auribus eorum, & cum pax sit, semper insidias suspicantur*. Et de obduratissimis Ægyptiis Sap. 17. *Sive Spiritus sibilans, aut circum densos ramos avium sonitus suavis, aut concentus aquæ euntis, aut sonus validus præcipitatarum petrarum, aut lascivientium animalium cursus, aut repercussa de concavitate montium Echo, dissolvebat illos*. Quod etiam Gentiles ipsi agnoverunt, quorum omnium una vox fuit: *Nihil mihi minus esse, quam animam hominis conscium: pejorem & maximam peccantium pœnam, peccasse: maximum sceleris in scelere supplicium esse*. Quis unquam pejor, impurior, magisque flagitiis affuetus Tiberio, & Nerone? & tamen de utriusque narrat Tacitus Annalium lib. 7. *Tiberium non fortuna, non solitudines protegebant, quin tormenta pectoris, suasque ipse pœnas fateretur*. Et de Nerone: *Reliquo noctis modo per silentium defixus, sæpius pavore exurgens, & mentis inops lucem operiebatur tanquam exitium allaturam*. Si ergo ne istis quidem defuit Deus, quim per conscientiam moneret, cui rogo defuturus est? aut quos Tiberio, & Nerone peiores, magisque procul gratiâ reperiesset? Ergo quæ de conscientia opponebantur, sententiæ nostræ suffragantur potius, quam noceant, cum constet, nullos esse peccatores tam improbos, quibus à peccato coercendis Deus conscientiam velut domestico tortore non utatur, torquere verò, ut vel abstineant, vel emendent. Semper ergo verum est, quod scribit Augustinus suprâ laudatus lib. 2. de Sermonibus Domini in Monte: *Nullam esse animam quamvis perversam, quæ tamen ullo modo ratiocinari possit, in cuius conscientia non loquatur Deus*.

XV. Oppo-

XV. *Opponitur quartò . S. Augustinus saepe docet , gratiam non omnibus dari , ac praesertim Serm. 11. de Verb. Apost. ubi : Communis , inquit , est omnibus natura , non gratia .*

Resp. Jam supra notatum esse , S. Augustinum plerumque de illa gratia loqui , quae per antonomasiam gratia vocatur , hoc est de specialissima illa , & effectrice , quae cur non omnibus detur , duplex causa est ; & indignitas creaturae impedimentum ponentis , & arcana Dei voluntas , ut citato loco eleganter observat Augustinus circa finem : Sed movet me , inquis , quod ille perit , ille baptizatur , movet tanquam hominem . Si verum vis audire , & me movet , quia homo sum . Sed si tu homo , & ego homo , ambo audiamus dicentem Apostolum : ò homo , tu quis es , qui respondeas Deo ? si posset loqui pecus , & dicere Deo , quare istum hominem fecisti , & me pecudem ? nonne iuste succenseres , & diceres : O pecus , tu quis es , qui respondeas Deo ? & tu homo es , sed ad Deum pecus es . Loquitur etiam Augustinus de gratia immediata , & proxima , non verò remota : sicut enim certum est , non omnes esse Christianos ; ita certum est , non omnes gratiam immediatam , & proximam habere , quàm sint Christiani ; habent tamen gratiam illam remotam , mediatam , & incompletam , quàm si uterentur , Christiani fierent , ut supra ex S. Augustino , & Thoma ostensum est . Imò hanc gratiam universalem , & remotam nemini à Deo negari , in illo ipso Sermone docet Augustinus , qui nobis opponitur , sic enim scribit : Adoremus eum Fratres , & prosternamur ei , & ploremus ante Dominum , qui fecit nos , non enim fecit , & deserit ; non enim curavit facere , & non curat custodire . Ploremus ante Dominum , qui nos fecit , quia non ploravimus , quando nos fecit , & tamen fecit . Qui ergo fecit , antequàm rogaretur , deserit , cùm rogatur ? utiq; exaudit , quos fecit , utiq; non potest non curare , quos fecit . Vides ex sententia S. Augustini neminem à Deo deferi , quem fecit : sicut ergo nullus homo est , quem non fecit ; ita nullus est , quem deferat , nullus , quem non custodit ; à quo autem magis custodiat , quàm à gehenna ? aut per quid aliud custodiat , quàm per gratiam ?

XVI. *Opponitur quintò . Exemplum parvulorum sine Baptismo decedentium , quibus constat , gratiam non dari , quàm salvari possint .*

Resp. Quæro ab iis , qui hæc opponunt , si concederemus , imò etiam probaremus efficaciter , parvulis sufficientem gratiam à Deo dari , applicarique ; an non continuò acquiescerent , crederentque , nihil ampliùs in causa parvulorum exigi à Deo posse , multoque mi-

nus illius misericordiæ litem moveri? at nos dicimus exhiberi parvulis si non gratiam sufficientem, quâ vitam æternam consequi possint, exhiberi tamen beneficium longè præstantius, quodque infinitis partibus ipsam gratiam sufficientem antecellat: eo enim beneficio prius è medio tolluntur, quàm peccatis se obstringant; & non damnantur, & innocentiam personalem, quæ scilicet peccatis actualibus opponitur illibatam conservant, & in eum statum bonorum naturalium transferuntur, quem paragrapho primo ex Angelico Doctore descripsimus. Ergo ut jam latè suprâ ostensum, certum est, etiam in parvulos maximam Dei misericordiam elucere; quamvis enim Dei visione, æternâque gloriâ priventur, at præservantur, ne peccent, hoc est, ne Deum ipsi offendant, ne jacturam innocentiae faciant, ne perpetuis ignibus crucientur, quæ omnia & maxima beneficia esse, & cœlesti gloriæ certa ratione præferri, & consequenter ad Christi merita, & Redemptionem pertinere, jam suprâ ostendimus. Quod si dicas, S. Augustinum, quoties causa parvulorum contra Pelagianos ageretur, nunquam hoc modo philosophatum esse, sed semper ad secretam, & inscrutabilem Dei voluntatem confugisse: *respondeo*, jure merito id ab Augustino factum: cum enim vellet Pelagius gratiam, & salutem æternam iis dari, qui viribus naturæ, & arbitrii eam vellent, non dari, qui nollent: Augustinus exemplo parvulorum id efficaciter refellit; parvuli enim arbitrio uti non possunt, cur ergo Baptismum non accipiunt, nisi quia noluit Deus? & hoc ad occulta ejus judicia pertinet, sufficitque refutando Pelagio. Alia verò, quæ dici de hac causa parvulorum possunt, nec ad institutum Augustini pertinebant, nec voluit ipse aliis libertatem adimere, ea omnia dicendi, quæ deinceps opportuna viderentur: quamvis enim nemo melius de gratia, & contra Pelagium Augustino scripserit, non scripsit tamen omnia, quippe haud necessaria, Calvino necdum exorto, & hominis arbitrium, Dei quæ bonitatem impugnante: aliis nunc armis opus est, alio hoste, belloque instantibus: & ipse Augustinus non contraria quidem iis, quæ scripsit, sed alia diceret, si ut olim cum Pelagio, ita modo cum Calvino, & Jansenio signa conferret: quid ergo mali est, si modò id facimus, quod faceret Augustinus, imò quod fecit, quando non contra Pelagium, & pro Gratia, sed contra Manichæos, & pro libertate pugnaverat?

XVII. *Opponitur sextò*. Docebant Pelagiani, Deum velle omnes omnino, nulloque excepto salvos fieri, ideo verò non omnes salvos esse,

esse, quia non omnes volunt: ideo non omnes ad agnitionem veritatis venire, quia nolunt petere, cum Deus velit dare; nolunt quærere, cum Deus velit ostendere, nolunt pulsare, cum Deus velit aperire. Quibus Augustinus Lib. 4. contra Julianum cap. 8. respondet primò: ea verba vult omnes salvos fieri, explicanda esse hoc modo: vult multos salvos fieri: Deinde, falsum esse, ideo non omnes salvari, quia nolunt, cum de parvulis, qui sine Baptismo decedunt id dici non possit. Falsum quoque esse, vitam æternam dari iis, qui petunt, qui pulsant, qui quærunt; cum parvuli Baptismo tincti nec petant, nec pulsant, nec quærant, & tamen æternam vitam consequantur. Ergo ex sententia Augustini falsum est, omnibus gratiam dari, & qui gratiã carerent, ideo carere, quia nolunt accipere, Deoque dare volenti resistunt.

Resp. Sententiam illam Apostoli quod attinet, quã ratione, & quàm universaliter intelligenda sit, jam suprã ex Augustino, ejusque Discipulis ostensum est: ubi etiam advertimus, aliterque ab Augustino expositam fuisse, utcumque opportunius videbatur Pelagianis confutandis; patiantur ergo, qui hæc opponunt, suorum verborum Augustinum interpretem esse. Tam multos quoque æternum perire, quia ipsi volunt, Deo licet ne pereant omnia moliente, jam quoque ex eodem Augustino, ejusque præcipuis Discipulis probatum est, quorum sunt frequentissimæ voces: *Misericordia ejus prævenit nos, sed vocationi dissentire propriæ voluntatis est. Hoc tibi imputatur ad culpam, quod sanare volentem contemnis: ad Cœnam Evangelicam omnes vocati sunt, sed qui venire noluerunt, tribuere sibi debent, quoniam ut venirent, in eorum potestate erat &c.* Hæc, inquam, apud Augustinum, ejusque Discipulos Prosperum, Fulgentium, Orosium, Anselmum, Thomam frequentissima sunt, ut de illorum mente dubitare non liceat; ideo videlicet reprobos perire, quia sic volunt, Deo salutem omnium volente, & ideo gratiam omnibus dante. Neque Augustinus loco citato contrarium docet: Negat enim id solum, quod Pelagiani asseriebant; asseriebant verò hominem viribus naturæ, propriæque voluntatis petere, pulsare, quærere, velle, & sic à Deo & gratiam, & gloriam obtinere, quod meritò Augustinus reiicit, refutatque exemplo Infantum, qui nec velle, nec petere, nec pulsare possunt, imò potiùs Baptismo repugnant, & tamen accipiunt, & salvantur. Hanc esse verissimam Augustini mentem patet ex ejus verbis, quæ loco citato præmiserat, videlicet: *Calumniam.*

lumniaris, me dicere; nihil studii expectari ab humana voluntate debere contra illud Evangelicum, quo ait Dominus: *petite, & accipietis, quærite, & invenientis, pulsate, & aperietur vobis.* Ibi enim vos, ut video, ponere jam cepistis merita gratiam præcedentia, quod est petere, quærere, pulsare, ut his meritis debita illa reddatur, ac sic gratia inaniter nuncupetur, tanquam gratia nulla præcesserit, & contigerit, ut beatificum bonum peteretur à Deo. Vides, quid dixerit Pelagius, & consequenter quid refutaverit Augustinus. Pelagius dixerat, ideo hominem salvari, aut non salvari; quia in ejus potestate, liberoque arbitrio est, velle, aut nolle; orare, vel non orare; pulsare, vel non pulsare &c. & ideo iis gratiam dari, qui volendo meruerunt, non dari, qui nolendo demeruerunt; quæ planè falsissima sunt, & meritò ab Augustino, omnibusque Catholicis damnata; nemini enim priùs merenti gratia datur, cum ipsa sit principium meriti, & quamplurimis non merentibus data sit, ut in Paulo, Magdalena, Gentilibus, aliisque patuit. Ergo, ut semel omnia dicamus; sciendum est, in hac Prædestinationis, & gratiæ causa, neminem cum Augustini sententia pugnare, nisi eum solum, qui ita defendit gratiam, ut neget liberum arbitrium, ita defendit arbitrium, ut neget gratiam, reliqua, quæcumque saluâ libertate, & gratia, Deique in omnes misericordiâ dicuntur, Augustino paria sunt. Ita Augustinus, ipse profitetur Tract. 53. in cap. 12. Joan. ubi: *Si quis autem istam quæstionem liquidius, & melius novit, se posse, & confidit exponere, absit, ut non sim paratior discere, quàm docere; tantum ne audeat quisquam liberum arbitrium sic defendere, ut nobis orationem conetur auferre: rursus ne quisquam neget voluntatis arbitrium, ut audeat excusare peccatum, sed audiamus Dominum & præipientem, quid facere debeamus, & adjuvantem, ut implere possimus.* Mirum ergo fuerit, aliquos inveniri, qui plura opinionibus suis tribui velint, quàm Augustinus voluerit sibi. Notanda quoque ad eruendam veram Augustini sententiam Sanctorum Bonaventuræ, & Thomæ præclara verba. Nam ille in Breviloq. p. 3. cap. 5. Non debetur parvulis pœna sensûs: Hoc credendum est, sensisse S. Augustinum, licet verba ipsius exterius propter detestationem erroris Pelagianorum aliter sentire videantur, ut eos reduceret ad medium, abundantius declinavit ad extremum, plus dicens, & minus volens intelligi. Et S. Thomas q. 5. de malo a. 2. ad 1. Sancti tali modo loquendi usi sunt; ut detestabilem redderent errorem Pelagianorum, qui asserebant, in

par-

parvulis nullum peccatum esse. Et in cap. 1. Joan. lect. 7. Antiqui Doctores, & Sancti emergentes errores circa fidem ita persecuti sunt, ut interdum viderentur in errores labi contrarios; sicut Augustinus contra Manichæos, qui destruebant libertatem arbitrii, taliter disputat, quod in hæresim Pelagii videatur incidisse.

XVIII. Opponitur Septimò. Quando Sancti Augustinus, Thomas, alique Patrum docent, omnibus hominibus gratiam dari, intelligendum id esse, non quod re ipsa omnibus detur, sed quod omnibus præparata sit: pro omnibus, inquit, instituit Sacramenta, pro omnibus passus est, sed non omnibus gratiam Sacramentorum, & Passionis suæ applicat; sicut Medicus, qui Apothecam aperiat omni remediorum genere instructam; dicitur omnium salutem velle, quamvis ea remedia non omnibus adhibeat.

Resp. Ita quidem aliqui philosophantur, sed pace illorum dixerim, tam procul à Scripturarum, Patrumque sententia, ut nihil magis. Verba S. Augustini, ejusque Discipulorum Prosperi, Orosii Fulgentii, Thomæ sunt ista: Deum neminem deserere, quem fecit: nullam esse animam tam perversam, in cuius corde non loquatur Deus: nulli hominum negatum esse, querere utiliter, quod inutiliter ignorat: non permisisse Deum, ut ullus Mortalium excusare se posset de umbra mortis: nulli pereuntium excusationem superesse de abnegato lumine veritatis: in extremis Mundi partibus illis Nationibus, quibus nondum illuxit gratia Salvatoris, illam mensuram generalis auxilii, quæ omnibus hominibus est præstita non esse negatam: universis, atque innumeris modis velle Deum, ut omnes homines salvi fiant, sed qui salvantur, Dei auxilio dirigi, qui non veniunt, suâ pertinaciâ reluctari: cunctis retro sæculis gratiam Dei sive occultè, sive manifestè omnibus adfuisse: Deum non solum in corpore suo, quod est Ecclesia, verum etiam universis in hoc Mundo gentibus adiutorium gratiæ suæ quotidie, per dies, per momenta, & cunctis, & singulis ministrare: evidentissimum esse, nemini hominum deesse adiutorium Dei: gratiam nulli deesse, sed omnibus communicari: Deum quantum in se est, omnibus ad trabendum manum porrigere: si homines non trahuntur, non esse defectum ex parte trahentis Dei, qui quantum in se est, nulli deficit, sed impedimentum ex parte illius esse, qui non trahitur. Hæ sunt Patrum sententiæ, & verba, quæ an intelligi possint de gratia, quæ actu ipso non tribuitur, tam clarum est, ut nec à me, nec ab aliis dici aliquid clariùs possit, & qui aliter interpretantur, planè oleum,

&

& operam perdunt. Paria sunt illa Scripturæ: *Deus omnium miseretur, quia est Dominus omnium: omnes peccatores ad nuptias vocat: dives in omnes: illuminat omnem hominem venientem in hunc mundum.* Nec verò, ut aliqui comminiscuntur, hæc ultima verba: *illuminat omnem hominem*, intelligi possunt, aut de lumine cognitionis naturalis, cum Joannes de illo lumine loquatur, quod Christus sua Incarnatione nobis meruit, quale non est lumen naturale; nec etiam intelligi possunt de aliquibus tantum, sive, ut loquuntur, de generibus singulorum; ea enim verba: *omnem hominem venientem in hunc Mundum*, ostendunt, nullum penitus excludi: Nec etiam dici potest, Deum præparare quidem omnibus lucem gratiæ, sed non omnibus dare; aliud enim est lumen præparare, aliud illuminare; non verò dicit Joannes: *Qui præparat lumen omnibus venientibus in hunc Mundum*: in quæ verba planè ad rem nostram Angelicus Doctor: *Verbum illuminat omnem hominem venientem in hunc mundum, quantum de se est, quia ex parte sua nulli deest; imò vult omnes salvos fieri, & ad agnitionem veritatis venire, quòd si aliqui non illuminantur, ex parte hominis est avertentis se à lumine illuminante.* Quid clariùs dici possit? Quòd si aliquando negat S. Thomas, quibusdam auxilium gratiæ necessarium dari, ut videre est 2. 2. *quest. 2. art. 5. ad 1.* intelligendus est, ut suprà ostendimus, vel quòd subinde, non verò semper, totoque vitæ tempore negetur: vel de auxilio gratiæ proximo ad aliquid faciendum, non verò de remoto, & incompleto, quo si utaris, reliqua etiam necessaria adjunguntur, ut idem Angelicus à nobis citatus docet de Cornelio Centurione, & de Barbaro in silvis educato. Rursus illa Scripturæ verba, quæ toties de peccatoribus etiam obduratissimis repetuntur, videlicet: *Deum stare ad ostium, pulsare, intraturum, si quis aperiat; vocare, tota die manus extendere ad populum contradicentem, & resistentem*, hæc, inquam, omnia clarissimè ostendunt actum, curamque ipsam Dei circa peccatores laborantis. Audi Scripturam ipsam, & judica: Paralip. 2. cap. 36. *Mittebat autem Dominus Deus ad illos per manum Nuntiorum suorum de nocte consurgens, & quotidie commonens, eò quòd parceret populo: at illi subsannabant Nuntios Dei, & parvipendebant sermones ejus, illudebantq; Prophetis, donec ascenderet furor Domini in Populum, & esset nulla curatio.* Nec obstat huic Patrum, & Scripturarum sententiæ similitudo illa Medici, omnibus remedia præparantis, sed non omnibus applicantis: Id enim potius

tius ad rem nostram facit: Si enim Medicus remedia sua manu, & arte confecta, ita custodiat, feri s̄que claudat, ut nemo accipere possit, nisi eo dante, ipse verò firmissimum propositum habeat dandi aliquibus tantum, non verò omnibus, nemo dixerit, Medicum re ipsa, serioque omnibus remedia parasse, quæ applicari non possint, nisi illo volente, & dante, ipse verò non velit omnibus dare. Idem de Deodicas: Cùm enim nemo salvus esse possit, nemo gratiam accipere, nisi eo volente, ac dante; ipse verò noluerit omnibus dare; imò ut tu dicis, voluntate efficaci, æternâ, insuperabili, omnemque culpam etiam prævisam antecedente, aliquos exclusit; qua ratione dici potest, iis quos sic exclusit, serid, veræque vitam æternam, & gratiam præparasse?

XIX. *Opponitur Octavò.* S. Paulus ad Rom. 10. hæc habet: *Omnis quicumq̃, invocaverit nomen Domini, salvus erit: quomodo autem invocabunt, in quem non crediderunt? aut quomodo credent ei, quem non audierunt? quomodo autem audient sine prædicante?* Quibus verbis insinuat Apostolus, salvari neminem posse, nisi qui credat, neminem credere, nisi qui Evangelium audiat; atqui certum est, quàmplurimas Nationes fuisse, quibus Evangelium annuntiatum diu non fuit, & nondum est: illi ergo gratiâ caruerunt, quâ salvarentur; nam si credere, & salvari poterant citra prædicationem, ergo falsa est Apostoli ratiocinatio.

Resp. Apostolum loqui de fide explicita in Christum, quam certum est, ordinario modo, nisi prædicatione Evangelii haberi non posse. Caterùm sine hac fide explicita in Christum, quàmplurimos ante illius adventum per solam gratiam, quâ legem naturæ observabant, & si eam transgressi erant, de Deo omnium Creatore, & Providore offenso dolebant, salutem adeptos esse, dubium nullum est. Ita enim Apostolus testatur ad Hebr. 11. *Accedentem ad Deum oportet credere; quia est, & quia remunerator est.* Vides, nullam fieri Incarnationis mentionem, solamque ad æternam vitam cognitionem existentis, & providentis Dei sufficere. Post promulgatum verò Evangelium, an fides explicita in Christum omninò necessaria sit, disputant Theologi; si tamen admittamus necessariam esse, dicendum est cum Angelico Doctore, omnibus hominibus etiam incultissimis, ac planè barbaris auxilium gratiæ dari, quo legem naturalem observent, quâ observatâ, & nisi obicem ponant, Deum curaturum, ut eis quoque Evangelium innotescat, ut de Sibillis, Cornelio, Eun-

cho Candacis Reginae, & Platone Philosopho constat. Verba Sancti Doctoris sunt ad Rom. 10. Lect. 3. Nunquid illi, ad quos fama prædicationis non pervenit, utpote si fuerint nutriti in silvis, excusationem habent de peccato infidelitatis? Ad hoc dicendum est, quod secundum sententiam Domini Joan. 17. illi qui loquentem Dominum per se, vel per eius discipulos non audierunt, excusationem habent de peccato infidelitatis, non tamen justificantur ab aliis peccatis, quæ vel nascenda contraxerunt, vel malè vivendo addiderunt, & pro his meritis damnantur. Si qui tamen eorum fecissent, quod in se est, Dominus eis secundum suam Misericordiam providisset, mittendo eis prædicatorem Fidei, sicut Petrum Cornelio, & Paulum Macedonibus. Sed tamen hoc ipso, quod aliqui faciunt, quod in se est, convertendo se scilicet ad Deum, ex Deo est, movente corda ipsorum ad Deum. Et 2. 2. quest. 2. art. 7. ad 3. Multis Gentilium facta fuit revelatio de Christo, ut patet per ea, quæ prædixerunt. Sibylla etiam prænuntiavit quædam de Christo, ut Augustinus dicit Lib. 13. contra Faustum cap. 15. Invenitur etiam in Historiis Romanorum, quod tempore Constantini Augusti, inventum fuit quoddam sepulchrum, in quo jacebat homo auream laminam habens in pectore, in qua scriptum erat: Christus nascetur ex Virgine, & ego credo in eum. Si qui tamen salvati fuerunt, quibus revelatio non fuit facta, non fuerunt salvati absq; fide Mediatoris; quia etsi non habuerunt fidem explicitam, habuerunt tamen implicitam in divina Providentia, credentes, Deum esse liberatorem hominum secundum modos sibi placitos, & secundum quod aliquibus veritatem cognoscentibus Spiritus revelasset, secundum illud Job. 35. Qui docet nos super universam terram.

XX. Opponitur Nono. Quibusdam obstinatissimis peccatoribus, & quorum sperari amplius correctio non potest, subducitur custodia Angelica juxta illud Isaia 5. Aufferam sepem ejus, & erit in direptionem. Et Jerem. 51. Curavimus Babilonem, & non est curata, derelinquamus eam. Ubi Glossa: Sicut Medici sub magno Medico Angeli Dei sunt, volentes animas nostras à vitiis curare, quos ipsi repellimus, dum consiliis eorum non acquiescimus: qui videntes se perdere operam, ad invicem dicunt: relinquamus eam: adiutoria, & medicamenta adhibuimus, contumax est, non vult observare, quod dicimus, studium nostrum non sequitur effectus, abeamus unusquisq; in terram suam. Refertque Josephus Lib. 7. Belli Judaici cap. 12. Romanis Jerosolymam obsidentibus Templi ingentem portam sponte,

te, improviseque patuisse, auditaque è Sanctuario Tutelarium voces se invicem adhortantium: *Migremus hinc*. Et de Juliano Apostata narrat in ejus vita Ammianus Marcellinus, pridie certaminis, quo cœlesti manu interfectus est, noctu in regio tabernaculo vigilantem, & incertam imminentis pugnae aleam volventem, Genium tutelarem tristi vultu adstricisse, dixisseque: *Aliquoties tanquam repudiatum abscissi, & jam tecum diutius non habitabo*. Sublatâ verò custodia Angelicâ consequens est, gratiam quoque sufficientem cessare, cum juxta receptam S. Thomæ doctrinam: *Homo nihil operari possit circa suam salutem sine auxilio divino, quod homini exhibetur mediante ministerio Angelorum*. Quod etiam repetit 1. p. q. 113. a. 1. ad 3. Quod etiam facit S. Augustini, aliorumque Patrum sententiæ docentium: Deum, qui omnia facit in numero, pondere, & mensura, singulis quoque peccatoribus certam mensuram, & temporum spatia præfixisse, quibus juvare illos, & sustinere velit, eâ verò completâ cessare Dei gratiam, & misericordiam, ac peccatores suis desiderijs relinqui, quæ omnium maxima castigatio est, juxta illud Prophetæ Amos 1. *Super tribus sceleribus Damasci, & super quatuor non convertam eum: & super tribus sceleribus Tyri, & super quatuor non convertam illum: super tribus sceleribus Edom, & super quatuor non convertam illum*. Et Eccle. cap. 7. *Considera opera Dei, quod nemo possit corrigere, quem ille despexit*. Et Augustinus: *Illud sentire nos convenit, unumquemque à Dei patientia tamdiu sustineri, quamdiu nondum suorum peccatorum terminum, finemque complevit, quo consumato, eum illico percuti, nec ullam ei veniam reservari*. Lib. de Vita Christiana cap. 3. Et Lib. de Nat. & Grat. cap. 67. *Ille est peccati pœna iustissima, ut qui rectum facere, cum posset, noluit, amittat posse, cum velit*. Dantur ergo aliqui peccatores, quibus in pœnam præcedentium criminum, & Angelorum custodia, & omne auxilium bene agendi, pœnitendique subtrahitur.

Resp. Quamvis hæc omnia concederentur, nihil propterea contra sententiam nostram inferri posse, nam ut suprà quoque observatum est, non quarimus modò, an peccatoribus semper, & ubique gratia pœnitendi tribuatur, sed tantùm illud contendimus, nullum etiam perditissimum esse, cui opportunè, & per aliqua temporum intervalla, certasque occasiones non gratia copiosè tribuatur, quâ salvari possit, aded, ut si non salventur, tota peccatoris culpa sit, oblatas affatim gratias respicientis.

Ceterum præter hoc, ne illa quidem admittimus, quæ in objectione afferuntur: Negamus enim aliquem peccatorem esse tam magnum, qui dum vivit, ab Angelo suo Custode deferatur. Hæc Angelici Doctoris expressa sententia est, nam p. 1. q. 113. a. 6. Custodia, inquit, Angeli est quædam executio divinæ Providentiæ circa homines facta. Manifestum est autem, quod nec homo, nec res aliqua totaliter divinæ Providentiæ subtrahitur; in quantum enim aliquid participat de esse, in tantum subditur universali Providentiæ Entium. Sed in tantum Deus secundum ordinem suæ Providentiæ dicitur hominem derelinquere, in quantum permittit illum pati aliquem defectum, vel pænæ, vel culpæ. Similiter etiam dicendum est, quod Angelus Custos nunquam totaliter dimittit hominem, sed ad aliquid interdum eum dimittit, prout scilicet non impedit, quin subdatur alicui tribulationi, vel etiam quin cadat in peccatum secundum ordinem divinorum iudiciorum. Et secundum hoc Babilon, & Domus Israël ab Angelis derelictæ dicuntur, quia Angeli earum Custodes non impediverunt, quin tribulationibus subderentur. Et a. 4. Homo in statu vitæ constitutus est quasi in quadam via, quæ debet tendere ad patriam: In qua quidem via multa pericula homini immanent, tum ab interiori, tum ab exteriori juxta illud Psalmi: In via hac, quæ ambulabam, constituerunt laqueum mihi: & ideo sicut hominibus per viam non tutam ambulanti bus dantur custodes, ita & cuilibet homini, quamdiu viator est, Custos Angelus deputatur. Quando autem jam ad terminum viæ pervenerit; jam non habebit Angelum Custodem, sed habebit in Regno Angelum conregantem, in inferno demonem punientem. Et ibidem ad 3. Sicut præsciti, & infideles, & etiam Anti-Christus non privantur interiori auxilio naturalis rationis; ita etiam non privantur exteriori auxilio totius naturæ humanæ divinitus concessio, scilicet custodiæ Angelorum; per quam etsi non juvantur, quantum ad hoc, quod vitam æternam bonis operibus mereantur; juvantur tamen quantum ad hoc, quod ab aliquibus malis retrahantur, quibus sibi ipsis, & aliis nocere possent. Nam & ipsi Demones arcentur per bonos Angelos, ne noceant, quantum volunt: & similiter Anti-Christus non tantum nocebit, quantum vellet. Vides ex mente Sancti Doctoris homini, quamdiu viator est, dum videlicet vivit, imò etiam ipsi Anti-Christo (quem verò Anti-Christo pejorem reperies?) nunquam Angelicam custodiam deesse, idque jure merito; Si enim, ut idem Angelicus observat art. 6. Demones nos semper impugnant jux-

ta

ta illud Apostoli: *Adversarius vester diabolus tanquam leo rugiens circumit querens, quem devoret; ergo multo magis boni Angeli semper nos custodiunt.* Accedit, Angelos ad custodiam hominibus dari, non quia iustis, non quia fidelibus (alioquin nulli peccatorum, nullique infidelium darentur) sed quia ad imaginem Dei factis, quia Viatoribus, & celesti patrocinio, ac tutelâ indigentibus ob imbecillitatem naturæ, insidiâsq; Dæmonum, & mille alia pericula, quæ viventibus occurrunt. Hæc verò rationes in quolibet etiam obstinato peccatore locum habent, & ideo custodia Angelica ad communem Providentiam, & communia beneficia pertinet, quæ nulli hominum negantur, juxta illud Matthæi 5. *Qui Solem suum oriri facit super bonos, & malos, & pluit super iustos, & iniustos.* Quam rationem eleganter quoq; insinuat Angelicus Doctor 1. p. q. 113. a. 1. ad 5. ubi: *Secundum rationem divinæ Providentiæ hoc in rebus omnibus invenitur, quod mobilia, & variabilia per immobilia, & invariabilia moventur & regulantur, sicut corpora inferiora per superiora, & omnia corporalia per substantias spirituales, quæ sunt invariabilia secundum substantiam.* Sed & nos ipsi regulamur circa Conclusiones, in quibus possumus diversimodè opinari per principia, quæ invariabiliter tenemus. Manifestum est autem, quod in rebus agendis cognitio, & affectus hominis multipliciter variari, & deficere possunt à bono, & ideo necessarium fuit, quod hominibus Angeli ad custodiam deputarentur, per quos regularentur, & moverentur ad bonum. . . . Beneficia enim, quæ dantur homini divinitus, ex eo quod est Christianus, incipiunt à tempore Baptismi, sicut perceptio Eucharistiæ, & alia huiusmodi. Sed ea quæ providentur homini, in quantum habet naturam rationalem, tunc ei exhibentur, quando nascendo talem naturam accipit, & tale beneficium est custodia Angelorum. Ad illa verò, quæ de Angelis, qui Babilonem, Jerosolymam, & Julianum Imperatorem deseruerunt, jam respondit idem Angelicus, ut modò audivimus. Ubi observandum quoque est, illam ipsam comminationem deferendi novum Angeli tutelaris beneficium esse, quo peccatores tanto malo prænuntiato ad pœnitendum validissimè incitantur, nam ut bene scripsit Augustinus: *Non vult ferire, qui dicit cave.* Et Chrysostomus Hom. 1. de Pœnitent. *Cuius rei causa, quæ facturæ est mala, prædicit? ut non faciat.* Nec verò admittendum est, quod Gonetius docuit, videlicet: *Angelos quamvis in Infidelibus non excitent supernaturales illustrationes iuvantes ad opera conducentia ad salutem,*

litem, iuvare tamen ad bona aliqua opera moralia, & pauciora committenda peccata, ut mitius in inferno puniantur: Si enim velit Gonetus, sæpe peccatores Angelicis illustrationibus obicem ponere, ut effectum principale, æternam videlicet gloriam non consequantur, id verissimum est, docetque S. Thomas paulò ante laudatus a. 4. ad 3. Si verò censeat, cessare Angelos ab illustrationibus salutis nostræ necessariis, falsissimum est: sic enim officio suo principali deessent, cum ideo dati sint, ut hominem à peccato custodiant, promoveantque ad gloriam æternam, juxta illud ad Hebræos 1. *Omnes sunt administratores Spiritus propter eos, qui hereditatem capiunt salutis*. Sicut ergo deesset officio Tutor, qui clientis sui agros, & facultates quidem curaret, sed graviter ægotanti necessaria ad vitam tuendam, fugiendamque mortem non provideret; cum Tutor præcipuè detur non rebus, sed personæ; ita deesset Angelus tutelarioris præcipui officii sui partibus; si omitteret ea inspirare, quæ ad vitandam animæ mortem, hoc est, peccatum, obtinendamque vitam æternam necessaria sunt: quod si inspirat, nec clientes obediunt, istorum culpa, non Angeli defectus est. Quanquam nemo tam perversus, qui non in aliquibus saltem Angelo inspiranti obtemperet, qualia sunt, quæ minus passioni, & cupiditati repugnant; ut si homicidio impudicus abstineat, Sacrumque audiat, & ideo experimur, etiam projectissimos peccatores facilius Ecclesiæ præcepta, quam Dei observare; nam qui odio, & adulterio abstinere non vult, abstinet tamen comedendis sabbatho carnibus, non quòd hoc melius, sed quòd minus cupiditati adversum, observatuque facilius. Semper ergo Angelorum custodia etiam in maximis, & obstinatissimis peccatoribus proficua est, & ideo nunquam cessat. Vide Sanctum Doctorem *questione citata a. 4. ad 3.*

Id verò, quod de certa peccatorum mensura dicitur, explanatione opus habet. Si enim sensus sit, Deum, qui omnibus creaturarum, ac præsertim hominum actionibus certum numerum, tempusque præscripsit, decrevisse tanto, & non majori tempore peccatorem ad poenitentiam expectare, quo elapso eum morte, aliove casu juxta communem cursum, nexumque causarum naturalium subito percutiat, ut poenitere amplius non possit; id verissimum est, & negari à nemine potest, & hoc duntaxat probant, quæ in contrarium adducuntur, idque sufficit planè ad peccatores quoscumque terrendos, cum quanto diutius peccato inhaerent, tanto viciniore termino sint,

sint , quem Deus aliis longiorem , aliis breviorē præfixit , omnibus incertū , & brevi finiendum : quī ergo non timeant , cū non ignorent , omne momentum posse ultimum , & decretorium esse ? Ita Theodoretus super illa Danielis verba : *Appensus es in statera : ubi : Docet per hæc verba Propbeta , nihil esse , quod apud Deum non ponderetur , quin etiam divinam misericordiam , ac diuinam lenitatem mensurâ quadam , & pondere hominibus adhiberi . Quando ergo transgressus es , inquit , clementiæ fines , accipe divinam sententiam .* Et S. Augustinus Serm. 31. de Verb. Dom. *Eia arbor infractuosa , non iam irrideas , quia parcitur tibi , dilata est securis , noli esse secuta , veniet , & amputaberis .* Et S. Gregorius Lib. 25. Mor. cap. 3. *Subito tollitur , qui diu toleratur .* Si verò sensus objectionis sit , Deum aliquam , certamque mensuram peccatorum statuissē , quā impletâ etiam viventi , & ratione utenti omne auxilium , gratiamque etiam sufficientem subtrahat , quā pœnitere , & divina præcepta implere possit ; hoc enim verò negamus , quippe contrarium tot illis Dei pollicitationibus , quibus omne genus peccatorum ad spem , & pœnitentiam hortatur , & veniam promittit , quamdiu vivit . Deinde quæro ex te quid intelligas nomine illius certæ mensuræ peccatis assignatæ ? aut enim intelligis , aliqua esse peccata tam gravia , ut ijs admissis continuò peccator omni auxilio , & facultate pœnitendi spoliatur ? at id falsissimum est ; constat enim nullum esse peccatum tam grave cui Deus veniam non polliceatur , & consequenter gratiam pœnitendi ; nam hoc negare idem esset , quod veniam negare , quæ sine pœnitentia haberi non potest : *si fuerint* , inquit , *peccata vestra ut coccinum , quasi nix dealbabantur , & si fuerint rubra sicut vermiculus ; sicut lana alba erunt* Isaïæ 1. v. 18. Et quod majus peccatum odio Dei , Idololatriâ , ipsoque Deicidio ? & tamen ut in Judæis patet , ista quoque misericordiam , & veniam adepti sunt . Aut intelligis , omnibus peccatoribus certum peccatorum numerum præscriptum esse , quo expleto , quamdiu vivunt , nullam ampliùs veniæ locum dari ? at quæ major series peccatorum excogitari potest , quàm quæ profertur , duratque usque ad mortem ? & tamen tunc quoque sperandum est , ut in S. Latrone ostensum , de quo celebre illud Augustini : *Unus est , ne desperes , unus est , ne præsumas .* Et illud non minùs celebre Chrysostomi (hominis alioquin austeræ sanctitatis) contra Novatianos : *Estimilles peccaveris , & pœnitentiam egeris , Ecclesiam ingredi .* Singulare quoque exemplum Manassis est , usque

usque in ultimam senectutem Deo rebellis, de cujus peccatis, & pœnitentia hæc leguntur Reg. 4. 21. & Paralip. 2. 33. *Duodecim annorum erat Manasses, cum regnare cepisset, & quinquaginta quinque annis regnavit in Jerusalem, fecitq; malum in conspectu Domini juxta idola Gentium, & erexit aras Baal, & adoravit omnem Militiam Cæli, & coluit eam, & extruxit aras in Domo Domini, & altaria universæ militiæ Cæli in duobus atriis Templi Domini, & traduxit filium suum per ignem, & ariolatus est, & observavit auguria, & fecit Pythones, & aruspices multiplicavit, ut irritaret Dominum. Posuit quoq; Idolum luci in Templo Domini, & seduxit Israël, ut faceret malum super Gentes, quas contrivit Dominus, & fecit abominaciones pessimas super omnia, quæ fecerunt Amorrhæi: insuper & sanguinem innoxium fudit multum nimis, donec impleteret Jerusalem usq; ad os Idcirco super induxit eis Dominus exercitum Regis Assyriorum, ceperuntq; Manassen, qui postquam coangustatus est, oravit Dominum Deum suum, & egit pœnitentiam valde coram Deo, deprecatusq; est eum, & obsecravit intentè, & exaudivit orationem ejus, reduxitq; in Regnum suum.*

Ergo nullum peccatum est, aut gravitate tam magnum, aut tempore tam diuturnum, cui exemplo Manassis venia sperari non possit. *Vel deniq; per mensuram illam peccatorum intelligis non omnes quidem, sed aliquos tantum peccatores esse, quibus certo numero expleto quamvis viventibus, & ratione præditis omnis ad conversionem gratia subtrahatur?* Dico ratione præditis, nam si aut morbo, aliove, & improvise casu, videlicet vulnere, naufragio, præcipitio aliqui Deo cursum naturæ non impediante, ita occupentur, ut mentem ad Deum, & quæ animam spectant, elevare non possint, certum est, istis quippe impotentibus nullam gratiam pœnitendi suppetere. Extra, inquam, hunc casum falsum est, alicui peccatorum viventi, suæque rationis compoti omnem gratiam subduci, quâ converti ad Deum possit: Id enim *repugnat* Scripturæ, omnes omnino peccatores, dum vivunt, ad pœnitentiam, & veniam invitantis, nullumque excludentis; at excluderet, si Deus auxilia necessaria negaret; paria enim sunt veniam negare, & negare auxilia, sine quibus obtineri venia non potest. *Repugnat* Augustino, cujus, ut supra vidimus, sententia est: *Nullam esse Animam tam perversam, modo ratiocinari possit, in cujus conscientia non loquatur Deus, nullumq; esse tam reprobum, tam cæcum, qui à Dei gratia, dum in hac*

vita

vita est, penitus excludatur. Repugnat experientiae: quis enim peior, obduratior, veniaque indignior Anti-Christo, Pharaone, iisque impœnitentibus, de quibus Apostolus: *Thesaurizant sibi iram in die iræ*, at nemo istorum à Deo ita penitus desertus est, ut pœnitere non posset. De Anti-Christo jam audivimus ex S. Doctore, neque illi Angelicam custodiam defuturam, ergo neque sanctas illuminationes, ob quas potissimum Angeli destinantur, ut supra ostensum. De Pharaone constat, aliquando pœnituisse (licet postea reciderit) quod sine gratia fieri non potuit. Verba ipsius sunt Exodi 27. *Peccavi etiam nunc, Dominus iustus, ego & populus meus impii*. In quæ verba S. Augustinus lib. de Prædest. & Grat. cap. 14. De cuius Libri dubia auctoritate jam alibi dictum est: *Si piè de Deo sentiamus, etiam Pharaoni non denegavit misericordiam suam; nunquid enim non potuit sicut flagellis cedens expulit populum, ita miraculis credens Deum tantæ virtutis agnoscere?*

De obduratissimis verd, & impœnitentibus Judæis, de quibus Apostolus dixerat ad Rom. 2. *Secundum duritiam, & impœnitens eor thesaurizas tibi iram in die iræ*, præmiserat pauld antè: *An divitias bonitatis ejus, & patientiæ, & longanimitatis contemnis, & ignoras, quoniam benignitas Dei ad pœnitentiam te adducit?* Et cap. 10. *Ad Israël autem dicit: tota die expandi manus meas ad populum non credentem, & contradicentem mihi*. Quibus ergo credendus est Deus gratiam & misericordiam negare, quam non Anti-Christo, non Pharaoni, non perfidissimis Judæis negat? Ut taceam, nullam rationem esse, ob quam hos fines divinæ Misericordiæ statuamus: Cur enim id Deus velit, ut peccatoris malitiam puniat? at satis punita est, si vel morte repentina percutiat, vel eo morbo tolli permittat, quo cogitare de pœnitentia non potest; vel etiam si gratias illas efficacissimas subducat, sine quibus prævidet, impœnitentem moriturum; his enim rationibus idem effectus sequetur, salva Dei bonitate, & toties facta promissione veniæ. *Neg, dicas, peccatum mortale hanc pœnam mereri, ut docet S. Thomas 3. contra Gentes cap. 162.* Jam enim supra respondimus, non hîc quæri, quid peccato debeatur, alioquin sequeretur de lege ordinaria, & plerumque hominem primo peccato commisso mox toto vitæ suæ tempore potentiâ resipiscendi, custodiâque Angelicâ privari, id enim peccato deberetur, ut loco citato observat S. Thomas. Non ergo quærendum à nobis est, quid Deus ex debito, sed quid ex abundan-

tia infinitæ Misericordiæ suæ & faciat, & facturum promiserit; promissit verò omnibus omnino, dum viverent, veniam admissorum, & ideo non aliquos tantum, non plerosque, sed omnes omnino ad pœnitentiam invitat; ergo dat etiam auxilium, quo possint pœnitere, alioquin ad impossibile invitaret, hoc est, ad volandum, non datis alis; ad transfretandum, non data navi; quæ omnia de Deo dici absurdissimum est.

Illud verò concedimus peccatoribus, qui consuetudinem peccati in naturam verterunt, difficillimum esse, ut convertantur: *desinit enim esse remedio locus, ubi quæ fuerunt vitia, mores fiunt*, ait Philosophus Stoicus. Et de huiusmodi dicitur Jeremiæ 13. *Si mutare potest Æthiops pellem suam, aut pardus varietates suas, & vos poteritis benefacere, cum didiceritis male*. Et S. Augustinus lib. 10. Confess. cap. 8. *Dicunt mihi creatura omnes, ut amem te, nec cessant dicere omnibus, ut sint inexcusabiles; altius autem tu misereberis, alioquin cælum, & terra surdis loquuntur*. Tantoque magis grandescit difficultas, cum Deo causis secundis naturalem cursum permittente peccatoribus occasiones occurrunt, quæ alliciant: adulatores, malique Consiliarii, qui seducant: fastidium rerum æternarum, contemptusque Sacerdotum utilia monentium: orandi desidia mente in res, causasque temporales penitus absorpta: rerum caducarum affluentia, quæ oblivionem æternorum pariat, & alia mille, quæ inveterati peccatoris conversionem planè arduam reddunt, non tamen impossibilem, sed nec difficillimam, si modò remedia usurpet à Deo copiosè oblata. Id Augustinus de se ipso testatur lib. 8. Confess. cap. 5. *Suspirabam ligatus non ferro alieno, sed mea ferrea voluntate: velle meum tenebat inimicus, & inde mihi catenam fecerat, & constrinxerat me; quippe ex voluntate perversa facta est libido, & dum servitur libidini, facta est consuetudo; & dum consuetudini non resistitur, facta est necessitas*. Sed paulò pòst lib. 9. Confess. cap. 1. Mox idem Augustinus subjungit: *Quàm suave mihi subito factum est, carere suavitatibus nugarum, quas amittere metus fuerat, & jam dimittere gaudium est: Eiiciebas enim eas à me, & tu intrabas pro his omni voluptate dulcior*. Idemque Seneca ipse lib. 3. de Ira cap. 12. *Nihil tam est difficile, quod non humana mens vincat, & in familiaritatem perducatur assidua Meditatio, nulliq; sunt tam feri, suisq; juris affectus, ut non disciplinâ perdomentur: quodcumq; sibi animus imperavit, obtinuit*. Vino quidam;

dam; alii Venere, quidam omni humore interdixere corporibus. Didicerunt alii in funibus ambulare, immania onera ferre, mergi in profundo, nec respirare. Sunt verò expugnandæ consuetudini hæc præsertim remedia. Primò fervens, constansque imploratio divinæ gratiæ; huic enim nihil est insuperabile; & oratio nunquam non exauditur ob divinam promissionem, constatque experiëntiâ, nullum unquam à Deo petiisse, quæ ad salutem pertineant, nec impetrâsse, ut proinde dubitare prudenter nemo possit, quod nulli, & nunquam à Deo negatum est, id sibi negatum iri. Erubescat humana pigritia; plus vult Deus dare, quàm tu accipere: plus vult ille misereri, quàm tu à miseria liberari, inquit S. Augustinus de Verb. Dom. Serm. 31. Et ibidem circa finem: Qui tam curvus est, ut terram intueatur, terrena felicitate letetur, aliam cœlestem non credat; quicumq;, inquam, tam curvus est, erigatur, & si per se ipsum non potest, invo- cet Dominum: nunquid enim & mulier illa curva per se ipsam erecta est? Væ illi, si manum ille non porrexisset. Alterum contra consue- tudinem præsidium est fortis, frequensque resolutio, perversam con- suetudinem superandi, ac contrariæ virtutis exercitium, quo paula- tim, sensimque prima consuetudo languescit, ac tandem cedit. Qua in re memoriâ dignum, quod in vita B. Bernardi legere est. Is nobilem virum inciderat, aded impuris amoribus captum, ut fate- retur, ne una quidem nocte carere iis posse. Cui Sanctus: quæso te, inquit, in gratiam Dei vel triduo abstine, & ad me redi. Abstinit, rediitque, ad quem Bernardus: nunc, inquit, tantundem Virgini præsta. Fecit: & Bernardus, semel adhuc, inquit, omnibus in Cælo Sanctis inducias has posco: quod cum pactus Nobilis esset, ipsoque usu didicisset, fieri posse, quod futurum prius desperaverat, ac simul bonæ conscientiæ dulcedinem, pacemque expertus, & quantum ista brevissimæ voluptati præstaret, ad Bernardum, regressus, sponte sua plura promisit, præstititque, quàm alter exegerat: Nolo, inquit, amplius diurnas cum Deo inducias, sed perpetuam pacem, stetitque promissis; aded verum est, non in Reipublicæ tantum, verumetiam in Animæ causis sæpe consultum esse: Arte rem moliri, vim procul habere.

Deniq;, optimè vincendæ consuetudini remedium est, mortis non tanquam remotæ, sed tanquam imminētis (ut revera semper est, aut esse potest) assidua Meditatio; Nemo enim est tamen insa- nus, qui brevissimum gaudium longissimo dolori præferre velit, sã

modò persuasum habeat, brevissimum illud fore. In quam rem non in iucundum auditu est Sacerdotis cuiusdam rerum ad animas pertinentium callentissimi egregium stratagemata, quo vitiis non minùs, quàm annis senem ad pœnitentiam, vitamque mutandam permovit. Is confessus accessit, longamque peccatorum seriem, quibus incanuerat, exposuit. Sacerdos primò jejunium imposuit. Illo vertiginem causante, cilicium iussit: & cùm alter intellexisset, quid rei cilicium esset, ideoque respueret; ergo, inquit, Sacerdos: certas quotidie preces è genu recitabis; at ille ne hoc quidem possum, quippe imbecilli, ac languente corpore. Flagello ergo te cades: flagellum, reponit, mihi aliàs fatiscienti, & vix muscam toleranti? tum Sacerdos, ergo hoc saltem agito: toto proximo mense, cùm te noctu ad lectum, & somnum paras, prolixam hanc, canamque barbam attentè, multumque specta, ac manibus versa, nihilque ampliùs. Senex primò ridere, tùm facere; ac repetito (quæ ipsa Sacerdotis intentio fuerat) barbæ aspectu, mortis vicinæ recordari; hinc timore, curaque futurorum angi, adeoque permoveri, ut lacrimis perfusus ad Sacerdotem rediret, tantoque pœnitendi ardore, castigandi que corporis ageretur, ut freno, quàm stimulo deinceps regi oportuerit. Ergo, ut dicebam, nulla est tam inolita, harenisque consuetudo, quæ vinci gratiâ, & studio non possit, & ideo nullius quoque salus desperanda est, modò medentem admittat, nam nisi admittat, non consuetudo, sed voluntas accusanda est.

Quæ verò ex Sacris Litteris, Sanctis que Patribus in contrarium opponebantur, facile ex dictis solvi possunt: illa enim verba: *In interitu quoque vestro ridebo: dorsum, & non faciem ostendam eis: nemo corrigi potest, quem Deus despexit*, hæc, inquam, & his similia significant tantum immobilem, & inflexibilem subinde Dei voluntatem circa pœnas temporales infligendas: significant etiam efficacissimas illas gratias subinde suspendi, peccatore impedimentum ponente, Deoque iustissimè vindicante. Ea verò subtractâ gratiâ peccatum non necessariò quidem, sed certissimò sequitur. Et denique, ut ex Augustino vidimus, iis loquendi formulis significat Scriptura, subitò peccatorem, improvvisoque percuti, ut pœnitendi, animumque ad Deum convertendi spatium non habeat; quid enim iustius, quàm iis, qui toties tempore abusi sunt, tempus auferri?

XXI. *Opponitur Decimò.* Certissima est Augustini regula: *Nemini videlicet gratiam dari, nisi petenti.* Verba illius sunt Libro de Eccle-

Ecclesiast. Dogniat. *Neminem credimus, nisi per gratiam salvari, nemini gratiam dari, nisi poscenti.* Atqui multi sunt, qui gratiam ritè orandi non habent, præsertim infideles: Oportet enim orationem, ut à Deo impetret, quodd postulat, esse fidelem, permanentem, & fiducialem, seu spe munitam; at quàm multi non sic orant? *Deus, inquit, Augustinus, dat omnibus affluenter, utq; his omnibus, qui sic petunt, & tantum petunt, quomodo, & quantum res tanta petenda est.* Lib. de Nat. & Grat. cap. 17. Et lib. 1. quæst. 2. ad Simplicianum: *Nonne aliquando ipsa oratio nostra sic tepida est, ut potius frigida, & penè nulla, imò interdum ita nulla, ut ne hoc in nobis cum dolore advertamus, quia sic hoc dolemus, iam oramus. Quid ergo aliud offenditur nobis, nisi quia & petere, & querere, & pulsare ille concedit, qui, ut hoc faciamus, jubet.*

Resp. Aliud est, peccatores non orare, aliud non habere gratiam, & facultatem, quâ orare possint, eaque auxilia impetrare, quæ iis necessaria sunt ad Legem divinam adimplendam: hoc positemum negamus, illud verò concedimus: aliud enim est carere gratia, aliud gratiâ uti nolle; sicut aliud est, carere Medico, à quo saneris, aliud sanare volentem nolle admittere: est enim gratia medicina voluntatis, quæ datur, ut sanetur, bonumque velit, sed non sanat invitam. Quodd ut rectè intelligas, observandum est, ad divina præcepta implenda, vincendaque tentationes duplici auxilio nobis opus esse, *remoto* videlicet, & *proximo*. *Remotum* est gratia orandi, petendi que à Deo vires necessarias. *Proximum* est, quo nobis vires tribuuntur, præceptum ipsum adimplendi. *Remotum* auxilium, seu gratia orandi omnibus, qui præcepto tenentur, loco, & tempore opportuno datur; habet enim se per modum primi principii practici, quod alio principio non eget, sed est causa omnium aliarum actionum supernaturalium: Sicut enim Deus in ordine naturali hominem præ reliquis brutis animalibus investem, inermem, rerumque omnium inscium, rudemque fecit; nec ideo tamen deferuisse dici potest (ut Plinius Philosophus Lib. 7. in Proæmio imperitè conqueritur) sed potius omnium maximè curasse, quia manum illi, & mentem dedit, quibus non unâ tantum, & extrinsecus acceptâ ratione, ut animantia, sed variis, & infinitis modis, nec tantum ad necessitatem, verumetiam ad commoditatem, & delitias, juxtaque temporum, locorum, conditionum, aliasque circumstantias, vestiri, armari, scientiis quoque, & artibus imbui posset; idque non natu-

ræ,

ræ, sed quod longè præstantius est, arbitrii, & industriæ suæ dono. Idem de ordine supernaturali dicas. Nascitur homo omnium, quæ ad vitam æternam pertinent, expers, & nudus; sed ut omnia, sine quibus nascitur, industriâ quoque suâ, & cum merito acquireret, data est ei, postquam ad usum rationis pervenit, gratia, & facultas orandi, quâ velut manu uteretur ad omnes reliquas gratias comparandas, sine quibus nec legem implere, nec vitam æternam consequi possit. Cæterum hæc gratia, seu spiritus orandi, *gradus* quoque suos, & minorem, majoremque perfectionem habet: Nam quoad initia sua, primosque gradus, à Deo non petitur, sed sponte, gratisque datur (alioquin eundem in infinitum esset, & hoc ipso, quod petis, jam gratiam petendi habes) non ergo petis, ut detur, sed datur, ut petas: sicut rota, non quia voluitur, rotunda est, sed quia rotunda est, ideo voluitur; sed quoad majorem intensiorem, fervorem, & perseverantiam, etiam ipsa gratia orandi postulatur; sic enim cum Ecclesia precamur: *Actiones nostras quæsumus Domine aspirando præveni, & adjuvando prosequere, ut cuncta nostra oratio, & operatio à te semper incipiat, & per te cepta finiatur.* Et ideo tantopere è Sanctis Patribus orationes illæ jaculatoriæ commendantur; quippe ob breviter, & facillimæ, & ardentissimæ, & frequentissimæ esse possunt, suntque semina quædam omnium aliarum gratiarum, parva quidem mole, sed maxima virtute, ac fructu, de quibus hæc habet S. Augustinus Epist. 121. ad Probam cap. 9. *Dicuntur Fratres in Ægypto crebras quidem habere orationes, sed eas tamen brevissimas, & raptim quodammodo ejaculatas, ne illa vigilanter erecta, quæ oranti plurimum necessaria est, per productiores moras evanescat, atque hebetetur intentio.* Atque per hoc etiam ipsi satis ostendunt, hanc intentionem, sicut non est obtundenda, si perdurare non potest; ita si perduraverit, non citò esse rumpendam; absit enim ab oratione multa locutio, sed non desit multa precatio, si fervens perseverat intentio. Tales orandi formulæ fuerunt illæ Davidis: *Peccavi Domino: & Josue: Sol contra Gabaon ne movearis.* Et Judithæ, cum ferrum in caput Holophernis vibraret: *Confirma me Domine Deus in hac hora;* Et Susannæ jamjam obruendæ: *Deus æternæ ecce morior, cum nihil horum fecerim.* Et Publicani: *Deus propitius esto mihi peccatori.* Et Latronis: *Memento mei Domine, cum veneris in Regnum tuum.* Imò Dominica oratio non solum brevissima ipsa est, verumetiam nihil est aliud, quàm contextus brevissimarum petitionum, quarum sin-

gulæ

gulae tribus, vel quatuor verbis absoluntur. His ergo orandi principiis, quæ nemini desunt, & major, ac perseverantior orandi spiritus, & proximum auxilium Dei ad legem implendam obtineri possunt. Primis ergo illis precibus, quarum facultas Dei liberalissimo dono omnibus peccatoribus præstò est, duo petimus: opportuno videlicet auxilium Dei, tum ad omnem orationem sequentem (quam oportet humilem, fiducialem, ac perseverantem esse) tum ad omnem operationem honestam, & salutarem, sed audiamus Augustinum id ipsum sæpius docentem. Nam Lib. de Grat. & libero Arbitrio cap. 16. *Jubet aliqua, quæ non possumus, ut noverimus, quid ab illo petere debeamus: ipsa enim est fides, quæ orando impetrat, quod lex imperat.* Et lib. 3. de Libero Arbitrio cap. 19. *Deo gratias agant, quod aliquid sine difficultate faciunt, & ubi difficultatem aliquam sentiunt, fidelissimis, & perseverantissimis precibus, & Misericordie promptis operibus facilitatem à Domino impetrare persistant.* Dignum quoque memoratu est, quod S. Gelasius Epist. 5. ad omnes Episcopos in Piceno constitutos contra Pelagianos censet, ideo Luciferum, & Adamum cecidisse, quod nimium viribus, & felicitate suæ nixi oratione abstinerint. Verba S. Pontificis sunt: *Si in ipsis primis hominibus, dum sua nimiam felicitate confidunt, & tantam Dei gratiam in vacuum recipientes non orando (quod utique nunquam fecisse referuntur) nec de receptis gratias referendo; nec ut eadem intemerata durarent, suppliciter implorando, incolumes constare nequiverunt; quanto magis post pravavicationis ruinam absq; divino munere suis viribus vel agri stare non possunt, sine quo nec integri persistere valuerunt.* Et S. Thomas 1. part. quest. 94. art. 4. ad 5. *Neo valet instantia, quam quidam afferunt, quod Adamo in tentatione non fuit subventum, ne deciperetur, licet tunc maxime indigeret; quia iam præcesserat peccatum in animo, & ad divinum auxilium recursus non habuit.* Vides, totam rationem, ob quam Adamus deceptus est, non aliam fuisse, quam quod orationem omiserit. Idemque de Petro dicendum est, toties lapsus imminens, & orationis admonito, & tamen, ut caveret, & oraret, nunquam persuaso.

Hoc verò primum auxilium locis, & temporibus opportunis nunquam negari, patet imprimis ex iis, quæ toto hoc paragrapho diximus, ubi prolixè ostensum est, Deum, ut omnibus, & quantum ex se est, efficaciter vult salutem; ita ad illam obtinendam omnibus copiosissima media tribuere, quorum potissimum, & maxime ne-

cessa-

cessarium est gratia orandi. Id ipsum ex Sacris Litteris constat, quæ toties omnes, nulloque excepto ad quærendum, pulsandum, petendum, vitamque mutandam invitant; quæ omnia supponunt, hæc fieri posse, & consequenter gratiam saltem remotam, hoc est, orandi, & petendi omnibus dari, alioquin frustra peccatores ad rem impossibilem invitarentur. Quod si tu ab ista universali, & in Sacris Litteris toties repetita regula aliquem excipias; oportebit hanc exceptionem probari, quod nunquam facturus es. Hæc ipsa est mens Augustini, qui mille locis de hominibus non imaginariis, non in cornibus Lunæ, aut terrestri Paradiso degentibus, sed de hominibus, quales in Mundo sunt, hoc est, peccato originali, multisque actualibus obstrictis, constantissimè docet, non peccaturos violatis divinis præceptis, nisi potestatem haberent illa observandi, & consequenter, nisi haberent gratiam saltem inchoatam, hoc est, orandi, sine qua in statu naturæ corruptæ nulla potestas est observandæ legis divinæ. Aut ergo ex mente Augustini nemini hæc gratia deest; aut si aliqui deest erit aliquis sanæ mentis, qui furando, occidendo, adulterando, blasphemandoque nihil peccabit, quod absurdissimum est. Sicut ergo ex sententia Augustini nullo peccato, quamdiu ratio viget, amittitur libertas, & potestas adimplendi Legem divinam, vitandique peccati; ita nullo peccato omnis gratia sufficiens, & remota, hoc est gratia petendi amittitur, sine qua omnem quoque libertatem tolli necesse est. Sed audiamus Augustinum: sic enim in actis cum Felice Manichæo cap. 17. ait: *Qui servare legem non vult, in potestate ejus est, si velit: non enim dixit, non potuerunt, sed noluerunt. Hoc certè, quod nolunt servare legem, sua voluntate nolunt.* Et Tract. 53. in Joan. *Nec quisquam neget voluntatis arbitrium, & audeat excusare peccatum; audiamus Dominum & præipientem, & opitulantem, & jubentem, quid facere debeamus, & adjuvantem, ut implere possimus.* Vides, ex mente Augustini, negato arbitrio, negari quoque, excusarique peccatum. Et Lib. de Fide contra Manichæos, qui liber tamen probabilius Evodio Episcopo Vzalensi tribuitur: *Quis non clamet, stultum esse, præcepta dare ei, cui liberum non est quod præcipitur, facere, & iniquum esse, eum damnare, cui non fuit potestas juxta complere?* Atqui etiam peccatoribus dantur præcepta, & istis obligantur; at teste Augustino stultum id esset, si liberi non forent, & consequenter nisi gratiam haberent, quâ possent præceptis obtemperare. Et lib. 3. de Libero Arbitrio cap. 17. Si laborio-

laboriosum est, omnia mandare memoria, quæ à nobis tam multa de peccato, & voluntate libera dicta sunt, hoc brevissimum tene. Quæcumq; ista est causa voluntatis, si ei non potest resisti, sine peccato ei ceditur. Si autem potest, non ei cedatur, & non peccabitur. Hæc sanè Augustini testimonia nulla interpretatione opus habent, sed simplici lectione, ut cuilibet certissimum sit, Sanctum Doctorem generatim in omnibus, & singulis hominibus agnovisse possibilitatem ad implendum quælibet præcepta Dei per ipsius auxilium, & opitulationem ut nemo jure, vereque conqueri de præcepto aliquo possit velut observatu impossibili.

Neque dicas, Augustinum Lib. I. Retract. cap. 15. hæc scribere: *Qui autem cogenti cupiditati bona voluntate resistere non potest, jam hoc ita peccatum est, ut sit etiam pena peccati.* Ergo ex mente S. Doctoris contingere potest, ut aliqui præditi bona voluntate careant auxilio sufficienti ad resistendum, sive non peccandum, quod alibi quoque, & sæpius repetit Augustinus.

Resp. Primò. Loqui Augustinum de auxilio proximo, & immediato præceptum implendi, non verò de auxilio remoto, hoc est, de gratia orandi, & impetrandi, quod nondum habes; de hoc enim semper locum habet universalissimum & vulgatissimum illud Augustini axioma: *Deus impossibilia non jubet, sed jubendo monet, & facere, quod possis, & petere, quod non possis.* Deinde nemo melius Augustinum interpretatus fuerit, quàm ipse Augustinus, qui hanc quæstionem in terminis proponit, deceditque omnino ex nostra sententia. Cùm enim Tract. 53. in cap. 12. Joan. ea verba exponit: *Propterea non poterant credere, quia dicit Isaias: excæcavit oculos eorum;* mox hanc quæstionem proponit: *Si non poterant credere, quomodo ergo non credendo peccabant? aut quod peccatum est hominis non facientis, quod non potest facere?* Ad hanc quæstionem quid responderet Janse-
nius, nisi: ideo non poterant credere, quia ob peccata præcedentia saltem originale omni gratiâ, auxilioque carebant? quid facilius hoc responso, quid ad intelligendum planius? At non ita Augustinus: Primò enim causam, quod non possent credere, assignat eorum per-
versam voluntatem; certissimum enim est, te non posse, quod non velis; & ideo quamdiu nolueris credere, tamdiu certum est, non posse te credere. Verba Augustini sunt: *Quare autem non poterant credere, si à me quærat, cito respondeo, quia volebant; malam enim eorum voluntatem prævidens Deus per Prophetam prænuntiavit: excæca-*

eor populi hujus, ut videntes non videant. Secundò respondet Augustinus: ideo non potuisse credere, quia à Deo deserti, hoc est, adjuti non sunt; ut verò defererentur, malam eorum voluntatem meruisse. Si verò ab Augustino quæras, quanam fuerit hæc mala eorum voluntas, ob quam deserti meruerunt? an peccatum originale? an peccata actualia præterita (quæ ut non fuerint juris nostri, & arbitrii amplius non est) quod Janseus, aliique putant? Non, inquit Augustinus: *Sed quia ita superbe sapiebant, ut crederent, se Dei adiutorio ad bene vivendum non indigere*; quamdiu ergo id pertinaciter sentiebant, tamdiu in *sensu composito* indignos se divinâ gratiâ reddebant, ponebantque obicem juvare volenti, obicem, inquam, non præteritum ob peccatum originale, aliaque actualia olim commissâ; sed obicem præsentem, actuque influxum gratiæ impediens. At carebant potentiâ, carebant gratiâ, hunc obicem amolienti? minimè, inquit, Augustinus; aderat eis potestas, aderat gratia, quâ obicem removerent, si uti vellent; sed uti volebant; & ideo tandem tota ratio, quòd non possent, erat, quòd non vellent. Verba Augustini sunt: *Dedit eis potestatem filios Dei fieri; ne omnino existimemus, in nostra potestate non esse, quòd credimus; agenda sunt ergo ei gratiæ, quia data est potestas, & orandum, ne succumbat infirmitas non poterant ergo credere, non quia mutari in melius homines non possunt, sed quamdiu talia sapiunt, non possunt credere*. Quando ergo scribit Augustinus, aliqua præcepta esse, quæ homo implere non possit, intelligendus est, ut se ipsum loco proximè allegato explicat, de impossibilitate in *sensu composito*, & ex ipsa prava voluntate hominis proveniente: avarus enim, quamdiu talis est, restituere aliena non potest, sed potest avarus non esse, obicemque amovere, quod ut faciat, semper illi potestas, & gratia remota præstò est; facultas videlicet orandi, petendi que à Deo. Idem de impudico, idem de iracundo, aliisque peccatoribus dicas. Denique sciendum est, sæpe à Sanctis Patribus, ipsisque Sacris Scripturis ea dici impossibilia, quæ valde difficilia sunt, ut jam, suprà ostendimus.

§. III.

*Dei gratiam etiam obstinatissimis peccatoribus non
deesse longa serie, multisque exemplis
ostenditur.*

UT haecenus dicta, Dei que etiam in perditissimos peccatores ef-
fusissima Bonitas tantò clarior evadat, placuit, longà fortasse,
sed non injucunda narratione id ipsum exemplis ostendere, ut ex iis,
quæ Deus sceleratissimis præstitit, intelligas, quæ præstitit minùs
sceleratis, minùsque indignis.

Anno Mundi 120. Cain fratrem suum Abelem innocentem,
& per insidias obtruncat. Fuit Cain primus, & exemplar omnium
reproborum; sacrilegus videlicet, invidus, fraticida, atheus, im-
pœnitens, & in peccatis suis longè obstinatissimus. Et tamen vide,
quot modis ad pœnitentiam, & veniam vocatus? Deus ipse corpo-
ralem speciem indutus eum convenit, de occiso interrogat, crimen
ante oculos ponit, pœnam infligit, & patris potiùs, quàm vindicis
more custodiam, ne impunè occidatur, promittit, sicque novò hoc
beneficio in spem, agendamque pœnitentiam erigit, denique sex-
centis annis ad veniam expectat. Quo fine hæc omnia, nisi ut cri-
men agnosceret, & elueret? at noluit; ipsius ergo culpa, non Dei
fuit.

Anno Mundi 1656. Totum genus humanum ob flagitia, &
præsertim impudicitiam aquis deletum. Sed quot priùs beneficiis,
ac prodigiis præmoniti peccatores, ut servarentur? missus Noë, qui
centum priùs annis (imò quingentis, ut Chrysostomus notat *Homil.*
21. & 22. in Genesim) Mundi naufragium prædicaret, qui totidem an-
nis Arcam ante oculos, & in conspectu omnium pararet. Animalia
ingenti miraculo, & quod solum ad convincendos etiam obstinatissi-
mos sufficeret, longo ordine, multisque mensibus toto Orbe collecta,
& in navim progressa; denique aquarum imbres non uno impetu, sed
paulatim, & 40. dierum spatio effusi, ut interim locus pœnitendi, vi-
tamque mutandi daretur. Quot ergo ictus, quot fabri, malleique circa

Aa a

Arcam

Arcam resonabant, quot animantium, & volucrum species, quot nubes in aere, quot dies, & horæ volvebantur, tot nova pœnitendi argumenta. Quis hîc Dei misericordiam, & patientiam in peccatores non advertat? Audi Basilium Orat. 5. *Erat facile vel absq; ligno Noëmum salvare, sed ipsum constituit primum, lentumq; arcæ adificatorem, ut vel ex visis concepta formidine intuentes ad pœnitentiam traherentur.* Erat & hoc divinum in hominum gratiam commentum invitamento ad pœnitentiam. Et S. Chrysostomum Homil. 1. de Pœnitent. *Cujus rei gratia ô Domine, quæ facturûs es mala, prædicis? ut non facias.* Et re ipsa multos eorum, qui diluvio perierunt, ad frugem rediisse, oblatâque ad pœnitendum gratiâ usos esse, clarè insinuat S. Petrus 1. c. 3. ac Rupertus 6. in *Genesim*. Imò S. Hieronymus tradit neminem eorum, qui diluvio absorpti sunt, damnatum esse, probatque ex littera Hebraica; exponens enim ea verba: *Non permanebit spiritus meus, sic loquitur: In Hebræo scriptum est: Non judicabit Spiritus meus homines istos in æternum, quoniam caro sunt. hoc est: quia fragilis est in homine conditio, non eos ad æternos servabo cruciatûs; sed illis restituiam quod merentur.* Ergo non severitatem, ut in nostris Codicibus legitur, sed indulgentiam Dei sonat, dum peccator hîc pro suo scelere visitatur. Quid dici possit de Deo clementius?

Hoc ipso tempore, post Diluvium videlicet, & vivente adhuc Noë, initium cepit Idololatria; aded nihil pœnis, & metu profectum, ut potius pejores evaderent homines, Dei que cultum, & amorem penitus abiicerent, quod ante diluvium nunquam est factum. Auctor hujus impietatis Ninus fuisse dicitur, qui Babylone publico in Optimatum, Principumque Conventu Patri Belo Imperii Assyriorum Fundatori ingentem, & preciosi operis statuam dedicavit, Sacerdotibus, Sacrificiis, Altaribus, ac jure Asyli addito; quâ pompâ, sacroque apparatu homines perstricti aliquid non tantum regii, verum etiam divini in hujusmodi statuis suspicati, eas instar Numinum primò admirari, deinde etiam colere, invocare, & pro Diis habere ceperunt. Prima ergo Idololatriæ causa fuit statuarum pompa, & privilegia illis, qui colerent, Principum voluntate concessa. Unde paulatim eò deventum, ut quidquid inter homines, aliasque creaturas etiam sensuum expertes quacumque ratione aut bellica, aut morali virtute, aut potentiâ, aut etiam formâ corporis emineret; imò quidquid beneficum esset, pro Diis haberetur. Quam super-

stitio-

fitiosam insaniam adjuvabant, & Dæmonum artes per simulachra loquentium, ac futura vaticinantium, & Magorum ludibria (nam ista cum Idololatria cepere) & Sacerdotum avaritia, qui quæstum, & auctoritatem ex Religione captabant, & Principum exempla imò iussa populos Deorum metu coërcentium, & denique ac præsertim corruptissimi hominum mores, qui cum nihil ampliùs, quam corporea, & mortalia cogitarent, amarentque, nullos quoque alios Deos agnoscere poterant, quàm corporeos, & cupiditatibus, ac sceleribus suis simillimos: Quid enim avaro, & impudico gratius esset, quàm Deos habere non tantùm non vindices, verùm etiam impuditiæ, & avaritiæ suæ authores, fautoresque? Quantumque non solatii tantùm, verùm etiam gloriæ in adulteriis Jovem imitari? crevitque eorumque insania, furorque adorandi, ut omnem planè admirationem superet, quod ipse Seneca Lib. de Superstitione à S. Augustino allegatus Lib. 6. de Civit. Dei cap. 10. his verbis eleganter expressit: *Si cui intueri vacet, quæ faciunt, quæque patiuntur, inveniet tam indecora honestis, tam indigna liberis, tam dissimilia sanis, ut nemo fuerit dubitaturus furere eos, si cum paucioribus furerent, nunc sanitatis patrocinium insanientium turba est.* Huius tamen furori certum tempus est. Tolerabile est semel in anno insanire. Sed si in Capitolium pervenias, pudebit publicatæ dementia: alius horas Jovi nuntiat; alius licitor est, alius unctor, qui vano motu brachiorum imitatur ungentem. Sunt quæ Junoni, ac Minervæ capillos disponant: sunt quæ speculum teneant, sunt, qui libellos offerant, & illos causam suam doceant. Sedent quædam in Capitolio, quæ se à Jove amari putant, nec Junonis quidem iracundissimæ respectu terrentur. Quid, quod & Matrimonia Deorum jungimus, & ne piè quidem, Fratrum scilicet, & sororum? Bellonam Marti collocamus, Vulcano Venerem, Neptuno Salariam; quasdam tamen calibes relinquimus &c.

Nec incredibile alicui videatur, ad tantùm insaniam potuisse homines pervenire, ut non tantum felibus, & Draconibus, (quæ fuit Ægyptiorum Religio) verùm etiam ut mutis simulachris inesse aliquid Divinitatis crederent. Cum enim hominem à bruto ratio distinguat, quid mirum est, non ut homines, sed ut bruta sensisse ratione per cupiditates oppressa? Furor ergo erat, quam Religionem vocabant, & furor tam publicus, lateque sparsus, ut ultra bis mille annos, hoc est, à diluvio usque ad Christi Nativitatem totum ferè orbem pervaserit, omnibus aut idola colentibus, aut cultum simulantibus, ne
popu-

popularem invidiam, odiumque inciderent. Tales Philosophi erant, inter quos Seneca Libro paulò antè laudato: *Hæc omnia Sapiens servabit tanquam legibus iussa, non tanquam Diis grata; omnem ergo istam ignobilem turbam Deorum, quam longo ævo longa superstitio invexit, sic adorabimus, ut meminerimus cultum ejus magis ad morem hominum, quam ad rem pertinere.* In quæ verba S. Augustinus 6. de Civit. cap. 10. *Sed ista populi Romani Senator colebat, quod reprehendebat, agebat, quod arguebat, adorabat, quod inculpabat: quia videlicet magnum aliquid eum Philosophia docuerat; ne videlicet superstitiosus esset in Mundo, non quidem ageret Scenicum in theatro, sed imitaretur in Templo, eoq; damnabilius, quòd illa, quæ mendaciter agebat, sic ageret, ut eum populus veraciter agere existimaret.*

Nemo tamen persuasum habeat ingratis ipsi, & insanissimis hominum divinam gratiam defuisse, quæ & occultis, & apertissimis modis ad verum Deum cognoscendum invitarentur, juxta celebrem illam Prosperi sententiam de Vocat. Gent. cap. 31. *Non solum in novissimis diebus, verumetiam in cunctis retro sæculis probatum est, gratiam Dei omnibus hominibus adfuisse, quoniam sive manifestè, sive occultè, ipse, ut Apostolus ait, Salvator omnium hominum est, maximè Fidelium.*

Quam sententiam Prosperi, ut intelligas, sciendum est vastas illas Monarchias, quæ maximam Orbis partem occupabant, idololatriæ coævas esse, quippe cum Imperio Assyriorum natas; nam ut Justinus observat Lib. 1. Histor. *Principio rerum Gentium, Nationumq; imperium penès Reges erat. Populus nullis legibus tenebatur, arbitria Principum pro legibus erant: fines Imperii tueri magis, quam proferre mos erat: intra suam cuiq; patriam Regna finiebantur. Primus omnium Ninus (Author Idololatriæ) Rex Assyriorum veterem morem novæ Imperii cupiditate mutavit. Hic primus intulit bella finitimis, & rudes adhuc ad resistendum populos, terminos usq; Lybiæ perdomuit, domitis verò proximis cum accessione virium fortior ad alios transfret, & proxima quæq; victoria instrumentum sequentis esset, totius Orientis populos subegit.* Ut ergo Deus velut ex altissima specula omnibus facem veritatis efferet, quam nemo posset ignorare, sæpissimè, maximisq; prodigiis, Regibus, & Imperatoribus Divinitatem suam ostendit. Id ne prolixior sim, de quatuor tantum Monarchiis palàm facere animus est.

Primò igitur Monarchiam Assyriorum omnium antiquissimam
quod

quod attinet, per intervalla temporum missi à Deo sunt Daniel, Esdra, Jonas, Nahum, Jeremias, multiq̃ue ex Judaico populo, à quibus & oretenus, & per prodigia veritatem edocerentur, Deo etiam captivitate suorum utente, ut Babiloniis, & Ægyptiis innotesceret. Quæ causa fuit illius Angelorum certaminis, quod apud Danielem legimus, aliis populum retinere volentibus, ut Babilonios ad cultum veri Dei converterent, aliis verò missionem optantibus, ne malorum exemplo perverterentur. De Ægyptiis constat, à Mose, Josepho, Jeremia, Trismegisto, aliisque unius, veri que Dei notitiam accepisse. Ab Ægyptiis verò maximè propagata est, nam & plerique Sapientum profectioes in Ægyptum adornabant, quales inter alios fuere Homerus, Pythagoras, Plato, Lycurgus, Solon, & omnes etiam Civitates, Provinciæque, quoties magni aliquid, arduique occurreret, illinc Oracula petebant. Et ipsi quoque Ægyptii colonias toto Orbe mittebant, quem postea morem Romani imitati sunt. Præsertim Dei notitiam propagavit celebris illa Sacrarum litterarum translatio à Ptolomæo Ægypti Rege procurata, totouque postea Orbe terrarum sparsa. Sanè Eusebius in Libris Præparationis multis argumentis ostendit, optima quæque, quæ Plato in suis Libris conscripsit, hausisse ex Sacris Litteris Veteris Testamenti. Hanc ipsam Dei cognitionem Sibyllæ toto Mundo dispersæ, earumque libri cantabant, quæ causa fuit, ut Christiani Sibyllinis Libris ad convincendos Gentiles maximè uterentur. Quam in rem optimè faciunt Clementis Alexandrini verba memoratu dignissima Lib. 1. Stromat. ubi: *Quomodo Deus Judæos salvos esse voluit dans eis Prophetas; ita etiam Græcorum spectatissimos, quod declaravit Paulus Apostolus dicens: Libros quoque Græcos sumite, agnoscite Sibyllam, quomodo unum Deum significet. Hydaspen sumite, & legite, & invenietis Dei filium multò clarius, & apertius esse scriptum.* Justinus quoque Martyr Orat. ad Antoninum Pium: *Operâ autem, & instinctu malorum Dæmonum mortis supplicium adversus Librorum Hydaspis, & Sibyllæ Lectores constitutum est, ut per timorem homines ab illis, quò minus scripta ea legentes rerum bonarum notitiam percipiant absterrentur: quod quidem efficere nequiverunt: Non enim absque timore tantum huiusmodi scripta legimus, verum etiam vobis ad inspiciendum offerimus, grata, acceptaque omnibus fore scientes.* Denique lumen ipsam rationis omnibus mortalium à natura impressum, & species ipsa Mundi, omniumque creaturarum hanc Dei co-

gni-

gnitionem nulli non inspirabat, *Ut enim si quis è longinquo citharam audiat ex multis, & diversis nervis compositam, & iis concentum, & harmoniam admiretur; planè intelliget, non à se ipsa citharam moveri, aut à pluribus pulsari, sed unum esse Musicum, qui unius cuiusque nervi sonum ex arte ad concentum, & harmoniam misceat, etiamsi illum coram non intueatur, ita quoque ex consona ubique, & concinna Mundi dispositione &c.* Verba sunt Athanasii Orat. contra Idola.

Quod si singularum Monarchiarum Principes consideres; deprehendes neque istis, quamvis aliquin perditissimis, Deum defuisse. Sennacheribum ausum Deo insultare, monuit prodigiosa illa strage centum octoginta quinque millium una nocte interfectorum: & quamvis nemo magis ipso Rege mortem meritis esset, ipsi in tanta suorum clade parsum, datumque tempus poenitendi: Nabuchodonosor ex Daniele, Jeremia, tribus Adolescentibus in fornacem jactis, & incendio prodigiosè liberatis Deum intellexit. Idem de Balthasaro Nabuchodonosoris filio constat, qui cum ex miraculo manus in pariete scribentis, & ipsius Danielis interpretatione verum Deum agnovisset, ac insuper imminenti sibi proximè mortem, aded tamen sibi defuit, ut vel inertia, vel metu suorum, vel usu pristinae vitæ abreptus, nec Deum, quem agnoverat, placandum curaret, nec consilium à Daniele, quem in Aula habebat, modumque quareret, utramque mortem temporalem, æternamque vitandi. Quid ego Balthasar suæ perfidiæ, & ignaviæ obtendet? & potuit, & debuit; at noluit. De Sardanapalo ultimo Assyriorum Rege paulò infra dicemus, cum de Ninivitis sermo erit.

Assyriorum Monarchiam Persica excepit. Primus illius Princeps Cyrus fuit. Hic à populo Judaico Babylone captivo, ab Esdra, & præsertim vaticinio Isaiæ ducentis prius annis de se edito Dei, veræque Religionis notitiam habuit, imò missione captivis data, instauratoque Dei Templo, optimè de Judæorum Sacris meritis est. Idem dicas de Dario Medo Cyri avunculo, & Danieli amicissimo, de quo alio Dario Hydaspis filio, qui Judæis facultatem dedit perficiendi Templi, fuitque maritus Esther Reginae, à qua & Mardocheo Dei cultum edoctus est. Idem de Artaxerxe longimano filio Xerxis, cuius jussu Esdras, & Nehemias missi ad omisam Templi fabricam restaurandam, & à quo tempore celebres illæ Danielis hebdomadæ septuaginta principium ducunt. Ex quibus patet, non defuisse Monarchis Persarum opportunissima media, quibus Deum agnoscerent, colerentque.

Idem

Idem de Græcis Principibus sentiendum est: Nam de Alexandro Magno primo Imperii Græci fundatore hæc habet Iosephus Lib. 12. cap. 8. *Alexander anno quarto in Phœniciam, Ægyptum, & Judæam venit, & solus ad Jaddum Pontificem accedens nomen illud Tetragrammaton Dei, quod Pontifex in lamina tiaræ affixa incisum gestabat, adoravit, & primus salutavit Pontificem. Syriæ Reges, & reliqui obstupuerunt. Solus Parmenio propius accedens: quid ita, cum ipse adoraretur ab omnibus, nunc adoraret Pontificem Judæorum? at ille, non hunc se adorasse respondit, sed Deo, cuius Pontifex esset, honorem exhibuisse: hunc enim, inquit, vidi hoc ipso habitu, cum adhuc essem in Macedonia, qui me deliberantem, quomodo Asiam possem subigere, hortatus est, sine mora traicere, nam suo ductu potiturum me Persarum Imperio. Hæc locutus, & comiter complexus Pontificem deducentibus Sacerdotibus in urbem pervenit, & cum ascendisset in Templum, immolavit Deo ex Sacerdotis præscripto, ostensq; sibi Danielis Libro, in quo Græcum quendam Persas debellaturum significabat; hunc ipsum se esse interpretatus latus dimisit multitudinem. Et cum fecisset potestatem si qui vellent salvois suis ritibus sequi ejus militiam, multi in eam expeditionem dederunt nomina. Imò certum est, florente Græca, Romanaque Monarchia Judæos & negotiorum, & commerciorum causâ toto Orbe, ut etiamnum videre est diffusos, suisque ritibus, cultuque veri Dei usos esse, quod & Iosephus loco mox citato asseverat, ubi narrat, sub Alexandri signis Judæos militasse, suisque ritibus permisos esse. Idemque Nazianzenus asseverat Orat. 44. Et Philo Libro de Legatione ad Cajum testatur, Judæos Augusti temporibus Romæ trans Tiberim habitasse, permisosque jure majorum vivere. Sed præsertim ex Sacris Litteris id constat Act. 2. ubi recensentur veri Dei cultores, qui Religionis, agendique Paschatis causâ ex toto Orbe, omniq; Natione Jerosolymam convenerant. Verba Sacri textus sunt: *Erant autem in Jerusalem habitantes Judæi viri religiosi ex omni Natione, quæ sub celo est, Parthi & Medi, & Elamitæ, & qui habitant Mesopotamiam, & Cappadociam, Pontum, & Asiam, Phrygiam, & Pamphiliam, Ægyptum, & partes Libyæ, & advenæ Romani, Cretes, & Arabes &c.* Herodotus quoque Halicarnassæus, qui 450. annis ante Christi Nativitatem floruit, apud Iosephum Lib. 8. Antiquit. cap. 4. scribit, Æthiopas antiquitus circumcisionem cultumque veri Dei ab Ægyptiis didicisse, sic enim Judæos vocat, quod in Ægypto habitassent, Autorque est Strabo*

Bb

lib. 17.

lib. 17. Eosdem Æthiopes unum coluisse Deum immortalem, qui esset omnium rerum causa. Ex hoc ipso Æthiopum exemplo colligere est, quid de aliis Nationibus minùs barbaris, minùsque incultis sentiendum sit. Quo autem consilio voluit Deus fidelem populum omnibus Nationibus toto Orbe misceri, nisi ut testes unus, veræque Divinitatis essent? Quod, ut suprà dictum est, maximè, pleneque obtentum, Sacris Litteris ex Hebraica lingua in Græcam translatis, omniq[ue] Græcia, Romanoque Imperio, quod totum Orbem terrarum amplectebatur, vulgatis.

Ipsum verò Romanum Imperium quod spectat, ex dictis jam patet, ante constitutam Monarchiam unius, veri que Dei notitiam habuisse: Nam quæ suprà de Philosophis, Sibyllis, Judæis toto Orbe dispersis, Sacris Libris, ac præsertim cum Græcis commercio dicta sunt, ea maximè in Romanis locum habent, tantoque clariora evadunt, si modum consideres, quo Deus singulos Imperatores ad cognitionem veritatis invitavit: Nam de Octaviano Augusto primo Romanorum Imperatore eum Sibyllinorum Librorum studiosissimum fuisse testatur Suetonius in Octaviano cap. 31. *Postquam, inquit, Pontificatum maximum suscepit, quidquid Vaticiniorum Librorum Græci, Latiniq[ue] generis, nullis vel parùm idoneis authoribus vulgò ferebatur, supra duo millia undiq[ue] cremavit, ac solos retinuit Sibyllinos, hos quoq[ue] delectu habito, condiditq[ue] duobus forulis auratis sub Pallatini Appollinis basi.* Idemque Author cap. 94. & Dio Lib. 37. de prodigio, quo Christi adventus prænuntiabatur, excitabaturque Augustus ad veritatem inquirendam, hæc habent: *Ante paucos menses, quàm nasceretur Octavius, prodigium Romæ factum publicè, quo denuntiabatur, Regem populo Romano naturam parturire: & Senatus exterritus censuit, ne quis illo anno genitus educaretur. Prodigium verò huiusmodi fuit: In Capitolio multæ Statuæ de Cælo tactæ, liquefactæq[ue] fluxerant, deiectæq[ue] erant tum alia simulachra, tum Jovis columnæ insistentes. Præterea imago Lupæ cum Remo, ac Romulo consecrata ceciderat: litteræ etiam in columnis, in quibus leges scribebantur, confusæ, atq[ue] oblitteratæ erant.* Nicephorus Lib. 1. cap. 17. Suidas verbo Augustus; Cedrenus in Compendio Histor. hæc addunt: *Cum Augustus Apollinis studiosissimus, ut qui crederetur Apolline genitus, quiq[ue] in cæna illa, quæ Dodecatheos vulgò dicebatur, pro Apolline ornatus solebat accumbere, cui & Templum in Palatio erexerat, eidem sacrificasset Hecatombem, hæc tandem ab eo responsa elicit:*

Me

*Me puer Hebraeus Divos Deus ipse gubernans
Cedere sede jubet, tristemq; redire sub Orcum.*

Aris ergo de hinc tacitus abscedito nostris.

Reversusq; inquit, Nicephorus Augustus Romam, Aram in Capitolio erexit hac inscriptione notatam: Ara primogeniti Dei. Quibus consentanea sunt, quæ Cicero Lib. 2. Divin. scribit. Sed quod caput est; cur isto modo jam Oracula Delphis non eduntur? hoc loco, cum urgentur, evanuisse ajunt vetustate loci ejus, unde anhelitus ille terræ fieret, quo Pythia mente incitata Oracula ederet. De vino, aut salsa-mento putes loqui, quæ evanescunt vetustate. Plutarchus quoque, qui Trajani tempore in Principis Aula degebat, integrum Librum de silentio Oraculorum scripsit. Et Philo Judæus Lib. de Legat. ad Ca-jum testatur, favisse Judæis Augustum, & jussisse, ut in Templo Hierosolymitano quotidianæ victimæ suis sumptibus Deo altissimo macarentur.

De Tiberio, qui Augusto successit, multò plura, & majora le-guntur. Tanta illi, & tam immania crudelitatis, ambitionis, & li-bidinum scelera, ut nec dici citra pudorem possit. Planè tam por-tentosa illius flagitia, tam diuturna fuere, præsertim ubi in Capreas Insulas toto septennio se abdidit, ut nullus æquè deferri à Deo mere-retur, & tamen tantum absuit, desertum esse, ut maximis argumen-tis ad Dei cognitionem, & scelerum pœnitentiam vocaretur. Nam ut taceam, flagella conscientiae, quibus adeò torquebatur, ut ad Se-natum hæc scriberet: *Quid scribam vobis Patres conscripti, aut quo-modo scribam? Dii me, Deaq; pejùs perdant, quàm perire quotidie sentio, si scio. Adeò, inquit, Tacitus, facinora, atq; flagitia sua ipsi quoq; in supplicium verterant. Præter hæc, inquam, constat ex Pi-lati Epistolis, quas officio ad Principem dederat, & ex publicis Ta-bulis quibus singulorum annorum gesta commenda bantur, ei adeò Christi Domini Divinitatem persuasam fuisse, ut de Christo inter Deos referendo ad Senatum deferret, ut Egesippus, & Eusebius te-stantur, ac præsertim Tertullianus in Apologet. cap. 5. ubi: *Vetus erat Decretum, ne quis Deus ab Imperatore consecraretur, nisi à Se-natu probatus. Facit & hoc ad causam nostram, quod apud vos de hu-mano arbitratu Divinitas pendet. Nisi homini Deus placuerit, Deus non erit; homo jam Deo propitius esse debet. Tiberius ergo, cujus tempore nomen Christianum in Mundum intravit, annuntiata sibi ex Syria Palestina, qua illic veritatem istius Divinitatis revelarant, de-**

tulit ad Senatum, cum prerogativa suffragii sui. Senatus, quia ipse non probaverat, respuit. Cæsar in Sententia mansit, comminatus periculum accusatoribus Christianorum. Et cap. 21. ejusdem Apologetici proficitur, nihil ad Christianam Religionem amplectendam Tiberium, aliosque Cæsares moratum esse, quàm metum perdendi imperii. Postquàm enim de Christi passione, Resurrectione, Ascensione, & Christianæ Religionis prædicatione sermonem instituisset, hæc addit: *Ea omnia super Christo Pilatus, & ipse jam pro sua conscientia Christianus, Cæsari tunc Tiberio nuntiavit: sed & Cæsares credidissent in Christum, si & Christiani esse Cæsares potuissent.*

Sed à condito Orbe vix pejorem aliquem, seu publicis seu privatis flagitiis Nerone reperias. Matrem, Fratrem, Uxorem, Præceptoremque Senecam parricidio sustulit, ut taceam tot alia Christianorum, in quos primam movit persecutionem, Ethnicorumque milia suppliciiis affecta. Libidinis verò tam prodigiosæ, tam inverecundæ, ac publicæ, ut non dubitaret publico ritu, cultuque muliebri Pythagoræ amasio nùbere. Taceo incendia, magiam, prædationes Templorum, & mille alia, quibus consecutus est, ut omnium sceleratorum, quotquot fuerunt, eruntque, Princeps dici mereretur. Et tamen ne huic quidem monstro Generis humani Dei benignitas defuit, qua sanari, mutarique in alium posset, si vellet: Nam primò missi ad illum sunt duo Principes Apostolorum, quorum operâ, & præsertim Pauli Evangelium & in Aula, & in Senatu, & in Collegio Pontificum, & in Gynæceo, omni que Urbis Prætorio prædicatum est: *ita, inquit Paulus, ut vincula mea manifesta fierent in omni Prætorio, & in cæteris omnibus.* Multi quoque de Cæsaris domo, licet corruptissima, veritatem, & Evangelium amplexi sunt, inter quos teste Chrysostomo Neronis etiam Concubinæ, earumque pulcherrima, & Principi præcipua Poppæa Sabina (ut aliqui memorant) Quæ causa fuit, ut idem Chrysostomus recitat, Apostolum occidendi. Sed maximè Neronis animus perculit Simonis casus. Cum enim is in aula Cæsaris, quippe Magicis artibus additissimi, præcipuâ gratia floreret, jactassetque, se palàm in cælum auolaturum, idque molitus esset, Cæsare, Populoque Romano novum Icarum spectante, jamque in aëra levaretur, subitò Petri Apostoli precibus in terram dejectus est, collisusque, & ipsum Cæsarem sanguine aspersit. Audi Suetonium in Vita Neronis: *Icarus primo statim canatu juxta cubiculum ejus decidit, ipsumque cruore res-*
persit.

perfit . Eadem habent Dio Chrysostomus Orat. 21. Arnobius, Cyrillus, Epiphanius, Augustinus, aliiq̃ue passim . Estq̃ue notatu dignum, quod Nicephorus Lib. 2. cap. 36. his verbis narrat: Ibi ex populo, qui antea Simonem divinos usurpantem honores laudibus celebraverant, subito ita prostratum videntes ingenti, claraq̃ voce: Unus est magnus Deus, acclamant, quem Petrus, & Paulus aperte, & clarè prædicant . Locus, in quem luctuosum hoc spectaculum incidit, ad hodiernam usq̃ diem Simonium vocatur . Nero autem certior factus à Petro, & Paulo Simone peremptum esse, Petrum quidem pedibus sursum versum in crucem egit, Paulum verò gladio occidit . Ferunt autem Paulum Neroni antea testatum esse, se illi tertio à cade sua die vivum se representaturum . Quod ubi est factum, in consternationem illum coniecit . Et cùm post mortem Paulus ita ut prædixerat, certò, & verè illi assistens liberè Christum verum esse Deum profiteretur, neq̃ veram salutem in alio, quàm JESU nomine esse ostendit . Ita Nicephorus, additq̃ue Baronius, hanc causam fuisse, ut Nero metu percussus mitius in Christianos ageret .

Patet ergo ex hæcenus dictis, etiam Romanis Imperatoribus multivariam provisum esse, ut salvarentur, idq̃ue longa deinceps Romanorum Principum serie ostendi posset, quibus & Martyrum sanguis, & invicta constantia, & prodigia sine numero edita, & Apologiæ, quas Christianæ Religioni muniendæ, & illustrandæ voce ac scriptis mirâ eloquentiâ vulgabant; hæc, inquam, nihil aliud profectò erant, quàm continuæ cæli voces, quibus ad veritatem cognoscendam invitabantur . Sed dulcedo illa omnium vitiatorum, qua si Christiani essent, carere oportebat, effecit, ut etiam agnitæ veritati repugnarent, aut saltem ne agnoscere vellent, mallentq̃ue oculos luci claudere dormiendi cupidine, quàm aperire, & exergisci . Cæterùm postquàm vidimus, Deum etiam Tiberio, ac Neroni possimis omnium tam propitium fuisse, nihil opus est, alios Imperatores adicere, quis enim suspicari possit, Deum alicui defuisse, qui non defuit Neroni? Nemo isto pejor, nemo indignior, nec tamen desertus; nullus ergo timendi, aut desperandi locus etiam Nerone adjuto . Sed postquàm de quatuor Monarchiis disputatum est, jam ad seriem annorum revertamur .

Anno Mundi 3215. Assyriis Sardanapalus ultimus antiquissimæ hujus Monarchiæ Rex imperavit omnium, quotquot unquam fuerunt, Principum longè corruptissimus . Quippe non idolorum tantum

tum cultui addictus, verumetiam adeo in libidinem, & voluptates effusus, ut inter Scortorum greges muliebri habitu, muliebri gestu, vultuque fucis, & coloribus picto purpuram neret, & omnes fœminas mollitie, luxuque anteiret, epitaphio post se relicto, ut ait Aristoteles, *bove, non Rege digno*, videlicet: *Ede, bibe, lude, post mortem nulla voluptas*. Et tamen, quis crederet? ne hunc quidem, civemque Ninivitas exemplo Regis sui flagitiosissimos Dei clementia destituit. Primò enim missus ad eos Jonas (quod hætenus nunquam factum, ut Propheta ad Gentiles mitteretur) qui eos metu imminenti ruinæ ad pœnitentiam provocaret. Secundò tanta tamque efficax gratia, & Regi, & civibus data, ut non solum ex animo pœniterent, verumetiam absolutissimum pœnitentiæ exemplar toti Mundo proponerent, dignumque, ut ab ipso Dei Filio ad imitandum omnibus commendaretur. Cœterum & Rege, & populo in antiquam licentiam, & flagitia ruentibus, non tamen cessavit Deus monere, missis Ninivem Nahum Propheta, & Tobia, quorum exemplo, & Verbis ad veri Dei cultum frugemque meliorem traherentur; sed cum nihil proficerent omnia, Sardanapalus occisus, imperium Assyriorum extinctum, Ninive subversa est. Si ergo Sardanapalus interrogaretur, quid aliud responsurus esset, quam quod in simili causa respondit Pharaon: *Iustus est Dominus; ego autem, & populus meus impii*.

Anno mundi 3993. Ante Christi Nativitatem vigesimo nono regnare in Judæa Herodes cepit, quem alii Idumæum, alii Ascalonitam faciunt, cum utrumque fuerit. Nam ut ex Eusebio *Lib. 1. Hist. Ecclesiast. cap. 6.* Et Julio Africano apud eundem Eusebium constat, Avum habuit Herodem quempiam (S. Ambrosius in caput 3. Lucæ Jerodulum vocat) Ascalonitam servum delubri, quod Ascalone Apollini sacrum erat. Hujus filius Antipater fuit, qui admodum puer à latrunculis Idumæis abductus ex genitili proselythus factus est, sacrisque Judaicis imbutus: Sciendum enim est, Idumæos integro ferè sæculo ante Regnum Herodis, cum à Joanne Hircano Judæorum Pontifice, ac Rege edomiti essent, abdicato proprio Gentis Idumææ Deo (quem Cozem vocabant) Judaicos ritus, ac Religionem amplexos esse, ut narrat Josephus *Lib. 15. cap. 11.* Ergo Antipater ex servili modicaque fortuna variis artibus, ac præsertim militari in magnam potentiam erectus Herodi secundo genito Galilæam curandam dedit, quippe Hircano Judæorum Principe ignaviâ torpente.

pente. Herodes ergo purgata mox latronibus Provincia gratiam populi, ac praesertim à Romano Syriae Praefide iniit, à quo etiam Cæsaryiae Praefecturam pecuniâ emit, retinuitque auctoritate, & Imperio Cassii, qui Julio Cæsare interfecto Ægyptum, & Palæstinam tenebat. Ac postea Romæ in Senatu Augusti, & Antonii favore Rex Judæorum declaratur, Antigono quoddà à Parthis Regnum accepisset, inter hostes, & in ordinem redacto. Utque minori invidia rerum in Judæa potiretur, Mariamnem duxit, Assamonæorum, seu Machabæorum familia natam. Inde expugnatâ Herosolymâ, cæsoque Antonii jussu Antigono ultimo Judæorum Principe Regnum occupat, firmatque Stirpe Regia, totoque Senatu, quem magnum Sane drin vocabant, mori coacto. Hic ergo Herodes ille est alienigena (quippe paterno genere Ascalonita, & Idumæus, materno Arabs) in quo juxta celebre Jacobi vaticinium jam instante Messia *Sceptrum Judæ*, hoc est, potestas judicandi regendi que Judaicum populum planè defecit. Hactenus enim quamvis aliquoties Judæi aut Persis, Græcisque, ac praesertim Assyriis tributarii egissent, aut etiam in captivitatem abducti essent, proprios tamen aut Reges, aut Duces habuere, à quibus regerentur, ut ex Historia Susannæ, ac Esdræ patet: ac praesertim ex Libro 4. Regum capite ultimo, unde constat, tempore Babilonicæ captivitatis Judæorum Regem fuisse Joachimum, eumque ab Evilmerodaco Regiis honoribus cultum: à captivitate verò mox Zorobabel Joachimi Nepos, alii que Duces usque ad Machabæos imperârunt. Et licet Machabæi Stirpe Levitica nati essent 1. Machab. cap. 2. illique ad Herodem usque, hoc est annis centum sexaginta quinque Judæi paruisent, semper tamen Sceptrum, & Ducatum penès Judam fuisse dici potuit; *tam* quia nomine Judæ totus populus Judaicus, praesertim post Babilonicam captivitatem appellatus est; pauci enim illi, qui ex aliis Tribubus redire, omnes in unam Tribum Judam cooptati insiti que sunt, & ideo Malachiæ 3. vers. 4. & 1. Machabæor. 1. vers. 5. Judas pro omnibus Judæis accipitur, totam Palæstinam incolentibus: *tam* quia jus eligendi, habendi que Regis à Deo Judaicæ Tribui, ac Stirpi Davidicæ attributum, confirmatum que à Populo post schisma decem Tribuum transferri non potuit, semper que penès Judaicam Tribum mansit, ad quam etiam Urbs, & Regia Metropolis Jerosolyma videlicet pertinebat. Tribus ergo Juda Machabæos Religione, ac virtute militari insignes sibi in Duces elegit, ut videre est Machabæor.

1. 19 & 14. Sicut ergo Imperium penès Romanos erat, quamvis non Romanum, sed Thracem, aut Hispanum Principem elegissent, & Regnum penès Polonos, quamvis Gallum, aut Transilvanum, non Polonum ad Regnum vocassent; ita de Tribu Juda sentiendum est; ut taceam Machabæos materno genere ex Tribu Juda oriundos fuisse, quæ sæpe cum Levitica Tribu conjugia miscebat, quod aliis Tribubus vetitum lege erat. Quodd verò Scaliger, paucique alii Criticorum velint, Herodem non alienigenam, sed verè Judæum fuisse, quodd videlicet Judaicam Religionem amplexus, sicque capax Imperii esset, vix refutationem meretur. Sicut enim Persa, aut Indus, qui Christianam fidem in Gallia, aut Hispania suscepit, non ideo desinit Persa, aut Indus esse, multoque minùs jura Gallorum, aut Hispanorum consequitur, cùm Religio animum, non statum politicum, aut patriam mutet. Ita Herodes suscepta Judæorum Religione, non ideo Allophylus, & Ascalonita esse desiit, nec jure ad Regnum soli Tribui Judaicæ destinatum, sed bello, tyrannide, ac Romanorum potentiâ pervenit. Imò Profelythi ne in Synedrium quidem, hoc est, Senatam admittebantur, quantò minùs in Regnum, & ideo Patres omnes Herodem alienigenam fuisse tradiderunt; & quod præcipuum est, Josephus ipse rerum omnium, quæ tunc gerebantur, optimè conscius id ipsum disertissimè tradit *Lib. 14. Antiquit. cap. 11. 27. 28. & lib. 1. de Bello Judaico cap. 5.*

Hic ergo Herodes Ascalonita meritò inter pessimos mortalium semper habitus est: Nam ut libidines, rapinas, perfidiam, Sacrilegia, tyrannidem, & alia taceam, crudelitatis inexplebilis, & immanissimæ fuit, ut optimè de illo dicas, quod olim de Tiberio, *Lutum extitisse humano sanguine maceratum.* Totam Machabæorum Stirpem ferro delevit, cognatos, Uxorem, Socrum, Patrum, filiosque sustulit. Jam moriturus promiscuam nobilissimi cujusque cædem mandavit, ne lacrimæ suo funeri deessent. Denique nihil ei ad summam crudelitatem præter Deicidium absuit; & Deicidium quoque voto commissum est, jugulatis quatuordecim infantum millibus. Meminerunt hujus cædis non tantùm Sacri Scriptores, verùm etiam Ethnici, inter quos Macrobius lib. 2. Saturnal. cap. 4. *Cùm audisset Augustus, inter pueros, quos in Syria Herodes Rex Judæorum intrabimatum jussit interfici, filium quoque ejus occisum esse, ait: melius esse Herodis porcum esse, quàm filium.* Et tamen hunc quoque sceleratissimum omnium, & cui nemo mortalium quidquam boni precatus esset,

esset, Deus quoque clementissimè vocavit tribus ex Æthiopia, Arabiaque missis ad eum Regibus, à quibus edoceretur adventum Messiae indicio novae Stellae, quae illos tanto tempore, & per tot spatia terrarum prodigiosè duxerat.

Anno Domini 363. Valens fratris sui Valentiniani permissu Imperium Orientis adiit, fuitque huius Imperatoris memoria semper Ecclesiae funesta ob haeresim Arianam toto orbe promotam, quam nulla crudeliùs, majorique damno in Religionem grassata est. Episcopos in exilium pellere, Ecclesias incendere, legatos Orthodoxorum flammis absumere, omnia vastare, Valentis facinora, & Victoriae erant: idque tanto furore, & barbarie actum, ut ipsi gentiles, praesertim Themistius Philosophus monerent, damnarentque, Populus verò nihil frequentius, magisque clamaret, quam *incendium, & rogam Valenti*, & eventus voto respondit. Is in Gothos exercitum ducens, Ilacium Monachum obvium habuit, qui ut Theodoretus narrat lib. 4. cap. 30. libera voce Valentem increpans: *Quò, inquit, proficisceris Imperator, qui auxilio Dei contra quem bellum geris prorsus destitutus es? Desine tu bellum contra eum facere, & ipse bellum contra te commotum sedabit. Redde gregibus optimos pastores, & victoriam reportabis. Quodsi omnibus his neglectis, bellum suscipias, neque ipse reverteris, & exercitum amittes.* Imperatore velut fatuum aspernante, ac aliquantum progresso; iterum Ilacius occurrere, eademque minari. Sed neque tunc auditus, alio itinere Valentem tertio aggreditur; quo primum turbato, quod aliquid humano majus suspicaretur; deinde ira incenso, Ilacius in vicinam foveam luto spinisque horridam mittitur. Sed inde ope Angeli expeditus, quarto Valenti se offert, vultuque flagrante, ac manu in frenum injecta eadem repetit: *Nec, inquit, reverteris, & exercitum, teque insuper perditum ibis.* Cui Caesar: *Revertar, & te interficiam, falsaque praedictionis poenas abs te repetam.* Et Ilacius: *Eneca si quid falsi me dixisse deprehenderis.* Ita discessum, ac paulò post infelicitè cum Gothis pugnatum, Romano exercitu fuso, valente in fugam acto, ac postea in proxima domo, qua se abdiderat, flammis absumpto. Jam dicant mihi, qui de clementia Dei duriùs sentiunt, quam oportet; quid, inquam, excusando Valenti superfluit; aut quid amplius exigere à Deo potuit, ne pessumiret? Monuit per Basilium Episcopum Caesareensem, qui miracula verbis adiecit, ut efficacius moveret; monuit per Trajanum insignem bello ducem, cuiusegre-

gia sunt illa ad Cæsarem verba: *Non ego Imperator victus sum, sed tu ipse prodidisti victoriam, qui contra Deum pugnare non desinis, itaq; ejus auxilium Barbaris concilias.* Monuit per Gratianum Augustum, qui repetitis nuntiis non cessabat rogare, non prius signa conferret, quam secum copias junxisset. Monuit denique per Monachum compertæ, vulgatæque Sanctitatis, & ideo dignum, cui fides haberetur; Nec unâ tantum, sed multâ importunaque monitione, periit ergo valens, quia perire omnino voluit, Deo quamvis, ne periret, omnia moliente, voluit ergo Deus, vocavit Deus, pulsavit Deus, opportunè, importunè institit Deus, sed noluit Valens. Idem de aliis peccatoribus dicas, quibus auxilia dantur non æquè omnibus nota, ut Valenti; at certè nunquam parca, & semper valida..

Anno Domini 363. cecidit Julianus Imperator Apostata cœlesti manu, ut ab omnibus creditum est, interfectus. Nolo illius flagitia, Apostasiam videlicet, sacrilegia, tyrannidem, immanitatem, veneficia, adeo ut evocandis manibus, futurisque cognoscendis puerorum, fœminarumque cadaveribus (quorum viscera scrutabatur) ac sanguine caveas impleret. Hæc, inquam, quippe comperta silentio transmittam. Illud tantum commemorabo quantâ Deus benignitate, quantaque patientiâ laboraverit principi tam scelerato, suæque Divinitatis hosti ad mentem, ultimoque exitio revocando. Ut enim taceam Gregorii Nazianzeni, Basilii, aliorumque Sanctissimorum Episcoporum curas, & monita, ac præsertim manifestissima de Cœlo prodigia, quibus continuò pulsabatur, Sacerdotibus videlicet ad præsentiam Christianorum subito collabentibus, statuis Cæsaris, quas in templum collocarat fulmine deletis, globis flammæ e terra prorumpentibus, cum templum Jerosolymis reparare moliretur, crucibus in victimarum extis sacrificanti ostensis, & trecentis aliis. Quis verò non stupeat Dei bonitatem, cum ista nil proficerent; voluisse illis ipsis incantationibus, auspiciis, malisque artibus, & sacrificiis, quibus Deum irritabat ad eum monendum, retinendumque uti, ne in exitium rueret? Audi quid de illo Chrysostomus, Ammianus, aliique scribant, cum ultimam ejus in Persas expeditionem narrant. Verba Chrysostomi sunt testis oculati oratione in Gentiles: *Quod autem Imperator fulmine (quo Daphniticum templum conflagraverat) percussus non fuerit, causam reperies ex eodem bonitatis, & benignitatis Dei fonte manantem.* Neq; hoc solum, neq;

pri-

primum virtutis sue signum Christus dedit, sed & alia item multa hoc ipso non inferiora, quæ in ipsis castris, tum quæ in urbibus evenerunt, huiusmodi fuere, ut vel saxeam animam flectere possent, nam quæ edebantur miracula per sese talia erant, ut ad eorum, qui ea cernerent emendationem aliud alio non egeret. Ammianus verò: Calendis Januariis ascendente eo gradile Genii templi & sacerdotum consortio quidam cæteris diuturnior, nullo pulsante, repente concidit, animamq; insperato casu efflavit. Et iterum: Iisdem diebus nuntiatum est Juliano per litteras Romæ super hoc bello libros Sibyllæ consultos, ut iusserrat, Imperatorem eo anno discedere à limitibus suis aperto prohibuisse responso. Et iterum: Quietâ nocte emensâ, manû jumentum quo peberetur ex usu poposcit, oblatuq; ei equus, Babylonius nomine, ictu torminis consternatus, dum dolorum impatiens volvitur, auro, lapillisq; ornamenta distincta compressit. Et iterum lib. 24. Complures hostias Marti parabat ultori, & ex Tauris pulcherrimis decem ad hoc perductis nondum aris ad moti voluntate sua novem procubere tristissimi, decimus verò, qui defraetis vinculis agrè reductus est, maculatus ominosa signa monstravit; quibus visis exclamavit indignatus acriter Julianus, Jovemq; testatus est, nulla se Marti jam sacrificaturum. Et iterum: Cum nihil humani proficerent sensus diu fluctuantes, & dubii, extructis aris, cæsisq; hostiis consulta Numinum sciscitabamur; sed extis inspectis, nihil certi respondebatur. Ac tandem lib. 25. Ipse Julianus ad sollicitam, suspensamq; quietem paulisper protractus, cum somno, ut solebat, depulso ad æmulationem Cæsaris Julii obscuræ noctis altitudine sententiis cujusdam Philosophi teneretur, vidit Squallidiûs speciem illam Genii publici, quàm, cum Imperium adiret, conspexerat in Galliis, velata cum cornucopia, per aulae tristiùs discedentem. Relictoq; humi strato cubili, adulta jam nocte Numinibus per sacra depulforia supplicans, flagrantissimam facem cadenti similem aëris parte sulcata evanuisse existimavit, horroreque perfusus est, quoddam apertè minax Martis apparuerit fidus. Confestim ergo ante lucis primitias Hetrusci Aurospices accersiti, consultiq; quid astri species portenderet nova? Vitandum esse cautissimè responderunt, ne quid tunc tentaretur, orabantq; saltem aliquot horis profecionem differri. Cum ergo Julianus nec per Sanctos Episcopos, nec per miracula, nec per Dæmones quidem, & impiissima sacra monentem Deum audiret, justissimè tandem permissum est, ut accepto, nescio cujus

manu in pugnâ vulnere vitam finiret. Audi Theodoretum Lib. 3. cap. 20. Ex improvîso vulneratus Martem inculabat, quodd auxili-
 lium minimè tulisset; Apollinem, quodd falsa vaticinatus esset, Jo-
 vem fulminantem, quodd in suum interfectorem fulmen non corrip-
 set. Ferunq; porro simul ac plagam acceperat, manum protinus
 sanguine implevisse, illumq; projecisse in aërem, ac dixisse: *Vicisti
 Gallilæe*. Nicephorus projecto in altum sanguine exclamasse his ver-
 bis dicit: *Saturare Nazarene*. Cui hanc Catastrophen rerumq;
 feriem consideranti, non continuè in mentem veniat verissimè à
 Dionysio Areopagita dictum esse: *Deus etiam à se aversos, ac resi-*
lientes, amatorie sequitur, ac deprecatur ne pereant.

Observandum hic est Auctorem morbo correptum extremam ma-
num huic narrationi imponere haud potuisse.

§. I V.

*Orationem etiam peccatoris, cum illa petit, quæ ad
 vitam æternam consequendam necessaria sunt,
 semper exaudiri, sicq; in peccatoris pote-
 state esse, etiam gratiam illam effica-
 cissimam, & triumphatricem
 orando impetrare.*

S U M M A R I A.

- I. *Quid sit efficacia gratiæ triumphatricis, fusè, multisq; ex Augu-
 stino testimoniis exponitur.*
- II. *Qua ratione voluntas humana præter objecti propositionem à Deo
 physice juvetur, ac etiam præmoveatur.*
- III. *Orationem efficacissimum, certissimūq; medium esse, quo etiam
 peccatores gratiam illam specialem, ac triumphatricem asse-
 qui possint, ubi distinctio peccatoris ad bonum conantis, &
 non conantis.*

IV. Pro-

IV. Probatur ex Sacris Litteris , juxta Patrum expositionem .

V. Ac etiam ex ratione .

VI. Qua ratione sint intelligenda Scriptura , cum dicunt , non exaudiri peccatores .

VT quæ dicturi sumus , intelligas , simulque liquidò constet , quid sit illa efficacia , & energia gratiæ triumphatricis , quæ difficultatem omnem expugnat , altius repetenda res est .

I. Sciendum igitur , naturæ humanæ innatum esse quoddam , intentumque , ac ferè perpetuum gaudendi desiderium : quod enim in appetitu sensitivo , brutisquæ animantibus delectationem , hoc in homine , & appetitu rationali gaudium vocamus . Cujus quidem rei , ut notat Aristoteles , superfluum est , causas quærere , tùm quia per se notæ sunt , tùm quia primæ causæ frustra alia causa inquiritur : at talis est delectatio , & gaudium , nam si ex mercatore quæras , cur velit navigare ? respondebit , ut Indias teneat : cur Indias petere ? ut aromata , & margaritas comparet : cur ista comparare ? ut carius in Europa vendat : cur carius vendere ? ut dives fiat : cur dives fieri ? ut bene sibi sit : cur bene sibi esse ? ut gaudeat , lætamque vitam agitet : ut lætari , & gaudere ? hîc tacebit , putabitque , id stultè quæri , cum per se notum sit , nullamque aliam causam habere possit , quod omnium humanarum operationum est prima , & ultima causa ; sicut enim nemo hominum est , qui non velit bene sibi esse ; ita nemo , qui non velit gaudere , hoc enim ex illo sequitur . Volunt alii hoc delectationis , & gaudii perenne desiderium infirmitatem esse ex culpa originali natam , sicut infirmitas Leonis est , semper febris , siti que ardere . Alii ex densa quadam , tetraque fuligine cor humanum obsidente , quæ nisi dilatatione cordis ventiletur , evoletque , hominem suffocet ; hanc verò dilatationem gaudio fieri , ut experientia testatur , docetque eleganter S. Thomas 1. 2. q. 3. a. 1. Alii , quod voluntas non possit satis fortiter , intenseque velle , quantum videlicet ad operandum sufficiat , nisi movente aliquo delectabili ; sicut nec oculus satis videre , nisi movente aliquo lucido ; nec intellectus satis firmiter assentiri , nisi movente principio aliquo evidenti : hoc ergo esse bonum delectabile voluntati , quod venatico canis odorem feræ , quo solo inter tot alios aromatum , florumque odores ad insequendum , currendumque abripitur , cum id , quod agendum est , ceperit non latere , nisi etiam delectet , & ametur ; non agitur

tur, non suscipitur, inquit, Augustinus Libro de Spiritu, & Littera cap. 3. Sed vera hujus rei causa est, quod hominis voluntas velle non possit, nisi aliquod bonum: consecutio verò boni causa est gaudii, ut videre est apud S. Thomam 1. 2. q. 31. a. 1. Sed cum omne bonum creatum nullo modo satiare, aut implere possit infinitum hominis desiderium; (omnia enim bona creata guttæ tantum sunt immensi illius boni, cujus anima capax est; gutta verò magnam sitim non satiat, sed potius auget) hinc est perpetuus ille gaudendi æstus, voluntate alia semper, & alia cupiente, & in orbem eunte, cum nec obtemperata fatient, & in novis meliora sperentur. Audi Augustinum Lib. 4. Confess. cap. 11. *Ecce illa discedunt, ut alia succedant, & omnibus suis partibus constat infima universitas Quidquid per carnem sentis, in parte est, & ignoras totum, cujus hæ partes sunt, & delectant te tamen: sed si ad totum comprehendendum esset idoneus sensus, vellet, ut transiret, quidquid in præsentia existit, ut magis tibi omnia placerent; nam & quod loquimur, audis, & non vis utiq; stare syllabas, sed transvolare, ut alia veniant, & totum audias; plus enim delectant omnia, quam singula, si possunt sentiri omnia.* Vide etiam Angelicum Doctorem 1. 2. q. 32. a. 2. ubi ostendit, motum esse causam delectationis. Ex hac etiam gaudendi cupidine sequitur, ut cum voluntas habere vera bona non possit, quibus gaudeat, fallacia vel imaginando, vel sperando fingat, eo ferè modo, quo cum Imperatorem videre non licet, ejus tamen imagine, aut statuâ delectamur; & cum dormienti palatia, convivia, & læta occurrunt, si expergiscaris, somniare iterum cupis, ac jucunda illa, quamvis ficta redire. Sic in theatris nemo ignorat, falsa esse, quæ luduntur, & tamen placent. Idem de bonis speratis; ista enim cum absentia sint, & incerta, multò majorem libertatem animo relinquunt, ea sibi persuadendi, fingendique, quæ oblectent; & cum omnia simul, ac velut densato agmine speranti occurrant, multò sæpè, fortiusque animum movent, quam præsentia, & exhibita, quippe plerumque aut minuta, aut infra votum; ut reverà mortalem vitam æstimanti appareat, plus sperando futura, & falsa, quam præsentia, & vera possidendo homines lætari. Vide S. Thomam 1. 2. q. 32. a. 3.

Ceterum non tantum de corporalibus, verum etiam spiritualibus bonis gaudium esse, imò istud longè majus, & intensius nasci, dubium non est, idque experientiâ patet; quis enim non malit cæcus, quam brutum esse, hoc est oculo, quam intellectu carere? at

ocu-

oculos corporeæ, intellectus spiritualis delectationis instrumentum, & minister est; quoddam verò plures corporeis delectentur, vitium est, non natura. Vide S. Augustinum *Lib. 14. de Civitate Dei cap. 14.* & S. Thomam 1. 2. q. 31. a. 5. ubi: *Si comparentur delectationes intelligibiles spirituales delectationibus sensibilibus corporalibus, sic secundum se, & simpliciter loquendo delectationes spirituales sunt majores.* Et hoc apparet secundum tria, quæ requiruntur ad delectationem, scilicet bonum conjunctum; & id cui conjungitur, & ipsa coniunctio: Nam ipsum bonum spirituale est majus, quàm corporale bonum, & est magis dilectum, cuius signum est, quod homines etiam à maximis corporalibus voluptatibus abstinere, ut non perdant honorem, qui est bonum intelligibile. Similiter etiam ipsa pars intellectiva est multo nobilior, & magis cognoscitiva, quàm per sensitiva. Coniunctio etiam utriusque est magis intima, magisque perfecta, & magis firma. Intimior quidem, quia sensus sistit circa exteriora accidentia rei, intellectus verò penetrat usque ad rei essentiam. Perfectior autem, quia coniunctioni sensibilis ad sensum adiungitur motus, qui est actus imperfectus; unde & delectationes sensibiles non sunt totæ simul, sed in eis aliquid pertransit, & aliquid expectatur consumandum, ut patet in delectatione ciborum, & sonorum: sed intelligibilia sunt absque motu, unde delectationes tales sunt totæ simul. Est etiam firmior, quia delectabilia corporalia sunt corruptibilia, & citò deficiat, bona verò spiritualia sunt incorruptibilia, & ideo dicit Philosophus 10. *Ethicorum cap. 7. & 8. quod maxima delectatio est secundum operationem sapientiæ.* Cum ergo tanta sit hominibus gaudendi cupido, ut malint non vivere, quàm vitam degere omnis prorsus delectationis expertem; sicque tota peccati illecebra sit dulcedo, & oblectatio peccandi: tota verò difficultas virtutis, quod non delectet; hinc est, ut iuxta constantem, ac millies repetitam S. Augustini sententiam, tota gratiæ triumphatricis virtus, & efficacia in eo posita sit, ut ostendat, & delectet, sicque peccandi dulcedinem aliâ, majorique dulcedine vincat. Infinitus sim, si omnia ex Augustino producam; unum tantum, alterumve sufficiat: Nam *Lib. 2. ad Bonifacium cap. 9.* Ipse est, inquit, cui fideliter, veraciterque cantatur: *præveniisti eum in benedictionibus dulcedinis: & quid hic aptius intelligitur, quàm ipsa cupiditas boni? tunc enim bonum concupisci incipit, cum dulcescere incipit.* Ergo benedictio dulcedinis est gratia Dei, quæ fit in nobis, ut nos delectet, & cupiamus, hoc est, amemus, quod præcipit nobis, in qua

qua si nos non prævenit Deus, non solum non perficitur, sed nec inchoatur ex nobis. Et in illa Joan. 6. Erunt omnes docibiles Dei. Videte, quomodo trahat Pater, docendo delectat, non necessitatem imponendo: ecce quomodo trahit: erunt omnes docibiles Dei, trahere Dei est. Et Tract. 26. in Joan. Magna gratia commendatio, nemo venit ad Patrem, nisi tractus; quomodo ergo voluntate credo, si trahor? ego dico: parum est voluntate, etiam voluptate traheris: quid est trahi voluntate: delectare in Domino, & dabit tibi petitiones cordis tui, est quædam voluptas cordis, cui panis dulcis est ille cælestis. Porro si Poeta dicere licuit: trahit sua quemq; voluptas; non necessitas, sed voluptas; non obligatio sed delectatio; quanto fortius nos dicere debemus, trahi ad Christum, qui delectatur veritate, delectatur beatitudine, delectatur iustitiâ, delectatur sempiternâ vitâ? An verò habent corporis sensus voluptates suas, & animus deseritur à voluptatibus suis? Si animus non habet voluptates suas, unde dicitur: torrente voluptatis deliciarum tuarum potabis eos, quoniam apud te est fons vitæ? Da amantem, da desiderantem, da in ista solitudine peregrinantem, atq; sitientem, & fontem æternæ patriæ inspirantem, da talem, & scit, quid dicam; si autem frigidus loquar, nescit, quid loquor. . . . Ista ergo revelatio, ipsa est attractio: ramum viridem ostendis ovi, & trahis illam, nuces puero demonstrantur, & trahitur; & quod currit, amando trahitur, sine lesione corporis trahitur, cordis vinculo trahitur. Si ergo ista, quæ inter delicias, & voluptates terrenas revelantur amantibus, trahunt, quoniam verum est: trahit sua quemq; voluptas; non trahet revelatus Christus à Patre? Quid enim fortius desiderat anima, quam veritatem? Et Lib. 2. contra Faustum cap. 28. Si enim nihil delectaret illicitum, nemo peccaret. Et Serm. 17. de Verb. Apost. cap. 3. elegantissimè hæc habet: Amanda est iustitia, & in hac iustitia amanda gradus sunt proficientium. Prius est, ut amor iustitiæ præponatur omnibus, quæ delectant. Quid est, quod dixi? ut inter omnia, quæ delectant, plus te delectet ipsa iustitia; non ut alia non delectent, sed prius ipsa delectet. Iustitia sic delectet, ut vincat etiam licitas delectationes. Constituamus ante oculos exemplum certaminis. Interrogo, utrum ames iustitiam? respondebis, amo; quod non responderes veraciter, nisi te aliquatenus delectaret; non enim amatur, nisi quod delectat; delectare in Domino, Dominus autem iustitia est. Non enim tibi fingere debes Deum, quæ si idolum, quod vides. Invisibilis similis est Deus, & ea, quæ in nobis

his sunt meliora quæ sunt invisibilia . Melior est fides , quàm caro ; melior est fides , quàm aurum , quàm prædia , quàm familia , & ista omnia videntur , fides non videtur . Habes duos servos , unum deformem corpore , alium pulcherrimum ; sed illum deformem fidelem , alterum infidelem . Dic mihi , quem plus diligas ? & video te amare invisibilia , quid enim , quando plus amas servum fidelem , licet corpore deformem , quàm pulchrum infidelem , an errasti , & fæda pulchris præposuisti ? utiq; non , sed pulchriora fædis præposuisti . Interrogasti oculos carnis , & quid tibi renuntiaverunt ? ille puleher est , ille fædus : repulisti eorum testimonium , & præposuisti servum fidelem , & non servum pulchrum . Quid fide pulchrius ? quid infidelitate deformius ? ergo præ omnibus voluptatibus , hoc est , delectationibus etiam licitis amanda est iustitia . Ecce delectat te aurum tuum , oculos tuos delectat ; metallum enim est pulchrum , fulgentissimum , non nego : nam si pulchrum negavero , Creatori injuriam facio . Venit ergo tentator , & dicit tibi : tollo tibi aurum , nisi dixeris falsum testimonium , si autem dixeris , addo tibi . Decedant in te duæ delectationes ; modo te interrogo , quid præponas , quid te plus delectet , aurum , an veritas , aurum , an verum testimonium ? Longum est , per singulos corporis sensus excurrere , sed quod de oculis dixi , hoc de cæteris intelligite , & præponite delectationi carnis delectationem mentis : Carnem quippe vestram delectant illicitæ voluptates ; mentem vestram delectet invisibilis , pulchra , casta , sancta , canora , dulcis iustitia , ut non ad eam timore cogamini ; si enim ad eam timore cogimini , nondum delectat ; peccare non debes , non timore pænæ , sed amore iustitiæ . Quando enim peccabatis , & delectabamini in peccatis vestris , timor vos adducebat ad peccandum , an suavis peccati ? respondebitis suavis . Ergo ad peccatum suavis adducit , & ad iustitiam timor impinget ? probate vos , inspicite vos , tollat aurum , qui minatur , suavior est iustitia , lucidior est iustitia . . . Sic ergo , sic amanda est iustitia , quomodo amata est iniquitas ? absit , ut sic , sed & utinam vel sic . Ergo plus ? plus omnino . In iniquitate secutus es voluptatem , pro iustitia toiera dolorem , & hoc est plus . Parum est , ut contemnas , quidquid te delectabat , contemne , quidquid terrebat , contemne carcerem , contemne vincula , contemne mortem , hæc vicisti , & iustitiam invenisti . In utroq; gradu amatores iustitiæ vos probate . Invenimus forsitan aliquos , qui præponant iustitiæ delectationem ; qui autem pro illa pænâ , dolores , mortemq; contemnant , putas est aliquis in vobis ? omne gaudium existimate Fratres , cum in tentationes varias incideritis : quid

D d

addi

addi potest, ut opus perfectum habeatur? amat, ardet, fervet, calcit omnia, quæ delectant, & transit: venit ad aspera, horrenda, truculenta, minacia; calcit, frangit, & transit: ô amare! ô ire! ô sibi perire! ô ad Deum pervenire! sic armandus est amator iustitiæ, sic armandus est amator invisibilis pulchritudinis. Sed prius Fratres mei plangite, quod eratis, ut, quod nondum estis, esse possitis, hoc enim, quod loquor, magnum est. Et unde nobis magnum, unde nobis? audite: omne datum optimum, & omne datum perfectum de sursum est, descendens à Patre luminum. Inde est, quod nondum habemus bonum; non habetis? petite, & accipietis. Examine se ergo omnis homo, & quidquid in se boni invenerit, quod pertineat ad justificationem nostram, agat gratias illi, qui dedit, & ab illo petat, quod nondum dedit. Non enim tu in proficiendo proficis, & ille in deficiendo deficit; quantumlibet capaces fauces, capacem ventrem afferas, fons vincit sumentem. Et denique ad Simplicianum Lib. I. q. 2. Quis potest credere, nisi aliqua vocatione, hoc est, aliqua rerum testificatione tangeretur? Quis habet in potestate tali viso attingi mentem suam, quo eius voluntas moveatur ad fidem? Quis autem animo complectitur aliquid, quod eum non delectat? aut quis habet potestatem, ut vel occurrat, quod eum delectare possit, vel delectet, cum occurrerit? Cum ergo nos ea delectant; quibus proficimus ad Deum, inquiratur hoc, & præbetur gratia Dei, non nutu nostro, aut industriâ, aut operum meritis comparatur.

Ex his omnibus Augustini testimoniis clarissimum est, nullam aliam ab eo gratiam effectricem cognitam esse, quàm quæ illustrando, & delectando intellectum simul, & voluntatem expugnet; idque jure merito: Cum enim homo, ut peccare velit, aut ignorantiam, aut dulcedine creati alicujus boni adducatur, gratia, quæ facit, ut peccare non velit, non aliter id assequi potest, quàm ignorantiam contraria luce, voluntatem contraria voluptate vincendo, agendoque, ut appareant, quæ prius latebant, ut delectent, quæ prius non delectabant; sic enim tota radice, & illecebrâ peccati sublatâ, ignorantiam videlicet æterni veri, ac amore fallacis boni, tam non potest esse voluntas peccandi, quàm non potest effectus esse sublatâ causâ. Quæ tamen non ita intelligenda sunt, quasi suavitas, & delectatio illa, quam gratia inspirat, omnem penitus aut in voluntate, aut in appetitu sensitivo difficultatem, & repugnantiam deleat: sicut enim non ideo dantur militi arma, ut nullum hostem, aut pugnam habeat, sed ut pugnando hosti prævaleat; ita gratia non ideo homini datur, ut omni

pi difficultate careat, sed ut ipsam difficultatem superet, luctando: que coronam mereatur, hoste quidem victo, sed nunquam planè de bellato juxta illud Apostoli ad Rom. 7. *Condelector quidem Legi Dei secundum interiorem hominem, video autem aliam legem in membris meis repugnantem legi mentis meae. Infelix ego homo, quis me liberabit de corpore mortis huius? gratia Dei per JESUM Christum Dominum nostrum.* Hæc ergo est illa gratia, quam Augustinus mirabilem, ineffabilem, efficacissimam, invictam, omnipotentissimam, indeclinabilem, insuperabilem, triumphatricem, & denique, ac frequentissimè congruam appellat; hoc est, talem, tamque flectendæ voluntati accommodatam, ut nunquam non flectat, & vincat, siue, ut ipse loquitur: *quæ facit de nolente volentem, quæq; à nullo corde respuitur.* Neque id mirum videri debet; voluntas enim non appetit nisi aliquod bonum; neque fugit, & averfatur, nisi aliquod malum, si ergo impudico proponatur castitas non solum ut bonum, sed etiam ut magnum bonum, magnisq; præmiis donandum, nec cum Dei auxilio difficile (ut reverà non est) impuritas verò non solum ut res vana, breviq; cessatura; verumetiam ut maximum malum, & gravissimis pœnis cum æternis, tum temporalibus obnoxium; voluntas hanc averfabitur, quia propositam instar maximi mali; illam verò amplectetur, quia propositam instar maximi boni: hoc enim est voluntati bonum, & malum, quod lanci majus, minusq; pondus; sicut ergo majus pondus lancem ad se trahit, ita majus bonum voluntatem: nam quod voluntas pro sua libertate minus bonum majori præponat, ideo est, quia majus bonum non considerat (quæ ipsis quoque Angelis causa peccandi fuit, teste Angelico Doctore) considerat verò minus bonum, quippe & à sensibus, & à pravis habitibus, & ab experientia, & à potentia imaginativa pictrice omnium maxima vivacissimè propositum; sicut ergo parva scintilla magis urit; quàm magnum incendium, non quia major, sed quia vicinior; ita aliquod bonum sæpe voluntatem plùs movet, non quia majus, sed quia notius. Si ergo Deus bonum honestum tam clarè, cumque omnibus illecebris, & deliciis suis voluntati obiciat, ut sensus appetitui solet, dubium non est, amaturam voluntatem, & in amplexum ruituram. Et hæc est gratia, de qua loquitur Augustinus, ea videlicet, quæ pulchritudinem boni honesti tam affabrè voluntati depingit, ut rapiat in amorem.

Id Augustinus *Lib. de Corrept. & Grat.* eleganti exemplo Eſthe-
 D d 2 ræ

re Reginæ ostendit, de qua cum ad Regem exorandum ingrederetur, ita loquitur Scriptura cap. 15. *Illa autem roseo colore vultum persusa, & gratis, ac nitentibus oculis ingressa cuncta per ordinem ostia stetit contra Regem, ubi ille residebat super solium Regni sui indutus vestibus regiis, auroque fulgens, & pretiosis lapidibus, eratque terribilis aspectu. Cumque elevasset faciem, & ardentibus oculis furorem pectoris indicasset, Regina corruit, & in pallorem colore mutato lassæ super ancillulam reclinavit caput. Convertiturque Deus spiritum Regis in mansuetudinem &c.* Ubi observa, Reginam quamvis pulchram ornatamque, non tamen flexisse animum Regis, imò potius asperâsse, quod non vocata intrâisset; flexisse autem pallidam, exanguem, & in deliquium, sinumque ancillæ collapsam; quod ergo non forma, non roseus color, non regius ornatus potuit, id pallor, & deliquium potuit; & cum Deus ad vincendum barbari Regis animum posset venustate uti, maluit languore: una ergo, eademque Regina fuit, & valida, & exanguis, sed uno modo regium animum movit, alio non movit. Idem libero arbitrio contingit, de quo Augustinus ad Simplicianum Lib. 1. q. 2. *Alius sic, alius autem sic movetur ad fidem; eademque res sæpe, alio modo dicta movet, alia modo dicta non movet, aliumque movet, alium non movet.* Hoc ergo est voluntati bonum, quod pulchra facies videnti; trahit enim, non cogit, quia trahit amantem, sicque de nolente volentem facit. Quid minus ad amandum dispositum erat, quam Affueri animus furore incensus? amavit tamen pulchra facie ex adverso micante, ac instar Solis tanto dulcius flagentis, quanto propius occasum. Si ergo tanta vis pulchritudini creatæ, cur non major increatæ, si voluntati quantumvis averas offeratur? An quod potest scintilla, non possit incendium? nam revera nihil aliud est forma creata, quam scintilla increatæ. Verum quidem est, unam, eademque veritatem, unum, idemque bonum jam valere, jam non valere inflammando amori; imò sæpe minus bonum efficere, quia melius propositum, quod majus non potuit; sicut in humano vultu minus pulcher est pallidus, quam roseus color, & tamen in placando Rege ille prævaluit; quid ergo mirum est, idem quoque in vertenda voluntate contingere, Deo ita faciem veri, bonique ostendente, ut placeat, & vincat? De Cleopatra refert Historia, tantum ejus formæ lenocinium fuisse, ut neminem intuentem non caperet, & ideo non aliter cum illa Augustum, quam dejectis in terram oculis locutum esse. Quid de Phryne Græcarum formosissima dicam, quæ

capi-

capitis damnanda, cum flammeum removisset, quo faciem velaverat, aded Judicum animos pulchritudine rapuit, ut omnium votis absolveretur? Et de Helena refert Aristoteles *Lib. 2. Ethic. cap. 9.* Sæpe à Trojanis de illa Græcis restituenda in Senatu decretum esse, sed quoties causam dictura Prætorium intrasset, aded illius venustate omnium animos perculosos esse, ut mutatâ sententiâ extrema pati, quàm reddere illam mallent. Si ergo in commovendis, versandisque in omnem partem animis tanta vis est creatæ formæ, quanta erit formæ increatæ? quod potuit lutum, non poterit Cœlum? quod potuit Helena, non poterit gratia, cum tamen, ut optimè dixit Augustinus: *incomparabiliter pulchrior sit veritas Christianorum, quàm Helena Græcorum?* Unicornem quamvis indomitum visa Virgine mansuescere, & in genua procumbere, Elephantem naturâ mitem aspectu purpuræ in rabiem agi, vertique in fugam certissimum est. Quid ergo mirum, aliquid esse, quod etiam voluntatem, si ostendatur, certissimè in aliam mutet? ostendere verò ad gratiam pertinet.

Quid de cantu, & Musica dicam? Quanta illi in ciendis, volvendisque affectibus potentia est? Alexandrum jam in furorem, jam in socordiam, utcumque vellet Timotheus cantu agebat. Saulus cytharæ lusu mœrore, & insaniâ levabatur. Theodosium Magnum Antiochenos delere parantem, quodd ejus statuem evertissent, Flavianus Episcopus aded cantu demulsi, ut convivanti lacrymæ in poculum caderent, juberetque continuò rebellibus parci. De se ipso Augustinus lib. 9. Confess. cap. 6. *Quantum flevi in Hymnis, & Canticis tuis suavè sonantis Ecclesiæ tuæ vocibus commotus acriter? Voces illæ insuebant auribus meis, & eliquabatur veritas tua in cor meum, & ex ea æstuabat affectus pietatis, & curvebant lacrymæ, & bene mihi erat cum eis.* Sed omnia superat, quæ de Erico 11. cui nomen boni, Daniæ Rege Olaus Magnus, Crantius *Lib. 5. Daniæ, & Saxo Grammaticus Lib. 12.* narrant. Verba Saxonis sunt: *Apud Ericum cognomine bonum Daniæ Regem, Citharædus quidam hæud ignobilis admirabiles, & propè stupendos artis suæ commendabat effectus, maximeq; illud ipsum, quod in humanos sensus, mentesq; obtineret imperium. Rex verborum novitate percussus, qui neq; tantam vim musica arbitraretur, continuò hominem artis suæ specimen edere jubet, & torpentes animos ad furorem Martium, si posset, accendere. Annuuit ille, & nequa nocendi ansa daretur, arma omnia ex aula efferri præcipit, Custodesq; in atrio collocari, quo furentes, si qui fortè in*
insa-

insaniam agerentur, compeſcerent. Dictum, factum. Tum illa, quæ plurimum pollebat, cantandi peritiâ primum quidem inusitata ſeveritatis concentum edidit, quo ſtupore quodam, & mœrore omnium, quotquot aderant, Auditorum mentes cernebantur oppreſſæ. Deinde adeo ſuaves, & mellitos cantus effudit, ut toti jactatione corporis intemperantem proderent letitiam. Tandem verò ubi acrioribus modulis intonare cepit, continuò totis tectis fremere, tumultuari, arma, & gladios inclamare. Nec mora, accurrunt Cuſtodes, ut Regem cum aliis furentem contineant. Sed ille effraſtis atrii foribus, arrepto enſe quatuor tranſfodit, & ut actus in rabiem taurus totis bacchatur adibus. Vix tandem pulvinarium, & lectulorum mole undiq; oppreſſus contineri potuit. Poſtquam menti reſtitutus eſt, relicto Procuratore Regni Filio Jeruſolymam expiandorum homicidiorum per pios cruciatus gratiâ proſectus eſt, atq; in Cypro deſunctus. Quid ſi quæras, unde in animi affectus tantum Muſicæ imperium? dari alia ratio non poteſt, quàm ſoni, aëriſque per ſonum concitati ad ſpiritum animale proportionem, quidamque Magnetismus, & occulta Sympathia; juxta enim proportionem ſoni, aëriſque vibrati, neceſſe eſt, moveri phantaſiam, humoresque corporis, aut criſpari, aut denſari, aut rareſceri, accendiſque ex motu verò phantaſiæ, humorumque, ac præſertim ſpiritus animalis agitatione alios, alioſque affectus in anima concitari: nam, ut ait Auguſtinus lib. 10. Conf. cap. 33. *Omnes affectus ſpiritus noſtri pro ſui diverſitate habent proprios modos in voce, atq; cantu, quorum nescio qua occulta varietate excitantur.* Et Athanaſius Kircherus in ſua Muſurgia lib. 7. fol. 552. *Latent in ſingulis rebus proportionem quadam, quarum concuſſu omnes rerum exoticæ operationes conſciuntur, quarum proportionum ſi quis perfectè rationem noſſet, is hæud dubiè maxima naturæ miracula in ſuſcitandis animi paſſionibus vi muſicæ efficere poſſet: ſi quis igitur harmoniam accommodare poſſet, ut ſpiritus eodem proſus modo, quo harmonici numeri moverentur; is intentum effectum produceret hæud dubiè.*

Si ergo in mollienda, ſectendaque voluntate tanta vis cantus, quantum major vis gratiæ? Et ſi ad eam ſuperandam tantum valet proportio ſoni, quantum magis valebit proportio, & cognitio boni, quod proprium illius obiectum eſt? An verò poterit peritus muſicus reperire ſonum, quo certiffimè affectum moveat, & non poterit Deus reperire obiectum, quo certiffimè voluntatem in aliam mutet? Aut anima magis cantui ſubditur, quàm veritati?

Paria

Paria de vi , & efficacia persuadendi , hoc est , eloquentia occurrunt : Possunt enim argumenta aliqua tam clara esse , tantaque facundia proponi , ut continuò & intellectum , & voluntatem capiant , subdantque veritati : ut bene de Eloquentia cecinerit Horatius lib. 3. Ode 11

*Tu potes Tigres , comitesque silvas
Ducere , & rivos celeres morari ,
Cessit immanis tibi blandienti
Janitor Aulae .
Cerberus , quamvis furiale centum
Muniant angues caput ejus , atque
Spiritus teter , saniesque manet
Ore trilingui .*

Et Tullius Lib. 2. de Orat. Tantam vim habet omnium Regina rerum Eloquentia , ut adversantem , & repugnantem , quò velit , inducat , deducat , unde velit . De Cleopatra Ægypti Regina narrat Dion lib. 42. Tantum in ejus verbis fuisse leporem , ut quisquis illam loquentem audiret , amore concideret . Scribit Laërtius , Palæmonem solutissimis moribus juvenem aliquando semiebrium , meretricio cultu , floribus , & unguentis sparsum Scholam irrupisse , dum Xenocrates de Temperantia diceret : sic verò illius argumentis , & eloquentiâ captum , ut delitiis , amoribus , ornatuque posito adeò pudicus , sobrius , sibi que dissimilis evaderet , ut passim ab omnibus ob morum gravitatem Tonus Doricus audiret , & ne à cane quidem rapido morsus vultum , aut colorem mutaret . Simile aliquid de Diogene refertur : cum videlicet Juvenem quendam obvium habuisset ob recentem in Ludis Olympicis victoriam triumphantem , palmâ , coronaque insignem , ac ingenti plaudentium turbâ circumfusum , quæ ovantem deducebat , interrogasse : quæ tanti apparatus , & causa tripudii ? eo que respondente , ob florem Græcæ Juventutis à se in lucta superatum ; Diogenem intulisse : quos ergo vicisse te gloriaris ; fortiores , pares , an imbecilliores te viribus erant ? non fortiores , aut pares ; alioquin victi non essent ; imbecilliores ergo : at vicisse imbecilliores , quæ tandem gloria est , aut quis non possit ? quin potius omissa hac virium pugna , quibus te bestię vincunt , quasque & morbus , & senium carpent , ad sapientiam , moresque componendos te vertis , perpetuâ tui gloriâ , & bono ? Nec mora , pudore suffusum juvenem palmâ , coronâ , turbâque omittis Philosophum induisse . Scribit in Atticis Bellariis Pontanus par. 2. cap. 16. Fuisse Chinesem , qui Regi

Regi suo persuaferat, repertum à se pharmacum, quo fieret immortalis; poculum verò in Aulam allatum quendam ex Amicis involasse, haussisseque, quem cum Rex nudato ferro invaderet, hoc Dilemmate furentem stitisse: aut, inquit, potio illa immortalem facit, aut non facit? Si facit, frustra mihi necem intentas; si non facit, ergo deceptus es, nec mortem mereor, qui te hac fraude liberavi. Tam clara visa argumentatio, ut ferrum Princeps recondere, dolumque intelligeret. Missi à Menia Milites, qui Antonium cæderent, cum jam gladios strinxissent, vibraissentque, aded illius oratione fracti, ut sideratis, ac stupentibus similes reinfecta ad suos redirent. Si ergo in ducenda, volvendaque voluntate tanta vis est verbo humano, quanta erit Verbo divino? potest Philosophus verba, & argumenta reperire, quibus intacta libertate voluntatem pleno cursu ruentem, non tantum sistat, verumetiam in oppositum vertat, & non poterit Deus? Plus dabimus Oratori, quam Creatori? plus verbo in aure, quam in mente sonanti? Nihil ergo aliud est triumphatri^x ista gratia, de qua loquimur, quam oratio, & Rhetorica Dei humanam voluntatem alloquentis, & alloquendo in quamcumque partem voluerit, persuadentis. Nec mirentur, si dicimus, posse Deum argumenta, & rationes invenire, quibus certissimè quamcumque etiam obliquantem voluntatem expugnet, cum id Diogenes, Tullii, Antonii, Cleopatraz, Xenocrates, aliique potuerint. *Liquefacta est anima mea, cum dilectus locutus est*, inquit aliqua, quæ amat: hoc ergo est cordi duro Verbum Dei, quod metallo est ardor ignis: liquecunt igni metalla, & non liquecunt corda Dei Verbo? Fac ærea, fac adamantina esse, ad hunc ignem solventur. Quod si in magno hoc Mundo dicente Deo facta sunt omnia, nihil novi, aut insoliti est, si dicamus, etiam in Mundo minori, hoc est, homine, dicente Deo, fieri omnia. Quid qualitates prædeterminantes, hoc est, quid arietes, & machinas, & vocabula quærimus, nec in Scripturis, nec in Patribus audita quatiendæ ac debellandæ voluntati, cum pro omnibus machinis unum Dei Verbum, nutusque sufficiat? Dixit: *fiat lux*, & facta est lux; *fiat Cælum*, *fiat Mare*, factumque est Cælum, & Mare: cur non etiam dicente illo, fiat in voluntate amor, non fiet amor? fiant lacrymæ, fiat castitas; non fient lacrymæ, & castitas? Ergo ut aliquando concludam: Deus, qui dicendo fecit Mundum ex nihilo, dicendo quoque facit justum ex peccatore (nam & peccatum nihil est) & hoc ipsam ita dicere, ut fiat, est gratia

tia Dei, quam prædicamus, & quam semper docuit Augustinus; qui verò aliter explicant, aliterque sentiunt; pace illorum dixerim: nec satis cum Augustino conveniunt, nec tantum Deo in anima loquenti tribuunt, quantum Dei verba merentur. Fixum ergo, ratumque sit, nihil aliud ex sententia Augustini gratiam effectricem esse, quam *cognitionem congruam*, hoc est, quæ tale, tamque proportionatum objectum, tali que modo proponat, ut ad illud amplectendum voluntas Magnetismo, & Sympathiâ quadam certissime moveatur. Nulla igitur tam fortis, & adversa, aut ex vicio, aut ex natura inclinatio, nulla vis inolitæ consuetudinis, quæ victrici huic gratiæ non planè succumbat, sive confestim, unoque velut impetu, ut in Paulo, & Magdalena; sive, ut plerumque contingit, paulatim, & longo velut bello voluntatem submittat. Si enim domari arte, contraque naturam Urso, Leones, aspides videmus; quis dubitet, posse domari gratiæ etiam voluntatem quamvis averfam, & repugnantem? An verò plus arti, quam gratiæ dabimus? quæ tamen & ipsa nihil aliud est, quam ars quædam Dei providentis. Quod si nemo tam avarus est, qui non furto abstineat metu præsentis Judicis, & à quo supplicium præsens expectet; nemo tam impatiens amoris, qui non temperet, si corruptam peste, aut leprâ amicam intelligat; nemo tam inimicus, qui non vindictam omittat, principe ipso rogante, & Regnum pollicente; si nulla, inquam, cupiditas est tam magna, & præceps, quæ majori spei, aut metui non cedat; quando magis nulla cupiditas, nulla consuetudo, nullumque vitium erit, quod timori omnium maximi, & certissimi mali, ac spei omnium maximi, & certissimi boni non continud cedat, gratiâ utrumque & validissime intellectui proponente? Hæc ergo est gratia illa victrix, quam, ut cordis humani potiatur, impedire nihil potest, & de hac dictum est: *Nihil est, quod tuæ possit resistere voluntati, si salvare decreveris Israel.* Ester 13.

II. Dices: Voluntas hominis est intrinsecè, ac physicè impotens ad actum supernaturalem, v. g. amoris, veræque contritionis: at per solam propositionem objecti, sanctasque inspirationes & illustrationes (quæ tantum moraliter movent) non potest physicè fieri potens; debet ergo fieri talis non solum per objecti propositionem hæcenus à nobis explicatam; sed per aliquam qualitatem ordinis supernaturalis (in iis præsertim peccatoribus, qui habitum charitatis necdum adepti sunt) quam qualitatem Theologi *physicam prædeter-*

E c

mina-

minationem vocare solent. Rursus bonitas objecti, quamvis infiniti, quamvis clarissimè, ac vivacissimè propositi, extra visionem beatificam voluntatem relinquit indifferentem, & indeterminatam ad amandum, & non amandum; debet ergo præter cognitionem objecti aliud principium effectivum admitti, à quo determinetur; neque enim dici potest, voluntatem indeterminatam à se ipsa determinari; cum enim ea determinatio sit res creata, debet subordinari, & dependere à causa prima, ejusque influxu, non tantum in genere naturæ, & potentiae verumetiam in esse agentis, & quoad ipsam actualem causalitatem.

Resp. Nec nobis, nec aliis quibuscumque rem bene, citraque affectum, ac privatum in partes studium consideranti hanc explicandi gratiæ efficacis rationem probari posse. *Primo* enim quæro, an in S. Augustino hanc qualitatem prædeterminantem aliquando repperint, aut non repperint? si repperunt, locum aliquem Augustini ostendant; at nunquam ostenderunt, nunquam ostendent. Si verò nunquam repperunt, quæ rogo fiducia est, in explicanda natura gratiæ scire aliquid melius velle, quàm sciverit Augustinus? aut velle querere & invenire, quod tanto studio, tanto ingenio, tantaque oratione nunquam Augustinus invenit? Quod argumentandi genus multò validius contra illos est, qui tantoperè Augustino gloriantur, nec patiuntur aliquid in hac causa dici, non ab Augustino acceptum. Nec opponant, gratiam efficacem ab Augustino *omnipotentissimam, invictissimam, indeclinabilem* &c. vocari, quæ elogia non videntur cadere in causam merè, uniceque moralem: Nam suppositum, quo nituntur, incertissimum est; quàm multi enim etiam ex nobilissimis Thomistarum sunt, qui docent, ab objecto, ejusque oblata bonitate non moraliter tantum, sed etiam physicè moveri voluntatem, ut oculus à colore, ejusque speciebus, utque in Divinis Verbum physicè spirat amorem? *Deinde*, quid opus rixis, & cavillationibus est; cum ipse Augustinus verborum suorum optimus interpret, toties ac tam disertè mentem suam explicaverit, eo videlicet modo, quem ex clarissimis, & quàmplurimis ejus testimoniis suprà ostendimus. Vocat ergo *omnipotentem*, non eo sensu, quem Gonetus, aliique obtendunt; sed quia omnia potest: *invincibilem*, quia omnia vincit: *indeclinabilem*, quia omnia superat: *triumphatricem*, quia omnia expugnat. *Secundo*. Qualitas illa prædeterminans tot difficultatibus implicatur; ut facilius Nodum Gordium, quàm illas exsolvas, ut

pas-

passim apud Theologos videre est. Sicque Ænigma Prædestinationis alio Ænigmate non tam explicant, quàm obscurant, Ænigma enim Ænigmati additum, sicut obscurum obscuro additum, non facit rem clariorem, sed facit magis obscuram, ut taceam alia mille, quæ ne à doctissimis quidem hæcenus intellecta sunt, & nec forsitan ab eorum Auctoribus.

Nec obstant, quæ opponuntur: Voluntas enim multis modis citra physicam prædeterminationem fit physicè potens ad operandum, nam quoad *specificationem*, hoc est, ut potiùs amet, quàm odio habeat, redditur potens, & determinatur à bono, & objecto supernaturali, quod per suas species in voluntatem agit, inclinaturque instar ponderis. Rursus fit potens per concursum simultaneum; sicut equus fit potens ad trahendum currum per rotam, sine qua equus non posset; jam verò suprà notavimus, hoc esse gratiam voluntati, quod rotam, & machinam currui. Deniq; & principaliter, ad actus supernaturales fit voluntas potens per voluntatem illam, & Decretum Dei æternum quidem, sed in tempore operans, quo Deus vult hîc, & nunc voluntatem Petri potiùs amare, quàm non amare. Hoc verò est illud stabile, fixumque Dei propositum, quod toties Apostolum, & Augustinum legenti occurrit. Quod Decretum licet formaliter indifferens, quippe liberum, & causa actûs liberi, est tamen eminenter, & virtualiter determinatum, & ideo potest esse causa effectûs determinati, nam quod est eminenter tale, idem potest, quàm quod est formaliter tale. Ita Sol eminenter calidus æquè manum calefacit, ac etiam objectum corpus inflamat, ac ignis, qui est formaliter calidus: & lux eminenter colorata æquè objectum colorat, & tingit (ut in nubibus, & iride, vitroque trigono videre est) ac coccus, & cinabarium, quæ sunt formaliter colorata. Idem dicas de voluntate humana, quæ licet omnibus omnino tam ex parte objecti, quàm ex parte Dei spectatis sit formaliter indifferens, quippe libera, est tamen eminenter, & virtualiter determinata, cum se ipsam determinare possit; utpote suorum actuum Domina; potest ergo ab illa quamvis indeterminatâ effectus determinatus prodire: Si enim à principio non calido potest calor procedere, & à principio non colorato potest effectus coloratus; cur non à principio indeterminato effectus determinatus? Cum ergo quæris, quis determinet voluntatem indeterminatam? Respondet: ipfam voluntatem, dependenter tamen à Causa prima, à qua

& virtutem se determinandi accepit, & concursus quoque simultaneus, & consequenter à qua non tantum quoad esse, verumetiam quoad operari dependet. Si ergo voluntas hominis, ejusque determinatio, & operatio à primo Operante, primaque Causa dependet, ei que subordinatur; cessant omnia absurda, quæ huic nostræ sententiæ opponuntur; nihil enim aliud à Causa secunda exigi potest, quam ut in esse, & in operari, in ipsa que sui determinatione à Causa prima dependeat, quamvis à Causa prima non prædeterminetur: præsertim si consideres, in voluntate operante nihil esse, quod non verè, proprièque causetur à Deo. In voluntate enim, cum v. g. amat, nihil aliud est, quam potentia voluntatis, & ipse actus amoris, qui actus solus voluntatem determinat, (nec datur media alia determinatio inter actum, & voluntatem, ut aliqui sibi imaginantur, alioquin eundem esset in infinitum) at tam ipsa voluntas, quam ipse actus voluntatis à Deo est, tanquam à causa: concursus enim simultaneus est vera causa amoris, omniumque actum, qui à voluntate procedunt. Et planè voluntatem à nullo alio, quam à se ipsa determinari (dependenter tamen à causa prima, ut modò explicatum est) apertissimè docet S. Thomas. Sic enim loquitur in 2. Distinct. 39. quæst. 1. art. 1. *Ipsa potentia voluntatis, quantum in se est, indifferens est ad plura, sed quod determinatè exeat in hunc actum, vel in illum, non est ab alio determinatè, sed ab ipsa voluntate.* Et q. 3. de Malo art. 3. ad 3. *Voluntas cum sit ad utrumlibet, per aliquid determinatur ad unum, scilicet per consilium rationis, nec oportet, hoc esse per aliquod agens extrinsecum.* Et 1. 2. q. 9. a. 6. ad 3. Ubi proposita quæstione, an voluntas moveatur à Deo sicut exteriori principio, respondet: *Deus movet voluntatem hominis sicut universalis Motor ad universale objectum voluntatis, quod est bonum* (tribuendo ei videlicet naturalem inclinationem, & determinationem ad solum bonum, sicut gravibus ad centrum) & *sine, hac universali motione homo non potest aliquid velle: sed homo per rationem determinat se ad volendum hoc, vel illud, quod est verè bonum; sed tamen interdum specialiter Deus movet aliquos ad aliquid determinatè volendum, sicut in his, quos movet per gratiam.* Vides clarissimè docere S. Thomam, excepto speciali casu gratiæ voluntatem creatam à se ipsa, non à Deo determinari. Quod si omnino velis, voluntatem creatam ab increata determinari, moverique, istud quoque in sano sensu verissimum est: Illud enim propositum, decretumque divinum, quo
Deus

Deus voluit, ut Petrus hinc, & nunc amaret, & quo statuit, in hunc finem tales ei gratias dare, quibus ad amandum moveretur, hoc, inquam, divinum Decretum verissima causa est, ut Petrus amet, & ad amandum determinetur. Quamvis enim hujusmodi Dei Decretum sit formaliter indifferens, ideoque libertati humanæ accommodatum, est tamen virtualiter, & eminenter determinatum, & ideo potest effectum determinatum producere modo, quem paulò antè insinuavimus. Et hæc ipsa ratio est, ut in hujusmodi Decreto suo, simulque in humana voluntate velut in causa Deus futurum Petri amorem certissimè prævideat: Cùm enim Deus & suam, & hominis voluntatem perfectissimè comprehendat, comprehendit quoque, cognoscitque omnes effectus ab utraque profecturos, hoc enim ipsum est causam comprehendere, nihil videlicet in ejus sinu esse, nihil ex ea futurum, quod cognoscentem lateat, quod præsertim de intellectu infinito verum est, qui se ad omnem speciem, & conditionem veri extendit; At etiam futura vera sunt, præsertim quia si futura non cognoscerentur, ideo esset, quia non sunt præsentia; at sunt præsentia, & coëxistunt æternitati, sicut minimum centrum coëxistit toti, maximoque circulo, quæ perpetua est S. Thomæ sententia 1. p. q. 14. a. 13. & contra Gentes cap. 67. Et alibi sæpè. Planè cùm Sacra Scriptura nihil de modo dicat, quo Deus voluntatem humanam movet, ac futura contingentia cognoscit (quod etiam fatetur Augustinus Lib. 8. in Gen. cap. 21. & alibi frequenter) dicat verò frequentissimè, milliesque repetat: *Deum velle omnes salvos fieri: relinquere hominem in manu consilii sui: expectare, ut faciat iras, & non labruseas: stare ad ostium, & pulsare, ut si quis aperiat, ad eum intret.* Cùm, inquam, ita se res habeat, mirum est, si quis contra regulam Augustini ista certissima propter illa incertissima neget. Quando ergo Angelicus Doctor alicubi dicere videtur, voluntatem hominis à Deo determinari, alibi verò contendit, non determinari nisi à se ipsa; ea ratione intelligendus est, quam modò exposuimus. Si ergo quæras, cur Decretum divinum, quod indifferens est ad amandum, & non amandum; causet potius amorem, quàm non amorem? Respondeo, idem quæri posse, cur Decretum divinum, quod indifferens est ad creandum Mundum A, & Mundum B; potius creet Mundum, A. quàm Mundum B? Causa ergo est, quia ob infinitam, & illimitatam perfectionis suæ plenitudinem voluntas divina ita formaliter est indifferens, ut eminenter sit determinata. Taceo importunam,

nam, & superfluum quæstionem esse, cum quæritur, cur voluntas divina hoc potius, quam illud velit, aut causet; hoc enim ipso, quod est causa prima, nullam aliam causam habet; & ideo tam absurdè illud quæritur, quam absurdè quæreretur, cur linea sit potius longa, quam lata, & cur centrum sit potius in medio, quam à latere circuli?

Hic etiam observandum est, Deum ad executionem Decreti illius sui, quod modò descripsimus, mutandamque hominis voluntatem, nulla qualitate opus habere, quæ voluntati inhæreat, eamque determinet; sed solo nutu, efficiamque suæ voluntatis id totum præstare: Quæ enim mutatio major cogitari potest, quam cum Deus materiâ primam tot formis cœlestibus, & sublunariis ornavit, & quando lutum animâ rationali, vitâque instruxit? At solo nutu voluntatis suæ, nullaque intermedia qualitate velut instrumento id fecit; quantum ergo magis eodem modo, eademque ratione mutare voluntatem poterit? Cum enim tota virtus agendi, quam tu qualitati illi attribuis, à Deo sit, & in Deo eminenter contineatur, sequitur; solum Deum sine illa præstare posse id totum, quod illa potest; sicut quia tota potestas jus dicendi in Iudice delegato est à Principe delegante, sequitur, solum Principem sine omni delegato posse iudicium exercere, ac sententiam ferre, quod Theologi volunt, cum universim docent, posse Deum supplere omnem virtutem causæ effectivæ non vitalis. Mutatur ergo voluntas in genere causæ effectivæ, & à Deo, & à se ipsa in genere causæ finalis à bonitate proposita; in genere verò causæ formalis ab amore, aliove actu, quem elicit, recipitque.

III. His ergo notatis, cum suprà copiosè probatum sit, gratiam petendi, orandi que nulli peccatorum negari, superest, ut ostendamus hanc ipsam orationem certissimam, & infallibile medium esse, efficacissimam hanc, & triumphatricem gratiam, præsertim verò finalis perseverantiæ à Deo impetrandi. Et quidem justos quod attingit, nihil in Sacris Litteris aut frequentius, aut clariùs exprimitur, quam eorum orationem, quoties petunt, quæ ad vitam æternam spectant, certissimò exauditum iri. Quod cum passim in Scripturis occurat, & notissimum sit, non est, ut hic fusiùs expendatur. De oratione tantum peccatoris quæstio est, de qua dicimus, si fiat, ut oportet, esse quoque efficacem, semperque exaudiri; non quidem per viam *meriti*, cum hoc dignitatem postulantis supponat; sed per viam

impe-

impetrationis, quæ solâ Dei misericordia, Christi quæ infinitis meritis nititur. Observandum tamen est, duo esse genera peccatorum: Alii enim sunt, qui nihil minus, quàm de peccatis deserendis cogitant, & instar mancipiorum, quæ libertatem pretio vendiderunt, catenas suas, & compedes amant. Istorum verò orationes non tantum non efficaces, verumetiam ingratas Deo esse, quippe temerarias, & impudentes, palam est, sæpeque in Scripturis expressum. Quid enim inverecundiùs, quàm si beneficia, & gratias à Principe petas, quem non tantum offendis, verumetiam deinceps offendere statuisti, palamque professus es? insultantis hæc oratio est, non postulantis: *qui declinat aures suas, ne audiat legem, oratio ejus fiet execrabilis*. Prov. 28. Et Isaïæ 1. *Cum extenderitis manus vestras, avertam oculos meos à vobis, & cum multiplicaveritis orationem, non exaudiam, manus enim vestrae plene sanguine sunt*. Talis fuit oratio Judæ, talis Antiochi Regis, de quo Machabæorum 9. *Orabat hic scelestus Dominum, à quo misericordiam non esset consecuturus*. Alii sunt peccatores, qui peccatum quidem fragilitate naturæ, aut impetu cupiditatis velut torrente abrepti, qui & peccatum agnoscunt, & sub jugo gement, cupiuntque servitutem, & catenas exuere, nec tamen possunt; & ideo divinum auxilium, & gratiam constanter implorant, quorum oratio illa est, quam dicimus, à Deo infallibiliter exaudiri.

IV. Primò enim *Matth. 7.* universaliter dicitur: *Omnis, qui petit, accipiet*. In quæ verba Author Operis Imperfecti Homil. 18. *Sive justus, sive peccator sit*. Et *Luc. 11.* *Dico vobis, etsi non dabit, quia amicus est, propter importunitatem tamen surget, & dabit, quicquid habet necessarium*. Ubi vides importunitatem, hoc est assiduitatem precandi æquari, imò præferri debito, juri quæ amicitia; aded ut quod amico negari potest, negari non possit importunè roganti. Ex quibus Evangelii verbis colligit etiam S. Basilii in *Constitut. Monast.* cap. 1. *peccatores impetrare, quod petunt, si perseveranter petant*. Et *Luc. 18.* Publicanus orando indulgentiam obtinet: quo exemplo S. Augustinus *Tract. 44.* in Joan. arguit illius cæci verba, dicentis: *Scimus, quia peccatores Deus non exaudit*. In quæ verba Augustinus: *Cæcus adhuc inunctus loquitur, nam & peccatores exaudit Deus, si enim peccatores Deus non exaudit, frustra ille Publicanus diceret: Deus propitius esto mihi peccatori*. S. Hieronymus quoque *Epist. ad Damasum de Filio prodigo*, docet, si peccator jam spe ac desiderio filius Dei sit, non absurdè in oratione Dominica dicere: *Pater noster,*
nam

nam & filius prodigus *Luc. 15.* nondum reconciliatus dicit se indignum, qui filius vocetur, & tamen Patrem appellat, cum ait: *Pater peccavi in Cælum, & coram te.* Et S. Chrysostomus Homil. 56. de diversis: *Non tam valet amicitia apud Deum, quam oratio, & quod amicitia non perfecit, id perfectum est ab oratione.* Idemque confirmat S. Gregorius in Psalm. 6. Pœnitentialem (si tamen hoc opus Gregorii est) exemplo Jonæ Prophetæ: *Clamavit Jonas ad Deum de ventre Ceti, de altitudine maris, de profundo inobedientiæ, & ad aures Dei oratio illius pervenit, qui eum eruit à fluctibus, eripuit à bestia, absolvit à culpa. Clamet & peccator, quem à Deo recedentem cupiditatum tempestas contrivit, quem malignus hostis absorbit, quem præsentis sæculi fluctus involvit, agnoscat, se esse in profundo, ut ad Deum sua perveniat oratio.*

Sed omnium luculentissimè Angelicus Doctor 2.2.q. 83. a 16. in C. & ad 2. In Peccatore duo sunt consideranda, scilicet natura, quam diligit Deus, culpa, quam odit. Si ergo peccator orando aliquid petit, in quantum peccator, id est, secundum desiderium peccati (v. g. iracundus vindictam, avarus injustum lucrum) in hoc à Deo non auditur ex Misericordia, sed quandoq; auditur ex iustitia ad vindictam, dum Deus permittit peccatorem adhuc amplius ruere in peccata; Deus enim quadam negat propitius, quæ concedit iratus, ut dicit Augustinus. Orationem verò peccatoris ex bono naturæ desiderio procedentem Deus audit non quasi ex iustitia, quia peccator hoc non meretur; Sed ex pura Misericordia, observatis tamen quatuor præmissis conditionibus, ut videlicet pro se petat, necessaria ad salutem, piè, & perseveranter. . . . Peccator quidem non potest orare, quasi ejus oratio ex habitu virtutis informetur; potest tamen ejus oratio esse pia, quantum ad hoc, quod petit aliquid ad pietatem pertinens, sicut ille, qui non habet habitum iustitiæ, potest aliquid iustum velle. Et quamvis ejus oratio non sit meritoria; potest tamen esse impetrativa; quia meritum ininititur iustitiæ, sed impetratio ininititur gratiæ.

Exempla quoque in Sanctis litteris abundant: Achab Regis, 3. Reg. 21. Manaïss 2. Paralip. 33. Nabuchodonosoris, Daniel. 4. Debitoris mille Talentorum, Matt. 18. Filiis prodigi. *Luc. 10.* Jonæ Prophetæ c. 2. & 3. Publicani *Luc. 18.* Denique quod olim nomine rebellium Judæorum Daniel; id omnes peccatores dicere ad Deum possunt: *Inclina aurem tuam Deus meus, & audi: neq; enim in iustificationibus nostris prosternimus preces ante faciem tuam, sed in miserationibus tuis multis.* Daniel. 9. 18. V. Et

V. Et planè id ipsum *ratio* convincit: Indignum enim est divi-
na, infinita quæ Clementiâ creaturam, ac filium repellere ejus au-
xilium & protectionem implorantem. Nec obstat, peccatorem indi-
gnum venia esse. Præterquam enim quod jam dignus aliqua ratione
videatur, cum cupit, & conatur contra naturæ suæ impetum pecca-
to obistere, quæ voluntas, & conatus sine gratia Dei esse non pos-
sunt; ubi verò Dei gratia, ibi jam aliqua dignitas est. Vt inquam,
de hoc sileam; illud præterea observandum est juxta doctrinam An-
gelici, orationis efficaciam, & virtutem impetrandi non merito, &
& dignitate postulantis niti, sed Dei misericordiâ, Christi quæ infini-
tis meritis; sicut ergo merita Christi, Dei quæ misericordia peccato-
res non excludit; ita nec eos excludit vis, & efficacia impetrandi to-
ties in Sacris Litteris promissa. Non ergo quæritur, quid mereatur
peccator, sed quid Deum, ejus quæ Bonitatem deceat; non autem
deceat, ut filium repellat ejus genua complectentem, ejus quæ non
amplius offendendi gratiam implorantem. Quid enim iustius, Deo-
quæ gratius peccator petat, quam ne illum offendat? quis verò cre-
dat, sibi quæ persuadere possit, Deum iusta, & grata petentem non
exaudire? Planè si nullus tam durus est, qui naufragium passus, &
cum undis luctanti, opem quæ poscenti, manum non porrigat: & si
Areopagus dignum morte Senatorem censuit, qui passerem sinu ex-
cussit, in quem se condiderat, milvo persequente; quanto minùs cre-
dendum erit, divinam Bonitatem creaturæ suæ, filio quæ facturam,
quod nemo cum naufrago, nemo cum passere faciat. Deinde nisi
Deus etiam peccatores exaudiat, tota ferè oratio etiam iustorum in-
valida redditur: Anima enim orationis est certa fiducia impetrandi,
juxta illud Apostoli: *postulet autem infide nihil hesitans, qui enim
hesitat, similis est fluctui maris, qui à vento circumfertur; non er-
go æstimet homo ille, quod accipiet.* Jacobi 1. Et ideo S. Doctor. 2.
2. q. 83. a 16. docet: *Orationem habere vim merendi à charitate; ef-
ficaciam verò impetrandi à fide & fiducia.* Et S. Bernardus Serm. 3.
de Annuntiat: *Sola spes apud te Domine miserationis obtinet locum;
nec oleum misericordie nisi in vasa fiduciae ponis.* At si oratio pecca-
torum virtutem impetrandi certam non habet; sequitur, etiam ju-
storum orationem, paucissimis exceptis, efficacem non fore. Quotus
enim quis quæ est, qui sine vlla hesitatione, nihil quæ dubitans credere
possit, se iustum esse? cum potius nesciat homo, odio, vel amore di-
gnus sit. Si ergo orationis efficacia, orantis quæ fiducia pendet à præ-

senti iustitia; sequitur, ut sicut nemo, paucis exceptis, certus est, se justum esse; ita nemo certam impetrandi fiduciam habere posse, & consequenter nullius etiam iusti orationem efficacem fore, quippe destitutam eâ fiduciâ, quæ juxta Apostolum ad impetrandum necessaria est, hoc est, quæ *nihil hæsitat, nilq. dubitat*.

Si ergo Deus, ut demonstratum est, exaudit orationem peccatoris, quoties necessaria ad salutem postulat, sequitur, si peccator gratiam illam efficacem, malæque voluntatis triumphatricem, hoc est, auxilium se emendandi, perseverandi que in bono postulaverit, infallibiliter obtenturum. Quid ergo superest peccatori, quod optare amplius, aut quo vecordiam suam excusare possit, si pereat, cum tot illi, tamque copiosa media suppetant, non pereundi? imò cum clavem acceperit, quâ Cœli thesauros, æternæque salutis aperire sibi januam certissimò, & tutissimò possit? Quid enim facilius, & promptius, quam petere, quod non habeas? & tamen tam certum est, te petendo accepturum, quam certum est, Deum id promississe, & salvere promissa non posse? Si ergo non petas, & ideo non habeas, amabo te! cuius culpa id erit? Dei volentis dare, si petas; an tua petere recusantis?

VI. *Oppones.* Sapissimè in Sacris litteris exprimitur, Deum aliquorum & contumacium peccatorum orationes non audire, imò eorum preces in peccatum verti. Nam *Thren. 3. v. 8. 42. 44. Sed & cum clamavero, & rogavero, exclusit orationem meam*. Nos iniquè egimus, & te ad iram provocavimus, idcirco tu inexorabilis es. *Opposui nubem tibi, ne transeat oratio*, Et *Prov. 1. Vocavi, & renuistis, & ego quoq. in interitu vestro ridebo: tunc invocabitis me, & non exaudiam; mane consurgent, & non invenient me*, eò quod exosam habuerint disciplinam. Et *Jerem. 15. Si steterit Moses, & Samuel coram me, non est anima mea ad populum istum; eiice illos à facie mea, & egrediantur*. Et *cap. 7. Et tu noli orare pro populo isto, nec assumes, pro eis laudem, & orationem, & non obsistas mihi, quia non exaudiant te*. Et ad Hebræos 7. *Esau reprobatus non invenit penitentiae locum, quamvis eum lacrimis inquisisset illam*.

Resp. Sacras Litteras, quoties dicunt, Deum non exaudire aliquorum peccatorum orationem, loqui de peccatoribus, vel qui perunt peccare, nullamque voluntatem emendationis habent, vel qui non pro culpa, peccatoque deinceps cavendo Deum rogant; sed tantum pro temporali pœna evitanda: Vel de illis, qui non pro se, sed

sed pro aliis rogant; isti enim non semper exaudiuntur; scriptum enim est: *Quidquid petieritis Patrem Vestrum, dabit vobis. Vobis*, inquit, non aliis. In quæ verba Augustinus: *Exaudientur, si pro se ipsis petant, non pro omnibus, non enim absolute dictum est, dabit, sed dabit vobis*. Tract. 102. in Joan. Ea verba: *In interitu vestro ridebo &c.* præter datas explicationes, quas solidissimas esse patet ipsum textum legenti, Beda, & Lyranus intelligunt de die iudicii, aut obitæ mortis, quando certum est, nullum amplius pœnitentiæ, & orationi locum esse. Illa verò, quæ S. Paulus ad Hebræos de Esau commemorat, & ex ipso contextu, & ex Patrum interpretatione certum est, non de pœnitentia commissi peccati accipienda; sed de pœnitentia venditæ, amissæque hæreditatis, ac primogenituræ, quam nullis lacrimis, nullisque precibus obtinere amplius à Patre Jacobo potuit. Gen. 27. v. 39.

§. V.

*Aphorismi seu Regule Asceticæ de Mystério
Prædestinationis.*

S V M M A R I A.

- I. *Explicatio primi Aphorismi.*
- II. *Explicatio secundi Aphorismi.*
- III. *Explicatio tertii Aphorismi, ubi de spe & timore.*

Aphorismus. I.

1. **D**E iis cogitandis, & faciendis sollicitum esse, quæ Deus præcepit, & quibus observatis nemo unquam periit: non verò de iis anxium esse, quæ Deus non præcepit, nec sciri à nobis voluit, quale est *Mysterium Prædestinationis*.

Hunc Aphorismum jam olim docuit S. Gregorius Nyssenus Magni Basilii Frater, qui *Homil. 2.* post Dominicam primam Quadragesimæ circa finem hæc habet: *Noli attendere ad Prædestinationem*

nem Dei, quam ignoras; attende ad verba, quæ audis, & intelligis: sicut enim in Prædestinatione verus est Deus, & mutari non potest: ita & verba ejus vera sunt, & mutari non possunt. Sed audiamus, quæ sunt verba: Si volueritis, & audieritis me bona terræ comedetis: quod si nolueritis; gladius devorabit vos. Ne quæras aliam Prædestinationem. Nihil hoc Aphorismo justius, rectæque rationi accommodatius, & communi omnium hominum consensu magis receptum: Quis enim peregrinus, qui in patriam contendat, ex duabus viis non eam eligat, quæ trita, conperta, secura, & quâ nemo non ad patriam pervenit? Eam verò relinquat, quæ longissima, impeditissima, inaccessa, & quam quotquot ingressi sunt, aut perierunt, aut maximum pereundi periculum adierunt? Via ad Cælum est via mandatorum Dei, assidueque orationis, quâ gratiam mandata observandi, in iisquæ perseverandi à Deo petimus: nemo ad Cælum non pervenit, qui hâc viâ incescit. Quid profunda judiciorum Dei, quid Eurippum Prædestinationis, & voraginem petis, quæ citra naufragium navigari non possunt? Hic Origenes, hic Pelagius, hic Calvinus, aliique absorpti sunt; quid sequeris pereuntes? Noli quærere, noli scrutari, sed vive, ut Christianum decet; hoc est, age quod potes, & pete, quod non potes; sic tutus pervenies. Id ipsum in omnibus negociis humanis, & ab omnibus mortalibus fieri videmus. Nemo enim pugnaturus sollicitus est, quid Deus de Victoria prædestinaverit, sed omnem curam in media vincendi vertit, quibus optimè paratis victoriam sperat. Idem de navigantibus, negotiantibus, agriculturam artesque omnes exercentibus dicas. Quotò ergo magis idem vitam Christianam profitentibus faciendum est? videlicet non eis curandum, cogitandumque prædestinati, aut non prædestinati sint; sed ut vitam Christianè instituunt; sic enim certissimè de prædestinatis erunt. Audi Augustinum egregiè in hanc rem differentem Lib. de Dono Perseverant. cap. 22. De ipso cursu vestro bono, rectoque condiscite, vos ad Prædestinationem divinæ gratiæ pertinere. Vos ipsam obediendi perseverantiam à Patre Luminum, à quo est omne datum optimum, & omne donum perfectum, sperare debetis, & quotidianis orationibus poscere. Atque hoc faciendo confidere, non esse vos à Prædestinatione alienos, qui etiam hoc, ut faciatis, ipse largitur. Quoties igitur de Prædestinatione sive tua, sive aliorum molestæ cogitationes occurrunt, excutiendæ sunt, & animus ad alia divertendus. Quid enim

enim juvat, superfluis, noxiisque occupari? At quid tam superfluum, & vanum, quàm velle cognoscere, quæ Deus voluit ignorari? aut quid tam noxium, quàm imperitum navigandi, nullaque necessitate se illi mari committere, quo etiam peritissimi abrepti, haustique sunt? Vitandum ergo est, quod nocere tantum, & juvare non potest. Qua de re præclare Gerſon noster philosophatur, peritissimus videlicet rerum asceticarum, vitæque Christianæ Magister: Sic enim in Dialogo de Prædestinatione loquitur, quem scripsit, cum soluto Concilio Constantiensi insidias Ducis Burgundiæ voluntario exilio in Bavaria declinaret; sic, inquam, in persona Monici interlocutoris monitum istud illustrat: *meditatur aliquando* (Gerſon videlicet) *Secum conquerens: quid si iusto Dei iudicio damnandus est? Si reperit indispositum cor suum ad humilem huius rei considerationem, derelinquit eam, & ad alia se convertit; quem admodum fieri consilium est in tentationibus, vel interrogationibus carnalium peccatorum, vel experientiis earum rerum, quæ sunt difficillimæ electionis. Si verò percipit affectum suum Deo propitio tranquillum, humilem, & suavem, sistit pededentim tamen, & cautè in hac recogitatione, si forte damnandus est: Cujus apprehensione nequaquam remurmurat secundum præsentem affectum, & sensum de divina Justitia, sed humiliatus dicit: iustus es Domine, & rectum iudicium tuum; etiamsi me occideris, tamen in te sperabo. Et conversus ad Dominum cum pio, & humili affectu: scio, inquit, æquissime iudex, quoniam dammati te odiant. At ego, dum interim affectibus illis tam efferis, & blasphemis careo, amo te, qui solus es amabilis: te Justissimum, te amantissimum, te clementissimum iudico: quidquid postremò de me futurum ordinaverit voluntas tua; credo, & ore profiteor, quoniam nulla est iniquitas apud te, qui Sanctus es in omnibus operibus tuis. Hic amor gratuitus est, non mercenarius, non recurvus: hac affectio filialis est, imò fidelis Sponsæ, quem amorem, quia Dominus suavis est, non acceptare non potest, quia diligentes se diligit. Beatus qui ascensiones in corde suo disponens ad hunc gradum penè supremum pervenit.*

Aporismus II.

II. Ita in negotio salutis conatum, & industriam propriam adhibere, ac si nihil à gratia expectares: ita verò in solam Dei gratiam sperare, ac si nihil conatus, & industria tua possent.

Hanc doctrinam à S. Ignatio societatis JESU Fundatore accepimus, cui admodum commendata erat; hic verò à S. Augustino didicit, cujus celebre illud axioma est: *Qui fecit te sine te, non salvabit te sine te*. Sunt plerique, qui talem Deum, talemque gratiam cuperent, quæ omnia faceret; hoc est, velis in Cælum navigare non remis vellent: ipsi non orare, non eleemosynas facere; non hostibus parcere, non cupiditatibus resistere; sed Deo omnia, sibi nihil relinquere. Victoriæ ergo sine bello, bravium sine cursu, & præmium sine merito cuperent; perinde ac si clementia esset Deo digna, terram otiosis, Cælum ignavis replere. Et ideo S. Apostolus, cum dixisset: *gratiâ Dei sum id, quod sum*, ne quis crederet, ita gratiam Dei omnia, solamque præstare, ut nihil humanæ voluntati faciendum supersit; mox adjunxit: & *gratia ejus in me vacua non fuit, sed plus omnibus laboravi; non ego autem, sed gratia Dei mecum*. In quæ verba Augustinus de Grat. & libero Arbitr. cap. 5. *Nec gratia Dei sola, nec ipse solus, sed gratia Dei cum illo*. Ad ipsum vel Ethnici agnovere. Narrat Plutarchus in Apophtegmatibus: fuisse quendam, qui pridie, quam cum adversario confliget, votis, & Sacrificiis Minervam placavit, acceptoque oraculo, *Deam ad futuram*, lætum, & victoriæ certum arenam intrasse. Sed cum nec manum ad pugnandum moveret, nec ferrum stringeret Minervæ suæ fiduciâ, & adversarius interim punctum, casumque feriret, conqueri cepisse: *Vbi est Deorum fides? Nunquid Minerva victoriâ promisit?* Cui à Dea responsum: *Tu quoque cum Minerva manum admove*. Cæterum quidquid in causa salutis præstare homo potest, id planè tam exiguum est, ut omnia gratiæ, nihil industriæ suæ debeat. Primò enim nihil potest sine gratia, & illud ipsum parùm, quod agit à gratia est: Sicut ergo stultus esset, quicumque morbo decumbens spem suam in viperas, & venena (quæ potiùs mortifera sunt) & non in medicum collocaret, qui novit ex venenis remedia conficere; ita multò stultior, qui voluntati, & naturæ suæ semper ad-

ma-

malum pronæ, non verò gratiæ consideret, quæ sola novit, ex mala voluntate bonam facere. Deinde illud ipsum parùm, quod homo cooperando gratiæ facit, si consideretur, quatenus ab homine est, nihil prorsus ad vitam æternam conducit. Quid ergo sperare homo de se possit, cum nihil possit? ut merito de humana voluntate, quatenus gratiâ caret, dicere possis, quod de ligno vitis apud Ezechielem legere est cap. 15. *Fili hominis, quid fiet de ligno vitis ex omnibus lignis nemorum, quæ sunt inter ligna silvarum? Nunquid tolletur de ea lignum, ut fiat opus, aut fabricabitur de ea paxillus?* Accedit, illum ipsum conatum, & concursum humanæ voluntatis tot aliis imperfectionibus, demeritis, culpisque, vel antecedenter, vel concomitanter admixtum, & inquinatum esse, ut si Deus seposita Misericordia agere tecum ex iustitia velit, longè plura reperturus sit, quæ puniat, quàm quæ præmio donet. Imò illa ipsa fiducia tui ex sententia omnium Patrum maximum demeritum, temeritas, & præsumptio est, ac proxima dispositio, ut à Deo relinquaris, & cadas. Quid ergo sperare de bonis operibus tuis tanquam de magnis opibus possis, quando semper plura debes, quàm solvas? *quasi pannus menstruatus omnes iustitiæ nostræ, inquit Isaias cap 64.* In quæ verba S. Macharius Homil 20. *Omnium Sanctorum opera bona & iustitiæ, si separantur à gratia Dei, & accipiantur ut procedentia tantum ex natura lapsæ libero, sed vitiato arbitrio; omnes indignæ sunt oculis Dei, & reputantur, ut pannus menstruatus: Opera enim ex operante asseminat Deus; hic autem operans est homo lapsus, vitiatus, concupiscens, & peccator.* Denique voluntas creata etiam maximis & perfectissimis donis instructa, aded volubilis, inconstans, & infidelis est (quod Luciferi, & Adami exemplis patuit) ut ab illa sperare perseverantiam in bono (sine qua nullum bonum prodest) idem sit, quod sperare perpetuum ab aere serenum, aut à maci malaciam. Quid est, inquit S. Gregorius 2. Moral. cap. 22. *quid est homo vis folium, quod tentationis vento rapitur, & desideriorum flatibus levatur? Mens quippe humana, quot tentationes patitur, quasi tot flatibus movetur. Hanc enim plerumq; ira perturbat: cum recedit ira, succedit inepta letitia; Aliquando hanc Superbia elevat, aliquando verò inordinatus timor in infima deponit. Unde bene per Isaiam dicitur: Cecidimus quasi folium universi, & iniquitates nostræ quasi ventus abstulerunt nos. Quasi ventus quippe nos iniquitas abstulit, quia nullo fixos pondere in vanam elationem levavit.* Hoc ergo est in
fe-

seipsum vireſque ſuas ſperare, quod ſperare in folium. Quod exem-
plo ſuo S. Auguſtinus olim expertus ita in ſoliloquiis egregiè deſcri-
bit: *Sperabam aliquando in virtute mea, quæ non erat virtus: &*
cùm ſic volui currere, ubi magis ſtare credebam, ibi magis cecidi, fa-
ctusq; ſum magis retrò, quàm antè. Dicebam enim, hoc faciam, illud
perficiam; fiebat poſt nec hoc, nec illud, quoniam de meis viribus con-
fidebam. Nunc autem confiteor tibi Domine Rex Pater Cæli & terræ,
quoniam in fortitudine ſua roborabitur vir, ut non gloriatur ante te
ſtulta præſumptio omnis carnis. Et lib. 6. Confels. cap. 16. Væ ani-
mæ audaci, quæ ſperavit, ſi à te reſceſſerit, ſe aliquid melius habitu-
ram. Verſa & reverſa in tergum, & in latera, & in ventrem, &
dura ſunt omnia, & tu ſolus requies es Domine. Inſigniter quoque
& ad praxin Gerſon ſuprà laudatus de hac re differit. Expendens
enim illud Jeremiæ cap. 17. Maledictus homo, qui confidit in homi-
ne, & ponit carnem brachium ſuum, & à Domino recedit cor eius.
Erit enim quaſi myrica in deſerto, & habitabit in ſiccitate. Benedi-
ctus vir, qui confidit in Domino, & erit Dominus fiducia ejus, ita
rationatur: Mirum fortasſe videbitur, quod dicturus ſum. Inve-
nire eſt hominem (Gerſon ipſe videtur indicari) qui quânto pluribus
impugnatur tentationibus; quânto renitens eis pluries vincitur, vel in
voracitate gula, vel in ſomniculoſa dormitatione, & aliis huiusmodi;
tantò frequentius, certius & ideo fortius, quia humilius in Deum ſe
proiicit, de Deo ſperat, & confidit. Conſultò quidem, dum nullam
in ſe videt fiduciam reſiſtendi vitiis, neque virtutes & ſalutem adipi-
ſcendi repositam. . . . Sed hîc occurret trepida cogitatio dicens: qua
ratione conabor declinare vitia, ſervare mandata Dei, virtutes acqui-
rere, ſine quibus ſperare vitam iam non ſpes eſt, ſed arrogans & inſi-
delis præſumptio? conaberis prorsus, ſed in adiutorio Altiffimi, &
millies victus, millies conaberis, eò quidem amplius & certius, quò
nulla tibi ſupereſt fiducia de proprijs operibus. Ergo dum propria fragi-
litas obiicitur, ut desperes; desperes volo, ſed de te, & in te, qui ho-
mo & caro es; nam maledictus homo, qui confidit in homine, & po-
nit carnem brachium ſuum. Deniq; ſpes velut anchora, quò minùs in
arenulis fragilibus & fluidis humani auxilii figitur; tantò ſolidius, &
certius ſuprà firmam petram, quæ Chriſtus eſt, defixa ſtabilitur.

Apho-

Aphorismus III.

III. Totam spem suam in Deum reponere, nec minori fiduciâ vitam eternam ab illo expectare, quàm si unice à voluntate, arbitrio tuo penderet.

Priùs aliqua observanda sunt, quàm Aphorismum hunc explicemus. Primò enim sciendum est, cùm de spe loquimur, nobis de iis peccatoribus sermonem non esse, qui cùm nullum peccandi finem faciant, nullamque curam emendandæ vitæ suscipiant, sperant tamen, se tandem misericordiam obtenturos. Quorum spes non tantùm vana est; verùm etiam temeraria, novoque supplicio digna, cùm ad offendendum Deum, ipso Deo, ejusque infinita Bonitate abutantur; perinde ac si Deus ideo bonus esset, ut ipsi mali sint. Et ideo hanc peccatorum spem, imò præsumptionem mille locis Sacræ Litteræ, Sanctique Patres detestantur. Misericordia enim Dei injusta esse non potest; at quid esset injustius, magisque aduersum Legibus rectæ Providentiæ, quàm obstinatè & ex proposito malos gratiâ & præmio afficere? Verum est, id aliquando, & aliquibus accidisse; sed rarissimè ac paucissimis: at quod rarissimè, citraque ordinem contingit, desperandum potiùs, quàm sperandum est; quis enim tam inops mentis, ut sanitatem à veneno speret, & ideo quotidie sumat, quia id aliquando bene Mithridati cessit? aut quis se in mare proiici faciat, sperans auxilio Delphini evasurum, quia id semel Arioni factum? Non sperare, sed delirare hoc est. Accedit, misericordiam divinam non debere iis propitiam esse, qui peccatis insistent; hoc enim ipso, quodd infinita est, sequitur, illi majorem boni & salutis publicæ, quàm boni & salutis privatæ curam esse; at quanta in publicum mala redundarent, si Deus hujusmodi peccatoribus gratiam indulgeret? hac enim non tantùm impunitate, verùm etiam remuneratione, ac facilitate, & fiduciâ veniæ omnes passim justî, injustique ad peccandum invitarentur, ut optimè dixerit Seneca: *Tam omnibus indulgere crudelitatem esse, quàm nulli.* Cùm ergo homines ad sperandum excitamus, de iis tantùm hominibus loquimur, qui aut justî sunt, aut saltem peccatores quidem; sed tales, qui peccatum agnoscant, illique delendo, divinæque gratiæ impetrandæ elemosynis, piis operibus, ac præsertim quotidianis

orationibus laborent; istis enim sperandam omnino misericordiam esse contendimus. Si enim objectum misericordiae miseria est, tantò utique major misericordia, quantò major miseria, at nulla major, quàm peccati; tantoque major, quòd voluntaria, nam si non voluntaria, nec esset peccatum, eoque nec vera miseria. Licet nec dici omnino voluntaria possit, cui extinguendae laboratur. Huiusmodi peccatoris statum captivi quidem, sed tamen evadere conantis egregiè in se ipso expressit, descripsitque S. Augustinus Lib. 8. Confess. cap. 11. *Egrotabam, & excruciebar accusans me metipsum, & volvens ac versans me in vinculo meo, donec abrumperetur totum, quo exiguo tenebar, sed tenebar tamen. Et tu instabas in occultis meis Domine severa à misericordia flagella ingeminans timoris & pudoris, ne rursum cessarem, & non abrumperetur id ipsum exiguum & tenue, quod remanserat, & revalesceret iterum, & me robustius alligaret: Dicebam enim apud me intus: ecce modò fiat, modò fiat. Et cum verbo iam ibam, iam penè faciebam, & non faciebam, & item conabar, & paulò minùs ibi eram, & iamjamq; attingebam & tenebam, & non ibi eram, nec attingebam, hæsitans mori mortì, & vitæ vivere, plusq; in me valebat deterius inolitum, quàm melius insolitum, punctumq; ipsum temporis, quo aliud futurus eram, quantò propius admovebatur, tantò ampliorem incutiebat horrorem. Retinebant me nugæ nugarum, & vanitates vanitatum antiquæ amicæ meæ, & succutiebant vestem meam carneam, & submurmurabant: dimittisne nos? & à momento isto non tibi licebit hoc & illud ultra in æternum? & dicebat mihi consuetudo violenta: putasne sine istis poteris? aperiatur autem ab ea parte, quâ intenderam faciem, & quò transire trepidabam, casta dignitas Continentiæ. Ibi tot pueri, & puellæ; ibi iuventus multa, & omnis ætas, & in omnibus ipsa Continentia, & irridebat me, quasi diceret: tu non poteris, quod isti & istæ? an vero isti, & istæ in semetipsis possunt, & non in Domino Deo suo? Quid in te stas, & non stas? proiice te in eum, noli metuere, non se subtrahet, ut cadas. Proiice te securus, excipiet te, & sanabit te. Quamdiu, quamdiu cras & cras? quare non modò, quare non hâc horâ suis turpitudinis tuæ? Planè dum Augustinus ea verba proferret: proiice te in eum, noli metuere, proiice te securus, excipiet te, & sanabit te; cum, inquam, hæc diceret, adhuc peccato tenebatur, & tamen sperabat, nihilque dubitabat de auxilio Dei, quo deinceps expugnare peccatum posset, & pudicus vivere; non ergo peccatum,*

cui

cui vincendo per orationem, aliaque pia opera militatur, certam spem & fiduciam de divina gratia obtinenda excludit. Idque eleganter quoque S. Thomas expressit 3. p. in Supplement. q. 14. a. 4. ubi quærens, an bona opera facta extra charitatem sint meritoria, respondet: Meritum dicitur actio, quâ efficitur, ut ei, qui agit, sit iustum aliquid dare. Sed iustum dupliciter dicitur, uno modo proprie, quod videlicet respicit debitum ex parte recipientis. Alio modo, quod respicit debitum ex parte dantis: aliquid enim decet dantem dare, quod tamen non habens non habet debitum recipiendi, & sic iustitia dicitur decentia divinæ Bonitatis, sicut Anselmus dicit, quod Deus iustus est, cum peccatoribus parcat, quia eum decet. Cum autem in omnibus illis, quæ gratis dantur, prima ratio dandi sit amor; impossibile est, quod aliquid tale sibi debitum faciat, qui amicitia caret; & ideo cum omnia & temporalia, & aterna ex divina liberalitate donentur, nullus habere potest debitum recipiendi aliquid illorum, nisi per charitatem ad Deum; & ideo opera extra charitatem facta non sunt meritoria ex condigno, neque æterni, neque temporalis alicujus boni apud Deum. Sed quia divinam Bonitatem decet, ut ubicumque dispositionem invenit, perfectionem adiciat; ideo ex merito congrui dicitur aliquis mereri aliquod bonum per opera bona extra charitatem facta, & secundum hoc opera ista ad triplex bonum faciunt, scilicet ad temporalium consecutionem, ad dispositionem ad gratiam, & ad assuetudinem bonorum operum. Circa quæ verba S. Doctoris notandum est, bona opera peccatoris vocari dispositionem ad gratiam; ubi verò est dispositio habens necessariam connexionem cum forma, illic quoque est ipsa forma, ut patet in calore intensissimo, quem semper comitatur forma ignis; at oratio perseverans est talis dispositio, propter promissionem divinam.

Deinde ex eodem Angelico Doctore 1. 2. q. 40. a. 8. Sciendum est spem valde conferre ad bene ac constanter operandum, spes, inquit, per se habet, quod adiuvet operationem intendendo ipsam. Et hoc ex duobus. Primo quidem ex ratione sui obiecti, quod est bonum arduum possibile (non enim dicitur aliquis sperare minimum, quod statim est in sua potestate ut habeat, & per hoc differt spes à desiderio vel cupiditate, quæ est de bono futuro absolute, existimatio enim ardui excitat attentionem; existimatio verò possibilis non retardat conatum. Secundò verò ex ratione sui effectus; spes enim causat delectationem, quæ adiuvat operationem. Ex quibus verbis S. Doctoris colligitur,

dum peccatores ad spem excitamus; nihil aliud nos agere, quam ut illis ad piè ac Christianè operandum stimulos, viresque addamus.

His ergo observatis Aphorismum nostrum testimonio Divi Augustini confirmamus, qui sapissimè illum tradit, nam lib. 1. de Prædest. Sanct. cap. 11. *Sane, inquit, cum Apostolus dicat: ideo ex fide ut secundum gratiam firma sit promissio; miror, homines infirmati sue se malle committere, quam firmati promissionis Dei. Sed incerta est mihi, inquit, de me ipso voluntas Dei. Quid ergo? tuane tibi voluntas de te ipso certa est, nec times? cum igitur utraq; incerta sit, cur non homo firmiori, quam infirmiori fidem suam, spem, charitatemq; committit?* Et lib. 2. de Bono Perseverant. cap. 6. *Tutiores igitur vivimus, si totum Deo damus; non autem nos illi ex parte, & nobis ex parte committimus.* Et cap. 17. *Ego autem nolo exaggerare meis verbis, sed illis potius cogitandum relinquo, ut videant, quale sit, quod sibi persuaferunt, prædicatione Prædestinationis audientibus plus desperationis, quam exhortationis afferri; hoc enim est dicere, tunc de sua salute hominem desperare, quando spem suam non in se ipso, sed in Deo didicerit ponere, cum Propheta clamet: Maledictus omnis, qui spem ponit in homine.* Et cap. 22. *Absit autem à vobis ideo desperare de vobis; quoniam spem vestram in ipso habere iubemini, non in vobis; bonum est enim confidere in Domino, quam confidere in homine, quia Beati omnes qui confidunt in eum.* Et hanc spem tenentes, servite Domino in timore, & exultate ei cum tremore. Hæc, atq; huiusmodi, cum dicuntur sive paucis Christianis, sive multitudini Ecclesiæ; cur metuinus Sanctorum Prædestinationem, & veram Dei gratiam, quæ non secundum merita nostra datur, prædicare? an verò timendum est, ne tunc de se homo desperet, quando spes ejus ponenda demonstratur in Deo; non autem desperaret, si eam in se ipso superbissimus & infelicissimus poneret? Hactenus Divus Augustinus, ex cujus doctrina palàm est, hominem Christianum non minùs sperare gratiam æternamque gloriam debere, Prædestinatione à divina voluntate pendente, quam si illa à propria voluntate penderet. Fac enim, in manu tua calamum & librum esse, quo in numerum Electorum adscribaris; quid tunc amabò ageres? nunquid te ipsum forte illa beatissima excluderes? minimè, inquis: cur verò non excluderes? quia me meamque felicitatem, inquis, amo. At multò magis te amat Deus, multò ergo magis ab eo, quam à te sperare illam debes. Si enim amor non ex verbis, sed operibus pensandus est: quantò plura pro te fecit Deus, quam

tu

tu pro te ipso; tantò major illius, quàm tuus amor. Deinde sicut, ut aliqd pervenias, non sufficit, ut ire velis, sed oportet, ut viam perveniendi agnoscas, & eligas; nam frustra est voluntas finis errore mediorum. Ita ut Beatus sis, non sufficit, ad Beatitudinem eligi, nisi certissima quoque media disponantur, quibus eam obtineas: at in mediorum electione, quoties, quantumque errares, numquam errante Deo? ergo quomodocumque Prædestinationem consideres, semper tutius Deo, quàm tibi spem tuam committis. At, *inquies*, cùm Deus tam multos ad vitam æternam non elegerit, quid si me quoque non elegisset? quomodo ergo securè in eum sperabo, illique meam sortem committam, qui tam multos abiecit? Resp. multos à Deo electos non esse, quia videlicet mediis ab illo præscriptis uti noluerunt, certum est; at falsum, aliquem electum, vitamq; æternam consecutum non esse, qui eo modo in Deum, ejusque gratiam speravit, quem modò descripsimus. Quid ergo times, tibi speranti eventurum, quod nemini hætenus speranti evenit? *Respicite filii nationes hominum, & scitote, quia nullus speravit in Domino, & confusus est.* Eccl. 2. In quæ verba eleganter S. Chrysostomus: *Non dixit, justus, sed quis? etsi, inquit, sit peccator.* Hoc est enim admirabile, quòd etiam peccatores anchoram hanc spei tenentes sint ab omnibus inexpugnabiles. Et in Psalm. 117. Dices: ego speravi, & sum pudore affectus. Bona verba queso ò homo, ne divina Scriptura obloquaris. Nam si pudore affectus, es ideo affectus, es quòd non ut oportuit, speraveris, ex eo quòd cesseris, quòd finem non expectaveris, quòd pusillo & angusto animo fueris. Hoc enim vel maxime est sperare, quando in media, mala & pericula fueris conjectus, tunc erigi: Nec minùs eleganter S. Bernardus Serm. 9. in Psal. qui habitat: *Quidquid agendum sit, quidquid declinandum; quidquid tolerandum, tu es Domine spes mea.* Hac una mihi omnium promissionum causa, hac tota ratio meæ expectationis. Pratendat alter meritum; sustinere se jactet pondus diei & ætus; jejunare se bis in Sabbatho dicat; postremò non esse sicut ceteros hominum gloriatur; mihi autem adherere Deo bonum est, ponere in Domino Deo spem meam. Si quid illi impossibile, si quid vel difficile ei est, quare aliud in quo speres; Sed verbo omnia potest, quid facilius dictu? an verò de facultate jam non dubitas, sed ipsa tibi est suspecta voluntas? at quando in se speranti desit illa Majestas, quæ tam studiosè monet, in se sperare, planè non derelinquet sperantes in se; quare? quibus meritis? quia speraverunt in eo: dulcis causa! sed tamen effi-

efficax, & irrefragabilis; quis enim speravit in eo, & confusus est? Et optimè S. Thomas: *Divino auxilio nemo potest nimis inniti*. Verba ipsius sunt 2. 2. q. 17. ad 2. *Virtus Theologica est circa ipsam regulam primam non regulatam aliâ regulâ tanquam circa proprium obiectum; & ideo per se, & secundum proprium obiectum non convenit virtuti theologicæ esse in medio, sicut fides non potest habere medium & extrema, in hoc, quod innitatur primæ Veritati, cui nullus potest nimis inniti*. Et similiter spes non habet medium, & extrema ex parte principalis obiecti, quia divino auxilio nemo potest nimis inniti. Cum ergo duæ sint voluntates ad vitam æternam consequendam necessariæ, divina videlicet, & humana, divinam quod attinet, nunquam de illa satis sperare potes, quia nunquam deesse, nunquam deferere vult, & ideo quantò ampliùs de illo speras, tantò felicior. Aliud est de voluntate humana, quæ cum naturaliter, semperque in defectum propendeat, ideo nihil boni ab ea sperare possis; sicut qui arundini incumbat, casui proximus est, nulla quidem terræ, quippe immobilis, sed arundinis culpâ. Hinc salubris ille & toties in Sacris Scripturis commendatus Sanctorum timor, quo spem suam velut myrrhâ mordaci quidem, sed salubri condiebant, ne corrumperetur, quantum enim securi de Deo erant, tantum de se metuebant. Constat illis, nunquam Deum sibi defuturum; at metuebant, ne ipsi deessent Deo, sicque perirent, juxta celebrem illam Augustini sententiam in Psalm. 102. *Sanat Deus omnem languidum, sed non sanat invitum, opus est, ut sanari velis*. Non ergo timebant, ne sanare Deus vellet; sed timebant, ne sanari ipsi nolent; sicque nulla de medico, tota de languido trepidatio.

Cæterum observant magistri vitæ spiritualis, hunc saluberrimum, perpetuumque timorem, quo misceri spem nostram oportet, talem esse debere, ut semper fiduciâ formidinem superet, sicque talis sit proportio timoris ad spem, qualis *septem ad centum*. Cum enim timor humana fragilitate & malitiâ; spes verò divinâ Omnipotentia, & Bonitate nitatur; quantò Bonitas Dei major malitiâ humanâ; tantò maior spes metu. Accedit, timorem, cum sit ex consideratione mali; affligere animam & dolorem afferre, sicque affectum quàm violentum, tam fugacem & brevem esse; & ideo animum gaudendi avidum, timori tanquam molesto omni conatu obsistere; ac tandem pellere: unde conversiones peccatorum solo metu inchoata, nisi spe & amore suslineantur, fallacissimæ & brevissimæ

simæ sunt, quales Achabi, Ninivitarum, Lutheri, aliorumque. Deinde timor etsi à peccato mortifero cohibeat, quippe causa æterni mali, non extinguit tamen amorem, & cupiditatem rerum terrenarum, quæ sine peccato lethali esse possunt. At cupiditate illa & amore flagrante semper anima in præcipiti est, cum difficillimum sit vehementer sitienti non plus bibere, quam sanitati conveniat. Timor ergo conversionem peccatorum inchoat quidem, sed nec producit, nec absolvit. *Quid enim, inquit, S. Augustinus Serm. 9. de verbis Apostoli, penam times? nam & Latro timet malum, & fugit Judice comparente, & tamen latro est: Ergo quod Medicus de vulneribus corporis optimè dixit: Nimis intumescere vulnus, malum; nihil intumescere, pessimum est. Idem & potiori jure de vulneribus animæ dicas: Nimis peccatorem timere malum; nihil timere, pessimum est.*

Sed iuvat, totam hanc de Prædestinatione & fiducia in Deum reponenda Dissertationem verbis laudati supra Gersonis absolvere: *Vt intelligo, ita se res habet: quod apud verè humilem, quanto minùs est in se spei, minùs in opè aliena fiducia, minùs deniq; vult constituere iustitiam suam, tantò plus spei, plus fiduciæ de Deo concipit, plus quoq; Justitiæ Dei fit subiectus, dicens ex sententia Psalmistæ: Mihi autem ad hæerere Deo bonum est, & ponere in Domino spem meam, sicq; magis intelligere nunc videor, quæ in devotorum libris legi de introductione Sponsæ in cubiculum Sponsi, de osculo oris ejus, de habitatione præterea in adjutorio Altissimi; non in habitatione vel meritorum priorum, quæ vana est; vel pœnarum futurarum, quæ anxiosa est; vel industriarum propriarum, quæ timida, & incerta est. Vult ergo Theologia per summam desperationem de homine, trahere ad summam de Deo spem; & per desolationem inestimabilem & intolerabilem sursum ducere ad solidam consolationem. Caterum stabilitur à Deo spes, cujus supernaturale est donum. Sed si particulariùs aliquid exigit, invenitur quadruplex meditatio, quæ velut in tetragono firmissimo gestat spem. Una meditatio est; divinæ iussionis, ut speres: Altera divinæ promissionis, si speres, Tertia inmensæ Dei pietatis, ne desperes de suis miserationibus. Quarta propriæ fragilitatis, ne speres in te, vel in propriis viribus. Dic igitur cogitationi tuæ sollicitanti spem deserrere, dum non facis certam vocationem tuam per bona opera, quotidie corruens de peccato in peccatum, ingerenti proinde, ne sis de multis vocatis, & non electis, sicut vita tua similis est multorum; dic, in-*
quam

quam: quod obedis iubenti Deo, qui mille locis Scriptura præcipit, ut speres in eo. Proiicio me in te iubente te: non es crudelis, aut fallax, ut abiicias me; juncta præsertim multiplici promissione tua, quæ sperantibus in te pollicitus es, quod liberares, eriperes, saluares, & glorificares: cujus demum tam immensa pietas est, ut nullis peccatis etiam infinitis (si commissem ea solus) vinci possit in hac via, quodq; interposuisti cum immobilitate consilii tui iusjurandum, ut per duas res immobiles, sicut loquitur Apostolus tuus, quibus impossibile est, mentiri te, nos fortissimum solatium habeamus ad tenendam propositam spem. Quamvis enim sis inobligabilis à creatura tua rationali; voluit tamen dignantissima condescensio tua commercium quoddam habere cum hominibus, ut bene de te mereantur, si iussa tua compleverint, & in te speraverint, qui fidelis es, & te ipsum negare non potes.



terris studium tandem in Cœlis didicerint. Et quid dico Cœli Magnatibus? imò isti forsan ignorant, Deo arcani suo parco. Ita Jobus Job 28. v. 21. profitetur: *Abscondita est, inquit, Sapientia ab oculis omnium viventium; volucres quoque Cœli latet.* Volucres Cœli Angeli sunt: quid ergo sibi promittant volucres terræ, hoc est, homines, quando ne ipsæ quidem norunt Volucres Cœli? An noctuæ cernent, quod Aquilas latet? dicam ergo cum Hilario: (a) *Ego nescio, nec requiro, consolabor ne tamen: Archangeli nesciunt, Angeli non audierunt, sæcula non tenent, Prophetae non sentiunt, Apostolus non interrogat, Filius ipse non edidit, quis ergo divinabit?*

Ut verò in hoc sacro pelago vela faciam, quantum homini licet, citraque naufragium; tria circa hoc Prædestinationis mysterium expediam. *Primo* ex Sacris litteris, Sanctisque Patribus ostendam, hoc unum esse ex illis Cœli secretis, quæ Deus celata homines voluit, ideoque quæ ab omnibus investigari non debent. *Secundo*. Quàm plurima esse in hoc mundo oculis nostris exposita, quorum causas nemo hactenus invenit; mirum ergo non esse, si remota, & divina homines non capiant, qui non capiunt vicina, & mundana. *Tertio*. Demonstrationem conficiam, quâ invictè, clareque ostendam, justissimum esse Prædestinationis Decretum.

§. Primus..

*Probatum ex Sacris Litteris, Sanctisque Patribus
noluisse Deum Mysterium Prædestinationis
ab Hominibus explorari..*

Primum ergo sit Esdræ (b) testimonium. Huic enim hoc ipsum Ænigma volenti ita Angelus respondit: *Excedens excessit cor tuum, & comprehendere cogitas viam Altissimi. Vade pondera mihi ignis pondus, aut mensura mihi statum venti, aut revoca mihi diem, quæ*

(a) Hilar. l. 2. de Trinitat. prope medium.

(b) Esdræ 4. c. 4. Quamvis non constet, Esdræ Librum quartum esse Canonicum; citatur tamen ab Ambrosio tanquam Canonicus, libro de bono Mortis & lib. 7. in Lucam; & Ep. 71. ad Horatianum & Genebrardus pro Canonico habet in Chronologia c. 90.

qua preterit. Si essem interrogans te, dicens: quanta sunt habitatio-
nes in corde maris; aut quanta vena sunt super firmamentum; aut
qui sunt exitus Paradisi, diceres mihi fortassis, in abyssum non de-
scendi, neq. in Caelum unquam ascendi. Nunc autem non interrogavi
te, nisi de igne, & vento, & die, per quem transisti, & à quibus se-
parari non potes. Si ergo tu quae tua sunt tecum coadolescencia non po-
tes cognoscere, quomodo poterit vas tuum capere Altissimi viam?
Quemadmodum enim terra silvæ data est, & mare fluctibus suis, sic
qui super terram inhabitant, quae sunt super terram intelligere solum-
modo possunt. Haec Angelus Esdrae. Sicut ergo frustra, inepte-
que laboraret, qui ignes ventosque ponderare, venas ac sinus Ma-
rium, omnesque fluctus numerare vellet; multoque magis insani-
ret, si ventos, & ignes, ac Maria à medio tolleret, darique negaret,
quod eorum naturam, ac pondus assequi non posset; ita planè insa-
nit, qui Dei Bonitatem, ac Justitiam in dubium revocat, quia caus-
sas occultissimas ignorat, metiri ignem non potes, & vis metiri
Deum? undas maris numerare non vales, & numerabis fluctus, ac
tempestates aeternae Praedestinationis? Non potes, non potes: crede er-
go, quod non vides, & adora, quod non capis. Notanda quoque
sunt illa verba. Quemadmodum terra silvæ data est, & mare fluctibus
suis: quasi dicat, quaelibet Creatura, & ars limites habet, & termi-
nos suos, quos egredi non potest: silvæ terram, non mare occupant:
tempestates, & naufragia aquis non terris insultant, flores in hortis,
non in arena proveniunt; conchæ in littore, non in pratis leguntur.
Et in ipsis quoque artibus quaelibet suis terminis coërcetur; quis enim
ferat, tutorem de Stellis, Astrologum de saporibus, Philosophum de
bello, militem de coloribus, pingendi regulis disputantem? Re-
censet Plinius: Magnum Alexandrum, cum Apellem crebrius invise-
ret, & in officina multa de arte pingendi imperitè differeret; comiter
ab Apelle silentii admonitum esse, quod à pueris, qui colores tererent,
videretur. Quamvis ergo magis ridendi, cogendi que ad silentium
sunt illi, qui cum homines sint, ultra homines sapere, ac divina ser-
vari volunt? Sileat de coloribus, qui pictor non est.

Secundo Ecclesiasticus c. 3. v. 22. Altiora te ne quaesieris & for-
tiora te ne scrutatus fueris; & in pluribus operibus ejus ne fueris cu-
riosus; non enim tibi necessarium est, ea quae abscondita sunt oculis tuis
videre, plurima enim supra sensum hominis ostensa sunt tibi. Quatuor
hic Spiritus Sanctus rationes insinuat, quae nos à rebus Divinis exa-

minandis prohibere debent. *Primò*, inquit, *Altiora te ne quæsieris, & fortiora ne scrutatus fueris*, quasi dicat, sicut nemo potest fastigium altissimæ arboris pollice attingere, nec Aquilam altissimo volatu per aëra meantem parvo lapillo ferire, nec implicatissimum nodum imbecilli, ac tremente manu evolvere, ita multoquæ minùs homini fas est, quæ in Cœlis fiunt, humano ingenio metiri; tam enim ista altitudine sua humanas vires excedunt, quàm arbor pollicem; Aquila teli jactum, nodusque Gordius invalidam manum. Deinde *non est*, inquit, *tibi necessarium ea, quæ abscondita sunt, videre*: Si ergo Deus abscondit, quis reperiet? & quanta temeritas, si tu ex infima servorum classe, & ad vestibulam palatii destinatus in superiora irrumpas, sublatoque velo, quid in Regio thalamo à Principe fiat, dicaturque arbitrari velis? habent Principes arcas, & scrinia, quarum claves committunt nemini; cur hoc non liceat Deo? & cur solus non habeat claves scrinii sui? Ferunt adolescentem quendam Corduba genitum, cum canistrum ferret fructibus plenum, sed velo tectum, obvio amico, quid illic ferret, interroganti promptè respondisse. *Non velâsem, si sciri vellem*. Simile ferè est responsum, quod Tertullianus rerum Divinarum importunis Scrutatoribus dedit. *Quis*, inquit, *revelabit, quod Deus texit? unde sciscitandum est? ergo ignorare tutissimum*. Pergit Ecclesiasticus: *Plurima supra sensum hominis ostensa sunt tibi*. Quasi dicat, cogita, quàm plurima esse, quæ hominibus videbantur, fieri non posse, & tamen Deus ostendit, facta esse. *Quis* credidit posse fieri, ut Cœlum, & Terra ex nihilo, unoque verbo formerentur? ut Deus humanâ indutus naturâ, & nasceretur & moreretur? ut virgo conciperet, pareretque? ut accidentia panis, & vini sine subiecto velut pila in aere penderent, & sub illis tanquam intra cortinam lateret Deus? ut eadem natura, & una esset, & in Personis trina? ut hominum Corpora consumpta, & in pulveres, in cineres, vermesque soluta iterum vitam reciperent morte triumphata? quod Plinio (a) tam absurdum est visum, ut mortuorum Resurrectionem inter *puerilia deliramenta, & vanitates Democriti* referret. Hæc inquam, priusquam fierent, aut futura esse Deus revelaret, incredibilia nobis videbantur, & tamen vera sunt. Ita cum Arcano Prædestinationis: fient, quæ fieri non posse credebantur, utque de futuris non dubites, voluit Deus tam multa alia præmittere, quæ fidem nostram superarent, & quæ tamen facta sunt.

Ter-

(a) *Plin. l. 8. C. 55.*

Tertiò. Job. 26. Quis poterit scrutari vias ejus, aut quis potest ei dicere, operatus es iniquitatem? memento, quòd ignores opus ejus, de quo cecinerunt viri: ecce Deus Magnus vincens scientiam nostram. Nota illa verba: Quis poterit scrutari vias ejus? quasi dicat: quemadmodum Leones, cum insequi venatorem sentiunt, vestigia sua arenis impressa turbant, delentque, ne observari possint, sed nec navium per aquas, nec Aquilarum per aëra aliquis unquam iter notavit; si ergo non Leonum, non Aquilarum, non navium viæ exploratæ nobis sunt; quantò minus viæ Dei quas Studiosè abscondit? quid frustra hanc Aquilam insequeris, & hunc Leonem venaris? nunquam iter reperies. Et quis poterit, inquit, ei dicere operatus es iniquitatem? interroga Caimum, interroga Judam, interroga Luciferum, omnesque damnatos, nemo istorum dicet, se injustè punitum, quid ergo dubitas de Justitia illius Judicis, quem ne ipsi quidem rei, damnati que accusant?

Quartò. Ecclesiastis 8. Intellexi, quòd omnium operum Dei nullam potest homo invenire rationem eorum, quæ fiunt sub sole: & quantò plus laboraverit ad querendum, tantò minus inveniet. Si homo non potest reperire rationem eorum, quæ fiunt sub Sole, quando reperiet rationem eorum, quæ fiunt supra Solem? si non potest homo videre propinqua, quando videbit remota?

Quintò. S. Paulus de hoc ipso argumento agens tandem disputationem omnem hoc epiphonemate claudit: O altitudo Sapientiæ, & Scientiæ Dei, quam inscrutabilia sunt judicia ejus, & investigabiles viæ ejus? quis enim novit sensum Domini, aut quis consiliarius ejus fuit? Si ergo nemo novit sensum Domini, & nemo illi à Consiliis, & secretis fuit, quanta erit temeritas, judicare de rebus, quas non novit, & quarum consilio non interfuit, cum decideretur? expectemus diem, quæ omnia aperiet, & sententiam interim suspendamus. Idem Apostolus raptum se, ait, in Paradisum, ubi audierit arcana verba, quæ non licet homini loqui. Si ergo ne Paulo quidem de hoc Arcano Prædestinationis loqui permissum, quantò minus nobis, qui nec in Paradiso fuimus, nec rationes audivimus?

Sextò. Idem Apostolus 1. Cor. de divinis operibus loquens, videmus, inquit, nunc in Enigmate. Nullum grandius ænigma ut illud Prædestinationis; & in hoc idem fecit Deus, quod olim Augustus, qui cum consilia, & secreta sua vellet occultissima, litteras annulo, gemmaque signabat, cui Sphinx in sculpta: Augustus, inquit
Pli-

Plinius l. 27. c. 1. *inter initia Imperii Sphynge signabat*. Sphynx monstrum erat Thebis vicinum, quod viatoribus Ænigmata proponebat, quæ solvi non poterant, quique frustra, nulloque successu tentabant, confestim à monstro necabantur, nec aliud remedium evadendi, quam à via declinare, solus Oedipus tandem evolvit. Ergo ut olim litteras Augustus, ita nunc Deus grande Prædestinationis Chirographum Sphynge notavit, voluitque Ænigma esse mortalibus insolubile: huic explicando, quotquot accincti sunt, Manichæus, Origines, Pelagius, Calvinus, omnes periere: ipse Spiritus S. mortem induxit, quotquot temerè conarentur, *Qui Scrutator est majestatis, opprimetur à gloria*. Videmus ergo nunc, hoc est, dum iter ad Cælum agimus; videmus, inquam, in Ænigmate: noli scrutari, si non vis opprimi; noli ad hanc Sphynge accedere, si Oedipus non es. Narrat Clemens Alexandrinus Diolpoli in Ægypto tabulam videri, more illius gentis (quæ figuris pro verbis, litterisque utitur) his imaginibus sculptam: infantis, senis, Acciptris, piscis, & Crocodili (a) Amabò te, si Theologus, si Philosophus, si Astrologus, si Historicus, si omnia es, hoc ænigma interpretare, & sententiam figurarum expone, quod si non potes hoc ænigma Ægypti, quantò minus ænigma Cæli? Quoties ergo Prædestinationem audis, toties cogita ænigma esse hominibus inaccessum, soli que Deo notum, & ideo nec humano ingenio tentandum.

Septimò. Christus denique ipse Joan. 3. *Spiritus*, inquit, *ubi vult spirat, & nescis, unde veniat, aut quò vadat; sic est omnis, qui natus est ex spiritu*. Duplex est hominis Nativitas, Prædestinationis, & Gratiæ, prima concipit, secunda parit: utriusque causa & origines tam incomptæ, quàm ventorum. Sicyonii, teste Pausania, nocte ventis Sacrificabant, ut innuerent, eorum naturam esse scitu difficilissimam. Duo in Regno æternitatis flant venti, Aquillo Justitiæ, & Favonius misericordiæ, isto ad æternam vitam, illo ad æternam mortem spirante; sed uterque spirat, ubi, & quando vult. Quis utriusque sit exitus aut origo, unde veniat aut quò vadat, ignoro. Quid remedii? utrique huic vento *noctu Sacrifica*, hoc est, crede, quod non vides: nox est ignorantia, sacrificium sit fides. Si ad Austrum pertines, lau-

(a) Sensus Emblematis Ægyptiaci hic est: ð qui nascimini, & interitis. Deus odit impudentiam. Cyrillus lib. 5. Stromatum. Ægyptiis enim Infans generationem; senex interitum; accipiter Deum; piscis odium, Crocodilus impudentiam signant.

lauda; si ad Aquilone time; semper tamen *Sacrifica noctu*, tuamque ignorantiam fatere, crede esse iusta, quamvis obscura. Dic cum Davide: *Misericordiam, & Judicium cantabo tibi Domine*: Misericordia est Auster, Judicium Aquilo, utrumque adora. Haecenus Scripturae, nunc Patres audiamus. Primò Tertullianus, *Quis*, inquit, *revelabit, quod Deus texit? unde Sciscitandum est? ergo ignorare tutissimum*. Nota illas voces *ignorare tutissimum*; quemadmodum, & papilionis tutissimum est, non accedere ad facem, à qua crematur, & aliò festinanti tutissimum est non ingredi labyrinthum, in quo faciliùs erret, quàm exeat. Ita hominibus, quæ Deus abscondita voluit, tutissimum ignorare.

Secundo. Salvianus de Provid. l. 3. *Possum constanter, & rationabiliter dicere, nescio secretum, & consilium Divinitatis ignoro* (a) Hoc est responsum Philosopho Christiano dignum, quidquid ex me quaesieris de occulto Prædestinationis consilio, respondebo tibi cum Salviano: *nescio, ignoro*. Nihil melius dici potest, quoties hæc causa vertitur. Cur Deus non omnes salvet, cum omnes possit? cur non omnibus det gratiam illam efficacem, & triumphatricem peccati? cur tot innocentes ante Baptismum mori permittat, cur modò post quatuor mille annos in Mundum venerit, quadraginta interim Sæculis Idololatriâ totum Mundum implente? cur Luciferum, totque Seraphinorum exercitus labi permiserit, damnaveritque unius cogitationis, unius momenti reos? cur, inquam, hæc omnia? *Nescio secretum, & consilium Divinitatis ignoro*! Neque hæc ignorantia Sapientem dedecet: Sapientis enim est scire, quæ sciri possunt; non autem velle scire, quæ sciri non possunt: Quis enim sapientem dicat, qui artem scire velit volandi sine pennis, & navigandi sine remis, velisque? aut quis unquam Sapientum conatus est oculis sonum audire, aut auribus colores videre? Atqui, ut optimè notat Augustinus, idem est, *Scrutari inscrutabilia, quod velle videre invisibilia, aut fari ineffabilia*.

Tertiò. S. Augustinus in illa Pauli Verba: *O Homo tu quis es &c. Magnum pondus habet, quod dictum est, O Homo tu quis es; nam in talibus questionibus ad suæ capacitatis considerationem revocat hominem verbo quidem brevi, sed re ipsa magna est redditio rationis: si enim non capit hæc, quis est qui respondeat Deo? si autem capit,*

(a) Idem Salvianus lib. 3. de Gub. Homo Sum, non intelligo; secretum Dei investigare non audeo.

pit, minus inveniet, quid respondeat. Quasi dicat Augustinus: Cùm interrogantibus de Prædestinatione Apostolus respondit: O Homo! idem fecisse videtur, quod Apelles, cùm sutori Helenam suam accusanti respondit: O Sutor, ne ultra crepidam! Apelles dixit: O Sutor, Apostolus dixit: O Homo: sicut enim non est Sutoris de Helena disputare, ita nec Hominis de Prædestinatione: O sutor ne ultra crepidam. O Homo, ne supra hominem. Deinde nota illud dilemma Augustino dignum: aut, inquit, Judicia Dei capis, aut non capis? Si capis, iusta invenies: si non capis, cur carpis, & cur accusas? nemo enim accusare, & carpere potest, quæ non intelligit. Si tecum Persicè loquar, & tu Persicè non intelligas, non poteris mihi respondere, nec capere, quæ ego loquor, & quæ tu non intelligis. Si ergo tu non intelligis me Persicè loquentem, quomodo intelliges Deum loquentem, & agentem divinè? Et si non habes, quæ respondeas mihi Persicè loquenti, quid habebis, quod respondeas Deo loquenti, & agenti divinè? Optima ergo, & iustissima Apostoli increpatio, cùm dicit: O Homo tu quis es, qui respondeas Deo? Idem S. Augustinus Tract. 26. in Joannem in illa verba: Nemo venit ad me, nisi Pater meus traxerit illum. Nemo, inquit, venit nisi trahens: quem trahat, & quem non trahat; quare illum trahat, & quare illum non trahat, noli velle judicare, si non vis errare. Idem ergo est in causa Prædestinationis, velle judicare, quod velle errare; quemadmodum in Eurippo Bæotia Freto perpetua tempestate, & septenis quotidie æstibus turbido, idem est velle natare, quod velle mergi, nec aliud naufragio remedium, quàm ut illuc non intres; Exemplo B. Egidii, qui rogatus de Arcano Prædestinationis, respondit: Sufficit mihi litus maris ad lavandas manus, & pedes, ac totum corpus, cur ipsum mare ingrediar? hoc est, cur velim scrutari, cùm sufficiat credere. (a) Idem S. Augustinus sermone 20. de verbis Apostoli: Si scrutari inscrutabilia venisti, crede quia periisti, tale est enim velle scrutari inscrutabilia, & investigabilia vestigare; quale est velle invisibilia videre, & ineffabilia fari.

Quarto. S. Gregorius illa verba expendens: Nunquid nostri ordinem Cæli, & pones rationem ejus in terra? Job 38 v. 33. Ad rem nostram ita scribit: Ordinem Cæli nōsse est supernarum dispositionum occultas Prædestinationes videre, rationem verò ejus in terra ponere, & ante humana corda talium secretorum causas aperire, quod

(a) Nierenbergius in Theopolitico fol. 137.

utiq; facere in hac terra positus nemo potest; quia quantalibet quis virtute proficiat, quantacumq; scientia excrescat; penetrare non sufficit, quo nos Conditor moderamine iudiciorum regat. Nota in hæc verba Jobi, ubi versio nostra latina habet: Nunquid nōsti ordinem Cæli? versionem Hebraicam habere: Nunquid nōsti leges, & statuta Cæli? ordinem enim, motusq; Cæli, & Stellarum, quæ videlicet superiores, quæ inferiores, quæ noctu, quæ interdiu luceant, quæ magnæ, quæ parvæ, quæ & quando oriantur, occidantq; optimè Astrologi callent. Imò Archimedes omnem Cæli ac Planetarum ordinem, motus, ortum, & occasum in Sphæra vitrea distinctissimè ostendit. Ordo ergo cæli sciri potest, ac etiam in charta vitroq; pingi. Sed leges, ac statuta cæli sciri non possunt: cælum enim alicubi semper serenum, alicubi semper turbidum est, alibi salubre, alibi noxium. Nunquid mihi causas divinabis, cur semper, ac stabili lege cælum tam variè in terras influat? cur in sola Ægypto nunquam pluat, cælo semper sereno? cur in Africa, cum æstas est, summique calores, noctes roribus abundant, frigeantq;? cur in Locris & ad lacum velinum in Italia quotidie Iris in Cælo spectetur, cur Rhodis, & Syraculis semper aliquâ diei horâ Sol videatur, quamvis alioquin nubilo aëre, & pluviis squallido? Si ergo cæli, quod videmus, nemo leges novit, quantò minùs noverit Leges, & Decreta Dei, quem non videmus?

Quintò S. Bernardus Epist. 189. Nihil magis contra rationem, quàm velle rationem ratione transcendere: Nihil magis contra fidem, quàm credere nolle, quidquid non possis ratione attingere.

Denique S. Hilarius lib. 8. de Trinitate: Sapientia hæc veritas est, interdum sapere, quod nolis, quasi dicat Hilarius: cogita, quàm multa homines faciant affectibus suis, & genio adversa, ut finem aliquem obtineant. Mercatores merces jactant, ut naufragium evadant: Milites vulnera, & mortem ferunt, ut stipendiis, ac victoriâ potiantur, & ægroti, ut sanitatem recipiant, quàm multa faciunt, quæ nolunt? quantò igitur magis fidei, animæque servandæ causâ, ac in gratiam æternæ veritatis oportet Christianum aliqua sapere, aliqua credere, quæ intellectus nolit. Ægroto amara videtur potio, quam sumit, haurit tamen, fiduciâ, & reverentiâ Medici, qui illam propinat. Sic Christiano amara videntur cæli Judicia; adoranda sunt tamen fiduciâ, ac reverentiâ Dei, qui illa revelat. Persuadet tibi Medicus, ut bibas ingrata; persuadeat tibi Deus, ut credas

das difficilia. Dicit Ægrotus cum Medico: sanitas est interdum bibere, quod nolis; tu dic cum Hilario: *veritas est, interdum credere, quod nolis.*

§. II.

Multa esse in rerum natura, quæ licet vera, occultas tamen, & inpenetrabiles habent causas, nec ideo falsi accusari possunt. Ergo multò magis idem dicendum de alea Prædestinationis.

Pessima semper fuit illa argumentatio: *Non video, non capio, ergo non est.* Id enim perinde fuerit, ac si noctua dicat: Solem non video, ergo Sol non est. Quodd enim tu aliquid non capias, sæpe ignorantia tua facit, & ideo non res ipsas accusare, sed ignorantiam oportet. Id verum esse hoc paragrapho ostendam, in quatruplici rerum genere. *Primò* in Mysteriis supernaturalibus. *Secundò*. In dispositionibus Diuinæ Providentiæ. *Tertiò*. In rebus Naturalibus. Et *quartò*. In consiliis, facilisque humanis. Ex quibus optimè inferes: sitam multa ignoramus, quæ vera sunt, mirum non esse, si etiam unum illud, & inpenetrabile Secretum Prædestinationis verum, justumque sit, quamvis non appareant ejus causæ, imò temerarios esse, qui accusant, quod ignorant, cum potius accusare se ipsos, & imperitiæ deberent, quia nesciunt, & temeritatis, quia audent.

Incipiamus ergo à *rebus Divinis*. Jam supra ostendi, multa à Deo facta esse, quæ humanæ rationi videbantur fieri non posse, Nolo repetere, quæ de Creatione, Incarnatione, ac Trinitate differui. Revoca tantum in mentem originem, & incrementa Christianæ Religionis. Cui unquam venisset in mentem expugnandæ Idolatriæ, tot Sæculorum possessione, tot Imperatorum viribus, & potentiâ, tot Philosophorum Libris, tot suppliciis armatæ suffraguros duodecim Piscatores inopes, rudes, inermes, ineloquentes, & supplicii consumptos? Planè non minùs id dignum admiratione, quàm si delendæ munitissimæ civitati, qualis Babilon, aut Roma

ma fuit, duodecim muscæ accingerentur. Si ego dicerem, Babilonem evertent duodecim muscæ, quis mihi crederet? at longè incredibiliùs, si totum Romanum Imperium convertant duodecim Piscatores, id tamen factum est. Sed longè miraculum auget, fidemque omnem superat, si consideres, quæ Religio nostra credenda, & facienda præscribit. Adorare pro Deo Hominem in stabulo inter Jumenta natum, & in Cruce inter Latrones extinctum, eumque Jovæ tonanti, tot victimis, & aureis Templis, & à tot Imperatoribus culto præferre; imò præ omnibus creatis, & increatis amare, ac pro illo milles mortem, & tormenta perferre: malle præ voluptatibus supplicia, præ opibus inopiam, præ honoribus contemptum, præ libertate servitutem; nec aliud præmium expectare, quàm speratum, & post mortem ac cineres obventurum Regnum, quod nemo vidit, Civitatem, quam nemo vidit, nuptias quas nemo vidit, Gloriam, quæ nunquam apparuit, & hæc præsentibus delitiis, honoribus, divitiis, vitæque præferre. Hæc dogmata erant nostræ Religionis, quæ adeò naturæ, ac sensibus repugnabant, quæque hominibus tam absurda visa sunt, ut eam teste Apostolo pro stulticia reputarent, & hanc tamen toti Mundo Piscatores persuasere. Quis rogo hoc crederet, antequàm fieret? & tamen factum esse nemo potest negare.

Photinus Philosophus Platonius, cùm apud Gallienum Imperatorem gratiâ floreret, unamque in Campania Civitatem peteret Platonopolim appellandam, & Platonis legibus, quæ sanctissimæ videbantur, imbuendam, nunquam efficere id potuit, cùm tamen Christiani non unam tantùm civitatem, sed totum orbem imple-
rent, Imperatoribus non tantùm non faventibus, sed maximè ad-
versis. Quis unquam antequàm hæc evenirent, sibi persuaderet, plu-
res Crucifixi, quàm Platonis Discipulos fore, & Academiam Cruci-
cessuram? id tamen præter omnium fidem evenit, duratque tot
Sæculis. In iis ergo, quæ Deus facit, non est attendendum, quàm
aliquid sit nobis creditu difficile, sed quàm nihil sit Deo impossi-
bile. Idem dicas de Prædestinatione. Justum erit, quidquid ipse de-
cernit, quamvis ignores; sicut facile erit, quidquid ipse faciendum su-
sceperit, quamvis non capias: quàm enim Deus est omnipotens, tam
est justus: & sicut omnia illi facilia, quia omnipotens; ita omnia il-
lius recta, quia justus; si ergo credis Omnipotenti, crede & iusto.

Narrat Nierembergius, [a] fuisse quendam Anachoretam, qui

li 2

à Deo

[a] l. 2. c. 1. de Divina Pulchritud.

à Deo quotidianis precibus expetebat, vellet sibi ostendere Arcana suæ Providentiæ. Apparuit Angelus Monachum indutus, rogavitque vellet sibi comes esse, aliorum, qui in deserto agebant, cellas invisuro. Primò Monachum adeunt selectæ, & vulgatæ Sanctitatis, ab hoc humanissimè excepti & passi. Dum à prandio abeunt, clanculò Angelus phialam, quâ aquam hauriebat, subducit. Monachus furto deprehenso adolescentem sequi jubet, qui repetat, quem Angelus fuisse aggressus interimit. Postea alterius Monachi cellam pulsant, à quo contumeliis & verberibus affecti pelluntur, hunc phialâ Angelus donat, quam alteri subduxerat. Tum clienti suo timore, & admiratione defixo: phiala, inquit, quam furripui, furto provenerat, & ideo non decuit, ut à Sancto illo Anachoreta, quamvis furti ignaro, possideretur, dedi ergo illam Monacho scelerato. Adolescentem, quem fuisse cecidi, si in proximam noctem vixisset, magistrum suum perempturus erat; præveni ergo parricidium, ut innocens moreretur. *Hæc sunt Judicia Dei.* Dixit, & evanuit. Ita Nierenbergius. Quis rogo hoc Ænigma solvisset, nisi Deus ipse aperiret? Sunt, qui Luciferi casum deplorant, Deumque nimis severitatis postulant, quòd in creatura tam pulchra, & felici unam cogitationem, unumque momentum æternis suppliciis damnaverit. Quòd si istis dicas: Luciferum malle infernum, quàm Cælum, nec veniam optare, quamvis Deus dare velit; non ergo iniuste veniam negari nec optanti, nec accipere volenti; quis hoc crederet? & tamen ita est. Refert enim S. Birgitta in *Lib. Revelat.* Visam à se animam æternis ignibus addictam divino tribunali assistere, ac Judicem sic alloqui: *Quamvis possem salvari, nollem tamen.* Causam rogata: *Ne tu,* inquit, *aliquid de me gaudium habeas, hæc est enim voluntas mea.* Amabò te, hoc unquam divinasses? Scribit Petrarcha [a] & ex illo Spondanus ad Annum 1343. Neapolim immani terræmotu quassatam esse, Cælo pluviis, fulminibus, ventisque horrido, & extrema minante. Tota Urbs ac præsertim Joanna Regina nudis pedibus, comisque solutis in Templum effusa: Mare verò tam sava tempestate jactatum, ut omnes in portu naves, Nautæque, & qui illis vehebantur, merisi fuerint, ne uno quidem superflite. Sola navis, quæ quadringentos Latrones vehebat, tota ferè nocte cum ventis, & fluctibus luctata, ubi jam rebus desperatis, remis, velisque consumptis naufragium expectaret, subito serenante Cælo, Marique placato

[a] l. 5. *Epist. Familiar. ep. 5.*

cato ad littus applicuit, ne uno quidem è tot Latronibus merfo. Rogo te, quis hic causam reperiet cœlestis Consilii? Nam si humanis rationibus hunc eventum metiaris; nemo magis, quàm illi Homicidæ, perire debuit. *Sed quis poterit scrutari vias Domini; aut quis potuit ei dicere: operatus es iniquitatem?* Jobi 26.

Qui vidit Susannam duci, & Josephum à Fratribus venditum, ac etiam adulterii convictum, planè conclamatum Innocentiam, & à Deo neglectam diceret: At exitus docuit, non neglectam, sed custoditam fuisse: Nec Joseph regnaret, nisi venderetur, nec Susannæ pudicitiam orbis agnosceret, nisi damnaretur. Ægyptii cùm Sacris operabantur, oculis in cœlum fixis ter exclamabant: *O tenebræ, ô tenebræ, ô tenebræ!* hocque Sacrificandi signum, & principium erat. Ita Mysterium Prædestinationis altis tenebris, & profunda nocte involutum jacet, & qui illud scrutari aggreditur, perinde fecerit, ac si densa nocte, extinctisque facibus rerum colores, quos nunquam vidit, distinguere velit. Tenebræ jam sunt, expectanda dies æternitatis, quæ colores, causasque aperiet Divinæ Providentiæ. Nunc aliud dicere Christianis non licet, quàm olim Ægyptiis, cùm Sacris, operarentur: *ô tenebræ! ô tenebræ! ô tenebræ!* Exitus ergo Artificem commendabit: nam ne quidem Artifices nostri de suis operibus judicari volunt ab imperitis ante operis finem. Si quis ignarus Medicinæ videat venas secari aliàs è naribus sanguinanti, credat perimi ægrotum, & tamen remedium est. Qui nescit artem navigandi, videatque imminente tempestate navim in altum mare, & à littore agi; dicet, naufragio exponi, & tamen tutior erit, quippe scopulis procul. Pictores tabulam velant, nec aspici volunt nisi finitam, sublatoque sipario. Scribunt Adamum Tannerum celebrem Theologum in itinere, ac rusticano pago morbo correptum fuisse. Morituro vestes, sarcinæque excussæ. Inter alia modicum vitrum repertum, in quo ingens monstrum, horridumque visebatur, quippe cornibus, squammis, alis, spiculo armatum, & mole specieque vasto Draconi simillimum. Ab omnibus conclamatum est, *Dæmonem esse in phiala*, & omnium votis, ac etiam Parochi ad spectaculum vocatis decretum est, si obiret, cadaver prophano loco condendum, beneficio comperto. Tandem supervenit Opticæ peritus, qui cum omnium risu, quem ipsi Dæmonem putabant, scarabæum esse ostendit, Microscopio inclusum, quique vici mendacio in grande monstrum evaserat. Si ergo ne quidem artificum nostrorum opera

ab

ab imperitis, & ante finem æstimanda sunt, quantò minùs opera Dei? Dies extrema Artificem nostrum absolvet, finemque querelis imponet. Id monuit Apostolus: *Nolite ante tempus judicare, quoad- usq; Dominus veniat.* Quid minùs pro Deo, & quid justius peti potest, quàm ut illum eodem jure, quo Latrones, reosque capitis habeas? Nemo Latronem aut judicat, aut damnat, nisi auditum & defensum: tu Deum damnabis, nec auditum, nec defensum? Noli ergo ante tempus judicare, sed expecta, donec à Deo causas intelligas.

Nunc age, examinemus quoque secreta *Natura*. Hæc tam admirabilia sunt, fidemque omnem superantia, ut humanum ingenium etiam minima fatigaverint, imò vicerint, Fuit, qui 40. annos in altissimo monte contemplando motui trepidationis impendit, nec tamen intellexit: Alius magnam vitæ partem mellificio apum in vitreo alveari, nec assequi potuit. Ferunt Aristotelem, cum causas Eurippi duodecies una die æstuantis penetrare non posset, se ipsum aquis hauriendum dedisse. Quid de aliis tam multis dicam, quorum causas nec videmus, nec capimus, & tamen sunt? cur Magnes relictis tribus cœli cardinibus ad solum Borealem vertitur? cur Iris tribus tantum coloribus pingitur, nec unquam orbem integrum absolvit? cur Serpens Fraxini umbram non patitur, & hominis salivâ, velut fervente aquâ cruciatur? cur si quis veneno intreat, nullis ignibus cor ejus cremari potest? cur arbor tristitiæ (nascitur in Malabari Insula, & Indi Parizicata vocant) noctu tantum floret, & Sole tacta comas, floresque deponit? cur Æthiopes etiam extrema senectute nunquam calvescunt? cur Leo Galli cantu terretur, & corallium infra mare mollis herba, supra mare in gemmam duratur? cur Adamas igni, ferroque invictus hircino sanguine mollescit ac frangitur? & ubi nascitur Nilus tantus fluvius, & tamen tam occultæ originis, ut antiquo proverbio pro re impossibili dicatur: *Fontes Nili querere*; & de quo Claudianus.

Arcanum Natura caput non prodidit ulli,

Amovitq; sinus, & Gentes maluit ortus

Mirari, quàm scire suos.

Quis, inquam, istarum, & mille aliarum rerum causas aut vidit, aut ratione penetravit? & tamen dubium non est dari, cum effectus videamus: Ita in rebus Divinis justæ sunt causæ Prædestinationis æternæ, quamvis nos lateant; nec mirum est latere, quæ supra naturam, cum, ut ostendi, tam multa nos lateant etiam intra naturam.

Quis

Quis nostram, inquit Tertullianus, scrutari potest apud aedificia, formica stabula, telas araneae? Et Augustinus inter communes: Admiratur homo Ecclipsin Solis, quia ignorat interpositionem Lunae: admiratur Ecclipsin Lunae, quia ignorat interpositionem Terrae: admiratur adventum fulguris, quia ignorat modum ejus incensionis. Quid ergo novi, si admirari nos oporteat Judicia Dei, quia ignoramus ejus rationes? nihil enim est aliud reprobatio, quam Ecclipsis Divini Solis propter oppositionem humanae voluntatis: vera est, iusta est, certa est, quamvis ignores; quod enim est rusticus ad Ecclipsin Solis, hoc est omnis homo ad Ecclipsin Dei; uterque causas ignorat, & tamen sicut Ecclipsis Solis non ideo est falsa, quia ejus causas ignorat rusticus; ita Ecclipsis Dei non ideo est injusta, quia ejus causas ignorat Christianus. Optimè Seneca de cælo disputans: Illa, inquit, Arcana non promiscuè, nec omnibus patent, reducta & in interiore Sacrario clausa sunt. Aliud hæc ætas, aliud, quæ post nos subibit, aspiciet. Idque à Seneca verissimè dictum; nam post sex mille annos à condito Mundo primus Galilæus quatuor, novosque Planetas observavit, qui Jovem ambiunt, quosque Stellas Medicæ appellavit, crebris Ecclipsibus inumbrari solitas. Tres quoque alios Planetas Saturni Comites, aded, ut pro septem Planetis, quos Antiquitas solos agnovit, nova Astrologia 14. detexerit. Taceo novum Mundum, hoc est, Indias Occidentales post sex mille annos nuper à Columbo repertas indicio anniversarii, statique venti ab occasu spirantis; hic jam mille sex annis spiraverat, & tamen solus Columbus agnovit, quid ferret, & forsitan alii quoque Mundi supersunt tam nobis occulti, quam Columbo America. Si ergo in hoc Mundo spectabili tam multa fuere, & adhuc sunt, quæ nos latent, & futuræ ætati reposita, quantò id veriùs erit de rebus illis, quæ planè nos fugiunt, quæque futura post nos ætas in Cælis aspiciet? Reperiri non potest Mundus Prædestinatorum nisi mari transmissio, hoc est finita hujus vitæ navigatione; tunc nostrum quilibet Columbus erit, nunc verò tam ignari Orbis Electorum, Reproborumque vivimus, quam Columbus Americæ, cum Hispali solveret. Ergo expectemus, dum liceat navigare, & in portum appellere.

Finiam hoc argumentum de occultis Naturæ, ubi unicum adjunxero Divinæ Providentiæ, etiam in rebus desperatis pulcherrimum specimen, ex quo intelligas, quantum etiam in Naturalibus rebus Divina consilia ab humanis distent. Est in Oceano Atlantico

inter

nter Canarias, seu Fortunatas Insulas Occidentem versùs una, quam *Ferream*, vocant. In hac nulli fluvii, nulli fontes, nulli rores, nullæque pluviae, sicque aquarum dulcium nulla copia: Incolæ ferè sex mille numero. Quis non crederet omnia siti peritura, cælo tam arido? aut quis remedium inveniet? Et tamen providit Natura. In medio Insulæ arbor maxima, densisque frondibus, folium Olivam imitatur, fructus glandem optimi odoris, & aromaticus, 40. pedes longa, & ubi comæ maximè sparguntur, pedes 120. lata. In hanc quotidie sub Meridiem Nubes incumbit, duratque in proximum diem, & Solis exortu evanescit. Ex nube per folia, ramosque tanta vis aquarum decurrit, ut sufficiat viciis mille amphoris implendis, una verò Amphora quinque hominum siti. Ex puteo per Eurippos, Nilosque in totam Insulam aqua diffunditur, abundatque omnium necessitati. Ita recenset Bethencour Nobilis *Gallus lib. de Insulis Canariis cap. 65.* Petrus Boucher Ordinis S. Francisci: Joannes Verrier Sacerdos, Thomas Nicolaus Anglus, Jacson Anglus testes oculati, & ex istis Sanfon Regis Christianissimi Geographus de Insulis Canariis fol. 64. Quis mihi jam causas aperiet tam miræ rigationis? quèd Nubes quotidie uno loco, certoque tempore, & in unam tantum arborem subsidat? quèd nec ventis, nec Sole Meridiano dissipetur, ut aliæ nubes, nec consumatur quotidiano, ac tam largo imbre, quodque exurgat sereno ubique cælo? Deinde si ab aliquo quærerem, qui nunquam hoc naturæ prodigium vidisset, legissetque, fieri ne potest illic homines, & Animantes vivere, ubi nulli fontes, nulli fluvii, nullique lacus, & nulla pluviarum copia? quis non responderet, fieri non posse? Et tamen fieri certum est, eamque Insulam habitari, Deo supra hominum fidem providente. Ita, multoque magis fieri credendum est in iis, quæ animam, ac æternitatem spectant; quis enim credat, Deo plùs Insulam, quàm Animas cordi esse? Quàm multi sunt, qui conqueruntur Turcis, Æthiopibus, Persis, Indis, Barbarisque Evangelium, & Sacramenta desuisse, quibus salvarentur, exclamantque: *Heu Insulas ferreas, quibus Cælum nunquam pluit!* Sed interim non intelligunt nullum esse tam Barbarum, cui licèt Evangelio, Sacramentis, aliisque ordinariis mediis destituto, alia remedia, alia, & occulta gratiæ auxilia, aliæ nubes singulis mortalibus innatæ non suppetant sedandæ siti, vincendæ concupiscentiæ, ac evitandæ æternæ morti. Ex his nubi-
bus Cornelius Centurio, alique Gentiles bibere, quos Deus miris
modis

modis ad veram fidem, æternamque salutem vocavit, & exempla abundant, quæ referre nolo. Nemo ergo Deum accuset, quippe nulla Insula tam ferrea, tamque arida, cui Cælum non pluat; nulla Anima tam deplorata, cui non sufficiens, largumque auxilium. Quid si natura non deficit in necessariis, multò minùs deficiet gratia: nescio modum, sed scio, non deesse.

Quod si tam difficile est, causas rerum Naturalium invenire, multò difficiliùs eorum causas, quæ ab hominum consiliis, arbitrioque dependent; & ideo jure optimo Jeremias cap. 17. vers. 9. *Pravum est cor hominis, & inscrutabile, quis cognoscet illud?* septuaginta habent: *סבליא האדם*. hoc est: *profundum est cor hominis*. Et verò tam profundum, tamque inscrutabile, ut Theologi doceant, occultas hominum intentiones ne ab ipsis quidem Angelis posse penetrari. Quid si cor hominis tam inscrutabile aliis, quantò magis cor Dei? Sed aliqua videamus. Narrat Spondanus ad Annum 1204. & plures alii ab eo laudati, Petrum Secundum Arragoniæ Regem ab Innocentio III. Romæ coronandum die Inaugurationi sacra in Vaticano comparuisse auro, gemmisque insignem, excepto Diademate, quod adamantum, & Margaritarum loco pane contextum erat. Nemo aliquis poterat tam novum Coronæ genus ingenio assequi: alii conjectabant, voluisse Regem Populis abundantiam polliceri: alii Concordiam, pane ex multis granis unitisque compacto: alii Regis frugalitatem à delitiis abhorrentis, & populari escâ contenti: alii cultum interpretabantur sanctissimæ Eucharistiæ: alii delirium; alii risum, & jocum. Finitis Sacris causam rogatus; eam dedit, quæ nemini in mentem venisset. Solebat eo tempore Pontifex, cum Reges coronaret, aureum Diadema pedibus stringere, candidatoque imponere. Pudebat Petrum, credebatque infra Majestatem, tam abjectè haberi; ut ergo Pontifex pedibus abstineret reverentiâ panis coronam ex pane delegit. Quis unquam aut videntium, aut legentium hanc causam indagasset, nisi illam Rex ipse depromeret? Recenset Nanus in Historia Turcica: Amurathem Turcarum Tyrannum; cum febri decumberet, vicinaque morte remedia cessarent, jussisse omnia vasa crySTALLINA ingentis pretii, quæque in delitiis habuerat toto orbe quæsitâ ex insperato collidi, nec prius quievissè, quàm omnia se coram frangerentur. Paulò post sanitas rediit. Quis mihi causam exponat, cur id jusserit Amurathes, subitoque perdi vellet, quæ aded amaverat? An mentis delirio? an quoddam hæredibus

invideret, nec vellet alios frui, quibus ipse non poterat? Nihil istorum. Ipse causam aperuit. Solebat ante mortem in crystallo bibere, & semel adedè largè se proluit, ut secuta flagrantissima febris, morti præluderet. Rebus desperatis vovit se nunquam deinceps vino usurum; utque incentiva ebrietatis procul haberet, nec elegantia, visuque crystalli votum abrumperet, comminui vasa, delerique voluit. Age jam verò tu, qui divina experiri, animoque complecti tentas, compone Amurathem cum Deo, pocula cum hominibus: si non capis consilia Amurathis de poculis, quomodo capies consilia Dei de hominibus? Nescis cur Amurathes frangi crystallum jubeat, & scies cur Deus damnari hominem permittat? Nescis, quæ homo agit circa vitrum, & scies, quid agat Deus circa Animam? Ergo in Amurathe, quod primò delirium omnibus videbatur, postea sapientissimè factum apparuit. Referunt quoque de Anaxagora, cum maxima ætate, sereno cœlo, & ferventissimo diei sole ludi Olympici agerentur, convenissetque ad spectaculum flos Græcæ Juventutis, intrasse Philosophum cerato pileo, penulaque crassissima, & impenetrabili onustam. Omnes in risum, & sannas effundi, illudebantque velut insano, quòd frigeret ardente cœlo, & reliquis omnibus aut seminudis, aut vix levissimo amiculo æstum ferentibus. Sed paulò post densissimæ nubes cœlo obductæ, tantaque vis pluviarum secuta, ut Theatrum & homines aquis implerentur, intacto solùm Anaxagora, qui astrorum peritus pluvias præviderat, & cujus consilium ante eventum imprudens videbatur; sed post eventum prudentissimum, dignumque Philosopho. Quid de aliis, & occultissimis Mortalium consiliis dicam, quæ non semel aut aliquando, sed passim, & quotidie contingunt? videt aliquis puellam elegantissima facie, gemmis, unionibus, illecebris plenam, totoque habitu amores, & delicias spirantem: videt, inquam, noctu, extinctis facibus, clam, suspensoque gradu ab Eunuchis in Tabernaculum, & thalamum duci decumbentis Imperatoris: quis non credat, Thaidem, & Lenam esse? & tamen Juditha est, sancta, innocens, pudica, eademque nocte bellum finitura, hoste obruncato. Videt alius adolescentem comptum, ferro præcinctum, pallioque faciem velante lupanar ingredi, proventa jam nocte: quis non credat Veneris militem? & tamen Theodorus est Christi martyr; Christianam prostibulo educet, mutato cum Virgine habitu, delusaque custodiâ. Videt alius senem talari amictum, capite canis sparso, foroque inambulantiem, fasciculos florum manu,

finu-

sinûque gestare, ut virgines solent; quis non credat, aut insanire, aut uxorem captare? & Philippus Nereus est, qui ad Insulam vocatus honores fugit, simulato delirio. Manet ergo fixum, ratumque, quodd probandum initio susceperam, multa in natura fieri, multa ab hominibus, quæ optima sunt, quamvis lateant causæ, primoque aspectu aut impossibilia, aut inconsulta ignorantibus videantur. Idem ergo dicendum de divinis Judiciis, quæ non ideo injusta sunt, quia nobis occulta, imò quia occulta, insanus sit, qui sententiam ferat de rebus, quas non intelligit. Memento, nihil esse naturam, omnesque creaturas, si cum Deo & divinis comparentur: quid enim est Nilus, aut Iris, aut Magnes, aut humana consilia cum Deo, rebusque divinis composita? Tu ergo, qui non capis tam parva, tamque exposita; quomodo capies tam magna, tamque recondita; quique in placidissimo, & minimo lacu nescis cymbulam agere, quomodo velificabis in maximo, & turbatissimo pelago? Et quid agis, cum rerum naturalium causas, & rationes non assequeris? An tibi non sufficit effectum videre, aut saltem ab hominibus probatissimæ fidei audire? Idem ergo fac in rebus Decretisque divinis. Duo hominum oculi sunt, fides & ratio: uterque, aut saltem oculus fidei falli non potest; cum ex adverso oculus corporis mille erroribus pateat. Dicit tibi oculus fidei, Deum existere, & justum ac bonum esse in omnibus operibus suis: idem quoque omnis ratio, omnisque creatura clamat. Tu ergo, qui non dubitas Magnetem semper in Boream, nunquam in Austrum vergere, quia id oculus tuus dicit; cur dubites, Deum semper bonum & justum esse, nunquam verò malignum, quia id fides, & ratio manifesta docet? An verò de Magnete oculo credes, qui falli potest, & de Deo non credes fidei, apertæque rationi, quæ falli non possunt? Duo testes oculus, & fides. Oculus testis sæpe mendacii, falsique convictus. Dicit solem parvum esse, & falsum est. Dicit Lunam maculis aspergi, & falsum est. Dicit umbram esse nigram, moverique, & id quoque est falsum. Dicit cælum stare, iridem coloribus pingi, aërem cæruleum, remosque aquæ immerfos fractos esse, quæ omnia sunt falsa. Tu ergo qui oculo tuo credis testi toties mendaci, cur non magis fidei credas testi semper incorrupto, & nullius mendacii comperto?

§. III.

*Causam Divinorum Judiciorum quærentibus
optima datur, omniq̃ue demonstra-
tione potentior.*

NOtat Plinius *lib. 21. c. 7.* aliquos esse flores, quorum, inquit, odor suavior è longinquo, propius admotus hebetatur, ut violæ, ac liliorum. Ita in rebus ac consiliis divinis, quæ melius capiunt, qui minùs, quàm qui nimis accedunt. Id optimè expressit S. Zeno: (a) *Non intelligunt miseri, quoniam curiositas rerum efficit, non peritum*: Et ideo Sponsa fugere à se dilectum optabat: *Fuge, inquit, dilecte mi, & assimilare capræ, hinnuloq̃, cervorum*. Mirum votum amantis! nam quæ homines amare, præsentis volunt, optantq̃ue videre, & amplecti; secùs illa, quæ Deum amat; diligit enim, & fugit: quæ causa tam miri, timidiq̃ue amoris? quia videlicet *curiositas rerum efficit, non peritum*. Si causam tamen pertinaciter velis divinæ Predestinationis, ea quoq̃ue in promptu est, tam clara, convincensq̃ue, ut clariorem, magisq̃ue invictam ne optare quidem possis. Eam breviter perstringit eloquentissimus Salvianus: (b) *Satis mihi sit, inquit, pro universis rationibus Author, & ordinator Deus. Author in iis quæ facit, ordinator in iis, quæ permittit*. Ex qua Salviani sententia ita argumentamur: Deus est justus, & bonus, ita ut non possit esse injustus, aut malus; ergo ejus quoq̃ue judicia sunt justa, & bona, ita ut non possint esse injusta, & mala. Si ergo ejus judicia justa & bona, ergo nulla causa criminandi: alioquin si tibi hæc demonstratio non sufficit, quæ ergo sufficiet? aut quid ampliùs velis? aperiantur Archivia æternitatis, evolvantur cœli Annales: retexantur longi, funestiq̃ue processus, Tabularia, Protocolla, Libelli, Causæq̃ue damnatorum, & à Deo velut à Judice suspecto, corruptoq̃ue rationes exigantur, cur istum & illum perire permiserit: quid, inquam, in his omnibus fortius occurret, pacandoq̃ue animo etiam obstinatissimo

(a) *Lib. 2. de æterna Filii Generat.*

(b) *Lib. 3. de Provid.*

fimo aptius, quàm demonstratio Salviani repetentis: *Satis mihi sit pro universis rationibus Author, & ordinator Deus*. Quoties ergo tu dixeris mihi: quare Deus, qui est tam bonus, permittit tot mala? quare cùm omnium sit Deus, non æquè omnium miseretur? quare ex duobus gemellis fratribus Jacob dilexit, Esau odio habuit? toties respondebo tibi: *Satis est mihi pro universis rationibus Author, & ordinator Deus*. Et si iterum petas, cur non annuntietur Indis Evangelium? cur Persæ non illuminentur? cur Tartaris, Chinisq̃ue tantis Imperiis nunquam emerferit Sol veritatis? Si, inquam, hæc mihi objeceris, iterum, iterumq̃ue respondebo: *Satis est mihi pro universis rationibus Author, & ordinator Deus*.

Si enim demonstratio ex Aristotelis sententia constare debet ex prioribus; quid rogo est prius divina Voluntate, quæ est æterna? Si ex notioribus; quid notius est, quàm Deum justum & Sanctum esse? Si ex necessariis; quid magis necessarium est, quàm nihil esse injusti, nihilq̃ue mali in eo, qui est summè justus, summèq̃ue bonus? quemadmodum in eo, qui est summè candidus, nulla nigredo; & in eo, qui summè calidus, nullum est frigus. Si denique Demonstratio constare debet ex causis conclusionis; voluntas diuina omnes causas complectitur, estq̃ue causa efficiens, exemplaris, finalis, formalis, & subiectiva omnis boni, & recti; aded ut in hoc Enthymemate: *Deus Judam damnari permisit; ergo Judas justè rectèq̃, damnatus est*: conclusio per omne genus causarum probata sit, quod in nulla alia demonstratione reperias. Tu ergo, quicumque es, rationes, & argumenta quære, tu disputa, & dubita; ego securus cum Salviano repetam: *Satis est mihi pro universis rationibus Author, & ordinator Deus*. Si quidem noctu in officinam ducam præstantissimi pictoris, qualis olim Apelles, & Parrhasius, nostrisq̃ue temporibus Rubenius, & Hostenius fuit, subitoq̃ue extinctis facibus à te quæram: dic mihi fodes, hic color est niger, an albus? hæc imago est turpis, an pulchra? hæc tabula est rasa, an picta? quid aliud respondebis, nisi, non possum judicare, quod non video, credo tamen pulchrum esse, quidquid Apelles pinxit. Idem de Deo, eiusq̃ue operibus dicendum. Totus Mundus officina Dei est, & quot homines, tot Dei Imagines; aliæ candidæ; aliæ atro colore pictæ; hoc est, aliæ æternum miseræ, aliæ æternum felices. Nox est Prædestinatio obscura & illunis, & in qua omnem faciem humani ingenij Deus extinctam voluit, Si ergo à me quæras: cur Deus hanc imaginem nigram, aliam candidam pinxit? hunc felicem, illum infelicem; hunc vas in honorem, illum vas

in

in contumeliam? Judam desperantem, Petrum poenitentem; paucos salvari, multos damnari voluit; imò non voluit, sed tantum permisit? quid aliud, inquam, respondebo, quàm nox est, faces extinctæ sunt, non video, nec possum cæcus de coloribus judicare, credo tamen pulchrum esse, quidquid Apelles pinxit, & justum esse, quidquid Deus fecit. Summa ergo omnium demonstrationum sit illa Salviani: *Auctor & ordinator Deus.*

Hac ipsa argumentatione tanquàm insuperabili semper usi sunt Sancti Doctores, quoties de Prædestinatione loqui oportuit. S. Gregorius l. 25. Moral. c. 36. *Docemur, inquit, non temerè discutere aterna consilia de aliorum vocatione attendentes, quod injustum esse non potest, quod placuit justo.* Et S. Paulinus epist. 38. *Non est ambigendum omnia Dei, etsi nobis non sint perspicua, tamen esse consulta.* S. Ambrosius in Luc l. 4. c. 5. *Si Deo non credimus, cui credemus?* quasi dicat: cogita quàm multa credas esse vera, quia homines dicunt, & nisi crederes, omnium risui, & sannis pateres. Credis Geographicis esse veram Americam; credis Navigantibus esse verum in Ægypto Nilum: credis Mercatoribus esse veras in Sinu Persico Margaritas: credis unguentariis verum balsamum in Palæstina ex arboribus fluere: credis Historicis verum aliquem Pompeium, & Cicero-nem Romæ fuisse. Hæc omnia nunquam vidisti, & tamen credis, quia homines dicunt. Amabò te, cur non multò magis credas, æquissima & honestissima, quæ Deus facit, cùm hoc ipsum & ratio, & Deus testentur; quòd si Deo non credimus, cui credemus? aut ergo Deo, aut nulli credendum. Cùm Socrati quædam oblata fuissent à Democrito Philosopho obscurissimè scripta, & ea attentè legisset; rogatus quid sentiret; respondit: *quæ intellexi fortia sunt, puto autem & quæ non intellexi; verùm Delio Natatione indigent.* Sic nos de Deo. Opera illius, quæ intelligis, justa sunt, crede autem, justa esse & quæ non intelligis. Quod permiserit Josephum vendi, ut imperaret; quòd Petrum labi, ut compati posset; quòd accusari Susannam, ut constaret Deum innocentibus subvenire; quòd Latronem in extremis poenitere, ut nemo desperet; hæc, inquam, omnia, quæ intelligis, justa sunt, crede ergo, etiam justa esse, quæ non intelligis. Refert Proclus, (a) Hieronem Sicilia Regem construi triremem jussisse ingentis molis Ptolomæo donandam: cùm verò multis laboribus, longoque tempore, ac totis ferè Syracusis frustra nitentibus moveri non posset, & in aquas mitti,

voca-

(a) l. 2. c. 3. in *Euclydem.*

vocatum esse Archimede[m] : is exiguam , levi[m]que machinam confecit , & Regi navi admovendam dedit , continuò levare navis , & in aquas agi uno Rege & citra laborem nitente . Rapuit Syracusas admiratio , ac Hieronem præcipue , qui totâ Siciliâ edictum in hæc verba vulgari jussit : *Ab hac die , quodcumq[ue] dixerit Archimedes , credendum est illi .* Si credendum Archimedi , postquàm semel , unoque tantum opere peritiam suam ostendit , quantò magis credendum Deo , qui toties , tantisque operibus toti Mundo , & tibi præsertim Justitiam suam , Providentiam , & Amorem probavit ? Quid fecisti , ut te crearet ? quid meruisti , ut sua morte redimeret ? & quot casibus te incogitantem , imò & hostem eripuit ? & post tot Providentiæ , & Amoris sui argumenta cur toto Orbe , omniumque mortalium cordibus non hoc pendeat Edictum : *Ab hac die , de quacumq[ue] re dixerit Deus , credendum est illi .* Quid tuâ interest , quid Deus cum aliis fecerit : cur Luciferum , cur Saulem , cur Judam pessumire , damnarique permiserit ? hæc aliena & occulta sunt , nec ad te pertinent ; cogita potius quid tecum fecerit , ejusque Clementiam & Bonitatem ex iis metire , quæ tibi collata sunt ; nulla enim major probatio , quàm ex iis , quæ quisq[ue] expertus est . Deus ergo , cum nihil esses , fecit ut esses . Et cum posset te lapidem , aut bovem , aut pavonem condere , idque ingens beneficium erat (quis enim non malit lapis , aut pavo , quàm nihil esse) cum posset , inquam , te plantam , aut brutum facere , hominem te fecit rationali Animâ , & immortali præditum : quantumque malum est non sapere , & mori , tantum beneficium fuit Animâ rationali , mortisque victrice donatum esse . Deinde inter ipsos homines , quot sunt cæci , claudi , nani , surdi , mutique ? Nihil istorum , quæ tot millibus aliis contingere , contigit tibi . Tu natus inter Christianos , & Fideles , cum tot alii inter Barbaros , & Infideles . Tibi vestiendo , potando , cibando , curandoque omnia Elementa , totque creaturarum millia fatigantur . Quoties cecidisti , & ille erexit ? quoties errasti , & ille reduxit ? quoties deliquisti , & ille ignovit ? quoties reus mortis effectus , & ille pepercit ? taceo quodd tibi triginta tres annos amarissimè sudaverit , quodd tibi sanguinem fuderit non guttatim , & parcè , sed torrentis more , quodd tibi vitam inter dolores finierit , nullus ita Filium , aut Sponsam amavit , ut ille te . Taceo tot Sacramenta , tot remedia animæ tuæ procurata , tot voces è Cathedra , tot voces è libris , tot voces è cælo missas , inspiratasque tibi admonendo , eximendoque periculis . Et post tanta amoris ejus
indi-

indicia tu velut de re dubia, & peregrina quæris & disputas, an Deus sit bonus? an rebus humanis provideat, perinde ac si aliquis media hyeme frigens, tremensque, postquam diu ad ignem confedit, & calefactus est, soluto frigore, è sociis quærat, verumne sit, quod Philosophi docent, ignem homines calefacere? quid alios interrogas, quæ tu ipse expertus es? Noli ergo de Deo, ejusque Bonitate ex iis judicare, quæ Lucifero aliisque damnatis contingere, hæc enim sunt tibi incomperta, sed ex ijs, quæ tu ipse probasti.

Si Romam quatuor sint viæ, quarum tres optimæ, ab omnibus calcatæ, à te ipso centies emensæ, quæque in Urbem commodissime ducunt: quarta verò sit invia, præcipitiis, Latronibus obfessa, & quæ nemo pervenit, & tu hanc quartam eligas, quæ pessima est, tribus aliis relictis, quæ optimæ sunt; quis te non dementissimum credat? nam primò nunquam Romam pervenies, deinde certissimæ morti te expones. Ita illis evenit, qui ad Indias profecturi, cùm notum tritumque Navigantibus iter Austrum versùs reliquissent, in Septentrionem breviori cursu, sed funesto flexere, quippe omnes frigore consumpti sunt, navibus gelu constrictis. Ita prorsus in causa Prædestinationis. Quatuor ad illam cognoscendam viæ sunt: tres securissimæ; fides videlicet, Ratio, experientia. Fides docet, ratio demonstrat, experientia convincit, Deum in omnibus Judiciis suis justum, & clementem esse. Quod si his viis relictis tu quartam aggrediaris omnibus inaccessam; occultamque; hoc est, non fide, non ratione, non experientiâ contentus scrutari causas, & arcana velis, planè nunquam hæc viâ prevenies, & medio in cursu vitam, animamque amittes. Clamant omnes Patres, hæc navigari non posse, clamant omnium exempla: periire enim, quotquot hanc viam aggressi gelu & frigore confecti sunt, desperarunt infelices Religionis, Animæque naufragio facto.

Dices: voluntas Dei est tantum causa Universalis: atqui effectus particulares per solam causam universalem demonstrari non possunt, multoque minus dubium eximere: Nam si quærenti, cur nix sit alba, non nigra: cur pisces non respirent: cur Gallus cantet revertente Sole; cur Cervi & Boves dentes non habeant? Respondeas, Deum & Naturam ita statuisse; planè rideberis, eritque hæc Demonstratio rustico, quàm Philosopho dignior.

Resp. Aliqua esse, quæ optimè, imò unice per causam universalem demonstrantur, præsertim cùm causæ particulares latent, pend-

dentque ex libera Dei, hominumque voluntate. Si quis navi iter faciat, dubitetque an erret; sufficit omni dubio vincendo, si dicas: *Gubernator hanc viam imperavit, ergo in portum ducit*; præsertim si constet Gubernatorem esse peritissimum viæ, ac sapissimè illuc iter fecisse. Ita si sententia Mortis in aliquem dicta sit, quique processui non interfuit, dubitet æqua sit an iniqua? sufficiet respondere: Princeps examinata causâ ita decrevit, ergo sententia est iusta, præsertim si constet Principem esse iustissimum, & causæ, de qua agitur, scientissimum; talis verò est Deus. Pythagoricis loco omnis demonstrationis erat Pythagoræ auctoritas, sufficiebatque ambigentibus dicere: *αὐτὸς ἔφα: Ἦπε dixit*. Cur ergo Christianis non sit præ omni demonstratione Auctoritas Dei, sufficiatque finiendis omnibus litibus dixisse: *αὐτὸς ἐκέλευ: Ἦπε decrevit*? Nec ægrotus causas Medicinæ quærit; nec saucius causas emplastri; sufficit, ut credant, fidantque Medico imperanti. Duo ergo in re aliqua quæri possunt. *Primo* an sit? *Secundo* cur sit? v. g. de Gallo, an verum sit, ejus cantu Leonem fugari? Et quæ causa hujus terroris? ad primam quæstionem affirmativè decidendam sufficit auctoritas Plinii, aliorumque Scriptorum id asserentium, præsertim si accedat experientia, quæ tamen, cum errori obnoxia sint, non possunt me certum reddere. Idem dicas, majorique ratione de divinis Decretis, nam si quæras, an iusta sint? iusta esse optimè probatur autoritate, & æquitate ipsius Dei, qui cum erroris sit expers, me quoque certissimum reddit, nisi dicas ad fidem hominis faciendam plus valere auctoritatem Plinii, qui falli potest, quàm auctoritatem Dei, qui falli non potest. Quare autem Deus hoc, illudque decernat, id reconditum est, minusque sciri potest, quàm cur Leo cantu vilissimæ avis effaminetur.

Plura indagare non licet, pendente adhuc velo cœlestis tribunalis. Hæc ergo sit vera, & unica methodus philosophandi de divinis Judiciis, si videlicet credas: *Primo* ita esse secreta & abdita, ut cognosci, multoque minus ut accusari possint. *Secundo*. Multa etiam naturaliter contingere, quorum causas & rationes non assequimur, quanto minus assequemur causas & rationes rerum divinarum? Sed & in ipsis Dei operibus aliqua initio ambigua & dura videbantur, quæ iustissima in exitu apparuere; non ergo ante exitum, ultimamque sententiam de illis judicandum. *Tertio*. Et denique sit pro *universis rationibus Auctor & ordinator Deus*. Qui in Myſterio

L l

Præ-

Prædestinationis præter istas rationes alias quærit, is non portum, sed naufragium quærit, prius peribit, quàm perveniat.

Quod si tamen ne ista quidem sufficiant; more Areopagitarum tecum agam. Cùm ad istorum Tribunal causa deferretur tam implicata, ut pugnantis utrimque rationibus nullus exitus, nullusque modus appareret litem finiendi; partes reverti jubebant post centum annos. (a) Ita in negotio Prædestinationis: Si tibi quæ hæcenus dixi sufficiunt; digitum ori impone, causamque perora: Si non sufficiunt, exi Areopago: *Quod Deus facit, tu nescis modò, scies autem postea*, redi post centum annos.

FINIS.

(a) *Aul. Gellius l. 12. c. 7.*

COROLLARIUM DOCTORUM,

*Qui sententiam de Prædestinatione ex prævisis
meritis, & respectivè de mente SS. Au-
gustini, & Thomæ tuentur.*

S Bonaventura Cardinalis, & Ecclesiæ Doctor *in prim. dist. 40.
art. 2. q. 2. ad ult. & communiter citatur in prim. dist. 41. q. 2.
& alibi, ut videre est apud Gaudentium Bontempi Tom. 1. in
S. Bonav. tract. prim. disput. 21. q. 7. infra citandum.*

Eandem sententiam probant, & sequuntur

Cardinalis Sadoletus *in cap. 8. Epist. S. Pauli ad Romanos,*

Cardinalis Contarenus *in Opusc. de Prædestinat. quos citat, & sequi-
tur Claudius Frassen infra citandus.*

Cardinalis Petrus Aureolus Ordin. Min. quem Sixtus Senensis ap-
pellat *Virum omnium scientiarum peritia clarissimum, in Com-
ment. super quatuor lib. Sentent. Romæ Typis Vaticanis anno
1595. opera Constantii Cardinalis Sarnani Ord. Min. Convent.
impressis, lib. 1. dist. 40. art. 1. & dist. 41. art. 3.*

Ludovicus Abelly Sac. Theol. Parisiensis Doctor, & Episcopus Ru-
thenensis in Gallia, in *Medulla Theologica par. 1. tract. 2. cap. 5.
sect. 3. ubi etiam citatur*

Sanctus Franciscus Salesius Episcopus Genevensis *lib. 3. de amore
Dei cap. 5., & hujus Sanctissimi, ac Sapientissimi Episcopi extat
etiam Epistola ad Patrem Leonardum Lessium Societ. Jesu, da-
ta Anelli Gebennensium 27. Augusti 1618. cujus autographum
apud Patres Societatis in theca argentea Antuerpiæ asservatur, &
præ cæteris verbis ejusdem Epistolæ hæc maximè notanda sunt:
Sententia illa, inquit. antiquitate, suavitate, scripturarum nati-
va auctoritate nobilissima de Prædestinatione ad gloriam post prævisa
opera, sanè mihi gratissima fuit, qui nimirum eam semper ut Dei*

Ll 2

mise-

miseriordia, ac gratia magis consentaneam, veriore, ac amabiliorem exstimaui, quod etiam tantisper in Libello de amore Dei indicavi.

Honorius Augustodunensis Ecclesiæ Presbyter, qui circa annum Christi 1220. claruit, in *Dialogo de Prædestinat. & libero arbitr.* clarissimè docet prædestinationem post prævisa merita.

Alexander de Ales *prim. par. quæst. 28. memb. 3. art. 3.*

Henricus *quodlib. 4. q. 19. & quodlib. 8. q. 5.*

Gulielmus Occamus Anglus Ordin. Min. Scoti Discipulus in *prim. dist. 41. quæst. 1.*

Joannes Baconus in *prim. dist. 41. quæst. unic. art. 2.*

Ruardus Taperus *Tom. 1. explicat. Articulorum Lovaniensium pag. 240. & seqq.*

Joannes Major in *prim. dist. 40. & 41.*

Albertus Pighius *lib. 8. de liber. arbit. cap. 2.*

Hieronymus Oforius *lib. 9. de Justitia.*

Joannes Eckius in suo Chrysopasto *Cent. 3.*

Stapletonus in *cap. 9. Epist. ad Roman.* & in Oratione qua ex professio hanc sententiam defendit, probatque de mente S. Augustini.

Philippus Gamachæus Doctor Sorbonicus, & Regius Sac. Theologiæ Professor *coment. in prim. par. D. Thomæ quæst. 23. de Prædest. cap. 6. conclus. 2.* hanc sententiam probat ex mente ipsius S. Thomæ, Sanctorumque Augustini, Hieronymi, Ambrosii, & Prosperi.

Nicolaus Isambertus Doctor, & Socius Sorbonicus in Academia Parisiensi Regius Theologiæ Professor in *prim. par. D. Thomæ disp. 4. ad quæst. 23. art. 3.*

Gregorius de Valentia Soc. Jesu *disp. 1. q. 23. de Prædest. punct. 4.* ubi fusè probat prædestinationem ex prævisis meritis de mente SS. Augustini, & Thomæ.

Gabriel Vasquez Societatis Jesu, quem præstantissimus, omniumque nostræ hujus ætatis eruditissimus Auctor Dissertat. historicae *De uno ex Trinitate carne passo Romæ editæ an. 1695. pag. 115.* hocce exornat Elogio: *Gabriel Vasquez, ait, celeberrimus Theologus, Vir in Patrum lectione æquè, ac in scholastica palestra versatissimus. Et pag. 240. Vasquez magnus Theologus in lectione Patrum versatissimus, & eorum præsertim, qui de divina gratia sub Augustino Magistro scripserunt. Quis Theologus audit, qui Vasquii nomen summa cum*

cum laude non inaudiverit? Est ille Theologorum Societatis facile Princeps, licet unus Franciscus Suarez dubium illi facere primatum quibusdam visus sit. Is igitur præstantissimus Theologus Tom. 1. disput. 89. cap. 4. & seqq. non solum sententiam hanc de Prædestinatione ex meritis prævisis latissimè defendit, sed talem quoque fuisse veram, germanamque Augustini mentem satis superque per quatuor, & amplius capita ostendit; Unde sub initio capit. 4. ait: Tametsi aliorum Patrum auctoritas in omni controversia magni ponderis apud omnes esse debet; in hac tamen de qua nunc agitur, unus pro multis mihi semper erit Augustinus.

Leonardus Lessius Societ. Jesu Opusc. de Prædest. & reprob. sect. 2. eandem tenet sententiam, ab eoque alii non pauci Auctores citantur, & num. 8. subiungit -- *Eandem tenent multi viri Doctissimi, qui nondum sua scripta typis mandarunt, quibuscum ego hanc rem contuli. Hos omnes ex consilio adduxi, ut appereat, quantus in hoc puncto sit omnium penè Doctorem consensus.*

Martinus Beccanus Soc. Jesu par. 1. cap. 14. num. 4. de Prædestin. ubi pro hac sententia refert Theologos Academiae Complutensis.

Franciscus Amicus Soc. Jesu Tom. 1. disput. 15. sect. 4., qui longa serie alios refert pro hac sententia Theologos, num. 61. sensum suum aperit his verbis -- *Ut huic sententiæ assensum præberem, movit me misericors Dei erga omnes intellectuales creaturas affectus, & æqua in prædestinatos, ac reprobos pro eorum præstitis operibus iusta Judicis retributio.*

Molina ad quæst. 23. art. 5. disput. 1. memb. 11. & 12.

Franciscus Turrianus in lib. de Elect. divina, & Luisius Turrianus Disput. 1. Opusc. 6. dub. 4. & 5.

Michael de Medina lib. 3. de recta in Deum fide cap. 1.

Ægydius Coninch. disp. 20. de spe dub. 13. num. 119.

Cornelius à Lapide passim in Pauli Epistolas, & Maldonatus multis locis in Evangelia.

Pennottus Canonicus Regularis S. Augustini latissimè in Propugnaculo humanæ libert. lib. 9. cap. 21. & seqq.

Herice disput. 23. cap. 10.

Moncæus disput. 4. select. disputat.

Joannes Martinon Tom. 1. de Deo excuso an. 1644. disput. 19. n. 23. postquam innumeros penè Doctores retulit pro sententia afferente electionem ad gloriam fieri post prævisa merita, inquit -- *De-*
nig

nūq̃ communem esse Sanctorum Patrum, & Sacris litteris, atq̃ divinae aequitati, iustitiae, misericordiae, nec non humanae libertati, pietati, & zelo propriae, alienaeq̃ salutis conformiorem patebit ex sequentibus sectionibus.

Ortega tract. 2. de Deo Controv. 7. disput. 2. quæst. 3. Brefferus lib. 6. de Conscientia à num. 267. & Alarcon in omnibus sequens vestigia Patris Vasquez.

Thyrus Gonzalez Præpositus Generalis Soc. Jes. ac præstantissimus hujus Ævi Theologus Tom. 2. Select. Disput. disput. 8. sect. 11. ubi pro hac sententia sæpè allegat Augustinum, respondetq̃ Bellarmino, & aliis, qui oppositam docuerunt.

Petrus de Comitibus Augustinianus, olim in studiis sui Ordinis Veneto, Patavino, Perulino, Romanoq̃ Regens in Tract. de Prædestin. disput. 3. art. 2. expressè tenet electionem ad gloriam fieri ex præscientia meritorum, & artic. 4. ponit hanc conclusionem -- Electio post prævisionem meritorum nullomodo contrariatur S. Patri Augustino, imò est germana ejus doctrina; & post allatos quàmplures S. Augustini textus concludit in hæc verba -- Possè afferre sexcenta alia loca, ex quibus clarè deducitur, germanam doctrinam D. Augustini nunquam fuisse, quòd prædestinatio ad gloriam sit antè prævisa merita. Demum art. 8. docet S. Thomam etiam tenuisse hanc sententiam.

Gaudentius Bontempi Ordinis Capucinatorum Tom. 1. in Seraph. Bonavent. Tract. 1. de Deo Disput. 21. de Prædest. quæst. 7. hanc sententiam latissimè probat ex mente Seraphici Doctoris.

Sed licèt Scotus in prim. dist. 41. quæst. uni. contrarium defendat, tamen in hac controversia problematicum ostendit, dum ait ibi -- Ne scrutando de profundo eatur in profundum, eligatur, quæ magis placet. Hinc est quod multi ex celebrioribus Scotistis proprii Doctoris libertatem, validissimæq̃ pro altera sententia rationes nacti, prædestinationem fieri ex prævisis meritis, atq̃ adeo ex mente S. Augustini docuerunt.

Horum ducit agmen Philippus Faber Faventinus Conventualis, (quem Theologum verè doctum Lucas Wadingus de Scriptoribus Ordinis Minorum appellat,) in prim. sentent. dist. 41. quæst. 1. disput. 58. de Prædest. ubi de mente S. Augustini fusè probat Prædestinationem fieri post merita prævisa.

Joannes Poncius Hibernas Corcagiensis qui quatuor Tomis Coment. in

in Scotum edidit, Philosophiam, & cursum Theologicum aliis duobus Tomis prælo donavit *disput. 7. Cursus Theolog. quæst. 3.* hanc sententiam tuetur de mente S. Augustini.

Claudius Frassen Theologus Parisiensis in Patrum lectione versatissimus, atque optima eruditione excultus *Tom. 1. Scoti Academici tract. 2. disput. 3. art. 2. sect. 1. quæst. 2.* fusè hanc quæstionem pertractat, defenditque ex mente S. Augustini, eorumque discipulorum, & sequacium, Prosperi videlicet, Fulgentii, Primasii, Anselmi &c.

Joannes Gabriel Boyvin Gallus *Tom. 1. disput. 2. quæst. 8.* eam pariter tuetur de mente S. Augustini.

Bartholomæus Durand Gallus *Tom. 1. Tract. 5. disp. 1. quæst. 1.* probat ex mente S. Augustini, & Fulgentii prædestinationem fieri ex prævisis meritis.

Saxius in sua Catastrofi *Tom. 2. dist. 10. quæst. 3. art. 1.* Gauellus Candelariensis *Tom. 1. disput. 8.*, quibus adde Ferchium Vegliensem præstantissimum Theologum in Universitate Patavina in *Epitom. Theolog. lib. 1. sent. dist. 41.*

Omittimus alios eximios, præstantissimosque Theologos, qui pro hacce sententia scholastica in Palæstra decertarunt, cum ijs omnino perspicuos esse credamus, qui in Scholasticorum lectione versantur.

FINIS.

ERRATA.

| Pag. | lin. | 5. <i>precedentie</i> | lege <i>providentia</i> |
|------|------|------------------------|-------------------------|
| 16. | ult. | <i>careros</i> | <i>cateros</i> |
| 29. | 21. | <i>damatos</i> | <i>damnatos</i> |
| 38. | 34. | <i>sanitatem</i> | <i>sanitatem</i> |
| 53. | 7. | <i>Batholo</i> | <i>Bartolo</i> |
| 54. | 4. | <i>dolore</i> | <i>dolores</i> |
| 63. | 30. | <i>Apostolis</i> | <i>Apostoli</i> |
| 65. | 10. | <i>nos</i> | <i>non</i> |
| 74. | 28. | <i>Indæos</i> | <i>Judæos</i> |
| 82. | 36. | <i>oporet</i> | <i>oportet</i> |
| 83. | 36. | <i>pectum</i> | <i>peccatum</i> |
| 85. | 17. | <i>alibi</i> | <i>albi</i> |
| 86. | 34. | <i>Doctore</i> | <i>Doctorem</i> |
| 87. | 19. | <i>vinum</i> | <i>riuum</i> |
| 91. | 15. | <i>intelligi</i> | <i>intelligit</i> |
| 101. | 22. | <i>viam in die vie</i> | <i>iram in die iræ</i> |
| 103. | 20. | <i>hereditarem</i> | <i>hereditatem</i> |
| 109. | 37. | <i>Apostolico</i> | <i>Apostolo</i> |
| 112. | 26. | <i>aliis</i> | <i>alii</i> |
| 117. | 17. | <i>puris</i> | <i>Pueris</i> |
| 124. | 34. | <i>Angelicus</i> | <i>Anglicus</i> |
| 135. | 20. | <i>tam sive</i> | <i>sive tam</i> |
| 155. | 36. | <i>viginta</i> | <i>viginti</i> |
| 179. | 37. | <i>tamen</i> | <i>tam</i> |
| 180. | 37. | <i>Augustini</i> | <i>Gennadi</i> |
| 192. | 23. | <i>ego</i> | <i>ergo</i> |
| 207. | 13. | <i>per</i> | <i>pars</i> |
| 239. | 33. | <i>despetes</i> | <i>desperes</i> |
| 242. | 8. | <i>ne</i> | <i>me</i> |
| 270. | ult. | <i>Hibernas</i> | <i>Hibernus</i> |

Reliqua errata, si quæ occurrant, Lector benevolus emendare dignetur: non enim totum Librum attentius percurrere licuit post editionem, ut omnia annotarem.

005645976

